

॥ नमो तस्स भगवतो अरहतो सम्मासम्बुद्धस्स ॥

खुद्दकनिकाये

नेत्तिप्पकरण-टीका

गन्थारम्भकथावण्णना

संवण्णनारम्भे (दी० नि० टी० १.गन्थारम्भकथावण्णना; म० नि० टी० १.१ गन्थारम्भकथावण्णना; सं० नि० टी० १.१.१ गन्थारम्भकथावण्णना) रतनत्तयवन्दना संवण्णेत्तब्बस्स धम्मस्स पभवनिस्सयविसुद्धिपटिवेदनत्थं, तं पन धम्मसंवण्णनासु विञ्जूनं बहुमानुष्पादनत्थं, तं सम्मदेव तेसं उग्गहणधारणादिवक्कमलद्भब्बाय सम्मापटिपत्तिया सब्बहितसुखनिष्पादनत्थं । अथ वा मङ्गलभावतो, सब्बकिरियासु पुब्बकिच्चभावतो, पण्डितेहि सम्माचरितभावतो, आयतिं परेसं दिट्ठानुगतिआपज्जनतो च संवण्णनायं रतनत्तयपणामकिरिया । अथ वा रतनत्तयपणामकरणं पूजनीयपूजापुञ्जविसेसनिब्बत्तनत्थं, तं अत्तनो यथालब्धसम्पत्तिनिमित्तस्स कम्मस्स बलानुष्पदानत्थं, अन्तरा च तस्स असङ्कोचनत्थं, तदुभयं अनन्तरायेन अट्ठकथाय परिसमापनत्थं । इदमेव च पयोजनं आचरियेन इधाधिप्पेतं । तथा हि वक्खति “वन्दनाजनितं...पे०... तस्स तेजसा”ति । वत्थुत्तयपूजा हि निरतिसयपुञ्जक्खेत्तसम्बुद्धिया अपरिमेय्यप्पभावो पुञ्जातिसयोति बहुविधन्तरायेपि लोकसन्निवासे अन्तरायनिबन्धनसकलसंकिलेसविद्धंसनाय पहाति, भयादिउपद्ववच्च निवारति । यथाह —

“पूजारहे पूजयतो, बुद्धे यदि व सावके”ति ॥ (ध० प० १९५; अप० थेर १.१०.१) च,
तथा —

“ये, भिक्खवे, बुद्धे पसन्ना, अग्गे ते पसन्ना, अग्गे खो पन पसन्नानं अग्गो विपाको होती”ति (अ० नि० ४.३४; इतिवु० ९०) च,

तथा —

“‘बुद्धो’ति कित्तयन्तस्स, काये भवति या पीति ।
वरमेव हि सा पीति, कसिणेनपि जम्बुदीपस्स ।
“‘धम्मो’ति...पे०... ‘सङ्को’ति...पे०... दीपस्सा”ति ॥ (दी० नि० अट्ठ० १.६; इतिवु० अट्ठ ९०; दी० नि० टी० १.गन्थारम्भकथावण्णना; म० नि० टी० १.१; अ० नि० टी० २.४.३४) च,

तथा —

“यस्मिं, महानाम, समये अरियसावको तथागतं अनुस्सरति, नेवस्स तस्मिं समये रागपरियुद्धितं चित्तं होति,
न दोस...पे०... न मोहपरियुद्धितं चित्तं होती”ति (अ० नि० ६.१०; ११.११) च,

तथा —

“अरञ्जे रुक्खमूले वा... पे०... ।

भयं वा छम्भितत्तं वा, लोमहंसो न हेस्सती”ति ॥ (सं० नि० १.२४९) च ।

तत्थ यस्स रतनत्तयस्स वन्दनं कत्तुकामो, तस्स गुणातिसययोगसन्दस्सनत्थं “महाकारुणिक”न्तिआदिना गाथात्तयमाह । गुणातिसययोगेन हि वन्दनारहभावो, वन्दनारहे च कता वन्दना यथाधिप्पेतप्पयोजनं साधेतीति । तत्थ यस्सा संवण्णनं कत्तुकामो, सा नेत्ति विसेसतो यथानुलोमसासनसन्निस्सया, तस्स च विचित्ताकारप्पवत्तिविभाविनी । तथा हि सुत्तन्तदेसना न विनयदेसना विय करुणाप्पधाना, नापि अभिधम्मदेसना विय पज्जाप्पधाना, अथ खो करुणापज्जाप्पधानाति तदुभयप्पधानदेसनाविसेसविभावनं ताव सम्मासम्बुद्धस्स थोमनं कातुं तम्मूलकत्ता सेसरतनानं “महाकारुणिकं नाथ”न्तिआदि वुत्तं ।

तत्थ किरतीति (दी० नि० टी० १.गन्थारम्भकथावण्णना; म० नि० टी० १.१; सं० नि० टी० १.१.१; अ० नि० टी० १.१.१) करुणा, परदुक्खं विक्खिपति अपनेतीति अत्थो । अथ वा किणातीति करुणा, परदुक्खे सति कारुणिकं हिंसति विबाधतीति अत्थो । कम्पनं करोतीति वा करुणा, परदुक्खे सति साधून् हृदयखेदं करोतीति अत्थो । कमिति वा सुखं, तं रुन्धतीति करुणा । एसा हि परदुक्खापनयनकामतालक्खणा, अत्तसुखनिरपेक्खताय कारुणिकानं सुखं रुन्धति विबन्धतीति अत्थो । किरियति दुक्खितेसु पसारियतीति वा करुणा, करुणाय नियुत्तोति कारुणिको यथा “दोवारिको”ति (अ० नि० ७.६७) । यथा हि द्वारद्वानतो अज्जत्थ वत्तमानोपि द्वारपटिबद्धजीविको पुरिसो द्वारानतिवत्तवुत्तिताय द्वारे नियुत्तोति “दोवारिको”ति वुच्चति, एवं भगवा मेत्तादिवसेन करुणाविहारतो अज्जत्थ वत्तमानोपि करुणानतिवत्तवुत्तिताय करुणाय नियुत्तोति “कारुणिको”ति वुच्चति । महाभिनीहारतो पट्टाय हि याव महापरिनिब्बाना लोकहितत्थमेव लोकनाथा तिट्ठन्तीति । महन्तो कारुणिकोति महाकारुणिको । सतिपि भगवतो तदज्जगुणानम्पि वसेन महन्तभावे कारुणिकसद्वसन्निधानेन वुत्तत्ता करुणावसेनेवेत्थ महन्तभावो वेदितब्बो यथा “महावेय्याकरणो”ति । एवञ्च कत्वा “महाकारुणिको”ति इमिना पदेन पुग्गलाधिद्वानेन सत्थु महाकरुणा वुत्ता होति ।

अपरो नयो — अत्थसाधनतो करुणं करुणायनं करुणासम्पवत्तनं अरहतीति कारुणिको । भगवतो हि सब्बज्जुताय अनवसेसतो सत्तानं हितं, हितुपायञ्च जानतो, तत्थ च अकिलासुनो हितेसिता सत्थिका, न तथा अज्जेसन्ति । अथ वा करुणा करुणायनं सीलं पकति सभावो एतस्साति कारुणिको । भगवा हि पथवीफस्सादयो विय कक्खळफुसनादिसभावा करुणासभावो सभावभूतकरुणोति अत्थो । सेसं पुरिमसदिसमेव । अथ वा महाविसयताय, महानुभावताय, महप्फलताय च महती करुणाति महाकरुणा । भगवतो हि करुणा निरवसेसेसु सत्तेसु पवत्तति, पवत्तमाना च अनज्जसाधारणा पवत्तति, दिट्ठधम्मिकादिभेदञ्च महन्तमेव सत्तानं हितसुखं एकन्ततो निष्फादेति, महाकरुणाय नियुत्तोति महाकारुणिको, तं महाकारुणिकं । सेसं सब्बं वुत्तनयेनेव वेदितब्बं । सुमागधादिपदानं विय चेत्य सद्वसिद्धि वेदितब्बा ।

नाथतीति नाथो, वेनेय्यानं हितसुखं आसीसति पत्थेतीति अत्थो, मेत्तायनवसेन चेत्य हितसुखासीसनं वेदितब्बं, न करुणायनवसेन पठमपदेन वुत्तत्ता । अथ वा नाथति वेनेय्यगतं किलेसब्बसनं उपतापेतीति नाथो, नाथतीति वा नाथो, याचतीति अत्थो । भगवा हि “साधु, भिक्खवे, भिक्खु कालेन कालं अत्तसम्पत्तिं पच्चवेक्खिता”तिआदिना (अ० नि० ८.७, ८) सत्तानं तं तं हितप्पटिपत्तिं याचित्वापि महाकरुणाय समुस्साहितो ते तत्थ नियोजेति । परमेन वा चित्तिस्सरियेन समन्नागतो, सब्बसत्ते वा सीलादिगुणेहि ईसति अभिभवतीति परमिस्सरो भगवा “नाथो”ति वुच्चति, तं नाथं ।

जातब्बन्ति जेय्यं, अतीतादिभेदभिन्नं सब्बं सङ्कतं, असङ्कतञ्च । सङ्गरणट्टेन सागरो, पतितपतितानं अत्तनो पुथुलगम्भीरभावोहि संसीदनं निम्मुज्जनं करोतीति अत्थो । सं-सदस्स चेत्थ “साभावो, सारागो”ति आदीसु (ध० स० ३८९, ३९१) विय निरुत्तिनयेन दट्ठब्बो । सङ्गरणट्टेनाति वा सङ्गरकरणट्टेन, ठितधम्मताय “अयं मे मरियादा, इमं वेलं नातिक्कमामी”ति लोकेन सङ्गरं सङ्केतं करोन्तो विय होतीति अत्थो । सङ्गरणं वा समन्ततो गलनं सन्दनं उदकेन करोतीति सागरो । कप्पवुट्टानकाले हि महासमुदो इतो चितो च पग्घरित्वा सकलं लोकधातुं एकोघं करोतीति । लोकिया पन वदन्ति “सागरस्स रज्जो पुत्तेहि सागरेहि निब्बत्तितो खतोति सागरो, पुरत्थिमो समुदप्पदेसो, तंसम्बन्धताय रुळ्हवसेन सब्बोपि समुदो तथा वोहरीयती”ति । सागरसदिसत्ता सागरो, जेय्यमेव सागरोति जेय्यसागरो । सदिसत्ता चेत्थ पुथुलदुत्तरगम्भीरानादिकालिकताहि वेदितब्बा, निहीनं चेतमोपम्मं । तथा हि जेय्यस्सेव सातिसया पुथुलता अपरिमाणलोकधातुब्यापनतो, सब्बञ्जुतज्जाणस्सेव तरणीयताय दुत्तरता, गम्भीरता, आदिकोटरहिता च पवत्ति, न इतरस्स परिच्छिन्नदेसत्ता बाहिरकवीतरागेहिपि इत्तरेन खणेन अतिक्कमितब्बत्ता, परिमितगम्भीरत्ता, परिमितकालत्ता च । जेय्यसागरस्स पारं परियन्तं गतोति जेय्यसागरपारगू, तं जेय्यसागरपारगुं ।

गमनञ्चेत्थ जाणगमनमेव, न इतरं जेय्यगगहनतो, तं पन जाणं दुविधं सम्मसनपटिवेधभेदतो, तथा हेतुफलभेदतो । तत्थ “किच्छं वतायं लोको आपन्नो”ति आदिना (दी० नि० २.५७; सं० नि० २.४, १०; पेटको० २३) करुणायनवसेनेव अभिनिविसित्वा अनेकाकारवोकारे सङ्घारे सम्मसन्तं भगवतो सम्मसनजाणं छत्तिसकोटिसतसहस्समुखेन जेय्यसागरं अज्झोगाहेत्वा तस्स पारं परियन्तं अगमासि, यं “महावजिरजाण”न्ति वुच्चति । पटिवेधजाणं पन सब्बञ्जुतज्जाणपदट्टानं आसवक्खयजाणं, आसवक्खयजाणपदट्टानञ्च सब्बञ्जुतज्जाणं, यं “महाबोधी”ति वुच्चति । पारगमनञ्च तस्स किच्चसिद्धिया, समत्थताय च वेदितब्बं । तथा यथावुत्तं सम्मसनजाणं हेतु, इतरं फलं । सह सम्मसनजाणेन वा आसवक्खयजाणं हेतु, सब्बञ्जुतज्जाणं फलं तदानिसंभावतोति वेदितब्बं ।

वन्देति नमामि, अभित्थवामि वा । सण्हट्टेन निपुणा, अनुपचितजाणसम्भारानं अगाधट्टेन गम्भीरा, एकत्तादिभेदतो नन्दियावट्टादिविभागतो च विचित्रा विसिट्ठा नानाविधा नया एतिस्साति निपुणगम्भीरविचित्रनया, निपुणगम्भीरविचित्रनया देसना अस्साति निपुणगम्भीरविचित्रनयदेसनो, तं निपुण...पे०... देसनं । नयतीति वा नयो, पाळिगति, सा च वुत्तनयेन अत्थतो निपुणा, अत्थतो व्यञ्जनतो च गम्भीरा, सङ्घेपवित्थारानुलोमादिप्पवत्तिया नानाविधताय विचित्रा । तथा हि पञ्चत्तिअनुपञ्चत्तिआदिवसेन, संकिलेसभागियादिलोकियादितदुभयवोमिस्सतादिवसेन, कुसलादिखन्धादिसङ्गहादिसमयविमुत्तादिठपनादिकुसलमूलादितिकपट्टानादिवसेन च अनेकविधा पाळिगतीति ।

तत्थ (दी० नि० टी० १. गन्थारम्भकथावण्णना) द्वीहाकारेहि भगवतो थोमना वेदितब्बा अत्तहितसम्पत्तितो, परहितप्पटिपत्तितो च । तेसु अत्तहितसम्पत्ति अनावरणजाणाधिगमतो, सवासनानं सब्बेसं किलेसानं अच्चन्तप्पहानतो च वेदितब्बा, परहितप्पटिपत्ति लाभसक्कारादिनिरपेक्खचित्तस्स सब्बदुक्खनिय्यानिकधम्मदेसनतो, पटिविरुद्धेसुपि निच्चं हितज्झासयजाणपरिपाककालागमनतो च वेदितब्बा । सा पनेत्थ पयोगतो, आसयतो च दुविधा, परहितप्पटिपत्ति, यथावुत्तभेदा दुविधा च अत्तहितसम्पत्ति पकासिता होति । कथं? “महाकारुणिक”न्ति इमिना आसयतो, “निपुण...पे०... देसन”न्ति इमिना पयोगतो, “नाथ”न्ति इमिना पन उभयथापि भगवतो परहितप्पटिपत्ति पकासिता करुणाकिच्चदीपनतो, “जेय्यसागरपारगु”न्ति इमिना सातिसयं अत्तहितसम्पत्ति परमुक्कंसगतजाणकिच्चदीपनतो ।

अथ वा तीहाकारेहि भगवतो थोमना वेदितब्बा हेतुतो, फलतो, उपकारतो च । तत्थ हेतु महाकरुणा, सा पन

पठमपदेन सरूपेनेव दस्सिता । फलं चतुब्बिधं जाणसम्पदा प्हानसम्पदा आनुभावसम्पदा रूपकायसम्पदा चाति । तासु पधानभूता जाणपहानसम्पदा “जेय्यसागरपारगु”न्ति इमिना पदेन पकासिता । पधाने हि दस्सिते अविनाभावतो इतरम्पि द्वयं दस्सितमेव होति । न हि बुद्धानं आनुभावरूपकायसम्पत्तीहि विना कदाचिपि धम्मकायसिरी वत्ततीति । उपकारो अनन्तरं अबहिरं कत्वा तिविधयानमुखेन विमुत्तिधम्मदेसना, सा “नाथं, निपुण...पे०... देसन”न्ति पदद्वयेन पकासिताति वेदितब्बं ।

तत्थ (दी० नि० टी० १.गन्थारम्भकथावण्णना) “महाकारुणिक”न्ति एतेन सम्मासम्बोधिया मूलं दस्सेति । महाकरुणासञ्चोदितमानसो हि भगवा संसारपङ्कतो सत्तानं समुद्धरणत्थं कताभिनीहारो अनुपुब्बेन पारमियो पूरेत्वा अनुत्तरं सम्मासम्बोधिं अधिगतोति करुणा सम्मासम्बोधिया मूलं । “जेय्यसागरपारगु”न्ति एतेन पुब्बभागपटिपत्तिया सद्धिं सम्मासम्बोधिं दस्सेति । अनावरणजाणपदद्वानज्झि मग्गजाणं, मग्गजाणपदद्वानञ्च अनावरणजाणं “सम्मासम्बोधी”ति वुच्चति । वुत्तप्पभेदं पन सम्मसनजाणं सह पञ्जापारमिया तस्सा पुब्बभागपटिपदा । तस्सा हि आनुभावेन लीनुद्धच्चपटिद्वानायूहनकामसुखल्लिकतकिलमथानुयोगसस्सतुच्छेदादिअन्तद्वयविरहिता उक्कंसपारमिप्पत्ता मज्झिमा पटिपदा भावनापारिपूरिं गता । “नाथ”न्ति इमिना सम्मासम्बोधिया फलं दस्सेति लोकत्तयनायकभावदीपनतो । तथा हि सब्बानत्थपरिहारपुब्बङ्गमाय निरवसेसहितसुखविधानतप्पराय निरतिसयाय पयोगसम्पत्तिया, सदेवमनुस्साय पजाय अच्चन्तुपकारिताय अपरिमितनिरुपमभावगुणविसेससमङ्गिताय च सब्बसत्तुत्तमो भगवा अपरिमाणासु लोकधातूसु अपरिमाणानं सत्तानं अनुत्तरगारवद्वानभूतताय च “नाथो”ति वुच्चतीति । “निपुण...पे०... देसन”न्ति इमिना सम्मासम्बोधिया पयोजनं दस्सेति । संसारमहोघतो सत्तसन्तारणत्थज्झि भगवता सम्मासम्बोधि अभिपत्थिता, तञ्च सत्तसन्तारणं यथावुत्तदेसनासम्पत्तिया समिज्झति तदविनाभावतो । इमिना भगवतो सातिसया परहितप्पटिपत्ति दस्सिता, इतरेहि अत्तहितसम्पत्तीति तदुभयेन अत्तहिताय पटिपन्नादीसु चतूसु पुगलेसु भगवतो चतुत्थपुगलभावं दीपेति, तेन च अनुत्तरदक्खिण्येय्यभावं, उत्तमवन्दनीयभावं, अत्तनो च वन्दनकिरियाय खेत्तङ्गतभावं दीपेति ।

एत्थ च यथा “महाकारुणिक”न्ति इमिना पदेन भगवतो महाकरुणा दस्सिता, एवं “जेय्यसागरपारगु”न्ति एतेन महापञ्जा दस्सिता । तेसु करुणागहणेन लोकियेसु महग्गतभावप्पत्तासाधारणगुणदीपनतो भगवतो सब्बलोकियगुणसम्पत्ति दस्सिता होति, पञ्जागहणेन सब्बञ्जुतञ्जाणपदद्वानमग्गजाणदीपनतो सब्बलोकुत्तरगुणसम्पत्ति । तदुभयगहणसिद्धो एव चत्थो नाथसद्देन पकासीयति । करुणावचनेन उपगमनं निरुपक्विकलेसं दस्सेति, पञ्जावचनेन अपगमनं । तथा करुणागहणेन लोकसमञ्जानुरूपं भगवतो पवत्तिं दस्सेति लोकवोहारविसयत्ता करुणाय, पञ्जागहणेन समञ्जाय अनतिधावनं । सभावानवबोधेन हि धम्मनं समञ्जं अतिधावित्वा सत्तादिसम्मसनं होतीति । तथा करुणागहणेन महाकरुणासमापत्तिविहारं दस्सेति, पञ्जागहणेन तीसु कालेसु अप्पटिहतजाणं, चतुसच्चजाणं, चतुपटिसम्भिदाजाणं, चतुवेसारज्जजाणं । करुणागहणेन महाकरुणासमापत्तिजाणस्स गहितत्ता सेसासाधारणजाणानि, छ अभिञ्जा, अट्टसु परिसासु (म० नि० १.१५१, १७८) अकम्पनजाणानि, दस बलानि, चुदस बुद्धजाणानि, सोळस जाणचरिया, अट्टारस बुद्धधम्मा (महानि० ६९, १५६; चूळनि० मोघराजमाणवपुच्छनिद्देस ८५; पटि० म० ३.५; दी० नि० अट्ट० ३.३०५; विभ० मूलटी० सुत्तन्तभाजनीयवण्णना; दी० नि० टी० ३.१४१), चतुचत्तालीस जाणवत्थूनि सत्तसत्तति जाणवत्थूनीति (सं० नि० २.३४) एवमादीनं अनेकेसं पञ्जाप्पभेदानं वसेन जाणचारं दस्सेति ।

तथा करुणागहणेन चरणसम्पत्ति, पञ्जागहणेन विज्जासम्पत्ति । करुणागहणेन सत्ताधिपतिता, पञ्जागहणेन धम्माधिपतिता । करुणागहणेन लोकनाथभावो, पञ्जागहणेन अत्तनाथभावो । तथा करुणागहणेन पुब्बकारिभावो,

पञ्चागहणेन कतञ्जुता । करुणागहणेन अपरन्तपता, पञ्चागहणेन अनन्तपता । करुणागहणेन वा बुद्धकरधम्मसिद्धि, पञ्चागहणेन बुद्धभावसिद्धि । तथा करुणागहणेन परेसं तारणं, पञ्चागहणेन सयं तारणं । तथा करुणागहणेन सब्बसत्तेसु अनुगहचित्तता, पञ्चागहणेन सब्बधम्मसु विरत्तचित्तता दस्सिता होति । सब्बेसञ्च बुद्धगुणानं करुणा आदि तंनिदानभावतो, पञ्चा परियोसानं ततो उत्तरि करणीयाभावतो, इति आदिपरियोसानदस्सनेन सब्बे बुद्धगुणा दस्सिता होन्ति । तथा करुणावचनेन सीलक्खन्धपुब्बङ्गमो समाधिक्खन्धो दस्सितो होति । करुणानिदानञ्चि सीलं ततो पाणातिपातादिविरतिप्पवत्तितो, सा च ज्ञानत्तयसम्पयोगिनीति । पञ्चावचनेन पञ्चाक्खन्धो । सीलञ्च सब्बबुद्धगुणानं आदि, समाधि मज्जे, पञ्चा परियोसानन्ति एवम्पि आदिमज्झपरियोसानकल्याणा सब्बे बुद्धगुणा दस्सिता होन्ति नयतो दस्सितत्ता । एसो एव हि निरवसेसतो बुद्धगुणानं दस्सनुपायो, यदिदं नयगाहणं, अञ्जथा को नाम समत्थो भगवतो गुणे अनुपदं निरवसेसतो दस्सेतुं । तेनेवाह —

“बुद्धोपि बुद्धस्स भण्येय वण्णं, कप्पम्पि चे अञ्जमभासमानो ।

खीयेथ कप्पो चिरदीघमन्तरे, वण्णो न खीयेथ तथागतस्सा”ति ॥ (दी० नि० अट्ठ० १.३०४; ३.१४१; म० नि० अट्ठ० ३.४२५; उदा० अट्ठ० ५३; अप० अट्ठ० २.७.२०; बु० वं० अट्ठ० ४.४; चरिया० अट्ठ० निदानकथा, पकिण्णककथा; दी० नि० टी० १.गन्थारम्भकथावण्णना; म० नि० टी० १.१; सं० नि० टी० १.१.१; अ० नि० टी० १.१.१; वजिर० टी० गन्थारम्भकथा; सारत्थ० टी० १.गन्थारम्भकथावण्णना) ।

तेनेव च आयस्मता सारिपुत्तत्थेरेनापि बुद्धगुणपरिच्छेदनं पति अनुयुत्तेन “नो हेतं, भन्ते”ति (दी० नि० २.१४५) पटिक्खपित्वा “अपिच मे, भन्ते, धम्मन्वयो विदितो”ति (दी० नि० २.१४६) वुत्तं ।

एवं सङ्खेपेन सकलसब्बञ्जुगुणेहि भगवन्तं अभित्थवित्वा इदानीं सद्धम्मं थोमेतुं

“**विज्जाचरणसम्पन्ना**”ति आदिमाह । तत्थ विज्जाचरणसम्पन्ना हुत्वाति वचनसेसो । विन्दियं धम्मानं सलक्खणं, सामञ्जलक्खणञ्च विन्दतीति **विज्जा**, लोभक्खन्धादीनि वा विज्झनट्टेन **विज्जा**, चतुन्नं वा अरियसच्चानं विदितकरणट्टेन **विज्जा**ति एवं तावेत्थ वचनत्थतो विज्जा वेदितब्बा । पभेदतो पन तिस्सोपि विज्जा **विज्जा भयभेरवसुत्ते** आगतनियामेनेव, अट्ठपि विज्जा **विज्जा अम्बट्टसुत्तादीसु** (दी० नि० १.२७८ आदयो) आगतनियामेनेव । चरन्ति तेहीति **चरणानि**, सीलसंवरादयो पञ्चदस धम्मा, इति इमाहि विज्जाहि, इमेहि च चरणेहि सम्पन्ना सम्पन्नागताति **विज्जाचरणसम्पन्ना** ।

येनाति येन धम्मेन करणभूतेन, हेतुभूतेन च । तत्थ मग्गधम्मस्स करणत्थो वेदितब्बो

निय्यानकिरियासाधकतमभावतो, निब्बानधम्मस्स हेतुअत्थो आरम्मणपच्चयभावतो । पच्चयत्थो हि अयं हेत्वत्थो । परियत्तिधम्मस्सपि हेतुअत्थो युज्जतेव परम्पराय हेतुभावतो । फलधम्मे पन उभयम्पि सम्भवति । कथं? “ताय सद्धाय अवूपसन्ताया”ति वचनतो मग्गेन समुच्छिन्नानं किलेसानं पटिप्पस्सद्धिप्पहानकिच्चताय फलस्स निय्यानानुगुणता, निय्यानपरियोसानता चाति इमिना परियायेन सिया करणत्थो निय्यानकिरियाय । सकदागामिमग्गविपस्सनादीनं पन उपनिस्सयपच्चयभावतो सिया हेतुअत्थो । एवञ्च कत्वा **अग्गप्पसादसुत्तादीसु** (इतिवु० ९०) अग्गादिभावेन अग्गहितापि फलपरियत्तिधम्मा **छत्तमाणवकविमानादीसु** (वि० व० ८८६ आदयो) सरणीयभावेन गहिताति तेसं मग्गनिब्बानानं विय महाअट्ठकथायं सरणभावो उद्धटो । विसेसतो चेत्थ मग्गपरियापन्ना एव विज्जाचरणधम्मा वेदितब्बा । ते हि निप्परियायेन निय्यानकिरियाय साधकतमभूता, न इतरे । इतरेसं पन निय्यानत्थताय निय्यानता । यदि एवं कस्मा “विज्जाचरणसम्पन्ना

हुत्वा”ति वुत्तं, निव्यानसमकालमेव हि यथावुत्तविज्जाचरणसम्पत्तिसमधिगमोति? नायं विरोधो समानकालताय एव अधिप्पेतत्ता यथा “चक्खुज्ज पटिच्च रूपे च उप्पज्जति चक्खुविज्जाण”न्ति (म० नि० १.२०४, ४००; ३.४२१, ४२५, ४२६; सं० नि० २.४३-४५; ४.६०; कथा० ४६५, ४६७)। **सम्पन्ना**ति वा पदस्स वत्तमानकालत्थता वेदितब्बा “उप्पन्ना धम्मा”ति (ध० सं० तिकमातिका १७) एत्थ उप्पन्नसदस्स विय। एवञ्च कत्वा वचनसेसमन्तरेनेव पदयोजना सिद्धा होति। “येना”ति च पदं उभयत्थ सम्बन्धितब्बं “येन धम्मेन विज्जाचरणसम्पन्ना, येन धम्मेन निव्यन्ती”ति।

लोकतोति खन्धादिलोकतो, वट्टतोति अत्थो। न्ति तं मग्गनिब्बानफलपरियत्तिभेदं धम्मं। **उत्तमन्ति** सेट्ठं। तथा हेस अत्तना उत्तरितरस्स अभावेन “अनुत्तरो”ति वुच्चति। तत्थ मग्गस्स निव्यानहेतुआदिअत्थेन, निब्बानस्स निस्सरणविवेकादिअत्थेन, फलस्स अरियसन्तभावादिअत्थेन च सेट्ठता वेदितब्बा। स्वायमत्थो “यावता, भिक्खवे, धम्मा सङ्गता, अरियो अट्ठङ्गिको मग्गो तेसं अग्गमक्खायती”ति (इतिवु० ९०; अ० नि० ४.३४) आदिसुत्तपदानुसारेण विभावेतब्बो।

धम्मन्ति यथानुसिद्धं पटिपज्जमाने अपायतो, संसारतो च अपतमाने कत्वा धारेतीति **धम्मो**। सम्मा, सामञ्च सब्बधम्मानं बुद्धत्ता **सम्मासम्बुद्धो**, सब्बज्जुताअनावरणजाणो समन्तचक्खु भगवा, तेन यथा सम्मासम्बोधिसमधिगमेनेव सब्बे बुद्धगुणा सम्मापुणीयन्ति, एवं सम्मदेव आसेवनाय भावनाय बहुलीकरियाय सम्मापटिपत्तिया सम्मदेव पच्चवेक्खणाय सक्कच्चं धम्मदेसनाय वेनेय्यसन्तानेसु पतिट्ठापनेन —

“अरियं, वो भिक्खवे, सम्मासमाधिं देसेस्सामि (म० नि० ३.१३६; पेटको० २४)। मग्गानट्ठङ्गिको सेट्ठो (ध० प० २७३; नेत्ति० १७०; पेटको० ३०)। यावता, भिक्खवे, धम्मा सङ्गता वा असङ्गता वा, विरागो तेसं अग्गमक्खायति (इतिवु० ९०; अ० नि० ४.३४)। एकायनो अयं, भिक्खवे, मग्गो सत्तानं विसुद्धिया (दी० नि० २.३७३; म० नि० १.१०६; सं० नि० ५.३६७, ३८४)। धम्मं, वो भिक्खवे, देसेस्सामि आदिकल्याण”न्ति (म० नि० ३.४२०; नेत्ति० ५) —

आदिवचनेहि, अभित्थवनेन च पूजितो मानितो अपचितोति **सम्मासम्बुद्धपूजितो**, तं सम्मासम्बुद्धपूजितं धम्मं वन्देति सम्बन्धो।

अयं पनेत्थ सङ्खेपत्थो — यस्स धम्मस्स अधिगमने विज्जासम्पन्ना चेव होन्ति चरणसम्पन्ना च, सब्बवट्टदुक्खतो च निव्यन्ति, तमेव अरियानं सकलगुणसमङ्गिभावनिमित्तं, अनवसेसदुक्खनिस्सरणहेतुभूतञ्च उत्तमं पवरं सद्धिं परियत्तिधम्मेन नवविधं लोकोत्तरधम्मं भगवतापि सम्मापटिपत्तिआदिविधिना पूजितं नमामि, अभित्थवामि वाति।

एत्थ च “येन लोकतो निव्यन्ति, विज्जाचरणसम्पन्ना च होन्ती”ति पदद्वयेन यथाक्कमं धम्मस्स भावेतब्बभावो, सच्छिकातब्बभावो च वुत्तो। तेसु पठमेन विज्जासम्पत्तिया धम्मं थोमेति, दुतियेन विमुत्तिसम्पत्तिया। तथा पठमेन ज्ञानसम्पदाय, दुतियेन विमोक्खसम्पदाय। पठमेन वा समाधिसम्पदाय, दुतियेन समापत्तिसम्पदाय। पठमेन वा खयजाणभावेन, दुतियेन अनुप्पादजाणभावेन। अथ वा पुरिमेन विज्जूपमताय, दुतियेन वजिरूपमताय। पुरिमेन वा विरागसम्पत्तिया, दुतियेन निरोधसम्पत्तिया। तथा पठमेन निव्यानभावेन, दुतियेन निस्सरणभावेन। पठमेन वा हेतुभावेन, दुतियेन असङ्गताभावेन। पठमेन वा दस्सनभावेन, दुतियेन विवेकभावेन। पठमेन वा अधिपतिभावेन, दुतियेन अमतभावेन धम्मं थोमेति। अथ वा पठमेन निव्यानिकभावदस्सनतो स्वाक्खातताय धम्मं थोमेति, दुतियेन सच्छिकातब्बभावतो

सन्दिद्धिकताय । तथा पुरिमेन अकालिकताय, पच्छिमेन एहिपस्सिकताय । पुरिमेन वा ओपनेय्यिकताय, पच्छिमेन पच्चत्तं वेदितब्बताय धम्मं थोमेति ।

“उत्तम”न्ति च एतेन अञ्जस्स विसिद्धस्स अभावदीपनेन परिपुण्णताय धम्मं थोमेति, “सम्मासम्बुद्धपूजित”न्ति एतेन परिसुद्धताय । सब्बदोसापगमेन हिस्स पूजनीयता । परिसुद्धताय चस्स पहानसम्पदा, परिपुण्णताय पभवसम्पदा । पहानसम्पत्तिया च भावनापारिपूरी अनवसेसदोससमुग्घाटनतो, पभवसम्पत्तिया सच्छिकिरियनिब्बत्ति ततुत्तरि करणीयाभावतो । अनञ्जसाधारणताय हि उत्तमोति । तथा भावेतब्बभावेनस्स सह पुब्बभागसीलादीहि सेक्खा सीलसमाधिपञ्जाक्खन्धा, सच्छिकातब्बभावेन सह असङ्गताय धातुया असेक्खा सीलसमाधिपञ्जाक्खन्धा दस्सिता होन्तीति ।

एवं सङ्खेपेन सब्बसद्धम्मगुणेहि सद्धम्मं थोमेत्वा इदानीं अरियसङ्घं थोमेतुं “सीलादिगुणसम्पन्नो”ति आदि वुत्तं । तत्थ सीलादिगुणसम्पन्नोति सीलसमाधिपञ्जाविमुत्तियादिगुणेहि सम्पन्नो समन्नागतो, सम्पन्नसीलादिगुणो वा । अरियानञ्जि तंतंमगवज्झकिलेसप्पहानेन हतपटिपक्खा सुविसुद्धा सीलादयो “सम्पन्ना”ति वत्तब्बतं अरहन्ति, न पुथुज्जनानं, यतो “सुप्पटिपन्नो”ति आदिना (म० नि० १.७४; अ० नि० ६.१०; उदा० १८) अरियसङ्घो थोमीयति । अथ वा सीलादिगुणसम्पन्नोति परिपुण्णसीलादिगुणो । अरियपुग्गलानञ्जि अरियसच्चप्पटिवेधेन सहेव यथारहं सेक्खासेक्खा सीलादिधम्मक्खन्धा पारिपूरिं गच्छन्तीति । ठितो मग्गफलेसूति मग्गेसु, फलेसु च ठितो, मग्गट्ठो, फलट्ठो चाति अत्थो । योति अनियमतो अरियसङ्घं निद्विसति, तस्स “त”न्ति इमिना नियमं वेदितब्बं ।

ननु च अरियसङ्घे न सब्बे अरियपुग्गला मग्गट्ठा, नापि सब्बे फलट्ठाति? सच्चमेतं, अवयवधम्मेन पन समुदायं निद्विसन्तो एवमाह यथा “समं चुण्ण”न्ति । यथा हि योगचुण्णस्स अवयवेसु लब्भमानो समभावो समुदाये अपदिसीयति “समं चुण्ण”न्ति, एवं अरियसङ्घस्स अवयवभूतेसु अरियपुग्गलेसु लब्भमानो मग्गट्ठफलट्ठभावो समुदायभूते अरियसङ्घे ठितो “मग्गफलेसू”ति अपदिट्ठोति वेदितब्बं ।

आरकत्ता किलेसेहि, अनये न इरियनतो, अये च इरियनतो, सदेवकेन च लोकेन “सरण”न्ति अरणीयतो अरियो, दिट्ठिसीलसामञ्जेन संहतत्ता सङ्घो, अरियो च सो सङ्घो चाति अरियसङ्घो, तं अरियसङ्घं । पुज्जभवफलनिब्बत्तनतो अत्तनो सन्तानं पुनातीति वा पुज्जं, खित्तं वुत्तं बीजं विरुहनट्टानताय तायति रक्खतीति खेत्तं केदारादि, खेत्तं वियाति खेत्तं, सत्तानं पुज्जस्स महप्फलभावकरणेन विरुहनट्टानताय खेत्तन्ति पुज्जक्खेत्तं । अनुत्तरं वन्देति सम्बन्धो ।

एत्थ च “सीलादिगुणसम्पन्नो”ति एतेन अरियसङ्घस्स भगवतो अनुजातपुत्ततं दस्सेति, तेनस्स पभवसम्पदा दीपिता होति । “ठितो मग्गफलेसू”ति एतेन पहानसम्पदं, जाणसम्पदञ्च दस्सेति किलेसानं समुच्छेदप्पटिप्पस्सद्धिप्पहानदीपनतो, मग्गफलजाणाधिगमदीपनतो च । “अरियसङ्घ”न्ति एतेन पभवसम्पदं सब्बसङ्घानं अग्गभावदीपनतो, सदेवकेन च लोकेन अरणीयभावदीपनतो । “पुज्जक्खेत्तं अनुत्तर”न्ति एतेन लोकस्स बहूपकारतं दस्सेति अग्गदक्खिण्येय्यभावदीपनतो ।

तथा “सीलादिगुणसम्पन्नो”ति इदं अरियसङ्घस्स सम्माउज्जायसामीचिप्पटिपन्नभावदीपनं । “ठितो मग्गफलेसू”ति इदं सतिपि सन्तानविभागेन अनेकभावे चतुपुरिसयुगअट्ठपुरिसपुग्गलभावदीपनं । “अरियसङ्घ”न्ति इदं आहुनेय्यादिभावदीपनं । “पुज्जक्खेत्तं अनुत्तर”न्ति इदं लोकस्स हितसुखाय पटिपन्नतादीपनं । तथा “ठितो मग्गफलेसू”ति इदं अरियसङ्घस्स लोकुत्तरसरणगमनसम्भावदीपनं, तेनस्स भगवतो ओरसपुत्तभावो दस्सितो होति ।

“सीलादिगुणसम्पन्नो”ति इमिना पनस्स विहतविधस्तकिलेसा अनवसेसा सेक्खासेक्खा सीलादिधम्मक्खन्धा दस्सिता । “अरियसङ्घं पुज्जक्खेतं अनुत्तर”न्ति इमिना तेसं तेसज्जेव यथावुत्तगुणविसेसानं सुपरिसुद्धतं दीपेति । तेनस्स महानुभावतं, अनुत्तरदक्खिण्येयभावं, वन्दनारहभावं, अत्तनो च वन्दनाकिरियाय खेत्तङ्गतभावं दीपेति । सरणगमनञ्च सावकानं सब्बगुणानं आदि, सपुब्बभागप्पटिपदा सेक्खा सीलक्खन्धादयो मज्झे, असेक्खा सीलक्खन्धादयो परियोसानन्ति आदिमज्झपरियोसानकल्याणा सब्बे अरियसङ्घगुणा इमाय गाथाय पकासिताति वेदितब्बं ।

एवं गाथात्तयेन सङ्केपतो सकलगुणसंकित्तनमुखेन रतनत्तयस्स पणामं कत्वा इदानीं तं निपच्चकारं यथाधिप्पेते पयोजने परिणामेन्तो “**वन्दनाजनित**”न्ति गाथमाह । तत्थ **वन्दनाजनित**न्ति वन्दनाकारेण निब्बत्तितं, रतनत्तयगुणाभित्थवनवसेन, निपच्चकारवसेन वा उप्पादितन्ति अत्थो । **इतीति** एवं “महाकारुणिक”न्ति आदिप्पकारेण । रतिजननट्ठेन **रतनं**, बुद्धधम्मसङ्गा, चित्तीकतादिभावो वा रतनट्ठो । वुत्तज्हेतं —

“चित्तीकतं महग्घञ्च, अतुलं दुल्लभदस्सनं ।

अनोमसत्तपरिभोगं, रतनं तेन वुच्चती”ति ॥ (खु० पा० अट्ठ० ६.३; दी० नि० अट्ठ० २.३३; सं० नि० ५.२२३; सु० नि० अट्ठ० १.२२६; महानि० अट्ठ० ५०; दी० नि० टी० १.गन्थारम्भकथा; म० नि० टी० १.४; सं० नि० टी० १.१.४; अ० नि० टी० १.१.४; सारत्थ० टी० १.गन्थारम्भकथावण्णना) ।

चित्तीकतभावादयो च अनञ्जसाधारणा बुद्धादीसु एव लब्धन्ति, रतनानं तयं **रतनत्तयं**, तस्मिं रतनत्तये । **हतन्तरायोति** विधस्तउपद्वो हुत्वाति सम्बन्धो, एतेन अत्तनो पसादसम्पत्तिया, रतनत्तयस्स च खेत्तभावसम्पत्तिया तस्स पुज्जस्स अत्थसंवण्णनाय उपघातकउपद्ववानं विहनने समत्थतं दस्सेति । **सब्बत्थाति** सब्बस्मिं अन्तो चेव बहि च, अज्झत्तिकबाहिरवत्थूसूति अत्थो । **सब्बत्थाति** वा सब्बस्मिं काले, संवण्णनाय आदिमज्झपरियोसानकालेसूति वुत्तं होति । **हुत्वाति** पुब्बकालकिरिया, तस्स “करिस्सामत्थवण्णन”न्ति एतेन सम्बन्धो । **तस्साति** यं रतनत्तये वन्दनाजनितं पुज्जं, तस्स । **तेजसाति** आनुभावेन बलेन ।

एवं रतनत्तयवन्दनाय पयोजनं दस्सेत्वा इदानीं नेत्तिप्पकरणस्स गम्भीरत्थत्ता अत्थसंवण्णनाय दुक्करभावं दस्सेतुं “**ठिति**”न्ति आदिमाह । तत्थ **ठिति**न्ति ठानं अनन्तरधानं अविच्छेदपवत्तिं । **आकङ्खमानेनाति** इच्छमानेन पत्थयन्तेन, “अहोवतायं सद्धम्मनेत्ति चिरं तिट्ठेय्या”ति एवं पत्थयन्तेनाति वुत्तं होति । **चिरन्ति** दीघकालं, पञ्चवस्ससहस्सपरिमाणं कालन्ति अत्थो । **सद्धम्मनेत्तियाति** सद्धम्मसङ्गाताय नेत्तिया । सद्धम्मो हि वेनेय्यसन्तानेसु अरियगुणानं नयनतो **नेत्ति**, सद्धम्मस्स वा नेत्ति **सद्धम्मनेत्ति**, तस्सा सद्धम्मनेत्तिया, स्वायमत्थो **अट्ठकथायं** विचारितो एव । **थेरेनाति** थिरगुणयुत्तेन । **अभियाचितोति** आदरगारवेन याचितो । अभिमुखं वा याचितो, अनुत्तरं कत्वा याचितोति अत्थो । उद्दिस्स वा याचितो, गरुतरं कत्वा याचितोति अत्थो, “करोतु आयस्मा नेत्तिप्पकरणस्स कञ्चि अत्थसंवण्णन”न्ति एवं नेत्तिया अत्थसंवण्णनं पति अज्झेसितोति वुत्तं होति । एत्थ च सद्धम्मस्स चिरं ठितिकामेन अज्झासयसम्पन्नेन सासने थिरगुणयुत्तेन सब्रह्मचारिना आदरगारवेन, अभिमुखं वा याचितेन मे न सक्का तस्स अभियाचनं पटिक्खितुन्ति दस्सेति “**ठितिं आकङ्खमानेना**”ति गाथाय ।

पदुमुत्तरनाथस्साति पदुमुत्तरस्स सम्मासम्बुद्धस्स । **पस्सताति** पुब्बेनिवासचक्खुना, समन्तचक्खुना एव वा हत्थतले ठपितआमलकं विय अभिनीहारं पस्सन्तेन । **तादिनाति** तादिभावयुत्तेन, सब्बत्थ वा निब्बिकारेण, “अम्हाकं भगवता”ति वचनसेसो । **यस्साति** आयस्मतो महाकच्चानत्थेरस्स । **ठपितोति** —

“एतदगं, भिक्खवे, मम सावकानं भिक्खूनं संखित्तेन भासितस्स वित्थारेन अत्थं विभजन्तानं यदिदं महाकच्चानो”ति (अ० नि० १.१८८, १९७) —

एवं ठपितो । सीलादिगुणविसेसेहि महन्ता सावकाति **महासावका** (थेरगा० अट्ठ० २.१२८८; अ० नि० टी० २.३.५९), महाकस्सपादयो, तेसु अयमायस्मा अज्जतरोति, महासावको च सो गुणविसेसयोगतो उत्तमो चाति **महासावकुत्तमो** ।

झानादीसु सातिसयानं आवज्जनादिवसीभावानं, अरियिद्धिवसेन परमस्स च चेतोवसीभावस्स अधिगतत्ता **वसिप्पत्तो** । अत्थादीसु सविसेसभेदगतपटिसम्भिदाजाणत्ता **पभिन्नपटिसम्भिदो** । “पण्डितो, भिक्खवे, महाकच्चानो, महापज्जो, भिक्खवे, महाकच्चानो”तिआदिना (म० नि० १.२०५) अनेकेसु ठानेसु भगवता पसंसितत्ता **सम्बुद्धेन पसंसितो** । तेन वुत्तं “सत्थु चेव संवण्णितो संभावितो, विज्जूनञ्च सब्रह्मचारिन”न्ति ।

अनुमोदिताति “साधु साधु, कच्चान, साधु खो, त्वं कच्चान, इमं धम्मसंवण्णनं अभासी”ति एवं अनुमोदिता । एकस्मिं किर समये अयं महाथेरो जम्बुवनसण्डे विहरन्तो अत्तनो सन्तिकावचरानं भिक्खूनं इमं हारनयपटिमण्डितं पकरणं अभासि । भासित्वा च भगवतो सन्तिकं उपसङ्कमित्वा भगवन्तं अभिवादेत्वा एकमन्तं निसिन्नो यथाभासितं इमं पकरणं भगवतो निवेदेसि । तं सुत्वा भगवा “साधु साधू”तिआदिना अनुमोदित्वा “तस्मातिह, त्वं कच्चान, इमं धम्मसंवण्णनं धम्मनेत्तित्वेव धारेही”ति नामगगहणं अकासीति वदन्ति । देसनाहारादिनन्दियावट्टनयादिहारनयानुसारेणैव सब्बधम्मसंवण्णनानं गतियोति आह “**सासनस्स सदायत्ता, नवङ्गस्सत्थवण्णना**”ति ।

गम्भीरजाणेहीहि गम्भीरेहि जाणेहि, न सद्धामत्तकेन, गम्भीरजाणेहि वा महापज्जेहि अरियेहि । पकरणस्स गम्भीरत्थतं, अत्तनो च जाणस्स नातिविसयतं विदित्वा संवण्णनारम्भे संसीदन्तम्पि मं सासनगुणादिउपनिस्सयसम्पदा उस्साहेसीति इममत्थं दस्सेति “**किञ्चापी**”तिआदिना ।

“**पञ्चपि निकाये ओगाहेत्वा**”ति इमिना नेत्तिया पञ्चपि महानिकाये अनुपविसित्वा अवट्टानं, तेसं संवण्णनाभावञ्च दीपेति । तत्थ “कतमो अस्सादो च आदीनवो चा”तिआदिपेटकोपदेसपाळिं (पेटको० २३) आनेत्वा इध देसनाहारादीनं पदत्थविनिच्छयो पेटकेन संसन्दनं नाम ॥ “**यथाबल**”न्ति इमिना सब्बथा सब्बभागेनापि नेत्तिया संवण्णना मया न सुकरा कातुं, अत्तनो पन जाणबलानुरूपं करिस्सामीति निरतिमानतं दीपेति ।

सुविसुद्धन्ति सुट्ठु विसुद्धं, निकायन्तरलद्धिदोसेहि अन्तरन्तरा अनुप्पवेसितेहि असम्मिस्सन्ति अधिप्पायो । **असंकिण्णन्ति** सनिकायेपि पदत्थन्तरपरिकप्पनादिना असंकिण्णं तादिससङ्कररहितं अनाकुलं सुपरिच्छिन्नं । विविधेहि आकारेहि निच्छिनोतीति **विनिच्छयो** । अत्थानं विनिच्छयो **अत्थविनिच्छयो** । गण्ठिद्वानभूतेसु अत्थेसु खिलमद्वनाकारेन पवत्ता विमतिच्छेदकथा, निपुणो सुखुमो सण्हो अत्थविनिच्छयो एतस्साति **निपुणत्थविनिच्छयो** । अथ वा अत्थे विनिच्छिनोतीति **अत्थविनिच्छयो**, यथावुत्तअत्थविसयजाणं, निपुणो छेको अत्थविनिच्छयो एतस्साति **निपुणत्थविनिच्छयो**, तं निपुणत्थविनिच्छयं । **समयन्ति** सिद्धन्तं । इदं वुत्तं होति — महाविहारवासीनं सिद्धन्तो वुत्तनयेन सुपरिसुद्धो, अनाकुलो, सण्हसुखुमविनिच्छयो च, सिद्धन्तं तं अविलोमेन्तो अनुकूलतो तत्थ सिद्धंयेव धम्मनेत्तिं पकासयन्तो नेत्तिप्पकरणस्स अत्थसंवण्णनं करिस्सामीति ।

पमादलेखन्ति अपरभागे पोत्थकारुळ्हकाले पमज्जित्वा लिखनवसेन पवत्तप्पमादपाठं । **वज्जेत्वाति** अपनेत्वा ।

पाळिं सम्मा नियोजयन्ति तं तं नेत्तिपाळिं तत्थ तत्थ उदाहरणभावेन आनीतसुत्ते सम्मदेव नियोजेन्तो, अत्थसंवण्णनाय वा तं तं उदाहरणसुत्तसङ्घातं पाळिं तस्मिं तस्मिं लक्खणभूते नेत्तिगन्थे सम्मदेव नियोजेन्तो। **उपदेसन्ति** नेत्तिउपनिसं नेत्तिहदयं। ख्वायं सपट्टानविभागस्स तेत्तिसविधस्स नेत्तिपदत्थस्स सह निमित्तविभागेन असङ्करतो ववत्थितो विसयो, तं। **विभावेन्तो** पकासेन्तो। तस्सा नेत्तिया करिस्सामि अत्थवण्णनन्ति सम्बन्धो।

एत्थ च “अभियाचितो”ति इमिना अत्थसंवण्णनाय निमित्तं दस्सेति, “ठितिं आकङ्खमानेन चिरं सद्भम्मनेत्तिया”ति इमिना पयोजनं, “करिस्सामत्थवण्णन”न्ति इमिना पिण्डत्थं। संवण्णियमाना हि पकरणत्था संवण्णनाय पिण्डत्थो। “तमुपनिस्साया”तिआदिना करणप्पकारं।

इदानीं संवण्णनाय सवने नियोजेन्तो “**इति अत्थ**”न्ति ओसानगाथमाह। तत्थ “**सक्कच्च**”न्ति पदं उभयत्थ योजेतब्बं “सक्कच्चं विभजन्तस्स, सक्कच्चं निसामयथा”ति।

गन्थारम्भकथावण्णना निड्ढिता।

निदानकथावण्णना

वचनत्थजाननेन विदितप्पकरणत्थसामञ्जत्थस्स पकरणकथा वुच्चमाना सोभेय्याति नेत्तिपदत्थपरिजाननमेव आदिमिं युत्तरूपन्ति तदत्थं पुच्छति “**तत्थ केनट्ठेन नेत्ती**”ति। तत्थ तत्थाति “तस्सा नेत्तिया करिस्सामत्थवण्णन”न्ति यदिदं वुत्तं, तस्मिं; यस्सा करिस्सामत्थवण्णनन्ति पटिज्जातं, सा नेत्ति केनट्ठेन नेत्तीति अत्थो। तत्थाति वा “नेत्तिप्पकरणस्सा”ति एतस्मिं वचने या नेत्ति वुत्ता, सा केनट्ठेन नेत्तीति अत्थो। “**नयनट्ठेना**”ति इदं कत्तुकरणाधिकरणसाधनानं साधारणवचनन्ति “**अरियधम्मं नयती**”ति कत्तुसाधनवसेन ताव नेत्तिसद्वस्स अत्थं वत्त्वा इदानीं करणाधिकरणसाधनवसेन वत्तुं “**नयन्ति ताया**”तिआदि वुत्तं।

तथा हि वुत्तन्ति नेत्तिउपदेसाधीनत्ता एव सुत्तावबोधस्स वुत्तं। **पेटके** “तस्मा निब्बायितुकामेन सुतमयेन अत्था परियेसितब्बा, तत्थ परियेसनाय अयं अनुपुब्बी भवति सोळस हारा पञ्च नया अट्टारस मूलपदानी”तिआदि (पेटको० ३)। हारनयविचारणा विनिमुत्तो अत्थसंवण्णनाविसेसो नत्थीति आह “**सुत्तस्स अत्थसंवण्णना नेत्तिउपदेसायत्ता**”ति। स्वायमत्थो परतो पकिण्णककथायं आवि भविस्सति। एवं महाविसया चायं नेत्ति कुतो पभवाति आह “**सुत्तप्पभवा**”ति, एतेन नेत्तिया पमाणभूतं दस्सेति। इदञ्च सुत्तस्स नेत्तिसन्निस्सयतापरिदीपनपरं, न थेरप्पभवतापटिक्खेपपरं। थेरो हि पञ्च महानिकाये ओगाहेत्वा तंसन्निस्सयेनेव तेसं संवण्णनाभूतं इमं पकरणं अभासि, तस्मा अयमेव संवण्णनाधम्मो, यदिदं संवण्णेतब्बधम्मसन्निस्सयता।

पकरणपरिच्छेदतोति पकरणस्स विभागतो। हारविचारादयो हि तयो नेत्तिप्पकरणस्स विभागा, पकरणभूतपरिच्छेदतो वा। तीणि हि एतानि पकरणानि तयो अधिकारा, यदिदं हारविचारादयो। **पाळिववत्थानतो**ति पाठसन्निवेसतो।

“**सब्बो हि पकरणत्थो**”तिआदिना सङ्गहवारस्स अन्वत्थसञ्जतं दस्सेति। “**ननु चेत्थ पट्टानं असङ्गहितं**”न्ति चोदको व्यभिचारमाह। इतरो यदिपि सरूपतो असङ्गहितं, अत्थतो पन सङ्गहितन्ति दस्सेन्तो “**नयिदमेव**”तिआदिना परिहरति। पुन “**तथा ही**”तिआदिना तमेवत्थं पाळिया पाकटतरं करोति। **अत्थनया** नन्दियावट्टादयो। **सङ्खारत्तिका**

पुज्जाभिसङ्खारादयो, कायसङ्खारादयो च । तेसु अत्थनयानं अज्जमज्जसङ्गहो परतो आवि भविस्सति । इतरे पन कामावचरा, रूपावचरा च कुसला चेतना **पुज्जाभिसङ्खारो**, अकुसला चेतना **अपुज्जाभिसङ्खारो**, अरूपावचरा कुसला चेतना **आनेज्जाभिसङ्खारो** । पुज्जाभिसङ्खारो च अपुज्जाभिसङ्खारो च कायद्वारप्पवत्तो **कायसङ्खारो**, सो एव वचीद्वारप्पवत्तो **वचीसङ्खारो**, मनोद्वारप्पवत्तो पन तिविधोपि **चित्तसङ्खारो** । इति जातिवसेन पुरिमत्तिके वुत्ता एव धम्मा द्वारवसेन दुतियत्तिके वुत्ता, ते एव च पुरिमत्तिकेति अज्जमज्जसङ्गहो वेदितब्बो ।

यत्थाति यस्मिं वारे । **पेटकेति** पेटकोपदेसे । **सम्पतमानाति** संवण्णनावसेन सन्निपतन्ता । **“व्यज्जनविधिपुथुत्ता”**ति इदं एकस्मिं सुत्ते अनेकेसं हारानं सन्निपतनस्स कारणवचनं । तथा हि **“अनेकसामत्थियनिचिता सद्वा”**ति अक्खरचिन्तका वदन्ति ।

“न सरूपतो”ति इमिना सङ्गहवारे विय उद्देसनिद्देसवारेसुपि पट्टानस्स अत्थतो उद्धटतं दस्सेति । मूलपदग्गहणेनेव गहितत्ता उद्देसवारे ताव एवं होतु, निद्देसवारे पन कथन्ति? तत्थापि नयग्गहणेनेव मूलपदानिपि गहितानीति वेदितब्बं । न हि मूलपदेहि विना काचि नययोजना सम्भवति । अपरे पन **“हारनया विय पट्टानं न सुत्तस्स संवण्णनाविसेसो, अथ खो तस्मिं तस्मिं सुत्ते संकिलेसभागियतादिलब्भमानविसेसमत्तन्ति न तस्स पकरणस्स पदत्थसङ्गहो । एवञ्च कत्वा तेत्तिंसाय नेत्तिपदत्थेसु पट्टानं असङ्गहितं, उद्देसनिद्देसवारेसु च अनुद्धटमेवा”**ति वदन्ति ।

“पाळितो एव विज्जायती”ति वुत्तमत्थं समत्थेन्तो **“तथा हि...पे०... आभत”**न्ति आह, तेन थेरेन भासितभावो विय भगवता अनुमोदितभावोपि पाळिअनुगतो एवाति दस्सेति । सावकभासितत्ता निदानं न वुत्तन्ति न सक्का वत्तुन्ति चोदेन्तो **“सावक...पे०... भासित”**न्ति आह । **नयिदं एकन्तिकन्ति** च सावकभासितबुद्धभासितभावो निदानावचनस्स, निदानवचनस्स च अकारणं उभयत्थापि उभयस्स दस्सनतो । तस्मा निदानावचनेन नेत्तिया असावकभासितता न सिज्झतीति दस्सेति । तेनाह **“न च तावता तानि अप्पमाणं, एवमिधापि दट्ठब्ब”**न्ति ।

येनेव कारणेन निदानावचनस्स पमाणभावसाधनता, तेनेव कारणेन इमस्स पकरणस्स पमाणभावसिद्धीति दस्सेति **“निदानञ्च नामा”**तिआदिना । इदानी **“अथ वा”**तिआदिना नेत्तिया निदानावचनेन अब्यभिचारहेतुमाह । अयज्हेत्थ पयोगो न नेत्तिया निदानं वत्तब्बं पाळिया अत्थसंवण्णनाभावतो । या हि पाळिया अत्थसंवण्णना न तस्सा निदानवचनं दिट्ठं यथा पटिसम्भिदामग्गस्स, निद्देसादीनज्जाति ।

“अयं विभागो”तिआदिना एकविधतो पट्टाय याव चतुरासीतिसहस्सप्पभेदा, ताव यथादस्सितस्स पकरणविभागस्स पुन **“आदिना नयेन पकरणविभागो वेदितब्बो”**ति इदं निगमनं । तत्थ **आदिना नयेनाति आदिसद्देन** अभिज्जेय्यधम्मनिद्देसतो पज्जत्तिपज्जपेतब्बधम्मविभजनतो तियद्धपरियापन्नधम्मविचारतो चतुरोघनित्थरणत्थतो पज्जाभिनन्दनादिप्पहानतो छतण्हाकायुपसमनतो सङ्गहवारादिसत्तवारसङ्गहतो अट्ठमिच्छत्तसमुग्घातदीपनतोति एवमादीनं सङ्गहो दट्ठब्बो ।

१. सङ्गहवारवण्णना

यन्ति अनियमत्थो सब्बनामसद्दो कम्मसाधनवसेन वुत्तो । अत्थावबोधनत्थो सद्दप्पयोगो अत्थपराधीनो केवलो अत्थपदत्थको, सो पदत्थविपरियेसकारिना इति-सद्देन परभूतेन सद्दपदत्थको जायतीति आह **“यन्ति अनियमतो**

उपयोगनिद्देशो’ति । लोकोति कत्तुनिद्देशोति आदीसुपि एसेव नयो ।

एवं “य”न्ति आदीनं गाथापदानं कम्मकत्तुकिरियाकत्तुविसेसनादिदस्सनवसेन अत्थं वत्वा इदानी अवयवजोतनवसेन पदत्थं दस्सेतुं “लोकियन्ति एत्था”ति आदिमाह । लोकसद्दो इध सामत्थियतो सत्तलोकवचनो दट्ठब्बो । तेनाह “पूजनकिरियायोग्यभूततावसेना”ति । सासनन्तरधानतो परं पूजना अञ्जबुद्धुप्पादेन वेदितब्बा, यथेतरहि विपस्सी आदिसम्मासम्बुद्धानं । “दीपङ्करो”ति आदिना यदिपि बुद्धवंसदेसनायं (बु० वं० २.७५) भगवताव वुत्तं, सुमेधपण्डितत्तभावेन पन पवत्तिं सन्धाय वुत्तन्ति आह “यथाह भगवा सुमेधभूतो”ति ।

परिञ्चाक्कमेनाति जातपरिञ्चादिपटिपाटिया । लक्खणावबोधप्पटिपत्तियाति विपस्सनाय । तेन वुत्तं “सुञ्जतमुखादीही”ति । तथा च वुत्तन्ति विञ्जूहि वेदनीयताय एव सासनवरस्स वुत्तं भगवता —

“एतु विञ्जू पुरिसो असठो अमायावी उज्जुजातिको, अहमनुसासामि, अहं धम्मं देसेमि, यथानुसिद्धं तथा पटिपज्जमानो न चिरस्सेव सामञ्जेव उस्सति, सामं दक्खिती”ति आदि (म० नि० २.२८१) ।

यं-सद्दो सासनविसयो, लोकपालसद्दो सत्थुविसयोपि लोकं पति गुणीभूतोति “तस्सा”ति पटिनिद्देशस्स कथं सत्थुविसयताति चोदनं मनसिकत्वा आह “सलोकपालोति चेत्था”ति आदि, गुणीभूतोपि लोकपालसद्दो पधानभूतो विय पटिनिद्देशं अरहति । अञ्जो हि सद्दक्कमो, अञ्जो अत्थक्कमोति ।

धम्मगारवेन भगवा धम्मं पूजेन्तो वेनेय्यबन्धवे अचिन्तेत्वा समापत्तिसमापज्जनधम्मपच्चवेक्खणाहि सत्तसत्ताहं वीतिनामेसीति आह “भगवतो... पे०... दीपेतब्बा”ति । तत्थ आदिसद्देन सावकेहि धम्मस्सवनस्स, तेसं पच्चुगमनादीनञ्च सङ्गहो वेदितब्बो ।

इच्चस्साति इति अस्स, एवं भगवतो अविपरीतअनन्तरायिकनिय्यानिकधम्मदेसनाय सब्बञ्जुतानावरणभावदीपनेनाति अत्थो । तेनाति चतुवेसारज्जयोगेन । तदविनाभाविना दसबल... पे०... पकासिता होति । आवेणिकबुद्धधम्मादीति एत्थ आदिसद्देन तीसु कालेसु अप्पटिहतजाणानि, चतुसच्चजाणानि, चतुपटिसम्भिदाजाणानि, पञ्चगतिपरिच्छेदकजाणानि, छ अभिञ्जाजाणानि, सत्त अरियधनानि, सत्त बोज्झङ्गा, अट्ठ विज्जा, अट्ठसु परिसासु अकम्पनजाणानि, अट्ठ विमोक्खा, नव समाधिचरिया, नव अनुपुब्बविहारा, दस नाथकरणा धम्मा, दस अरियवासा, द्वादस धम्मचक्काकारा, तेरस धुतधम्मा, चुद्दस बुद्धजाणानि, पन्नरस चरणधम्मा, सोळस जाणचरिया, सोळस आनापानस्सती, एकूनवीसति पच्चवेक्खणजाणानि, चतुवीसति पच्चयविभावनजाणानि, चतुचत्तारीस जाणवत्थूनि, सत्तसत्तति जाणवत्थूनि, चतुवीसतिकोटिसतसहस्ससमापत्तिसञ्चारिमहावजिरजाणं, अनन्तनयसमन्तपट्टानपविचयदेसनाकारप्पवत्तजाणानि चाति एवमादीनं भगवतो गुणविसेसानं सङ्गहो दट्ठब्बो ।

अपरो नयो — गुणविसिद्धतं दीपेति, सा च गुणविसिद्धता महाकरुणामहापञ्चाहि वेदितब्बा ताहि सत्थुसम्पत्तिसिद्धितो । तत्थ महाकरुणाय पवत्तिभेदो “बहुकेहि आकारेहि पस्सन्तानं बुद्धानं भगवन्तानं सत्तेसु महाकरुणा ओक्कमती”ति आदिना पटिसम्भिदामग्गे (पटि० म० १.११७) वुत्तनयेन वेदितब्बो । महापञ्चाय पन पवत्तिभेदो वुत्तो एव । तत्थ करुणाय भगवतो चरणसम्पत्ति, पञ्चाय विज्जासम्पत्ति । करुणाय सत्ताधिपतिता, पञ्चाय धम्माधिपतिता । करुणाय लोकनाथता, पञ्चाय अत्तनाथता । करुणाय पुब्बकारिता, पञ्चाय कतञ्जुता । करुणाय अपरन्तपता, पञ्चाय

अनन्ततपता । करुणाय बुद्धकरधम्मसिद्धि, पञ्जाय बुद्धभावसिद्धि । करुणाय परेसं तारणं, पञ्जाय सयं तारणं । करुणाय सब्बसत्तेसु अनुगहचिन्ता, पञ्जाय सब्बधम्मसेसु विरत्तचित्ता पकासिता होतीति अनवसेसतो परहितपटिपत्तिया, अत्तहितसम्पत्तिया च पारिपूरी वेदितब्बा । **तीसुपि अवत्थासूति** हेतुफलसत्तूपकारावत्थासु ।

अभिसमयो पटिवेधसासनस्स, मनसिकरणं पटिपत्तिसासनस्स, सवनादीहि परिचयकरणं परियत्तिसासनस्साति तिण्णम्पि वसेन योजेतब्बो । तेनाह “**यथारह**”न्ति । “**सक्कच्चं धम्मदेसनेना**”ति इमिना इध “सासन”न्ति वुत्तस्स तिविधस्सापि सद्धम्मस्स अविसेसेन देसनापूजं वत्वा थोमनापूजनस्स वसेन तं विभजित्वा दस्सेन्तो “**अरियं, वो भिक्खवे**”तिआदिमाह । तत्थ “**थोमनेना**”ति पदेनापि “सक्कच्च”न्ति पदं योजेतब्बं । पूजनाद्वयस्सापि वा वसेन इधापि पदयोजना वेदितब्बा । **अरियभावादयो**ति अरियसेट्ठुअगगभावादयो । **निय्यानादयो**ति निय्यानहेतुदस्सनादयो । **स्वाक्खाततादयो**ति स्वाक्खातसन्दिद्धिकतादयो ।

इदानी अरियसङ्गुणानम्पि इमाय गाथाय पकासितभावं दस्सेतुं “**यस्मा पना**”तिआदि वुत्तं । **बाल्यादिसमतिक्कमनतो**ति बालअव्यक्तभावादिसमतिक्कमनतो ।

जाणविसेसो सुतचिन्ताभावनामयजाणानि । सोतब्बमनसिकातब्बपटिविज्झितब्बावत्था **अवत्थाभेदो** । **उभयन्ति** व्यञ्जनपदं, अत्थपदञ्च । **उभयथा**ति करणकम्मसाधनवसेन पच्चेकं योजेतब्बं । **पटिपज्जितब्बत्ता**ति जातब्बत्ता ।

“**अयञ्च गाथा**”तिआदि केसञ्चि वादो । तथा हि अपरे “थेरेनेवायं गाथा भासिता”ति वदन्ति । अत्तूपनायिकापि हि कदाचि धम्मदेसना होति एव यथा “दसबलसमन्नागतो, भिक्खवे, तथागतो चतुवेसारज्जविसारदो”तिआदि (सं० नि० २.२१-२२) । एवञ्च कत्वा “कतमे सोळस हारा”तिआदिवचनं समत्थितं होति ।

यथावुत्तअत्थमुखेनेवाति मूलपदसङ्घातअत्थुद्दारेनेव । **परतो आगमिस्सती**ति निद्वेसवारस्स परियोसाने आगमिस्सति “तीणि च नया अनूना”तिआदिना (नेत्ति० ४ द्वादसपद) ।

वुच्चतीति कत्तरि कम्मनिद्वेसोति आह “**वदती**”ति । अथ वा **वुच्चती**ति कम्मकत्तुनिद्वेसोयं । अयञ्हेत्थ अत्थो — हारा, नया चाति उभयं परिगगहितं संवण्णकेन सब्बथा गहितञ्चे, वुच्चति सुत्तं, सयमेव सुत्तं संवण्णेतीति, एतेन हारनयेसु वसीभावेन सुत्तसंवण्णनाय सुकरतं दस्सेति ।

पकारन्तरेनाति पुब्बे “सासन”न्ति वुत्तमत्थं “देसना, देसित”न्ति ततो अञ्जेन पकारेन । **नियमेत्वा**ति तस्स एकन्ततो विञ्जेय्यतं अवधारेत्वा । **विञ्जेय्यता** विसिद्धेसु देसनादेसितेसु विञ्जेय्यपदे लब्धमाना विजाननकिरिया ।

देसनादेसितानि च यावदेव विजाननत्थानीति विजाननं पधानन्ति तमेव निद्वारेन्तो “**तत्राति तस्मिं विजानने**”ति आह ।

एत्थाहाति नवङ्गसासननवविधसुत्तन्ताति एतस्मिं अत्थवचने आह चोदको । तस्सायं अधिष्ठायो — नवहि अङ्गेहि ववत्थितेहि अञ्जमञ्जसङ्कररहितेहि भवितब्बं, तथा च सति असुत्तसभावानेव गेय्यङ्गादीनीति नवविधसुत्तन्तवचनं विरुद्धेय्य । अथ सुत्तसभावानि गेय्यङ्गादीनि, एवं सति “सुत्त”न्ति विसुं सुत्तङ्गं न सिया, एवं सन्ते अट्ठङ्गसासनं आपज्जतीति । तेनाह “**कथं पना**”तिआदि । गेय्यङ्गादीसु कतिपयानम्पि सुत्तभावे यथावुत्तदोसानतिवत्ति, पगेव सब्बेसन्ति

दस्सेति “यञ्चा”तिआदिना । सङ्गहेसूति अट्टकथासु । पोराणट्टकथानञ्चि सङ्खेपभूता इदानी अट्टकथा “सङ्गहा”ति वुत्ता । सुत्तं नाम सगाथकं वा सिया, निग्गाथकं वाति अङ्गद्वयेनेव तदुभयङ्गं कतन्ति विसुं सुत्तङ्गस्स असम्भवो तदुभयविनिमुत्तस्स सुत्तस्स अभावतो । तेन वुत्तं “सुत्तङ्गमेव न सिया”ति । अथापि कथञ्चि । सियाति वक्खमानं सामञ्जविधिं सन्धायाह । एवम्पि अयं दोसोति दस्सेन्तो “मङ्गलसुत्तादीन”न्तिआदिमाह ।

तब्भावनिमित्तन्ति गेय्यङ्गभावनिमित्तं । वेय्याकरणस्स तब्भावनिमित्तन्ति सम्बन्धो । चोदको “गाथाविरहे”ति वचनं अगगणहन्तो “पुच्छाविस्सज्जनं व्याकरण”न्ति वचनमत्तमेव गहेत्वा “एवं सन्ते”तिआदिना चोदेति । इतरो पन ओकासविधितो अनोकासो विधि बलवाति जायं गाथाविरहितंयेव वेय्याकरणन्ति, इधाधिप्पेतन्ति च दस्सेन्तो “नापज्जती”तिआदिना परिहरति । तथा हीति तेनेव कारणेन, सतिपि सज्जन्तरनिमित्तयोगे अनोकाससज्जानं बलवभावेनेवाति अत्थो ।

सङ्गहवारवण्णना निड्ढिता ।

२. उद्देसवारवण्णना

१. विभागेनाति सरूपविभागेन । अदिट्ठं जोतीयति एतायाति अदिट्ठजोतना । दिट्ठं संसन्दीयति एतायाति दिट्ठसंसन्दना, संसन्दनं चेत्थ साकच्छावसेन विनिच्छयकरणं । विमति छिज्जति एतायाति विमतिच्छेदना । अनुमतिया पुच्छा अनुमतिपुच्छा । “तं किं मज्जथा”ति हि का तुम्हाकं अनुमतीति अनुमति पुच्छिता । कथेतुकम्यताति कथेतुकम्यताय ।

“हरीयन्ति एतेही”तिआदिना करणाधिकरणकत्तुभावकम्मसाधनानं वसेन हार-सदस्स अत्थं वत्त्वा सदिसकप्पनावसेन दस्सेतुं “हारा विया”तिआदि वुत्तं । पुन गन्थकरणादिअत्थेन गन्थादिसद्धानं विय हारकरणादिअत्थेन हारसद्विसिद्धिं दस्सेतुं “हारयन्ती”तिआदिमाह । “हरणतो, रमणतो चा”ति इमिना मनोहरा मनोरमा चेते संवण्णनाविसेसाति दस्सेति ।

उपपत्तिसाधनयुत्तीति लक्खणहेतु । वुत्तनयेनाति “ननु च अज्जेपि हारा युत्तिसहिता एवा”तिआदिना देसनाहारे वुत्तनयानुसारेन ।

चतुन्नं ब्यूहो एत्थाति भिन्नाधिकरणानम्पि पदानं अज्जपदत्थसमासो लब्धति “उरसिलोमो”तिआदीनं (दी० नि० टी० ३.५४, ३०३) वियाति वुत्तं ।

सेसन्ति “विवचनमेव वेवचन”न्ति एवमादि ।

अनुप्पवेसीयन्तीति अवगाहीयन्ति । समाधीयन्तीति परिहरीयन्ति । विना विकप्पेनाति जाति सामञ्जं, भेदो सामञ्जं, सम्बन्धो सामञ्जन्तिआदिना पदत्थन्तरभावविकप्पनमन्तरेन ।

पदट्टानादिमुखेनाति पदट्टानवेवचनभावनापहानमुखेन । केचीति पदट्टानपरिक्खारआवट्टपरिवत्तनपज्जत्तिओतरणे सन्धाय वदति ।

२. सम्बन्धोति हेतुफलभावयोगो । तथाभूतानञ्चि धम्मानं एकसन्तानसिद्धता एकत्तनयो । विभागो सतिपि नेसं हेतुफलभावे विभक्तसभावता । अज्जो एव हि हेतु, अज्जं फलन्ति । व्यापारविरहो निरीहता । न हि हेतुफलानं एवं होति “अहं इमं निब्बत्तेमि, इमिनाहं निब्बत्तो”ति । अनुरूपफलता पच्चयुप्पन्नानं पच्चयानुकूलता । समूहादिं उपादाय लोकसङ्केतसिद्धा वोहारमत्तता सम्मुतिसभावो । पथवीफस्सादीनं कक्खळफुसनादिलक्खणं परमत्थसभावो । अयज्हेत्थ सङ्खेपो — यस्मिं भिन्ने, इतरापोहे वा चित्तेन कतेन तथा बुद्धि, इदं सम्मुतिसच्चं यथा घटे, ससम्भारजले च, तब्बिपरियायेन परमत्थसच्चन्ति । परमत्थसच्चप्पटिवेधायाति निब्बानाधिगमाय ।

अन्तोति अब्भन्तरो । पधानावयवेनाति मूलभावेन । “नन्दी दुक्खस्स मूल”न्तिआदीसु (म० नि० १.१३) तण्हा “नन्दी”ति वुत्ता । “सङ्गामे च नन्दिं चरती”तिआदीसु पमोदोति आह “तण्हाय, पमोदस्स वा”ति ।

३. जातिभेदतोति कुसला, अकुसलाति इमस्मा विसेसा । युज्जन्तीति एत्थ हेतुअत्थो अन्तोनीतो वेदितब्बोति आह “योजीयन्ती”ति । केहि योजीयन्ति? संवण्णनकेहीति अधिप्पायो । युज्जन्तीति वा युत्ता होन्ति, तेहि समानयोगकखमा तग्गहणेनेव गहिता होन्तीति अत्थो तदेकट्ठभावतो । इमस्मिं अत्थे “नवहि पदेही”ति सहयोगे करणवचनं, पुरिमस्मिं करणे । “एते खो”ति च पाठो । तत्थ खो-सद्वस्स पदपूरणता, अवधारणत्थता वा वेदितब्बा । एते एवाति एते तण्हादयो एव, न इतो अज्जेति अत्थो । अट्टारसेव न ततो उद्धं, अधो वाति । पुरिमस्मिं पक्खे मूलपदन्तराभावो, दुतियस्मिं तेसं अनूनाधिकता दीपिता होति ।

उद्देसवारवण्णना निट्ठिता ।

३. निद्देसवारवण्णना

४. निद्देसवारे सामज्जतोति साधारणतो । विसेसेनाति असाधारणतो । पदत्थोति सद्वत्थो । लक्खणन्ति सभावो । कमोति अनुपुब्बी । एत्तावताति एत्तकप्पमाणभावो । हेत्वादीति हेतुफलभूमिउपनिसासभागविसभागलक्खणनया । विसेसतो पन लक्खणन्ति सम्बन्धो ।

हारसङ्खेपवण्णना

१. यं, भिक्खवेति एत्थ यन्ति पच्चत्तवचनं, तज्ज सुखं, सोमनस्सन्ति द्वयेन समानाधिकरणन्ति कत्वा “अस्सादीयतीति अस्सादो, सुखं, सोमनस्सज्जा”ति वुत्तं । सुखादिवेदना विय मनापियरूपादिपि अवीतरागस्स अस्सादेतब्बन्ति आह “एवं इट्ठारम्मणम्पी”ति । “अस्सादेति एतायाति वा अस्सादो, तण्हा”ति एतेन “य”न्ति हेतुअत्थे निपातोति दस्सेति । तत्रायमत्थो — येन हेतुना पज्जुपादानक्खन्धे पटिच्च अस्सादनीयभावेन उप्पज्जति सुखं सोमनस्सं, अयं तण्हासङ्घातो अस्सादो अस्सादनकिरियाय कारणन्ति । इति कत्वा अयमत्थो दिट्ठाभिनन्दनादिभावतो विपल्लासेसुपि सम्भवतीति आह “एवं विपल्लासापी”ति । अनिट्ठम्पीति पि-सद्देन इट्ठम्पीति योजेतब्बं, अनवसेसा सासवा धम्मा इध आरम्मणग्गहणेन गहिताति आह “सब्बेसं तेभूमकसङ्खारान”न्ति ।

दुक्खादुक्खमसुखवेदनानन्ति एत्थ दुक्खसभावा एव अदुक्खमसुखा वेदना गहिता अनिट्ठारम्मणस्स अधिप्पेतत्ता, न सुखसभावा । यं सन्धाय वुत्तं “यायं, भन्ते, अदुक्खमसुखा वेदना, सन्तस्मिं एसा पणीते सुखे वुत्ता भगवता”ति (म० नि०

२.८८; सं० नि० ४.२६७)। “**सुखपरियायसम्भावतो**”ति इमिना इद्वतामत्ततोपि लेसेन सत्तानं आरम्भणस्स अस्सादनीयता सम्भवतीति दस्सेति।

आदीनवो दोसनिस्सन्दनताय दोसो, स्वायं पीळनवुत्तिया वेदितब्बोति आह “**आदीनवो दुक्खा वेदना, तिस्सोपि वा दुक्खता**”ति। एवं दोसत्थतं आदीनवस्स दस्सेत्वा इदानी कपणत्थतं दस्सेतुं “**अथ वा**”तिआदि वुत्तं। यतोति यस्मा दोसकपणसभावत्ताति वुत्तं होति।

निस्सरतीति विवित्ति, सब्बसङ्खारविवेकोति अत्थो। **सामञ्जनिद्देसेनाति** निस्सरणसद्वचनीयतासामञ्जेन। **पुरिमानन्ति** अस्सादादीनवतानं। **उपायो चाति**आदीसु च-सद्वो पदपूरणमत्तन्ति कत्वा आह “**पच्छिमानञ्चा**”ति, फलादीनन्ति अत्थो। **तदन्तोगधभेदानन्ति** अरियमग्गपरियापन्नविसेसानं।

कामभवादीनन्ति आदि-सद्वेन न रूपारूपभवा एव गहिता, अथ खो ते च सञ्जीभवादयो च एकवोकारभवादयो च गहिता। तेनाह “**तिण्णं तिण्णं भवान**”न्ति।

यावदेव अनुपादापरिनिब्बानत्था भगवतो देसनाति आह “**ननु च...पे०... निष्फादीयती**”ति। “**वुत्तमेवा**”ति इमिना पुनरुत्तिदोसं चोदेति। इतरो “**सच्चमेत**”न्ति अनुजानित्वा “**तञ्च खो**”तिआदिना परिहरति। “**परम्पराया**”ति एतेन अज्झत्तं योनिमोमनसिकारो विय न परतोघोसो आसन्नकारणं धम्माधिगमस्स धम्मस्स पच्चत्तं वेदनीयत्ताति दस्सेति। तथा हि “अक्खातारो तथागता, पटिपन्ना पमोक्खन्ति, ज्ञायिनो मारबन्धना”ति (ध० प० २७६) वुत्तं। **तदधिगमकारणं** अरियमग्गाधिगमकारणं सिया। किं पन तन्ति आह “**सम्पत्तिभवहेतू**”ति, तेन चरिमत्तभावहेतुभूतं पुञ्जसम्पत्तिं वदति।

“**अत्तानुदिट्ठिं ऊहच्च, एवं मच्चुतररो सिया**”ति इदं अरियमग्गस्स पुब्बभागपटिपदाय फलभावसाधनं। येन हि विधिना अत्तानुदिट्ठिसमुग्धातो, मच्चुतरणञ्च सिया, सो “**एव**”न्ति इमिना पकासितोति। अत्तानुदिट्ठिसमुग्धातमच्चुतरणानं फलभावे वत्तब्बमेव नत्थि।

“**धम्मो हवे**”ति पन गाथायं लोकियस्स पुञ्जफलस्स वुत्तत्ता आह “**इदं फल**”न्ति। यं निब्बत्तेतब्बं, तं **फलं**। यं निब्बत्तकं, सो **उपायो**। अयमेत्थ विनिच्छयो। तेनाह “**एतेन नयेना**”तिआदि। **उपधिसम्पत्तीति** अत्तभावसोभा।

विसुद्धीति जाणदस्सनविसुद्धि अधिप्पेताति आह — “**एत्थापि...पे०... विज्जातु**”न्ति। “**यस्मा पना**”तिआदिनापि तमेवत्थं वचनन्तरे पाकटतरं करोति।

सरूपतो आगतानि “यतो खो, भिक्खवे, भिक्खु पञ्चन्नं उपादानक्खन्धानं समुदयञ्च अत्थङ्गमञ्च अस्सादञ्च आदीनवञ्च निस्सरणञ्च यथाभूतं पजानाती”तिआदीसु (सं० नि० ३.२६-२८)। **एकदेसेन आगतानि** “संयोजनियेसु, भिक्खवे, धम्मेसु अस्सादानुपस्सिनो विहरतो (सं० नि० २.५३), बहुदुक्खा बहुपायासा, आदीनवो एत्थ भिय्यो (म० नि० १.११७), सङ्खारानमेतं निस्सरणं, यदिदं निब्बान”न्तिआदीसु (पटि० म० १.२४; ३.४१)। **न सरूपेन आगतानि** यथा सामञ्जफलसुत्तादीसु। **अत्थवसेनाति** अस्सादेतब्बादिअत्थवसेन। **न पपञ्चितोति** न वित्थारितो।

२. एसेव नयोति अतिदेसेन विचियमानवचनसेसो अतिदिट्ठो। भावत्थे तोहि आह “**विस्सज्जितन्ति विस्सज्जना**”ति। **सुत्ते आगतं** न अत्थसंवण्णनावसेन अट्ठकथायं आगतन्ति अधिप्पायो। **पुच्छानुरूपता** इध

पुब्बापरन्ति चतुब्यूहपुब्बापरतो इमं विसेसेत्वा दस्सेति । पुच्छानुसन्धीति पुच्छाय विस्सज्जनेन अनुसन्धानं । अट्ठकथायं पन हेट्ठिमदेसनाय पुच्छानिमित्तपवत्तउपरिदेसनाय सम्बन्धो “पुच्छानुसन्धी”ति वुत्तं । पुब्बापेक्खन्ति पुच्छितविस्सज्जितपदापेक्खं । “सुत्तस्सा”ति वा इमिना पुच्छाविस्सज्जनाअनुगीतियो ठपेत्वा सेसो विचयहारपदत्थो सङ्गहितोति पदस्सापि सङ्गहो वेदितब्बो । इमस्मिं पक्खे गाथायं च-सद्वो पदपूरणमत्ते दट्ठब्बो ।

“चक्खु अनिच्च”न्ति पुट्ठे “आम, चक्खु अनिच्चमेवा”ति एकन्ततो विस्सज्जनं एकंसब्बाकरणं । “अज्जिन्द्रियं भावेतब्बं, सच्छिकातब्बज्जा”ति पुट्ठे “मग्गपरियापन्नं भावेतब्बं, फलपरियापन्नं सच्छिकातब्ब”न्ति विभजित्वा विस्सज्जनं विभज्जब्बाकरणं । “अज्जिन्द्रियं कुसल”न्ति पुट्ठे “किं अनवज्जट्ठो कुसलट्ठो, उदाहु सुखविपाकट्ठो”ति पटिपुच्छित्वा विस्सज्जनं पटिपुच्छाब्बाकरणं । “सस्सतो अत्ता, असस्सतो वा”ति वुत्ते “अब्बाकतमेत”न्तिआदिना अविस्सज्जनं ठपनं । “किं पनेते कुसलाति वा धम्माति वा एकत्था, उदाहु नानत्था”ति इदं पुच्छनं सावसेसं । विस्सज्जनस्स पन सावसेसता वेनेय्यज्झासयवसेन देसनायं वेदितब्बा । अप्पाटिहीरकं सउत्तरं । सप्पाटिहीरकं निरुत्तरं । सेसं विचयहारनिद्देसे सुविज्जेय्यमेव ।

एत्थ च अस्सादो अस्सादहेतु याव आणत्तिहेतूति एवं हेतूनम्पि अस्सादादयो वेदितब्बा । तत्थ सङ्खेपतो सुखसुखपच्चयलक्खणो अस्सादो, सो विसेसतो सग्गसम्पत्तिया दीपेतब्बो । सा हि तस्स उक्कंसो, सेसा पनेत्थ भवसम्पत्ति तदन्वायिका वेदितब्बा । तस्स हेतु दानमयं, सीलमयञ्च पुज्जकिरियवत्थु । दुक्खदुक्खपच्चयलक्खणो आदीनवो । विपरिणामसङ्खारदुक्खतानं तदवरोधतो वट्ठदुक्खस्सापि एत्थ सङ्गहो । विसेसतो पन कामानं ओकारोति दट्ठब्बो, स्वायं संकिलेसवत्थुना, इत्तरपच्चुपट्टानतादीहि च विभावेतब्बो, तस्स हेतु दस अकुसलकम्मपथा । नेक्खम्मं निस्सरणं, तस्स हेतु यथारहं तदनुच्छविका पुब्बभागप्पटिपदा । फलं देसनाफलमेव, तस्स हेतु देसना । उपायो यथावुत्तउपायोव, तस्स हेतु चत्तारि चक्कानि । आणत्ति उपदेसो, तस्स रागगिआदीहि लोकस्स आदित्ता, सत्थु महाकरुणायोगो च हेतु ।

तथा चतूसु अरियसच्चेसु समुदयेन अस्सादो, दुक्खेन आदीनवो, मग्गनिरोधेहि निस्सरणं, मग्गो वा उपायो, तदुपदेसो आणत्ति, अनुपादिसेसा निब्बानधातु फलं । इति अनुपुब्बकथाय सङ्घि बुद्धानं सामुक्कंसिकाय धम्मदेसनाय निद्धारणभावेन विचयो वेदितब्बो । पदस्स पदत्थसम्बन्धो हेतु । सो हि तस्स पवत्तिनिमित्तं, पज्जस्स जातुकामता, कथेकुकामता च । अदिट्ठजोतनादीनज्हि चतुन्नं जातुकामता, इतरस्स इतरा । विस्सज्जनस्स पज्जो हेतु । एवं सेसानम्पि यथारहं वत्तब्बं ।

३. व्यज्जनत्थानं युत्तायुत्तपरिक्खाति व्यज्जनग्गहणेन पदं गहितं, अत्थग्गहणेन पज्जादीहि सङ्घि अस्सादादयो गहिता । विचयहारपदत्था एव हि युत्तायुत्तादिविसेससहिता युत्तिहारादीनं पदत्था । तथा हि पदट्टानपदट्टानिकभावविसिद्धा तेयेव पदट्टानहारस्स पदत्था । लक्खणलक्खितब्बताविसिद्धा, निद्धारिता च लक्खणहारस्स, निब्बचनादिविभावनाविसिद्धा चतुब्यूहहारस्स, सभागधम्मवसेन, विसभागधम्मवसेन च आवट्टनविसिद्धा आवट्टहारस्स, भूमिविभागादिविसिद्धा विभक्तिहारस्स, पटिपक्खतो परिवत्तनविसिद्धा परिवत्तनहारस्स, परियायवेवचनविसिद्धा वेवचनहारस्स, पभवादपिज्जापनविसिद्धा पज्जत्तिहारस्स, खन्धादिमुखेहि ओत्तरणविसिद्धा ओत्तरणहारस्स, पदपदत्थपज्जारम्भसोधनविसिद्धा सोधनहारस्स, सामज्जविसेसनिद्धारणविसिद्धा अधिट्टानहारस्स, पच्चयधम्मोहि परिक्खरणविसिद्धा परिक्खारहारस्स, पहातब्बभावेतब्बतानिद्धारणविसिद्धा समारोपनहारस्स पदत्था । “व्यज्जनस्स सभावनिरुत्तिता, अत्थस्स सुत्तादीहि अविलोमनं युत्तभावो”ति इमिना असभावनिरुत्तिता, सुत्तादीहि विलोमनञ्च

अयुत्तभावोति दीपेति, तेन युत्तायुत्तीनं हेतुं दस्सेति ।

४. योनिसोमनसिकारादीति आदिसद्देन सद्धम्मस्सवनसप्पुरिसूपनिस्सयादिसाधारणं, असाधारणञ्च देय्यपटिग्गाहकादिं सङ्गण्हाति । **सम्भवतो**ति यथारहं तस्स धम्मस्स अनुरूपं । **याव सव्वधम्मा**ति एत्थ **सव्वं** नाम पदेससव्वं, न सव्वसव्वन्ति । अयञ्हि **सव्व**सद्दो यथा पठमविकप्पे सुत्ते आगतधम्मवसेन पदेसविसयो, एवं दुतियविकप्पे पदट्ठानपदट्ठानिकनिद्धारणेन तंतंपकरणपरिच्छिन्नधम्मगहणतो पदेसविसयो एव, न अनवसेसधम्मविसयोति । सुत्तागतधम्मानं यानि पदट्ठानानि, तेसञ्च यानीति एवं कारणपरम्परानिद्धारणलक्खणो पदट्ठानहारो, परिक्खारहारो पन सुत्तागतधम्मानं तंतंपच्चयुप्पन्नानं पटिहेतुपच्चयताविसेसविभावनलक्खणोति सतिपि कारणविचारणभावे अयं पदट्ठानहारपरिक्खारहारानं विसेसो ।

५. यथा “समानाधिकरणसमानपदे”तिआदीसु एकसद्धस्स अत्थो **समान**सद्दो, एवं एकरसद्धेन भावना “एकुप्पादा”तिआदीसु (कथा० ४७३) विय **एकलक्खणा**ति एत्थ **एक**सद्दो समानत्थोति आह “**समानलक्खणा**”ति । **संवण्णनावसेना**ति एत्थ कम्मत्थे **अन-**सद्दो, संवण्णेतव्वतावसेनाति अत्थो । **लक्खणा**ति उपलक्खणा । “नानत्तकायनानत्तसज्जिनो (दी० नि० ३.३४१, ३५७, ३५९; अ० नि० ९.२४), नानत्तसज्जानं अमनसिकारा”तिआदीसु **सहचारिता** दट्ठब्बा । सज्जासहगता हि धम्मा तत्थ सज्जागहणेन गहिता । “ददं मित्तानि गन्थती”तिआदीसु (सं० नि० १.२४६; सु० नि० १८९) **समानकिच्चता** । पियवचनत्थचरिया समानत्ततापि हि तत्थ मित्तगन्थनकिच्चेन समानकिच्चा गहन्ति सङ्गहवत्थुभावतो । “फस्सपच्चया वेदना”तिआदीसु (म० नि० ३.१२६; सं० नि० २.१, ३९; महाव० १; विभ० २२५; उदा० १; नेत्ति० २४) **समानहेतुता** । यथा हि फस्सो वेदनाय, एवं सज्जादीनम्पि सहजातादिना पच्चयो होति एवाति तेपि समानहेतुताय वुत्ता एव होन्ति । तथा हि वुत्तं “तज्जामनोविज्जाणधातुसम्फस्सजा चेतना”ति (ध० स० ५), “फुट्ठो सज्जानाति, फुट्ठो चेतेती”तिआदि (सं० नि० ४.९३) । एवं “तण्हापच्चया उपादान”न्ति (म० नि० ३.१२६; सं० नि० २.१, ३९; महाव० १; विभ० २२५; उदा० १; नेत्ति० २४) एवमादिपि उदाहरितव्वं । “अविज्जापच्चया सङ्खारा”तिआदीसु (म० नि० ३.१२६; सं० नि० २.१, ३९; महाव० १; विभ० २२५; उदा० १; नेत्ति० २४) **समानफलता** दट्ठब्बा । यथा हि सङ्खारा अविज्जाय फलं, एवं तण्हुपादादीनम्पीति तेपि तत्थ गहिताव होन्ति । तेनाह “पुरिमकम्मभवस्मिं मोहो अविज्जा आयूहना सङ्खारा निकन्ति तण्हा उपगमनं उपादान”न्ति । “रूपं अस्सादेति अभिनन्दति, तं आरब्भ रागो उप्पज्जती”ति (पट्ठा० १.१.४२४) वुत्ते तंसम्पयुत्ता वेदनादयो वुत्ता एव होन्ति समानारम्भणभावतो । न हि तेहि विना तस्स उप्पत्ति अत्थि । **एवमादीहीति** एत्थ आदिसद्देन अत्थप्पकरणलिङ्गसदन्तरसन्निधानसामत्थियादीनम्पि सङ्गहो दट्ठब्बो । अत्थादिवसेनपि हि सुत्ते अवुत्तानम्पि वुत्तानं विय निद्धारणं सम्भवतीति । **वुत्तप्पकारेना**ति “वधकट्टेन एकलक्खणानी”तिआदिना पाळियं, “सहचारिता”तिआदिना अट्ठकथायञ्च वुत्तेन पकारेन ।

६. “फुसनट्टेन फस्सो”तिआदिना निद्दारेत्वा वचनं **निब्बचनं**, तं पन पदस्सेव, न वाक्यस्साति आह “**पदनिब्बचनं**”न्ति । अधिप्पायनिदानानिपेत्थ ब्यज्जनमुखेनेव निद्दारेत्वा निब्बचनपुब्बापरसन्धीसु वत्तव्वमेव नत्थीति आह “**विसेसतो ब्यज्जनद्वारेनेव अत्थपरियेसना**”ति । **पवत्तिनिमित्तं** अज्झासयादि ।

७. “**पदट्ठाने**”ति इदं सुत्ते आगतधम्मानं कारणभूतेपि धम्मे निद्दारेत्वा सभागतो, विसभागतो च आवट्टनं कातव्वन्ति दस्सनत्थं वुत्तं, न तन्तिवसेन । तस्मा पदट्ठाननिद्धारणाय विनापि आवट्टनं युत्तमेवाति सिद्धं होति । पदस्स वा सहपवत्तिट्ठानं **पदट्ठानं** पदत्थो । एतस्मिं पक्खे “आरम्भथ निक्कमथाति (सं० नि० १.१८५; नेत्ति० २९; पेटको० ३८; मि०

प० ५.१.४) वीरियस्स पदद्वान'न्ति (नेत्ति० २९) एत्थ ख्यायमारम्भधातुआदिको अत्थो वुत्तो, तं वीरियसदस्स पवत्तिद्वानं वीरियसद्वाभिधेय्यो अत्थोति एवमत्थो वेदितब्बो । सेसेसुपि एसेव नयो । **सेसकं** नामगहिततो इतरं, तं पन तस्स पटिपक्खभूतं वा सिया, अज्जं वाति आह **“विसभागताय अगगहणेन वा”**ति । **संवण्णनाय योजेन्तो**ति यथावुत्तविसभागधम्मनिद्वारणभूतेन अत्थकथनेन पाळियं योजेन्तो । तेनाह **“देसन”**न्ति । **“पटिपक्खे”**ति इदं निदस्सनमत्तं दट्ठब्बं सभागधम्मवसेनपि आवट्टनस्स इच्छितत्ता ।

८. नामवसेनाति साधारणनामवसेन । पाळियं पन ‘मिच्छत्तनियतानं सत्तानं, अनियतानञ्च सत्तानं दस्सनपहातब्बा किलेसा साधारणा’ति आगतत्ता (नेत्ति० ३४) **“दस्सनपहातब्बादिनामवसेना”**ति वुत्तं । **वत्थुवसेनाति** सत्तसन्तानवसेन । सो हि धम्मानं पवत्तिद्वानताय इध **“वत्थू”**ति अधिप्पेतो । तेनाह — **“पुथुज्जनस्स, सोतापन्नस्स च कामरागव्यापादा साधारणा”**ति आदि (नेत्ति० ३४) । **वुत्तविपरियायेनाति** नामतो, वत्थुतो च आवेणिकताय । तंतंमगगफलद्वानज्हि तंतंमगगफलद्वता, भब्बानं भब्बता, अभब्बानं अभब्बता असाधारणा ।

९. “भाविते”ति इदं भावनाकिरियाय उपलक्खणं, न एत्थ कालवचनिच्छाति आह **“भावेतब्बेति अत्थो”**ति । भावना चेत्थ आसेवनाति, कुसलसद्दोपि अनवज्जट्ठोति वेदितब्बो । **पटिपक्खतोति** विपक्खतो । विसदिसूदाहरणेन व्यतिरेकतो यथाधिप्पेतधम्मपतिद्वाना हेसा ।

१०. पदत्थस्साति पदाभिधेय्यस्स अत्थस्स, सभावधम्मस्स वा ।

निक्खेपो देसना । **पभवो** समुदयो ।

१२. “अवुत्तानमि सङ्गहो”ति इमिना अवुत्तसमुच्चयत्थो च-सद्दोति दस्सेति ।

१३. “गाथारुद्धे”ति इमिना पाळिआगतोव पज्जो वेदितब्बो, न इतरोति दस्सेति । तेनाह **“बुद्धादीहि व्याकते”**ति । तस्स अत्थस्साति आरब्धस्स अत्थस्स, तेन आरम्भसोधनस्स विसयमाह । एत्थ च अत्थद्वारेनेव पदपुच्छासोधनमि करीयतीति पुन **“तस्स अत्थस्सा”**ति वुत्तं । अथ वा **विस्सज्जितम्हीति** विस्सज्जने । विस्सज्जनसोधनेन हि पज्जासोधनं । **पज्जेति** पुच्छायं । **गाथायन्ति** उपलक्खणं, तेन गाथायं, सुत्तगेय्यादीसु चाति वुत्तं होति । **यमारब्भाति** यं सीलादिमारब्भ गाथादीसु देसितं, तस्मिं आरम्भेति अत्थो । **पुच्छिताति** पुच्छाकारिनी, **“का एत्थ पदसुद्धि, का पज्जासुद्धि, का आरम्भसुद्धी”**ति एवं पुच्छाकारिनी पुच्छं कत्वा पवत्तिता सुद्धासुद्धपरिक्खाति योजना ।

१४. न विकप्पयितब्बाति यथा लोके **“जाति सामज्जं, भेदो सामज्जं, सम्बन्धो सामज्जं”**न्ति आदिना सामज्जं जातिआदिं, तब्बिधुरञ्च विसेसं विकप्पेन्ति परिकप्पेन्ति, एवं न विकप्पयितब्बाति अत्थो । यदा यो कालविसेसो **“स्वे”**ति लद्धवोहारो, तदा सो तंदिवसातिककमे **“अज्जा”**ति, पुन तंदिवसातिककमे **“हिय्यो”**ति वोहरीयतीति अनवट्टितसभावा एते कालविसेसा । दिसायपि **“एकं अर्वाधिं अपेक्खित्वा पुरत्थिमा दिसा, ततो अज्जं अपेक्खित्वा पच्छिमा नाम होती”**ति आदिना अनवट्टितसभावता वेदितब्बा । **जातिआदिअपेक्खायाति** जातिआदिदुक्खविसेसापेक्खाय । **सच्चापेक्खायाति** सच्चसामज्जापेक्खाय । **“तण्हा”**ति वुच्चमानं कामतण्हादिअपेक्खाय सामज्जमि समानं सच्चापेक्खाय विसेसो होतीति एवमादिं सन्धायाह **“एस नयो समुदयादीसुपी”**ति ।

१६. एत्थाति एतस्मिं बुद्धवचने । तेनाह “सिक्खत्तयसङ्घातस्सा”तिआदि । यथारुतं यथाकथितं सद्वतो अधिगतं निद्वारितं, न अत्थप्पकरणलिङ्गसद्वन्तरसन्निधानादिप्पमाणन्तराधिगतं । “अत्थतो दस्सिता”ति इदं यस्मिं सुत्ते भावनाव कथिता, न पहानं, तं सन्धाय वुत्तं ।

नयसङ्केपवण्णना

१७. तण्हाविज्जाहि करणभूताहि । संकिलेसो पक्खो एतस्साति **संकिलेसपक्खो**, संकिलेसपक्खिको सुत्तत्थो, तस्स नयनलक्खणोति योजना । वोदानपक्खस्स सुत्तत्थस्साति सम्बन्धो । वुट्ठानगामिनिया, बलवविपस्सनाय च दुक्खादीसु परिज्जेय्यतादीनि मग्गानुगुणो गहणाकारो **अनुगाहणनयो** । यदि एवं कथं नयोति आह “तस्स पना”तिआदि । तत्थ “नयवोहारो”ति इमिना नयाधिद्वानं नयोति वुत्तन्ति दस्सेति ।

१८. बाधकादिभावतोति बाधकपभवसन्तिनिय्यानभावतो । अज्जथाभावाभावेनाति अबाधकअप्पभवअसन्ति अनिय्यानभावाभावेन । **सच्चसभावत्ताति** अमुसासभावत्ता । **अविसंवादनतोति** अरियसभावादिभावस्स न विसंवादनतो एकन्तिकत्ताति अत्थो ।

१९. संकिलिद्वधम्माति संकिलेससमन्नागता धम्मा **सद्धम्मनयकोविदाति** सच्चपटिच्चसमुप्पादादिधम्मनयकुसला, एकत्तादिनयकुसला वा ।

२०. अत्थविस्सज्जनेसूति “इमे धम्मा कुसला”तिआदिना (ध० स० १) सुत्ते कतपञ्चविस्सज्जनेसु चेव अट्ठकथाय कतअत्थसंवण्णनासु च । “वोदानिया”ति इमिना अनवज्जधम्मा इध कुसलाति अधिप्पेता, न सुखविपाकाति दस्सेति । तस्स तस्स अत्थनयस्स योजनत्थं मनसा वो लोकयतेति योजना ।

२१. यदि करणभूतं, कथं तस्स अत्थन्तराभावोति आह “येन ही”तिआदि । दिसाभूतधम्मानं वो लोकयनसमानयनभावतो वोहारभूतो, कम्मभूतो च नयो, न नन्दियावट्टादयो विय अत्थभूतोति “वोहारनयो, कम्मनयो”ति च वुच्चति ।

द्वादसपदवण्णना

२३. अपरियोसिते पदेति उच्चारणवेलायं पदे असमत्ते, विप्पकतेति अत्थो । परियोसिते हि “पद”न्त्वे समज्जा सिया, न “अक्खर”न्ति अधिप्पायो । पदस्स वेवचनताय अत्थवसेन परियायं खरन्तं सज्जरन्तं विय होति, न एवं वण्णो अवेवचनत्ताति आह **परियायवसेन अक्खरणतो**”ति । न हि वण्णस्स **परियायो विज्जती**”ति इदं अकारादिवण्णविसेसं सन्धाय वदति, न वण्णसामज्जं । तस्स हि वण्णो अक्खरन्ति परियायो वुत्तो एवाति ।

अक्खरसद्वस्स अत्थं वत्वा तप्पसङ्गेन वण्णसद्वस्सपि वत्तुं “**केनट्टेन वण्णो**”तिआदिमाह । तत्थ ननु पदेन, वाक्येन वा अत्थो संवण्णीयति, न अक्खरेनाति चोदनं मनसि कत्वा आह “**वण्णो एव ही**”तिआदि । **पदादिभावेनाति** पदवाक्यभावेन । **यथासम्बन्धन्ति** यथासङ्केतं । **अयं**-सद्वो इमस्सत्थस्स वाचको, अयं अत्थो इमस्स सद्वस्स वचनीयोति यथागहितसङ्केतानुरूपं सद्वत्थानं वाचकवचनीयभावो । अथ वा य्वायं सद्वत्थानं अज्जमज्जं अविनाभावो, सो **सम्बन्धो** । तदनुरूपं एकक्खरं नामपदं “मा एवं मज्जसी”तिआदीसु **मा**-कारादि । **केचीति** अभयगिरिवासिनो । ते हि अभिधम्मदेसनं

“मनसादेसना”ति वदन्ति, यतो राहुलाचरियो “विसुद्धकरुणानं मनसादेसना वाचाय अक्खरणतो अक्खरसज्जिता”ति आह ।

सत्त्वप्पधानन्ति द्रव्यप्पधानं । नामपदे हि द्रव्यमाविभूतरूपं, किरिया अनाविभूतरूपा यथा “फस्सो”ति (मं नि० ३.१२६; सं० नि० २.१, ३९; महाव० १; विभ० २२५; उदा० १; नेत्ति० २४) । आख्यातपदे पन किरिया आविभूतरूपा, द्रव्यमनाविभूतरूपं यथा “फुसती”ति । तेन नेसं सत्त्वकिरियाप्पधानता वुत्ता । **किरियाविसेसग्गहणनिमित्तन्ति** किरियाविसेसावबोधहेतु किरियाविसेसदीपनतो, यथा “चिरप्पवासि”न्ति (ध० प० २१९) एत्थ प-सद्वो वसनकिरियाय वियोगविसिद्धतं दीपेति । “एवं मनसि करोथ, मा एवं मनसाकत्था”ति आदीसु किरियाविसेसस्स जोतको **एवं-सद्वो** । “एवंसीला (दी० नि० ३.१४२) एवंधम्मा”ति आदीसु (दी० नि० २.१३; मं नि० ३. १९८; सं० नि० ५.३७८) सत्त्वविसेसस्स । एवं सेसनिपातपदानम्पीति अधिप्पायो । तेनाह “**किरियाय...पे०... निपातपद**”न्ति ।

सङ्खेपतो वुत्तं, किं पन तन्ति आह “**पदाभिहित**”न्ति । अथ वा **सङ्खेपतो वुत्तं**, यो अक्खरेहि सङ्कासितोति वुच्चति । **पदाभिहितं** पदेहि कथितं, यो पदेहि पकासितोति वुच्चति । तदुभयं, यदि पदसमुदायो वाक्यं, तस्स को परिच्छेदो । यावता अधिप्पेतत्थपरियोसानं, तावता एकवाक्यन्तिपि वदन्ति, बहूपेत्य प्रकारे वण्णेन्ति । किं तेहि, साख्यातं साव्ययं सकारकं सविसेसनं “वाक्य”न्ति दट्ठब्बं । ननु च पदेनपि अत्थो व्यञ्जीयतीति चोदनं मनसि कत्वा आह “**पदमत्तसवनेपि ही**”ति आदि । आकारेसु वाक्यविभागेषु अभिहितं कथितं निब्बचनं **आकाराभिहितं निब्बचनं** । “**अभिहितन्ति च पाळिआगत**”न्ति वदन्ति ।

“निब्बानं मग्गति, निब्बानत्थिकेहि वा मग्गीयति, किलेसे वा मारेन्तो गच्छतीति **मग्गो**”ति आदिना (ध० स० अट्ठ० १६) निब्बचनानं वित्थारो । तंनिद्देसकथनत्ता निद्देसोति इममत्थमाह “**निब्बचनवित्थारो निरवसेसदेसनत्ता निद्देसो**”ति । **पदेहीति** वाक्यावयवभूतेहि, वाक्यतो विभज्जमानेहि वा आख्यातादिपदेहि । तेनाह “**वाक्यस्स विभागो**”ति, तथा चाह “**अपरियोसिते**”ति आदि । अपरे पन “पकतिपच्चयलोपादेसादिवसेन अक्खरविभागो **आकारो**, निरुत्तिनयेन पदविभागो **निब्बचनं**, वाक्यविभागो **निद्देसो** । **वण्णपदवाक्यानि** हि अविभक्तानि, विभक्तानि च छ **व्यञ्जनपदानी**”ति वदन्ति । **छट्ठं वचनन्ति** छट्ठं पदं । **कातब्बन्ति** “अक्खरं पदं व्यञ्जनं आकारो तथेव निरुत्ति निद्देसो छट्ठवचन”न्ति गाथायं एवं कत्तब्बं, संवण्णनावसेन वा आकारपदं चतुत्थं कातब्बन्ति अत्थो । सब्बो सद्वोहारो विभत्तेहि, अविभत्तेहि च अक्खरपदवाक्येहेव, तद्व्यञ्जकारो नत्थीति आह “**यानिमानि**”ति आदि ।

२४. कासनासद्वो कम्मत्थोति दस्सेतुं “**कासीयती**”ति आदि वुत्तं । पदेहि ताव अत्थस्स सङ्कासना, पकासना च होतु, पदावधिकापि संवण्णना इच्छिताति अक्खरेहि पन कथन्ति आह “**अक्खरेहि सुय्यमानेही**”ति आदि । **पदत्थसम्पटिपत्तीति** पदाभिधेय्यअत्थावबोधो । “**अक्खरेहि सङ्कासेती**”ति आदिना अक्खरकरणं सङ्कासनभूतं उग्घटनकिरियं वदन्तेन यथावुत्तो अत्थो साधितोति दस्सेतुं “**तथा ही**”ति आदि वुत्तं ।

विभजनुत्तानीकम्मपञ्चत्तीति एकत्तनिद्देसो समाहारोति अयं द्वन्द्वसमासो । **उभयेनाति** “विवरणा, विभजना”ति इमिना द्वयेन । **एतेहीति** एत्थ एव-कारो लुत्तनिद्दिट्ठोति आह “**एतेहि एवा**”ति । “**सङ्कासना...पे०... अभावतो**”ति इमिना यथाधिप्पेतअनूनावधारणफलं दस्सेति । **उग्घटनादीति** आदिसद्देन विपञ्चननयानि सङ्गणहाति ।

२५. सम्मा युत्तोति सम्मा अविपरीतं, अनवसेसतो च युत्तो सहितो । तथा हि वुत्तं “**अनूना**”ति । सब्बो हि

पाळिअत्थो अत्थपदअत्थनयेहि अनवसेसतो सङ्गहितो । तेनाह “सब्बस्स ही”तिआदि ।

२६. कस्मा पनेत्थ मूलपदपदट्टानानि असङ्गहितानीति? पदत्थन्तराभावतो । मूलपदानि हि नयानं समुद्धानमत्तत्ता पदट्टानानीति दस्सितोयं नयो । तेन वुत्तं “इतो विनिमुत्तो कोचि नेत्तिपदत्थो नत्थी”ति ।

नेत्तिया कारणभूताय । हारा संवण्णेत्तब्बाति सुत्तस्स अत्थसंवण्णनावसेन हारा वित्थारेत्तब्बा । स्वायन्ति सो अयं संवण्णनावकमो । येन अनुक्कमेन नेत्तियं देसिता, तेनेव सुत्ते अत्थसंवण्णनावसेन योजेतब्बाति । एवं सिद्धेति देसनावकमेनेव सिद्धे । अयं आरम्भोति “सोळस हारा पठम”न्ति एवं पवत्तो आरम्भो । इममत्थन्ति इमं वुच्चमाननियमसङ्घातं अत्थं ।

यदि देसितक्कमेनेव हारनया सुत्ते योजेतब्बा सियुं, किं सो कमो कारणनिरपेक्खो, उदाहु कारणसापेक्खोति? किञ्चेत्थ — यदि ताव कारणनिरपेक्खो हारनयानं अनुक्कमो, अनेके अत्था वुच्चमाना अवस्सं एकेन कमेन वुच्चन्तीति । एवं सन्ते येन केनचि कमेन सुत्ते योजेतब्बा सियुं, तथा सति नियमो निरत्थको सिया । अथ कारणसापेक्खो, किं तं कारणन्ति? इतरो कारणगवेसनं अक्त्वा अत्थो एवेत्थ गवेसितब्बोति अधिप्पायेन “नायमनुयोगो न कत्थचि अनुक्कमे निविसती”ति वत्त्वा “न पन मयं देवानंपियस्स मनोरथविघाताय चेतमा”ति कमकारणं विचारेन्तो “अपिचा”तिआदिना देसनाहारस्स ताव आदितो देसनाय कारणं पतिट्ठपेति । तत्थ धम्मदेसनाय निस्सयो अस्सादादीनवनिस्सरणानि, सरीरं आणत्ति । पकतिया सभावेन । निद्धारणेन विनापि पतिट्ठाभावतो निस्सयभावतो ।

“तथा हि वक्खती”तिआदिना यथावुत्तं अत्थं पाकटतरं करोति । एस नयो इतरेसुपि ।

विचयानन्तरन्ति विचयहारानन्तरं । सेसेसुपि एसेव नयो । तथा हीति लक्खणहारविभङ्गे युत्तायुत्तानं कारणपरम्पराय परिग्गहितसभावानं अवुत्तानम्पि एकलक्खणताय गहणं वुत्तं ।

अत्थतो निद्धारितानन्ति अत्थुद्धारपुब्बापरानुसन्धिआदिअत्थतो सुत्तन्तरतो उद्धटानं संवण्णियमानसुत्ते आनीतानं पाळिधम्मनं । सद्दतो, पमाणन्तरतो च लद्धानं इध विचारेत्तब्बत्ता आह “निरवसेसतो”ति । अत्थस्साति अभिधेय्यत्थस्स । धम्मस्साति सभावधम्मस्स । तत्थ तत्थ तं अभिनिरोपेतीति तस्मिं तस्मिं अत्थे, धम्मे च तं नामं अभिनिरोपेति, “अयमेवंनामो”ति वोहरति । “अत्थस्स, धम्मस्सा”ति पदद्वयेन सामञ्जसतो अत्थो, धम्मो च अनवसेसेत्वा गहितोति आह “अनवसेसपरियादान”न्ति, यतो वुत्तं “तत्थ तत्था”ति । तथाति यथा अनवसेसत्थावबोधदीपकं अनवसेसपरियादानं कतं चतुब्बूहपाळियं, एवं पुनप्पुनं गब्भमुपेतीति एत्थ असद्दवती अत्था पवत्तिवसेन लब्भमाना सम्मापटिपत्ति उद्धटाति उपसंहारत्थो तथा-सद्दो ।

तेनेवाति सुत्तन्तरसंसन्दनस्स सभागविसभागधम्मन्तरावट्टनूपायभावतो एव । यतोति सभागविसभागधम्मावट्टनस्स साधारणादिधम्मविभजनूपायत्ता । पटिविभत्तसभावेति पटिभागभावेन विभत्तसभावे ।

ते धम्माति पटिपक्खतो परिवत्तितधम्मा । न परियायविभावना पञ्जत्तिविभागपरिग्गाहिकाति आह “परिया... पे०... सुबोधनञ्चा”ति ।

पुच्छाविसोधनं विस्सज्जनं । आरम्भविसोधनं देसनाय अत्थकथनं । तदुभयविचारो धातादीसु असम्मुहन्तस्सेव

सम्भवतीति आह “धातायतना...पे०... सम्पादेतु”न्ति । सुद्धो आरम्भोतिआदिपाळिनिदस्सनेनपि अयमेवत्थो उदाहटोति वेदितब्बं ।

“कारणाकारो”ति पदद्वानं सन्धाय वदति । पभेदतो देसनाकारोति वेवचनं । निद्धारेत्वा वुच्चमानानीति उद्धरित्वा समारोपियमानानीति अधिष्पायो । सुत्तस्स अत्थं तथत्तावबोधायाति सुत्तस्स पदत्थावगममुखेन चतुसच्चाभिसमयाय ।

वेनेय्यत्तययुत्तो अत्थनयत्तयूपदेसो “वेनेय्यत्तयप्पयोजितो”ति वुत्तो । वेनेय्यत्तयज्झि पच्चयसमवाये तदुपदेसफलं अधिगच्छन्तं अत्थं पयोजेति नामाति । तदनुक्कमेनेवाति तेसं उग्घटितज्जुआदीनं देसनानुक्कमेनेव । तेति तयो अत्थनया । तेसन्ति उग्घटितज्जुआदीनं । यथा उद्देसादीनं सङ्खेपमज्झिमवित्थारवुत्तिया तिण्णं पुग्गलानं उपकारता, एवं तेसं अत्थनयानं । तस्साति अत्थनयत्थस्स । तत्थाति तस्सं तस्सं भूमियं ।

समुद्धानं निदानं । अनेकथा सहनयतो, निरुत्तिनयतो चाति अनेकप्पकारं । पदत्थो सहत्थो । विधि अनुवादोति इदमेत्थ विधिवचनं, अयमनुवादोति अयं विभागो वेदितब्बो । समाधातब्बोति परिहरितब्बो । अनुसन्धीया अनुरूपं निगमेतब्बन्ति याय अनुसन्धिया सुत्ते उपरि देसना पवत्ता, तदनुरूपं संवण्णना निगमेतब्बा । पयोजनन्ति फलं । पिण्डत्थोति सङ्खेपत्थो । अनुसन्धीति पुच्छानुसन्धिआदिअनुसन्धि । उपोग्घाटोति निदस्सनं । चालनाति चोदना । पच्चुपद्धानं परिहारो ।

पकतिआदिपदावयवं भिन्दित्वा कथनं भेदकथा यथा “दिब्बन्तीति देवा”ति (म० नि० अट्ठ० १.१५३) । पदस्स अत्थकथनं तत्त्वकथा यथा “बुद्धोति यो सो भगवा सयम्भू अनाचरियको”ति (महानि० १९२; चूलनि० पारायनत्थुतिगाथानिद्देस ९७; पटि० म० १.१६१) । परियायवचनं वेवचनगहणं यथा “पज्जा पजानना”ति (ध० स० १६) । विचययुत्तिचतुब्यूहपरिवत्तनहारेकदेससङ्गहिता, वेवचनहारसङ्गहिता चाति आह “ते इध कतिपयहारसङ्गहिता”ति ।

अत्तनो फलं धारेतीति धम्मोति हेतुनो धम्मभावो वेदितब्बो । जापकहेतूपि जाणकरणट्टेन कारके पक्खिपित्वा आह “कारको सम्पापकोति दुविधो”ति । पुन चक्खुबीजादिनिब्बत्तकमेव कारणं कत्वा दस्सेन्तो “पुन...पे०... तिविधो”तिआदिमाह । “तयो कुसलहेतू”तिआदिना (ध० स० १०५९-१०६०) आगता अलोभादयो, लोभादयो च हेतुहेतु नाम । “चत्तारो खो, भिक्खवे, महाभूता हेतु, चत्तारो महाभूता पच्चयो रूपक्खन्धस्स पज्जापनाया”तिआदिना (म० नि० ३.८६) आगतो पच्चयहेतु नाम । कुसलाकुसलं कम्मं अत्तनो विपाकं पति उत्तमहेतु नाम । चक्खादिबीजादि चक्खुविज्जाणअङ्कुरादीनं असाधारणहेतु नाम । कुसलाकुसलानं सतिपि पच्चयधम्मभावे इट्ठानिट्ठफलविसेसहेतुभावदस्सनत्थं विसुं गहणं, सदमगगानं पन जापकसम्पापकहेतुभावदस्सनत्थन्ति दट्ठब्बं । अङ्कुरादिकस्स असाधारणहेतु बीजादिसमानजातियहेतुताय सभागहेतु । साधारणहेतु भुससलिलादिअसमानजातियताय असभागहेतु । इन्द्रियबद्धसन्तानिको अज्झत्तिकहेतु, इतरो बाहिरहेतु । केचि पन “ससन्तानिको अज्झत्तिकहेतु, इतरो बाहिरहेतू”ति वदन्ति । परिग्गाहको उपत्थम्भको । परम्परहेतु उपनिस्सयपच्चयो ।

निब्बानस्स अनिब्बत्तनियेपि समुदयप्पहानसमुदयनिरोधानं अधिगमाधिगन्तब्बभावतो निब्बानं पति मग्गस्स हेतुभावो विय मग्गं पति निब्बानस्स फलभावो उपचारसिद्धोति आह “फलपरियायो लब्भती”ति ।

पटिपज्जमानभूमि मग्गधम्मा । पटिपन्नभूमि फलधम्मा ।

किञ्चतोति सरसतो । **लक्खणतोति** उपलक्खणतो । **सामञ्जतोति** समानभावतो । तेन समानहेतुता, समानफलता, समानारम्भणता च गहिता होतीति । तत्थ यं वत्तब्बं, तं हेट्ठा **लक्खणहारनिदेसवण्णनायं** वुत्तमेव ।

अपिचेत्थ सम्पयोगविषयविरोधपकरणलिङ्गसदन्तरसन्निधानसामत्थियादीनम्पि वसेन नयविभागो वेदितब्बो । तत्थ **सम्पयोगतो** तावनयविभागो — “नाहं, भिक्खवे, अञ्जं एकधम्मम्पि समनुपस्सामि, यं एवं लहुपरिवत्तं, यथयिदं चित्तं”न्ति (अ० नि० १.४८) चित्तस्स लहुपरिवत्तिता गहिता, तंसम्पयोगतो चेतसिकानम्पि गहिताव होति अञ्जत्थ नेसं चित्तेन सम्पयोगदीपनतो । अथ वा “सज्जिनो”ति । सज्जासहिततावचनेन हि नेसं वेदनाचेतनादिवन्ततापि सम्पयोगतो दीपिता होति ।

विषययोगतो — “अहेतुका”ति । हेतुसम्पयुत्ता हि धम्मा “सहेतुका”ति वुत्ताति तब्बिधुरा धम्मा विषययोगतो “अहेतुका”ति वुत्ताति विज्जायति । अथ वा “असज्जिनो”ति । सज्जाविषययुत्ता हि धम्मपवत्ति इधाधिप्पेता, न सज्जाय अभावमत्तन्ति विज्जायति ।

विरोधतो — “अट्टमको (यम० ३.इन्द्रियमकपाळि.४३९), सद्धानुसारी”ति (पु० प० मातिका ७.३६) च वुत्ते तं सन्ततियं संयोजनत्तयप्पहानं विज्जायति, तथा “सति वा उपादिसेसे अनागामिता”ति (दी० नि० २.४०४; म० नि० १.१३७) वुत्ते पञ्चोरम्भागियसंयोजनप्पहानं, “दिट्ठेव धम्मे अज्जा”ति (दी० नि० २.४०४; म० नि० १.१३७) वुत्ते अनवसेससंयोजनप्पहानं विज्जायति ।

पकरणतो — “अव्याकता धम्मा”ति (ध० स० मातिका) । अधिकारतो हि कुसलाकुसलभावेन न कथिताति जायति । “उपधी हि नरस्स सोचना”ति (सं० नि० १.१२, १४४) च । बाहिरा हि धम्मा इध “उपधी”ति अधिप्पेताति विज्जायति ।

लिङ्गतो — “सीतेनपि रुप्पति, उण्हेनपि रुप्पती”तिआदि (सं० नि० ३.७९) । सीतादिग्गहणेन हि लिङ्गेन भूतुपादायप्पकारस्सेव धम्मस्स रूपभावो, न इतरस्स ।

सदन्तरसन्निधानतो — “कायपस्सद्धि, कायायतन”न्ति । “या वेदनाक्खन्धस्सा”तिआदिवचनतो हि पुरिमो कायसद्वो समूहवाची, इतरो आयतनसद्वसन्निधानतो पसादवाची ।

सामत्थियतो — “सब्बं, भिक्खवे, आदित्तं (सं० नि० ४.२८; महाव० ५४), सब्बे तसन्ति दण्डस्सा”ति (ध० प० १२९) च, तथा “सब्बावन्तं लोकं मेत्तासहगतेन चेतसा...पे... फरित्वा विहरती”तिआदि (दी० नि० १.५५६; ३.३०८; म० नि० १.७७, २३२, ४५९, ५०९; २.३०९; ३.२३०; विभ० ६४२) । एत्थ हि सतिपि सब्बसद्वस्स अनवसेससत्तवाचकत्ते आदित्तता सापेक्खस्सेव अत्थस्स वाचकत्ता पदेसवाची सब्बसद्वो, लोकसद्वोपि सत्तवाची । सत्तारम्भणा हि अप्पमज्जाति । तथा “मातरं पितरं हन्त्वा”ति (ध० प० २९४-२९५) सब्बेन सब्बं हि सपटिक्खेपतो, मातुपितुघातकम्मस्स च महासावज्जतापवेदनतो, इध च तदनुज्जाय कताय मातुपितुड्डानिया तादिसा केचि पापधम्मा वेनेय्यवसेन गहिता विज्जायति । के पन तेति? तण्हामाना । तण्हा हि जननी सत्तानं । “तण्हा जनेति पुरिस”न्ति (सं० नि० १.५५-५७) हि वुत्तं । पितुड्डानियो मानो तं निस्साय अत्तसम्पग्गणहतो “अहं असुकस्स रुज्जो, राजमहामत्तस्स वा पुत्तो”ति यथा । **सामत्थियादीनन्ति** आदिसद्देन देसपकतिआदयो सङ्गहन्ति ।

लब्धमानपदतथनिद्वारणमुखेनाति तस्मिं तस्मिं सुत्ते लब्धमानअस्सादादिहारपदतथनिद्वारणद्वारेण ।
यथालक्खणन्ति यं यं लक्खणं, लक्खणानुरूपं वा यथालक्खणं । हेतुफलादीनि उपधारेत्वा योजेतब्बानि तेसं वसेनाति
अधिप्पायो । इदानीं हेतुफलादयो ये यस्मिं हारे सविसेसं इच्छितब्बा, ते दस्सेतुं “विसेसतो पना”तिआदिमाह । तं
सुविज्जेय्यमेव ।

निद्वेसवारवण्णना निद्विता ।

४. पटिनिद्वेसवारवण्णना

१. देसनाहारविभङ्गवण्णना

५. अन्वत्थसञ्जतन्ति अत्थानुगतसञ्जभावं, “देसनाहारो”ति अयं सञ्जा अन्वत्था अत्थानुगताति अत्थो ।

अवुत्तमेवाति पुब्बे असंवण्णितपदमेव । “धम्मं वो”तिआदि (म० नि० ३.४२०) वचनस्स सम्बन्धं दस्सेतुं “कत्थ
पना”तिआदि वुत्तं । तेपिटकस्स हि बुद्धवचनस्स संवण्णनालक्खणं नेत्तिप्पकरणं, तच्च परियत्तिधम्मसङ्गाहके सुत्तपदे
संवण्णेतब्बभावेन गहिते गहितमेव होति । तेनाह “देसनाहारेण...पे०... दस्सेती”ति ।

येसं अस्सादादीनं विभजनलक्खणो देसनाहारो, ते गाथाय, इधापि च आगते “अस्सादं आदीनव”न्तिआदिना
उदाहरणवसेन विभजितुं “तत्थ कतमो अस्सादो”तिआदि आरब्धं । तत्थ तत्थाति तस्सं “अस्सादादीनवता”ति गाथायं
वुत्तो कतमो अस्सादो । अथ वा “अस्सादं आदीनव”न्तिआदिना यो इध अस्सादादीनं उद्देशो, तत्थ कतमो अस्सादोति
चेति अत्थो । एस नयो सेसेसुपि । कम्मकरणत्थभिन्नस्स विसयविसयितालक्खणस्स अस्सादद्वयस्स निदस्सनत्थं
गाथाद्वयुदाहरणं, तथा कामविपरिणामलक्खणस्स, वट्टदुक्खलक्खणस्स चाति दुविधस्सापि आदीनवस्स निदस्सनत्थं
“अरियमग्गो निब्बान”न्ति दुविधस्सापि निस्सरणस्स निदस्सननिदस्सनत्थञ्च द्वे द्वे गाथा उदाहटा ।

धम्मो हवे रक्खति धम्मचारिन्ति (जा० १.१०.१०२-१०३; नेत्ति० ५, २६, ३१; पेटको० २२) एत्थ धम्मचारिनो
मग्गफलनिब्बानेहि सातिसयारक्खा सम्भवति, सम्पत्तिभवस्सापि विपरिणामसङ्खारदुक्खताहि दुग्गतिभावो इच्छितोवाति
अधिप्पायेनाह “निस्सरणं अनामसित्वा”ति । तथा हि वक्खति “निब्बानं वा उपनिधाय सब्बा उपपत्तियो दुग्गती”ति ।

अवेक्खस्सूति विधानं । तस्सा पन अवेक्खाय पवत्तिआकारो, विसयो, कत्ता च “सुञ्जतो, लोकं, मोघराजा”ति
पदत्तयेन वुत्ताति आह — “सुञ्जतो...पे०... आणत्ती”ति । तत्थ सङ्खारानं सुञ्जता अनत्तसभावताय, अत्तसुञ्जताय च
सिया । यतो ते न वसवत्तिनो, अत्तसारविरहिता च, यतो ते अनत्ता, रिक्ता, तुच्छा च अत्तना, तदुभयं दस्सेति
“अवसवत्तिता”तिआदिना । एवं मच्चुतरो सियाति एवं पटिपत्तिया मच्चुतरो भवेय्याति अत्थो । परिकप्पेत्वा
विधियमानस्स मच्चुतरणस्स पुब्बभागपटिपदा देसनाय पच्चक्खतो सिज्झमानं सातिसयं फलन्ति आह “तस्स यं...पे०...
फल”न्ति ।

६. उदाहरणवसेनाति निदस्सनवसेन । तत्थ “पुग्गलविभागेना”ति इमिना उग्घटितञ्जुआदिपुग्गलपयोजितो
अस्सादादीसु भगवतो देसनाविसेसोति दस्सेति ।

घटितमत्तन्ति सोतद्वारानुसारेण मनोद्वारिकविज्जाणसन्तानेन आलम्बितमत्तं । सस्सतादिआकारस्साति सस्सतुच्छेदाकारस्स । इदञ्च द्वयं धम्मदेसनाय चालेतब्बं, न अनुलोमिकखन्ति, यथाभूतजाणं वा । एतस्मिञ्चि चतुक्के आसयसामञ्जता । वुत्तज्हेतं —

“सस्सतुच्छेददिट्ठी च, खन्ति चवानुलोमिका ।

यथाभूतञ्च यं जाणं, एतं आसयसज्जितं”न्ति ॥ (विसुद्धि० महाटी० १.१३६; दी० नि० टी०

१.पठममहासङ्गीतिकथावण्णना; सारत्थ० टी० १.पठममहासङ्गीतिकथावण्णना, वेरञ्जकण्डवण्णना; वि० वि० टी० १.वेरञ्जकण्डवण्णना) ।

चलनायाति विक्खम्भनाय । परानुवत्तियाति समुच्छेदनाय । उग्घटिते जानातीति उग्घटितञ्जूति मूलविभुजादिपक्खेपेन सहसिद्धि वेदितब्बा । विपज्जितन्ति “विसमं चन्दिमसूरिया परिवत्तन्ती”तिआदीसु (अ० नि० ४.७०) विय भावनपुंसकनिद्देशोति आह “मन्दं सणिक”न्ति । निस्सरणआदीनवनिस्सरणअस्सादादीनवनिस्सरणानं विभावना वेनेय्यत्तयविनयनसमत्था ।

चत्तारोति अस्सादो च आदीनवो च अस्सादो आदीनवो च अस्सादो निस्सरणञ्चाति एते चत्तारो । यदि निस्सरणविभावना वेनेय्यविनयनसमत्था, कस्मा पञ्चमो न गहितोति आह “आदीनवावचनतो”ति । यदि हि उग्घटितञ्जुं सन्धाय अयं नयो वुच्चति, निस्सरणमत्तेन सिद्धं सिया । अथ विपज्जितञ्जुं, नेय्यं वा, आदीनवो च निस्सरणञ्च अस्सादो च आदीनवो निस्सरणञ्च वत्तब्बो सिया? तथा अप्पवत्तत्ता न गहितो । तेनाह “आदीनवावचनतो”तिआदि । देसनन्ति सामञ्जतो गहितं “सुत्तेकदेसं गाथं वा”ति विसेसेति । पदपरमअगगहणञ्चेत्थ सउपायस्स निस्सरणस्स अनामट्टत्ता ।

“कल्याण”न्ति इमिना इट्ठविपाको, “पापक”न्ति अनिट्ठविपाको अधिप्पेतोति आह “अयं अस्सादो, अयं आदीनवो”ति । लाभादीनं पुज्जफलत्ता तदनुरोधं वा सन्धाय “अयं अस्सादो”ति वुत्तं । तब्बिपरियायेन अलाभादीनं आदीनवता वेदितब्बा ।

कामाति किलेसकामसहिता वत्थुकामा । विरूपरूपेनाति अप्पतिरूपाकारेण । मथेन्तीति मद्दन्ति । पब्बजितोम्हीति पब्बज्जं उपगतो अम्हि । अपण्णकन्ति अविरज्जनकं । सामञ्जन्ति समणभावो । समितपापभावोयेव सेय्यो सुन्दरतरो ।

तत्थ “कामा हि चित्रा मधुरा मनोरमा”ति अयं अस्सादो, “विरूपरूपेण मथेन्ति चित्त”न्ति अयं आदीनवो, “अपण्णकं सामञ्ज”न्ति इदं निस्सरणन्ति आह “अयं...पे०... निस्सरणञ्चा”ति ।

फलादीनं एककवसेन च तिकवसेन च पाळियं उदाहटत्ता वुत्तं “दुकवसेनपी”ति ।

सुखा पटिपदा, दुक्खा पटिपदाति या द्वे पटिपदा, तासु एकेका दन्धखिप्पाभिज्जताय द्वे द्वे होन्तीति आह “पटिपदाभिज्जाकतो विभागो पटिपदाकतो होती”ति । कतपुब्बकिच्चस्स पथवीकसिणादीसु सब्बपठमं “पथवी”तिआदिना पवत्तमनसिकारो पठमसमन्नाहारो । उपचारन्ति उपचारज्झानं । पटिपज्जितब्बताय ज्ञानम्पि “पटिपदा”ति वुच्चति । तदञ्जा हेट्ठिमपञ्जतो अधिका पञ्जाति कत्वा “अभिज्जा”ति वुच्चति ।

किलेसेति नीवरणप्पकारे, तंसहगतकिलेसे च । अङ्गपातुभावन्ति वितक्कादिज्ञानङ्गपटिलाभं ।

अभिनिविसन्तोति पट्टपेन्तो । **रूपारूपं परिगगणहन्तोति** रूपारूपधम्मे लक्खणादीहि परिच्छिन्दित्वा गणहन्तो । परिगगहितरूपारूपस्स मग्गपातुभावदन्धता च नामरूपववत्थानादीनं किच्छसिद्धिया सियाति न रूपारूपपरिगगहकिच्छताय एव दुक्खापटिपदता वत्तब्बाति चे? न, नामरूपववत्थानादीनं पच्चनीककिलेसमन्दताय सुखसिद्धियम्पि तथासिद्धविपस्सनासहगतानं इन्द्रियानं मन्दताय मग्गपातुभावतो । **रूपारूपं परिगगहेत्वाति** अकिच्छेनपि परिगगहेत्वा, किच्छेन परिगगहिते वत्तब्बमेव नत्थि । एवं सेसेसुपि । **नामरूपं ववत्थापेन्तोति** “नामरूपमत्तमेतं, न अज्जो कोचि सत्तादिको”ति ववत्थापनं करोन्तो । कतरो पनेत्थ वारो युत्तरूपोति? यो कोचि सकिं, द्विक्खत्तुं, अनेकसतक्खत्तुन्ति एवमादीसु हि विक्खम्भनवारोसु सकिं, द्विक्खत्तुञ्च विक्खम्भनवारो सुखा पटिपदा एव, न ततो उद्धं सुखा पटिपदा होति, तस्मा तिक्खत्तुं विक्खम्भनवारतो पट्टाय दुक्खा पटिपदा वेदितब्बा । अपिच कलापसम्मसनावसाने उदयब्बयानुपस्सनाय उप्पन्नस्स विपस्सनुपक्किलेसस्स तिक्खत्तुं विक्खम्भनेन किच्छतावारो दुक्खा पटिपदा वेदितब्बा । एत्थ दन्धत्ता पटिपदाय एतस्स अकिच्छत्तेपि पुरिमानं किच्छत्ते दुक्खापटिपदता वुत्तनयाव । यस्स पन सब्बत्थ अकिच्छता, तस्स परमुक्कंसगता सुखा पटिपदा वेदितब्बा ।

यथा नामरूपपरिगगहकिच्छताय मग्गपातुभावदन्धताय दुक्खा पटिपदा दन्धाभिज्जा वुत्ता, तथा तब्बिपरियायेन चतुत्थी, तदुभयवोमिस्सतावसेन दुतिया, ततिया च जातब्बाति दस्सेन्तो आह “**इमिना...पे०... वेदितब्बा**”ति । वट्टदुक्खतो निय्यानस्स अधिप्पेतत्ता “**विपस्सनापक्खिका एवा**”ति वुत्तं ।

हेतुपायफलेहीति एत्थ तण्हाचरितता, मन्दपज्जता च पठमाय पटिपदाय हेतु, तण्हाचरितता, उदत्थपज्जता च दुतियाय, दिट्ठिचरितता, मन्दपज्जता च ततियाय, दिट्ठिचरितता, उदत्थपज्जता च चतुत्थिया । **उपायो** पन यथाक्कमं सतिसमाधिवीरियपज्जिन्द्रियानि, सतिपट्टानज्ञानसम्मप्यधानसच्चाणि च उपनिस्सयभूतानि । **फलं** वट्टदुक्खतो निय्यानं ।

समाधिमुखेनाति समाधिमुखेन भावनानुयोगेन । तेनेवाह “**समथपुब्बङ्गमाय विपस्सनाया**”ति । इधाति इमस्मिं नेत्तिप्पकरणे । वक्खति “रागविरागा चेतोविमुत्ति सेक्खफल”न्ति, “रागविरागा चेतोविमुत्तिकामधातुसमतिक्कम”न्ति च । **सोति** अनागामी ।

तेनाति पटिपक्खेन । **ततोति** पटिपक्खतो । समानाधिकरणवसेन च चेतोविमुत्तिसद्धानं समासं कत्वा भिन्नाधिकरणवसेन वत्तुं “**अथ वा**”तिआदि वुत्तं । पुन “**चेतसो वा**”तिआदिना अज्जपदत्थवसेन चेतोविमुत्तिपदानं समासं दस्सेति । विज्जाणपरियायेन चेतो-सद्देन वुत्तयोजना न सम्भवतीति आह “**यथासम्भव**”न्ति ।

हा-सद्दो गतिअत्थो, गति चेत्य जाणगति अधिप्पेताति आह “**हातब्बाति गमेतब्बा**”ति । **नेतब्बाति** आपेतब्बा ।

७. तन्ति पुग्गलविभागं । **जाणविभागेनाति** सुतमयादिजाणप्पभेदेन । **निब्बत्तनन्ति** उप्पादनं । **तत्थाति** तस्मिं उग्घटितज्जुतातिआदिपुग्गलविभागभूते देसनाभाजने । **देसनायन्ति** सुत्ते । **तं दस्सेतुन्ति** तं पुग्गलविभागं दस्सेतुं । “स्वायं हारो कथं सम्भवती”ति केचि पठन्ति ।

साति वुत्तप्पकारधम्मत्थानं वीमंसनपज्जा । **अधिकारतोति** “सत्था वा धम्मं देसयती”तिआदिअधिकारतो । **सामत्थियतो** उग्घटितज्जुआदिवेनेय्यविनयनसमत्थभावतो । **परियत्तिधम्मस्स उपधारणन्ति** एत्थापि “अधिकारतो सामत्थियतो वा”ति आनेत्वा योजेतब्बं ।

“वीमंसादिपरियायवती पठमविकप्पवसेन, वीमंसादिविभागवती दुतियविकप्पवसेन, चिन्ताय हेतुभूताय निब्बत्ता चिन्तामयी”ति एवमादिवुत्तनयानुसारेण सक्का योजेतुन्ति आह “सेसं वुत्तनयमेवा”ति ।

सुतचिन्तामयजाणेसूति सुतमयजाणे च चिन्तामयजाणे च सुतचिन्तामयजाणेसु च सुतचिन्तामयजाणेसूति एकदेसरूपेकसेसो वेदितब्बो । चिन्तामयजाणेयेव हि पतिट्ठिता महाबोधिसत्ता चरिमभवे विपस्सनं आरभन्ति, इतरे सुतचिन्तामयजाणेसूति । तेहीति तथा पठन्तेहि । वुत्तनयेनाति “उपादारूपं परिगण्हाति, अरूपं परिगण्हाती”तिआदिना पटिपदाकथायं (नेत्ति० अट्ठ० ५) वुत्तनयेन ।

८. परतो घोसो पच्चयभूतो एतिस्साति अधिप्पायो । “पच्चत्तसमुद्धितेन च योनिसोमनसिकारेना”ति इदं आवुत्तिनयेन दुतियं आवट्ठतीति वेदितब्बं । तेन सावकानं भावनामयजाणुप्पत्ति सङ्गहिता होति । सावकानमेव वा जाणुप्पत्ति इधाधिप्पेता उग्घटितज्जुआदिविभागकथनतो । एतस्मिं पक्खे पुब्बे वुत्तएकसेसनयोपि पटिक्खित्तो दट्ठब्बो । “आसयपयोगपबोधस्स निष्फादितत्ता”ति एतेन पच्छिमचक्कद्वयपरियापन्नानि पुब्बहेतुसङ्गहानि सुतचिन्तामयजाणानि सन्धाय “इमा द्वे पज्जा अत्थी”ति वुत्तन्ति दस्सेति । अत्थिभावो चेतासं पटिपक्खेन अनुपहुतता वेदितब्बा । अपरिक्खितत्ता अनभिसङ्खत्तत्ता । सुतमयजाणस्सापि पुरिमसिद्धस्स ।

९. देसनापटिपदाजाणविभागेहीति निस्सरणदेसनादिदेसनाविभागेहि, दुक्खापटिपदादिपटिपदाविभागेहि, सुतमयजाणादिजाणविभागेहि ।

अवसिद्धुपारिसज्जेनाति खत्तियगहपतिपरिसपरियापन्नेन । अट्ठन्नन्ति खत्तियपरिसा ब्राह्मणगहपतिसमणचातुमहाराजिकतावतिसमारब्रह्मपरिसाति इमासं अट्ठन्नं ।

समत्थेतीति समत्थं सम्बन्धत्थं करोति ।

तमेव द्वादसपदभावं दीपेत्वाति सम्बन्धो । तदत्थस्साति छल्लक्कपरियायत्थस्स (म० नि० ३.४२० आदयो) । सब्बपरियत्तिधम्मसङ्गाहकत्ता छल्लक्कपरियायस्स, तदत्थस्स च धम्मचक्कप्पवत्तेन सुत्तेन (सं० नि० ५.१०८१; महाव० १३; पटि० म० २.३०) सङ्गहितत्ता वुत्तं “सब्बस्सापि...पे०... विभावेन्तो”ति । विसयिभावेन ब्यञ्जनपदानं, विसयभावेन अत्थपदानं सम्बन्धं सन्धायाह “तेसं...पे०... सम्बन्धभाव”न्ति ।

पदावयवो अक्खरानि । पदत्थोति पदत्थावयवो । पदत्थगगहणस्साति पदत्थावबोधस्स । विसेसाधानं विसेसुप्पत्ति । वाक्यभेदेति वाक्यविसेसे । चित्तपरितोसनं चित्ताराधनं । बुद्धिनिसानं पज्जाय तेजनं तिक्खभावकरणं । नानावाक्यविसयतापि सिद्धा होति पदादीहिपि सङ्कासनस्स सिद्धत्ता । एकवाक्यविसयताय हि अत्थपदानं सङ्कासनादयो यथाक्कमं अक्खरादिविसया एवाति नियमो सिया । एतेनाति अत्थपदानं नानावाक्यविसयत्थेन ।

उग्घटनादिअत्थानीति उग्घटनविपज्चननयनप्पयोजनानि ।

१०. उपतिट्ठति एत्थाति उपट्ठितन्ति उपट्ठितसदस्स अधिकरणत्थतं दस्सेतुं “उपतिट्ठनट्ठान”न्ति वुत्तं यथा “पदक्कन्त”न्ति । तेनाह “इदं नेस”न्तिआदि । पटिपत्तिदेसनागमनेहीति पटिपत्तिगमनदेसनागमनेहि । “किच्छं वतायं लोको आपन्नो जायति च...पे०... जरामरणस्सा”तिआदिना जरामरणतो पट्ठाय पटिच्चसमुप्पादमुखेन विपस्सनं

अभिनिविसित्वा महागहनं छिन्दितुं निसानसिलायं फरसुं निसेन्तो विय किलेसगहनं छिन्दितुं लोकनाथो जाणफरसुं तेजेन्तो बुद्धभावाय हेतुसम्पत्तिया परिपाकगतत्ता सब्बज्जुतज्जाणाधिगमाय विपस्सनागम्भं गण्हापेन्तो अन्तरन्तरा नानासमापत्तियो समापज्जित्वा अनुपदधम्मविपस्सनावसेन अनेकाकारवोकारसङ्खारे सम्मसन्तो छत्तिसकोटिसतसहस्समुखेन यं जाणं पवत्तेसि, तं “महावजिरजाण”न्ति वदन्ति। अट्ठकथायं पन “चतुर्वीसतिकोटिसतसहस्ससमापत्तिसज्चारिमहावजिरजाण”न्ति (दी० नि० अट्ठ० ३.१४१) आगतं, तं देवसिकं वळज्जनकसमापत्तीं पुरेचरानुचरजाणं सन्धाय वुत्तं। यं पन वक्खति “जाणवजिरमोहजालपदालन”न्ति, तं सह विपस्सनाय मग्गजाणं वेदितव्वं। एतं ब्रह्मचरियन्ति सासनब्रह्मचरियं अधिप्पेतन्ति तं दस्सेन्तो “ब्रह्मनो”तिआदिमाह।

देसनायाति करणत्थे इदं करणवचनं। नियुत्तोति एत्थ हेतुअत्थो अन्तोनीतोति दस्सेन्तो “निद्धारेत्वा योजितो”ति आह।

देसनाहारविभङ्गवण्णना निड्डिता।

२. विचयहारविभङ्गवण्णना

११. जातिलिङ्गकालसाधनविभत्तिसङ्ख्याविसेसादितो सदतो पदविचयो कातब्बो। तत्थ करियमानो च यथासभावनिरुत्तिया एव कतो सुकतो होतीति दस्सेन्तो “इदं नामपदं ...पे०... अयं सदतो पदविचयो”ति वत्वा “सो पनाय”न्तिआदिमाह। वत्तब्बअत्थसंवण्णनाति तंतंपदवचनीयस्स अत्थस्स भेदं वत्वा परियायेहि विवरित्वा कथनं।

विचियमानस्स सुत्तपदस्साति पुच्छावसेन पवत्तसुत्तपदस्स। “सुत्तन्तरपदानिपि पुच्छावसेनेव पवत्तानी”ति वदन्ति “न सब्बम्पि सुत्तपद”न्ति। एकस्सेव पदस्स सम्भवन्तानं अनेकेसं अत्थानं उद्धारो अत्थुद्धारो। एकस्सेव पन अत्थस्स सम्भवन्तानं अनेकेसं पदानं उद्धारो पदुद्धारो। सब्बे हि संवण्णियमाने सुत्ते लब्भमाने सब्बे पदत्थे। नव सुत्तन्तेति सुत्तगेय्यादिवसेन नवप्पकारे सुत्तस्मिं आनेत्वा विचिनतीति योजना। अथ वा “सब्बे नव सुत्तन्ते”ति इमिना पविचयलक्खणेन हारेण सुत्तगेय्यादीनि सब्बानिपि नवप्पकारानि सुत्तानि विचिनतीति अत्थो। तेनाह “सुत्तगेय्यादिके”तिआदि।

“कोसलानं पुरा रम्मा”तिआदिका (सु० नि० ९८२) छपज्जास गाथा वत्थुगाथा। “पारायनमनुगायिस्स”न्ति (सु० नि० ११३७ आदयो) पन आदिका एकूनवीसति गाथा अनुगीतिगाथा। इदं नामं कतन्ति इदं “पारायन”न्ति नामं कतं। तेनाह “पारं गमनीया इमे धम्मा, तस्मा इमस्स धम्मपरियायस्स ‘पारायनन्त्वेव अधिवचन’”न्ति (सु० नि० पारायनत्थुतिगाथा; चूळनि० पारायनत्थुतिगाथा १४९ आदयो)। बुद्धियं विपरिवत्तमानन्ति इमस्स विचयहारविभङ्गस्स देसनाकाले आयस्मा महाकच्चानो अत्तनो बुद्धियं वत्तमानं कत्वा एवमाहाति योजना।

एकंसब्बाकरणस्स अयन्ति एकंसब्बाकरणीया, एकंसेन वा ब्याकातब्बत्ता एकंसब्बाकरणीया, एकंसब्बाकरणयोग्गाति अत्थो। सेसपदद्वयेपि एसेव नयो। ठपनीयाति ठपेतब्बत्ता अब्बाकरणीयाति अत्थो। समयन्तरपरिचयेन निवारणधम्मं पति संसयपक्खन्दो पुच्छतीति अधिप्पायेनाह “विमतिच्छेदन”न्ति। पकतिया पन निवारणधम्मं अजानन्तो जातुकामताय पुच्छतीति अदिट्ठजोतनाय पुच्छापि सिया। तथा हि वक्खति “लोकस्स निवारणादीनि अजानन्तेना”ति।

एकवत्थुपरिग्गहाति एकस्स अभिधेय्यत्थस्स गहणतो ।

विमुक्तिपरिपाचकइन्द्रियानि विवट्टपक्खे ठितस्स सद्भादयो धम्मा, किं पनेत्थ अरियानम्पि इन्द्रियलोकेन सङ्गहो होतीति आह “परियापन्नधम्मवसेना”तिआदि ।

काळपक्खचातुहसीघनवनसण्डमेघपटलच्छादनअट्टरत्तीनं वसेन चतुरङ्गसमन्नागतेन । विविच्छाति विचिकिच्छाय । तेनाह “विचिकिच्छाहेतू”ति । दुक्खमस्स महब्भयन्ति एत्थ वुत्तं “अस्सा”ति पदं “जप्पाभिलेपनं अस्स ब्रूमी”ति आनेत्वा सम्बन्धितब्बन्ति दस्सेन्तो “जप्पा तण्हा अस्स लोकस्सा”ति आह । “सब्बसत्तान”न्तिआदिना, “सब्बसोवा”तिआदिना च अन्वयतो, व्यतिरेकतो च सातिसयं अविज्जाय नीवरणभावं दस्सेति । “दूरे सन्तो पकासन्ति (ध० प० ३०४; नेत्ति० ११), रत्तो अत्थं न जानाती”ति (नेत्ति० ११, २७) गाथाद्वयेनापि अनुगीतिविचयं दस्सेतीति योजेतब्बं ।

रूपावचराति रूपावचरसत्ता । विपरिणामदुक्खताय मुच्चनस्स कारणवचनन्ति सम्बन्धो । यतो वट्टदुक्खतो मुच्चनं । तं वट्टदुक्खं अनवसेसपरियादानवसेन सङ्खारदुक्खतागहणेन ।

एकाधारन्ति एकवत्थु अधिष्ठानं । निवारणं विक्खम्भनं पिधानं समुच्छेदोति अत्थद्वयस्स पुच्छितत्ता “अनेकाधारं दस्सेतु”न्ति वुत्तं । तेनाह “निवारणसङ्घातं संवरं...पे०... पिधिद्यन्ति पच्छिज्जन्ती”ति (सु० नि० अट्ट० २.१०४१; चूळनि० अट्ट० ३) । तस्सत्थो “निवारणसङ्घातं विक्खम्भनं, संवरं, पिधानञ्च कथेही”ति ।

“वोदान”न्ति इमिना सोतानं विक्खम्भनविसुद्धि, “वुट्ठान”न्ति इमिना समुच्छेदविसुद्धि अधिप्पेताति आह “पुच्छाय दुविधत्थविसयतं विवरितुं ‘एवं’न्तिआदि वुत्त”न्ति । तथा चाह “वोदायति...पे०... अरियमग्गो”ति ।

दिट्ठिमानाविज्जासोतापि तण्हासोतानुगाति आह “येभुय्येन अनुरोधवसेना”ति । उपचारवसेनाति निस्सितुपचारवसेन । सब्बस्माति चक्खुतो याव मनतोति सब्बस्मा द्वारतो । सब्बप्पकारेनात्ति तण्हायनमिच्छाभिनिवेसनउन्नमनादिप्पकारेन ।

तमेव सतिन्ति यायं सति पुब्बभागे सोतानं विक्खम्भनवसेन वुत्ता, तमेव सति । मग्गक्खणे सोतानं संवरं पिधानं ब्रूमि । यस्मा पन पिधायिकापि सति मग्गक्खणे पज्जानुगा, पज्जाकिच्चमेवेत्थ अधिकं, तस्मा वुत्तं “पज्जायेते पिधीयेरे”ति ।

संवरपिधानानन्ति एत्थ संवरसद्देन निवारणं वुत्तं ।

यस्मिं यस्मिं अरियमग्गे अनधिगते यं यं अभिसङ्खारविज्जाणं उप्पज्जनारहं, तस्मिं तस्मिं अधिगते तं तं विज्जाणं अनुप्पादनरोधेन निरुज्झति सद्धिं अत्तना सम्पयुत्तनामरूपेनाति आह “तस्स तस्स विज्जाणस्स निरोधेन सहेवा”ति । अनुप्पादनरोधो हि एत्थ “निरोधो”ति अधिप्पेतो अनुपादिसेसनिब्बानस्स अधिप्पेतत्ताति । अनुसन्धीयति एतेनाति अनुसन्धि, इध पुच्छियमानो अत्थो ।

सह विसयेन दस्सेतुन्ति एत्थ सच्चानि एव विसयो । पहातब्बसभावं समुदयसच्चं, तस्स विसयो दुक्खसच्चं । “संयोजनियेसु, भिक्खवे, धम्मेषु अस्सादानुपस्सिनो विहरतो तण्हा पवट्ठती”ति (सं० नि० २.५३, ५७) हि वुत्तं ।

पहायकसभावं मगसच्चं, तस्स विसयो निरोधसच्चन्ति आह “सह विसयेन...पे०... सच्चेसू”ति । कामञ्चेत्थ “समुदयो द्वीसु भूमीसु पहीयती”ति आरब्धं, “दस्सनेन तीणि संयोजनानि पहीयन्ति, भावनाय सत्त संयोजनानि पहीयन्ती”ति पन विभागवचनमेव वत्तन्ति आह “पहायकविभागमुखेन पहातब्बविभागं दस्सेतु”न्ति ।

निरवसेसकामरागव्यापादा ततियमग्गेन पहीयन्ति, इतरे चतुत्थमग्गेनाति वुत्तं “इतरेहि पन निरवसेस”न्ति । तत्थाति कम्मविपाकवट्टप्पभेदेन तेधातुके भवत्तये । संयोजनवसेनाति सब्बदा योजनवसेन बन्धनवसेन ।

१२. अग्गफलजाणताय एकम्पि समानं तन्निमित्तस्स खयानुप्पादारम्मणस्स पच्चवेक्खणजाणस्स वसेन फलवोहारेन द्वे नामानि लभति ।

सोमनस्सनामलाभो इमिना आरम्मणसङ्केतेनाति तदत्थं विवरन्तो “खये...पे०... समञ्जाया”ति आह ।

१३. तग्गहणेनेवाति फस्सपञ्चमकपञ्चरूपिन्द्रियग्गहणेनेव । सहचरणादिनाति सहजातादिअनन्तरादिपच्चयभावेन चेव निस्सयारम्मणादिना च । “सम्पयुत्त”न्ति इमिना सहितता अविसिद्धता इधाधिप्पेताति आह “अविभागेन गहणीयभावं सन्धाया”ति ।

कथं समाधिन्द्रियं उप्पादेतीति आह “सतिग्गहणेन चेत्थ परियुट्ठानप्पहानं इधाधिप्पेत”न्ति । न हि समाधिना परियुट्ठानप्पहानं सम्भवति ।

पदहति एतेनाति पधानं, वीरियं । तेति वीरियसङ्घारा । एकरसेनाति यथा इन्द्रियानि एकरसानि होन्ति, एवं एकरसभावेन सरणतो पवत्तनतो । तथा पवत्तिया एव सुट्ठु वत वीरियं वाहेसीति योगिना सङ्कप्पेतब्बतो तदुपगवीरियवाहनट्ठेन “सम्पहंसना”ति वुत्तं । तेनाह “एवं मे...पे०... हेतुभावतो”ति ।

इद्धिसद्वस्स पठमो कत्तुअत्थो, दुतियो करणत्थो वुत्तो, पादसद्वस्स एको करणत्थो एव । पज्जितब्बा च इद्धी वुत्ता, न च इज्जन्ति । पज्जितब्बा च इद्धी पज्जनकरणेन पादेन समानाधिकरणा न होन्तीति “पठमेन अत्थेन इद्धि एव पादो”ति कथं सक्का वत्तुं, तथा इद्धिकिरियाकरणेन साधेतब्बा बुद्धिसङ्घाता इद्धि पज्जनकिरियाकरणेन पज्जितब्बाति द्विन्नं करणानं न समानाधिकरणा सम्भवतीति “दुतियेन अत्थेन इद्धिया पादो”ति कथं सक्का वत्तुन्ति चे? सक्का, पादस्स इज्जमानकोट्ठास इज्जनकरणूपायभावतो । अथ वा “पठमेन अत्थेन इद्धिया पादो, दुतियेन अत्थेन इद्धि एव पादो इद्धिपादो”ति एवं योजनतो । कथं? अनन्तरत्थो पच्चासत्तिजायेन इध पठमोति अधिप्पेतो, ततो पुरिमो दुतियोति ।

“छन्दं चे भिक्खु अधिपतिं करित्वा लभति समाधि”न्तिआदि (विभ० ४३२) वचनतो छन्दसमाधिप्पधानसङ्घारसमन्नागतं इद्धिपादं भावेतीति एत्थापि छन्दाधिपति समाधि छन्दसमाधीति अधिपतिसद्वलोपं कत्वा समासो वुत्तोति विज्जायति । अधिपतिसद्वत्थदस्सनवसेनेव पन “छन्दहेतुको, छन्दाधिको वा समाधी”ति सम्मोहविनोदनियं (विभ० अट्ठ० ४३१) वुत्तं, तस्मा इधापि छन्दाधिपति समाधि छन्दसमाधीति वेदितब्बो । तं पन छन्दं वुत्तनयेन सद्धासीसेन दस्सेन्तो “सद्धाधिपतेय्या चित्तेकग्गता”ति वुत्तं । “इदं पधान”न्ति वा वीरियं वुत्तं । वीरियसद्वपेक्खासहितं एकवचनेन वत्वा चतुब्बिधस्सपि वीरियस्स अधिप्पेतत्ता निब्बत्तेतब्बधम्मविभागेन च “इमे सङ्घारा”ति वुत्तं । तेन पधानभूता सङ्घाराति एवं समासो वेदितब्बो । सङ्घतसङ्घारादिनिवत्तनत्थञ्चेत्थ पधानग्गहणं । अथ वा

तं तं विसेसं सङ्करोतीति सङ्कारो, सब्बम्पि वीरियं । तत्थ चतुकिच्चसाधकतो अज्जस्स निवत्तनत्थं पधानग्गहणन्ति पधानभूता सेट्ठभूताति अत्थो ।

वीरियिद्धिपादनिद्वेसे “वीरियसमाधिप्पधानसङ्कारसमन्नागत”न्ति (विभ० ४३५) द्विक्खत्तुं वीरियं आगतं । तत्थ पुरिमं समाधिविसेसनं “वीरियाधिपति समाधि वीरियसमाधी”ति, दुतियं समन्नागमङ्गदस्सनत्थं । द्वे एव हि सब्बत्थ समन्नागमङ्गानि समाधि, पधानसङ्कारो च । छन्दादयो समाधिविसेसनानि । पधानसङ्कारो पन पधानवचनेनेव विसेसितो, न छन्दादीहीति न इध वीरियाधिपतिता पधानसङ्कारस्स वुत्ता होति । वीरियज्ज समाधिं विसेसेत्वा ठितमेव समन्नागमङ्गवसेन पधानसङ्कारवचनेन वुत्तन्ति नापि द्वीहि वीरियेहि समन्नागमो वुत्तो होति । यस्मा पन छन्दादीहि विसिट्ठो समाधि तथा विसिट्ठेनेव तेन सम्पयुत्तो पधानसङ्कारो, सेसधम्मा च, तस्मा समाधिविसेसनानं वसेन “चत्तारो इद्धिपादा”ति वुत्ता । विसेसनभावो च छन्दादीनं तंतं अपस्सयनवसेन होतीति छन्दसमाधि...पे०... इद्धिपादन्ति एत्थ निस्सयत्थेपि पादसद्वेन उपायत्थेन छन्दादीनं इद्धिपादता वुत्ता होति । तथा हि अभिधम्मे उत्तरचूळभाजनीये “चत्तारो इद्धिपादा छन्दिद्धिपादो”ति आदिना (विभ० ४५७) छन्दादीनमेव इद्धिपादता वुत्ता । पञ्हापुच्छके च “चत्तारो इद्धिपादा — इध भिक्खु छन्दसमाधी”ति (विभ० ४६२) आरभित्वापि पुन छन्दादीनं येव कुसलादिभावो विभत्तो । उपायिद्धिपाददस्सनत्थमेव हि निस्सयिद्धिपाददस्सनं कतं । अज्जथा चतुब्बिधताव न होतीति । अयमेत्थ पाळिवसेन अत्थविनिच्छयो वेदितब्बो ।

तदङ्गसमुच्छेदनिस्सरणविवेकनिस्सितत्तं वत्वा पटिप्पस्सद्धिविवेकनिस्सितस्स अवचनं “छन्दसमाधि...पे०... इद्धिपादं भावेती”ति (विभ० ४३२) भावेतब्बानं इद्धिपादानं वुत्तत्ता । भावितिद्धिपादस्स हि सच्छिकातब्बा फलपरियापन्ना इद्धिपादाति ।

वोस्सग्गसद्धो परिच्चागत्यो, पक्खन्दनत्थो चाति वोस्सग्गस्स दुविधता वुत्ता । यथावुत्तेन पकारेनाति तदङ्गसमुच्छेदप्पकारेन, तन्निन्नभावारम्मणप्पकारेन च । परिणमन्तं विपस्सनक्खणे ।

१४. पुब्बभागपञ्जायाति एकावज्जनानावज्जनवीथीसु पवत्तउपचारपञ्जाय । अधिगमपञ्जायाति अप्पनापञ्जाय । पुन पुब्बभागपञ्जायाति नानावज्जनपचारपञ्जाय, पटिसन्धिपञ्जाय वा । उपचारपञ्जायाति एकावज्जने, सब्बत्थ वा पवत्तउपचारपञ्जाय ।

पुच्छाविस्सज्जनविचयोपीति यथावुत्ताय पुच्छाय विस्सज्जनविचयोपि । वुत्तनयानुसारेनाति अदिट्ठजोतना, विमतिच्छेदना चाति हेट्ठा वुत्तनयानुगमनेन ।

१५. सेखे असेखेति सेक्खे अरियपुग्गले, असेक्खे अरियपुग्गले । विपस्सनापुब्बङ्गमप्पहानेति विपस्सनं पुरेचारिकं कत्वा पवत्तकिलेसप्पहाने, पहानाभिसमयेति अत्थो ।

“यं अनिच्चं दुक्खं अनत्ता”ति पाळिं दस्सेत्वा पुन “यं अनिच्चे दुक्खे अनत्तनी”ति वचनं एवम्पेत्य पठन्तीति दस्सेतुं ।

सेससंकिलेसवोदानधम्माति गेधतो अवसिट्ठसंकिलेसधम्मा च सब्बवोदानधम्मा च । अभावेनाति अभावनेन अभावकरणेन ।

पयोगपरक्कमन्ति भुसं योगो पयोगो, पयोगोव परक्कमो पयोगपरक्कमो, चित्तं । उक्खिपतीति कोसज्जपक्खे पतितुं अदेन्तो कुसलपक्खे उद्धं खिपेन्तो विय पवत्तति । पधानवीरियन्ति अकुसलानं अनुप्पादनद्वेन उत्तमवीरियं । योजेतब्बानीति “आसेवमानो वायमती”ति आदिना योजेतब्बानि । अनुप्पन्नाति अवत्तब्बतं आपन्नानन्ति भूमिलद्धारम्मणाधिग्गहिताविकखम्भितासमुग्घाटितुप्पन्नानं ।

१६. “अट्टमकस्स इन्द्रियानी”ति वुत्तत्ता “पठममग्गे सद्धादयो”ति आदि वुत्तं । इन्द्रियग्गहणञ्च पाळियं निदस्सनमत्तं दट्ठब्बं ।

असुभानुपस्सना कायानुपस्सनासतिपट्टानन्ति आह “सतिपट्टानभावनाय सुनिग्गहितो कामवितक्को”ति । समाधि उप्पज्जमानो कामवितक्कम्पि निग्गहेत्वा एव उप्पज्जतीति दस्सेन्तो “अनवज्जसुखपदट्टानेना”ति आदिमाह । “कुसलेसु धम्मेषु आरद्धवीरियो”ति आदिना धम्मच्छन्दतो उप्पज्जमानो वीरियच्छन्दो खन्तिं परिब्रूहेतीति दस्सेति । अनवज्जधम्मनं उपकारकधम्मासेवनं विय अनुपकारकधम्मपरिवज्जनम्पि पज्जानिसेवनेनेव होतीति आह “समाधिआदीन”न्ति आदि ।

१७. सब्बधम्माधिट्टानं देसनं पुग्गलाधिट्टानेन विभजितुं “लोको नामा”ति आदि वुत्तन्ति दस्सेन्तो “सब्बधम्मानन्ति...पे०... दस्सेतु”न्ति आह । महग्गतधम्मेषु ठानं तंसम्पादनाव । तथा सेसेसु । वड्ढियमानेसूति यथा विमुत्तिं परिपाचयन्ति, एवं ब्रूहियमानेसु ।

दस्सनपरिज्जाति रूपारूपधम्मानं सलक्खणतो, पच्चयतो च परिजानना । तेनाह “जातपरिज्जा”ति । पटिपक्खविधमनेन सद्धिं लक्खणत्तयविभावना इध “भावनापरिज्जा”ति अधिप्पेताति आह “भावना...पे०... परिज्जा चा”ति । दस्सनत्था परिज्जा दस्सनपरिज्जा, भावनत्था परिज्जा भावनापरिज्जाति एवं वा एत्थ अत्थो दट्ठब्बो ।

कक्खळफुसनादीति कक्खळादिफुसनादि । अभिजानित्वाति अभिज्जाय पज्जाय जानित्वा, ठितस्स अभिजाननहेतु वाति अत्थो । अत्थोति फलं । नयोति वुत्तनयो ।

“यं असङ्घत्त”न्तिपि पठन्ति । चतुनयकोविदोति एकत्तनानत्तादिनयचतुक्के निपुणो । देसनायुत्तिकुसलोति धम्मानं देसनाविधिम्हि कुसलो ।

सदिसी कातब्बा संसन्दनवसेनाति अधिप्पायो । आनेतब्बा “अयं देसना इमाय देसनाय एवं संसन्दती”ति । अत्थतो अपेतन्ति अयुत्तत्थं । असम्बन्धत्थन्ति अज्जमज्जं असम्बन्धपदत्थं । ननु पट्टानविचारो नयविचारो विय हारेहि असम्मिस्सो विचारणन्तरोति चोदनं मनसि कत्वा आह “यस्मा पना”ति आदि । इध निक्खित्तोति इध सुत्तविचये सुत्तत्थविचारभावतो निक्खित्तो, एतेन वा पट्टानस्स हारन्तो गधभावदस्सनेनेव मूलपदानं विय पट्टानस्स पदत्थन्तराभावो दस्सितोति वेदितब्बं ।

इमस्स सुत्तस्साति संवण्णियमानसुत्तं सन्धायाह । कस्मिं वा पदेति संवण्णियमानं गाथं सन्धायाह । तब्बिचयेनाति पुच्छादिविचयेन, अस्सादादिविचयेन च ।

विचयहारविभङ्गवण्णना निट्ठिता ।

३. युत्तिहारविभङ्गवण्णना

१८. एवमेतस्स सुत्तस्स अत्थो न गहेतब्बो, एवं पन गहेतब्बोति अगगहेतब्बगहेतब्बानं अत्थानं विजहनगगहणत्थाय युत्तायुत्तिविचारणायं वज्जेतब्बेसु ताव पठमं पटिपत्तीति दस्सेन्तो आह “अतथाकारेण गद्दमाना सुत्तत्था विसयो”ति यथा “वामं मुञ्च, दक्खिणं गण्हा”ति (ध० स० अट्ठ० ४९८; विसुद्धि० महाटी० १.१४; सं० नि० टी० १.१.२१३)। वज्जेतब्बभावतो हि सुत्तपदेहि सुत्तत्थे विवेचिते गहेतब्बभावो च अवसिद्धो होति। तथा हि वक्खति “मेत्ताविहारस्स सतो ब्यापादो चित्तं परियादाय ठस्सती”ति न युज्जति देसना, “ब्यापादो पहानं अब्भत्थं गच्छती”ति युज्जति देसना”ति (नेत्ति० २१)।

युत्तिनिद्धारणेन अयथासभावतो विवेचित्वा यथासभावतो धम्मस्स गहणकारणानि कथेन्तो “महन्ता अपदिसितब्बा एतेसन्ति महापदेसा”ति इममत्थमाह “बुद्धादयो”ति आदिना। पतिट्ठानानीति पतिट्ठानसाधनानि। सेसेसूति सङ्गापदेसादीसु। पठमत्थो एव हि इध पाळि आगतो, विनिच्छयने कारणं महापदेसोति अधिप्पायो। सुत्तोतरणादीति आदिसद्देन सुत्तानोतरणादिपि सङ्गहति। सुत्तोतरणविनयसन्दस्सनानि हि केनचि यथाभतस्स गन्थस्स “धम्मो”ति विनिच्छयने कारणं। सुत्तानोतरणविनयासन्दस्सनानि “अधम्मो”ति। यदि एवन्ति यदि यथाभतस्स गन्थस्स सुत्तविनयेहि संसन्दनं “धम्मो”ति, असंसन्दनं “अधम्मो”ति विनिच्छयकारणं, एवं सन्तोति अत्थो। सम्पदीयति जापीयति धम्मो एतेहीति सम्पदाया, अक्खातारो।

विनीयन्ति रागादयो एतेनाति विनयो, कारणं। तेनाह “रागादिवूपसमनिमित्त”न्ति। किं पन तं? साधिट्ठानसमथविपस्सनादिधम्मा। ये परतो “तेचत्तालीसं बोधङ्गमा धम्मा”ति (नेत्ति० २४) वक्खति।

विनयमहापदेसा कप्पियानुलोमतो अनुलोमकप्पियं नाम, तंसदिसताय सुत्तन्तमहापदेसापि अनुलोमकप्पियन्ति अट्ठकथावोहारो। तेन वुत्तं “यं अनुलोमकप्पियन्ति वुच्चती”ति।

यदिपि तत्थ तत्थ पवत्ता भगवतो पकिण्णकदेसना अट्ठकथा, सा पन धम्मसङ्गाहकेहि तेपिटकं बुद्धवचनं सङ्गायित्वा तस्स अत्थसंवण्णनानुरूपेण वाचनामगं आरोपितत्ता आचरियवादो नाम। तेन वुत्तं “आचरियवादो नाम अट्ठकथा”ति। तस्सोपि सङ्गीतियो आरुळ्हो एव हि बुद्धवचनस्स अत्थसंवण्णनाभूतो कथामगो पच्छा तम्बपण्णियेहि महाथेरेहि सीहळभासाय ठपितो। अत्तनोमति थेरवादो। समेन्तमेव गहेतब्बन्ति यथा पाळिया संसन्दति, एवं महापदेसतो अत्था उद्धरितब्बाति दस्सेति। पमादपाठवसेन आचरियवादस्स कदाचि पाळिया असंसन्दनापि सिया, सो न गहेतब्बोति दस्सेन्तो आह — “सुत्तेन समेन्तो एव गहेतब्बो”ति।

चतूहि महापदेसेहि युज्जतीति चतूहि महापदेसेहि न विरुज्झति। इदानि तं अविरुज्झनाकारं दस्सेन्तो “येन येना”ति आदि वुत्तं। सुत्तोतरणादि एव हेत्थ कारणं। तस्स च अनेकाकारताय “पकारेना”ति वुत्तो। संवण्णियमाने सुत्ते संवण्णनावसेन गहेतब्बन्ति सम्बन्धो। आभतेनाति आनीतेन। सुत्ततोति सुत्तन्तरतो। अयज्हेत्थ अत्थो — केनचि पसङ्गेन सुत्तन्तरतो उद्धरित्वा आनीतेन सुत्तपदेन सुत्तोतरणादिना, कारणप्पकारेण च चतुमहापदेसाविरोधेन संवण्णियमाने सुत्ते संवण्णनावसेन अत्थजातं गहेतब्बन्ति। तेनाह “तेन... पे०... कातब्बा”ति। तत्थ युत्तिहारयोजना कातब्बाति युत्तिनिद्धारणवसेन अयं युत्तिहारो योजेतब्बो। अथ वा युत्तिहारयोजना कातब्बाति इमिना हारेण वक्खमाननयेन युत्तिगवेसनं कत्वा तां युत्तिया सब्बहारयोजना कातब्बाति अत्थो। लक्खणज्हेतं युत्तिगवेसनाय, यदिदं युत्तिहारो। तेनाह “सब्बेसं हारानं, या भूमी, यो च गोचरो तेसं। “युत्तायुत्तपरिक्खा”ति (नेत्ति० ४), “इमाय युत्तिया अज्जमज्जेहि कारणेहि गवेसितब्ब”न्ति (नेत्ति० २०) च।

१९. यदि वा सब्बानि पदानि एकं अत्थं अभिवदन्तीति योजना ।

२०. जरायं ठितस्स अज्जथत्तन्ति ठितस्स यं अज्जथत्तं अज्जथाभावो, अयं जरा नाम । खणिकमरणं खणिकनिरोधो । समुच्छेदमरणं खीणासवानं खन्धपरिनिब्बानं ।

केवलस्साति जराय अमिस्सस्स । अज्जाव जरा, अज्जं मरणन्ति “पटिज्जातस्स केवलस्स मरणस्स दिट्ठत्ता”ति हेतु । यथा तं देवानन्ति सदिसूदाहरणं, विसदिसूदाहरणं पन इद्धिपादादयो, अन्वयव्यतिरेका गहेत्वा योजेतब्बा ।

तेहीति जरामरणोहि ।

“जीरणभिज्जनसभावा”ति इमिना लेसेन तण्हाजरामरणानं अनज्जत्तं योजेति । यदिपि “अज्जा तण्हा, अज्जा जरा, अज्जं मरण”न्ति सिद्धोवायमत्थो, यं सन्धाय वुत्तं “न इदं”न्तिआदि, तथापि सक्कुण्यपरिहारायं चोदनाति अज्झारुळ्हं तत्थ दोसं दस्सेतुं “यदि च यथा जरामरण”न्ति पाळिपवत्तानि दस्सेन्तो “यदि...पे०... दस्सेती”ति आह । भावोति अधिप्पायो । एतेसन्ति तण्हाजरामरणानं ।

“इमाय युत्तिया अज्जमज्जेहि कारणेहि गवेसितब्ब”न्ति च केचि पठन्ति, व्यज्जनतोपि गवेसितब्बं, अज्जत्थ अत्थतो अज्जत्थम्पीति अधिप्पायो । तमेव व्यज्जनतो अज्जत्थं दस्सेतुं पाळियं “सल्लोति वा”तिआदि वुत्तं । इमेसन्ति सल्लधूपायनानं । इच्छाविपरियायेति इच्छितालाभे, अप्पच्चयसमवाये वा । इदम्पि समत्थनं होति यथाधिप्पेतस्स अज्जत्थस्स व्यतिरेकदस्सनभावतो । जरामरणविपरियायेति जरामरणे असति । न हि यथाधिप्पेतजरामरणाभावे तण्हा न होतीति ।

द्विधा वुत्ताति द्विप्पकारेन वुत्ता, द्विक्खत्तुं वा वुत्ता । यं इदं...पे०... आरम्भणकरणवसेन वा अभिलपनन्ति एवं किरियापरामसनं योजेतब्बन्ति वेदितब्बं । विसेसोति अयं एतासं इच्छातण्हानं पकतिसङ्घातो विसेसो । “द्वीहि नामेही”तिपि पाळि । यदिपि एवन्ति कामं विसयविसेसेसु एवं यथावुत्तअवत्थाविसेसेन इच्छातण्हानं अत्थि काचि भेदमत्ताति अत्थो । सभावतो पन भेदो नत्थीति दस्सेन्तो “तथापी”ति आह ।

इच्छन्तीति कामेन्ति । तण्हायना पातुकामता । सन्तापनट्टेनाति परिदहनभावेन । आकड्डनट्टेनाति अवहरणट्टेन । सरितानीति रागवसेन अल्लानि । तंसम्पयुत्तपीतिवसेन सिनिद्धानि सिनेहितानि । विसत्तिकाति वित्थता रूपादीसु तेभूमकधम्मेषु ब्यापनवसेन । विसटाति पुरिमवेवचनमेव त-कारस्स ट-कारं कत्वा वुत्तं । विसालाति विपुला । विसक्कतीति परिसक्कति सहति । रत्तो हि रागवत्थुना पादेन ताळियमानोपि सहति । “ओसक्कनं, विप्फन्दनं वा विसक्कनं”न्ति वदन्ति । अनिच्चादिकं निच्चादितो गणहन्ती विसंवादिका होति । विसंहरतीति तथा तथा कामेषु आनिसंसं दस्सेन्ती विविधेहि आकारेहि नेक्खम्माभिमुखप्पवत्तितो चित्तं संहरति संखिपति । विसं वा दुक्खं, तं हरति, वहतीति अत्थो । दुक्खनिब्बत्तकस्स कम्मस्स हेतुभावतो विसमूला, विसं वा दुक्खादिभेदा वेदना मूलं एतायाति विसमूला, दुक्खसमुदयत्ता विसं फलं एतिस्साति विसफला । रूपादिदुक्खस्सेव परिभोगो एताय, न अमतस्साति विसपरिभोगा । सब्बत्थ निरुत्तिवसेन पदसिद्धि वेदितब्बा । यो पनेत्थ पधानो अत्थो, तं दस्सेतुं पुन “विसता वा पना”तिआदि वुत्तं ।

सिनेहनं पेमकरणं । बन्धनट्टेनाति संयोजनट्टेन । आसीसनट्टेनाति इच्छनट्टेन । अभिनन्दनट्टेनाति अस्सादनट्टेन,

सम्पटिच्छनद्वेन वा ।

२१. अनभिरतीति उक्कण्ठा । जाणनिब्बिदाति निब्बिदानुपस्सना । यथा च दुक्खू...पे०... चारेसु युत्ति वुत्ताति योजना ।

सुखापटिपदादन्धाभिज्जा सुखापटिपदाखिप्पाभिज्जा सुखापटिपदादयो । यो दुक्खाय पटिपदाय विसेसं अधिगन्तुं भब्बो, तस्स सुखापटिपदायोग्यस्स विय करियमाना धम्मदेसना विसेसावहा न होति, तस्मा सा न युत्ताति इममत्थं दस्सेति “रागचरितो”तिआदिना । रागचरितस्स तथा तथा कामानं आदीनवं, ओकारं, संकिलेसं, नेक्खम्मे आनिसंसञ्च अविभावेत्वा आदितो विपस्सनाकथाव करियमाना न विसेसावहा होति आसयस्स असोधितत्ताति एतमत्थं दस्सेन्तो पाळियं “विपस्सना...पे०... देसना”ति आहाति वेदितब्बं । सेसपदेसुपीति यथा “रागचरितस्सा”तिआदिना रागचरितकोट्टासवसेन पाळियं देसनाय अयुत्ति वुत्ता, इमिना नयेन सेसपदेसुपि दोसचरितकोट्टासादीसुपि “दोसचरितस्स पुग्गलस्स असुभं देसेय्या”तिआदिना पाळियं अवुत्तोपि यथासम्भवमत्थो निद्वारेत्वा वत्तब्बो । कस्मा पन युत्तिहारे अयुत्तिनिद्वारणा कताति चोदनं मनसि कत्वा आह “एत्थ चा”तिआदि । सेसेसुपि एसेव नयोति सेसेसुपि दोसचरितादिवसेन निद्वारितेसु अयुत्तिगवेसनेसु अयमेव उपायो । अनुलोमप्पहान”न्तिपि पाळि, सो एवत्थो ।

“यावतिका जाणस्स भूमी”ति एतेन युत्तिहारस्स महाविसयतं दस्सेति । कस्मा पनायं महाविसयोति? युत्तिविचारभावतो, संवण्णेतब्बस्स च धम्मस्स नानानयनिपुणादिगुणविसेसयोगतोति दस्सेन्तो “तं किस्स हेतू”ति आह ।

अपरभागेति पच्छाभागे । मेत्ताविहारिभागस्स अपरिहीनतावचनतो अयोगो वुत्तो । तेनाह “सतो”ति । यथावुत्तकारणतो एवाति पटिपक्खत्ता एव ।

पहानेकट्ठभावतो दिट्ठिमज्जितस्स । आदीनवदस्सनेन वितक्कं जिगुच्छन्ता दुतियज्झानस्स आसन्नउपचारज्झानधम्मापि वितक्कारम्मणा न होन्ति, पगेव दुतियज्झानधम्माति अधिप्पायेनाह “आरम्मणकरणत्थो हेत्थ सहगतसद्वो”ति ।

एवं युत्तिहारलक्खणं आगमतो युत्तायुत्तविचारं दस्सेत्वा इदानी आगमानुगताय युत्तियापि तं दस्सेतुं गुणमुखेन दोसविभजनं विभजन्तो “अपिचेत्था”तिआदिमाह । तं उत्तानत्थमेव ।

युत्तिहारविभङ्गवण्णना निद्विता ।

४. पदद्वानहारविभङ्गवण्णना

२२. तेसं तेसन्ति अनवसेसपरियादानं, तेन ये सुत्ते वुत्ता च धम्मा, ये च तेसं कारणभूतं, तेसं सब्बेसम्पीति वुत्तं होति । सब्बधम्मयाथावअसम्पटिवेधोति इममत्थं दस्सेतुं “कत्थ पन सो”तिआदि वुत्तं ।

पियायितब्बजातियन्ति पेमनीयसभावं । मिच्छापटिपदाति पमादापत्ति, मिच्छाभिनिवेशो वा । एकवारं उप्पन्नापि पाणातिपातचेतना वेरप्पसवनतो दोसस्स, एकवारं उप्पन्नापि पमादापत्ति, मिच्छाभिनिवेशो वा मोहस्स उप्पत्तिकारणन्ति पाळियं अवुत्तम्पि नयतो निद्वारेतब्बन्ति दस्सेन्तो “दोसस्स...पे०... इमिनाव नयेन अत्थो वेदितब्बो”ति आह ।

निमित्तत्थगगहणलक्खणं वण्णसण्ठानं, अनुब्यञ्जनत्थगगहणलक्खणं अनुब्यञ्जनन्ति
“निमित्तानुब्यञ्जनगगहणलक्खणा”ति वुत्तं। तत्थ तत्थ निमित्तं इत्थिपुरिसनिमित्तं। **अनुब्यञ्जनं**
 हत्थपादहसितकथितादि। फस्सो पच्चयो एतिस्साति **फस्सपच्चया**, तंभावो **फस्सपच्चयता**। अस्सादेति एतायाति
अस्सादो, तण्हा।

वत्थूनि जेय्यधम्मोति आह **“वत्थुअविप्पटिपत्ति विसयसभावपटिवेधो”**ति। इधाधिप्पेतं सम्मापटिपत्तिं दस्सेतुं
“सीलसमाधिसम्पदानं”ति वुत्तं। एकदेसुपलक्खणवसेन, वण्णगन्धरागिसप्पायवसेन वा पाळियं
“विनीलकविपुब्बकगगहणलक्खणा असुभसञ्जा”ति वत्त्वा **“तस्सा निब्बिदापदट्टानं”**ति वुत्तं **निब्बिदं दस्सेन्तो**
“निब्बिदा”तिआदि वुत्तं। तत्थ परितस्सनतो विसेसेतुं **“जाणेना”**ति विसेसितं। तथा पवत्तन्ति निब्बिदनाकारेन पवत्तनं।

योनिस्सो उम्मुज्जन्तिया विदेहरज्जो धीताय **रुचाय** जातिस्सरजाणं कम्मस्सकतज्जाणस्स कारणं अहोसि, न पन
 असप्पुरिसूपनिस्सयतो, अयोनिस्सो उम्मुज्जन्तस्स तस्सेव रज्जो सेनापतिनो **अलातस्स बीजकस्स** दासस्साति इममत्थं
 दस्सेन्तो **“इमस्स च...पे०... उदाहरितब्बो”**ति आह। सोति पसादो। अवत्थाविसेसोति सम्पयुत्तधम्मानं
 अनाविलभावलक्खितो अवत्थाभेदो। **आयतनगतो**ति ठानगतो, रतनत्तयविसयोति अत्थो। **“कायो”**तिआदिना
 अवत्थाविसेसेन विना सभावसिद्धमेव पदट्टानं दस्सेति।

इमस्मिं च ठाने पाळियं पुब्बे येसं धम्मानं पदट्टानं निद्धारितं, ते धम्मा येसं धम्मानं पदट्टानानि होन्ति, ते दस्सेतुं
“अपरो नयो”तिआदि आरद्धन्ति वेदितब्बं। अस्सादमनसिकारो अयोनिस्सोमनसिकारलक्खणो वुत्तो
 निदस्सनमत्तअत्थोति वेदितब्बो, येभुय्येन सत्तानं लोभवसेन अयोनिस्सोमनसिकारा संवत्तन्तीति दस्सनत्थं वा एवं वुत्तं।
 उपपत्ति एव **ओपपच्चयं**, तस्स भावो **ओपपच्चयिकन्ति** आह **“उपपत्तिभवभावेना”**ति। ववत्थितभावोति
 ववत्थितभावो रूपस्स दस्सनादिपटिनियतारम्भणकिच्चता। **भवस्स अङ्गानीति** भवस्स कारणानि। दुतिये **अङ्गानीति**
 अवयवा, कम्मवट्टम्पि वा कारणङ्गभावेन योजेतब्बं।

कम्मट्टानस्साति भावनाय ब्रूहना वट्टुना। तेसूति तित्थज्जुतादीसु। कल्याणमित्तस्स सम्मदेव पथिरुपासनायपीति तं
 निस्साय लद्धेन सब्बाय धम्मस्सवनेन धम्मपसंहितं पामोज्जं होतीति तित्थज्जुता पीतज्जुताय पदट्टानं। एवं याय विमुत्तिया
 सति विमुत्तिजाणदस्सनं होतीति सा तस्स पदट्टानन्ति अयमत्थो पाकटोति आह **“पुरिमानं...पे०... सुविज्जेय्यो एवा”**ति।
सह अधिट्टानेनाति जातपरिज्जाय सद्धिं। जातपरिज्जा हि तीरणपरिज्जाय अधिट्टानं। सेसं सुविज्जेय्यमेव।

पदट्टानहारविभङ्गवण्णना निट्ठिता।

५. लक्खणहारविभङ्गवण्णना

२३. **“लक्खणहारस्स विसयं पुच्छती”**ति वुत्तं, **“को पन तस्स विसयो”**ति वुत्ते समानलक्खणा अवुत्तधम्मा।
 कायानुपस्सनाय समारद्धाय वेदनानुपस्सनादयो सुखेनेव सिज्झन्तीति तब्बचनेन वेदनागतासतिआदीनं वुत्तभावो दस्सितो
सतिपट्टानभावेन एकलक्खणत्ताति कायानुपस्सनासतिपट्टानस्स सद्धानुगहितानि वीरियसतिसमाधिपज्जिन्द्रियानि
 साधनं, एवं इतरेसम्पीति कत्वा वुत्तं। अयं अत्थो **अट्ठकथायमेव** (नेत्ति० अट्ठ० ५१) परतो आगमिस्सति। इमिना नयेन
 सेसेसुपि एकलक्खणतानिद्वेसेसु अत्थो वेदितब्बो। **परतोति चतुब्बूहहारवण्णनायं** (नेत्ति० अट्ठ० २०)।

असम्मिस्सतोति वेदनादयोपि एत्थ सिता एत्थ पटिसन्धाति काये वेदनादिअनुपस्सनापसङ्गेपि आपन्ने तदसम्मिस्सतोति अत्थो ।

अवयविगाहसमज्जातिधावनसारादानाभिनिवेसनिसेधनत्थं कायं अङ्गपच्चङ्गेहि, तानि च केसादीहि, केसादिके च भूतुपादायरूपेहि विनिब्भुजितुं “तथा न काये”तिआदिमाह । पासादादिनगरावयवसमूहे अवयविवादिनोपि अवयविगाहणं करोन्ति । नगरं नाम कोचि अत्थो अत्थीति पन केसज्जि समज्जातिधावनं सियाति इत्थिपुरिसादिसमज्जातिधावने नगरनिदस्सनं वुत्तं । अज्जो कोचि सत्तादिको । यं पस्सति इत्थिं, पुरिसं वा । ननु चक्खुना इत्थिपुरिसदस्सनं नत्थीति? सच्चं नत्थि, “इत्थिं पस्सामि, पुरिसं पस्सामी”ति पन पवत्तसमज्जावसेन “यं पस्सती”ति वुत्तं । मिच्छादस्सनेन वा दिट्ठिया यं पस्सति, न तं दिट्ठं रूपायतनं होति, रूपायतनं वा तं न होतीति अत्थो । अथ वा तं कोसादिभूतुपादायसमूहसङ्घातं दिट्ठं न होति, दिट्ठं वा यथावुत्तं न होतीति अत्थो । यं दिट्ठं तं न पस्सतीति यं रूपायतनं, केसादिभूतुपादायसमूहसङ्घातं वा दिट्ठं, तं पज्जाचक्खुना भूततो न पस्सतीति अत्थो ।

न अज्जधम्मणुपस्सीति न अज्जसभावानुपस्सी, असुभादितो अज्जाकारानुपस्सी न होतीति वुत्तं होति ।

पथवीकायन्ति केसादिं पथवीधम्मसमूहत्ता “कायो”ति वदति, लक्खणपथविमेव वा अनेकभेदभिन्नं सकलसरीरगतं पुब्बापरियभावेन पवत्तमानं समूहवसेन गहेत्वा “कायो”ति वदति । एवं अज्जत्थापि ।

आकारसमूहसङ्घातस्साति अनिच्चतादिआकारसमुदायपरियायस्स ।

तीसु भवेसु किलेसेति भवत्तयविसयकिलेसे । सब्बत्थिकन्ति सब्बत्थ लीने, उद्धते च चित्ते इच्छितब्बत्था, सब्बे वा लीने, उद्धते च भावेतब्बा बोज्झङ्गा अत्थिका एतायाति सब्बत्थिका । अन्तो सङ्कोचोति अन्तो ओलीयना, कोसज्जन्ति अत्थो ।

२४. गहितेसूति भावनागहणेन गहितेसु, भावितेसूति अत्थो, वचनेन वा गहितेसु । भावनागहणदीपनत्थत्ता पन वचनेन गहणस्स भावनागहणमेत्थ पधानं । यस्स सतिपट्टाना भाविता, तस्स सम्मप्यधानादयो बोधिपक्खियधम्मा न भाविताति नेतं ठानं विज्जतीति च समानलक्खणतापदेसेन इममत्थं दस्सेतुं पाळियं “चतूसु सतिपट्टानेसु भावियमानेसु चत्तारो सम्मप्यधाना भावनापरिपूरिं गच्छन्ती”तिआदि वुत्तं ।

विपल्लासा पहीयन्ति उजुविपच्चनीकभावतो । “आहारसमुदया कायस्स समुदयो, फस्ससमुदया वेदनानं समुदयो (सं० नि० ५.४०८), सङ्खारपच्चया विज्जाणं, विज्जाणपच्चया नामरूप”न्ति (सं० नि० १.१, ३९; म० नि० ३.१२६; महाव० १; उदा० १; विभ० २२५) वचनतो कायादीनं समुदयभूता कबळीकाराहारफस्समनोसज्जेतनाविज्जाणाहाराकायादीनं परिजाननेन परिज्जाता होन्ति तप्पटिपक्खप्पहानतोति दस्सेन्तो “चत्तारो आहारा”तिआदिमाह । सब्बत्थाति “उपादानेहि अनुपादानो भवती”ति एवमादीसु ।

तत्थ यस्मा पज्च कामगुणा सविसेसा काये लब्भन्तीति विसेसेन कायो कामुपादानस्स वत्थु, सुखवेदनस्सादवसेन परलोकनिरपेक्खो “नत्थि दिन्न”न्तिआदि (दी० नि० १.१७१; म० नि० १.४४५; २.९४-९५, २२५; ३.९१, ११६; सं० नि० ३.२१०; ध० स० १२२१; विभ० ९३८) परामासं उप्पादेतीति दिट्ठुपादानस्स वेदना, चित्ते निच्चगहणवसेन सस्सतस्स

“अत्तनो सीलादिवसेन परिसुद्धपरामसनं होती”ति सीलब्बतुपादानस्स चित्तं, नामरूपपरिच्छेदेन भूतं भूततो अपस्सन्तस्स “अत्ताभिनिवेसो होती”ति अत्तवादुपादानस्स धम्मा वत्थु, तस्मा “चतूसु सतिपट्टानेषु भावियमानेषु उपादानेहि अनुपादानो भवती”ति वुत्तं ।

यस्मा पन वुत्तनयेनेव कायो कामयोगस्स वत्थु, भवेसु सुखगगहणवसेन भवस्सादो होतीति भवयोगस्स वेदना, सन्ततिघनगगहणवसेन चित्ते अत्ताभिनिवेसो होतीति दिट्ठियोगस्सचित्तं, धम्मविनिब्भोगस्स दुक्करत्ता, धम्मनं धम्ममत्तताय च दुप्पटिविज्झत्ता सम्मोहो होतीति अविज्जायोगस्स धम्मा, वत्थु, तस्मा चतुसतिपट्टानभावनाय तेसु तेसं पहानसिद्धितो योगेहि विसंयुत्तता वुत्ता । एतेनेव आसवेहि अनासवता, ओघेहि नित्तिण्णता च संवण्णिता होति कामरागादीनं एव कामयोगकामासवकामोघादिभावतो ।

वुत्तनयेनेव कायो अभिज्झाकायगन्थस्स वत्थु, “दुक्खाय वेदनाय पटिधानुसयो अनुसेती”ति (म० नि० १.४६५) दुक्खदुक्खविपरिणामदुक्खसङ्खारदुक्खभूता वेदना विसेसेन व्यापादकायगन्थस्स वत्थु, चित्ते निच्चाभिनिवेसवसेन सस्सतस्स “अत्तनो सीलेन सुद्धी”तिआदिपरामसनं होतीति सीलब्बतपरामासस्स चित्तं वत्थु, सप्पच्चयनामरूपदस्सनाभावतो भवविभवदिट्ठिसङ्खारतो इदं सच्चाभिनिवेसो होतीति तस्स धम्मा वत्थूति चतुसतिपट्टानाति योजेतब्बं ।

वुत्तनयेनेव विसेसतो कायो रागसल्लस्स वत्थु, वेदना दोससल्लस्स, “चित्तं निच्चगगहणवसेन अत्ताभिनिवेसं अत्तानं सेय्यादितो दहती”ति चित्तं मानसल्लस्स, वुत्तनयेनेव धम्मा मोहसल्लस्स वत्थूति चतुसतिपट्टानाति योजेतब्बं ।

यस्मा पन कायानुपस्सनादीहि कायवेदनाचित्तधम्मेसु परिज्जातेसु रूपवेदनासज्जासङ्खारक्खन्था परिज्जाता होन्ति, चित्ते हि परिज्जाते सज्जापि परिज्जाताव होति, तस्मा “विज्जाणट्ठितियो चस्स परिज्जं गच्छन्ती”ति वुत्तं ।

तथा विसेसतो काये सापेक्खा छन्दागतिं गच्छतीति कायो छन्दागतिया वत्थु, वुत्तनयेनेव वेदना व्यापादस्स निमित्तन्ति सा दोसागतिया वत्थु, सन्ततिघनगगहणवसेन सरागादिचित्ते सम्मोहो होतीति मोहागतिया चित्तं, धम्मसभावानवबोधेन भयं होतीति भयागतिया धम्मा वत्थूति चतुसतिपट्टानभावनाय अगतिगमनप्पहानं होतीति आह “अगतिगमनेहि च न अगतिं गच्छती”ति ।

“अकुसलस्स सोमनस्सस्स वसेना”ति इदं “अयम्पि अत्थो सम्भवती”ति कत्वा वुत्तं । “सुखाय वेदनाय रागानुसयो अनुसेती”ति (म० नि० १.४६५) पन वचनतो सुखवेदनागगहणेन तत्थानुसयनेन समुदयसच्चं देसितन्ति वेदितब्बं । देसितं दुक्खं अरियसच्चन्ति दुक्खदुक्खगगहणेन सातिसयं दुक्खं अरियसच्चं पकासितं होतीति पाळियं “दुक्खं अरियसच्चं देसितं”न्ति वुत्तं । सहचरणादीसु यं वत्तब्बं, तं हेट्ठा निद्वेसवारवण्णनायं (नेत्ति० अट्ठ० ५ आदयो) वुत्तं ।

लक्खणहारविभङ्गवण्णना निट्ठिता ।

६. चतुब्बूहहारविभङ्गवण्णना

२५. हारानन्ति निद्धारणे सामिवचनं । हारेसु इमस्स चतुब्बूहहारस्स विसेसतो सुत्तस्स व्यञ्जनविचयभावतोति योजना । तेन वुत्तं “व्यञ्जन...पे०... दस्सेती”ति । यायाति निरुत्तिया ।

यथारहन्ति संवण्णियमाने सुत्ते यं यं अरहति निब्बचनं वत्तुं, तंतंलोकसमञ्जानुरोधेनेव । पुब्बभागपटिपदा सम्पादेत्वा पच्छा सच्चाभिसमयं पापुणातीति आह “सम्मुति...पे... होती”ति, तंतंपञ्जत्तिग्गहणमुखेन परमत्थग्गहणं होतीति एवं वा इमिना सम्बन्धो ।

यमिदं अनिन्द्रियबद्धरूपसन्तानं सन्धाय “उभयमन्तरेना”ति इध वुत्तं । ओतरणहारे (नेत्ति० अट्ठ० ४२ आदयो) पनस्स द्वारप्पवत्तफस्सादिधम्मे सन्धाय वुत्तभावं दस्सेतुं “उभयमन्तरेनाति फस्ससमुदितेसु धम्मेसू”ति अत्थो वुत्तो । अट्ठकथाचरिया पनाहु “अन्तरेनाति वचनं पन विकप्पन्तरदीपन”न्ति । तस्मा अयमेत्थ अत्थो — न इमं लोकं, न हुरं लोकं, अथ खो उभयमन्तरेनाति । अपरो विकप्पो — उभयमन्तरेनाति वा वचनं विकप्पन्तराभावदीपनं । तस्सत्थो — न इमं लोकं, न हुरं लोकं निस्साय ज्ञायति ज्ञायी, उभयमन्तरेन पन अज्जं ठानं अत्थीति ।

येपि च “अन्तरापरिनिब्बायी, सम्भवेसी”ति च इमेसं सुत्तपदानं अत्थं मिच्छा गहेत्वा अत्थि एव अन्तराभवोति वदन्ति, तेपि यस्मा अविहादीसु तत्थ तत्थ आयुवेमज्झं अनतिककमित्वा अन्तरा अग्गमग्गाधिगमेन अनवसेसकिलेसपरिनिब्बानेन परिनिब्बायन्तीति अन्तरापरिनिब्बायी, न अन्तराभवभूतोति पुरिमस्स सुत्तपदस्स अत्थो । पच्छिमस्स च ये भूता एव, न पुन भविस्सन्ति, ते हि (कथा० अनुटी० ५०७) खीणासवा, पुरिमपदेहि “भूता”ति वुत्ता । तब्बिपरीतताय सम्भवं एसन्तीति सम्भवेसिनो । अप्पहीनभवसंयोजनत्ता सेक्खा, पुत्थुज्जना च । चतूसु वा योनीसु अण्डजजलाबुजसत्ता याव अण्डकोसं, वत्थिकोसञ्च न भिन्दन्ति, ताव सम्भवेसी नाम । अण्डकोसतो, वत्थिकोसतो च बहि निक्खन्ता भूता नाम । संसेदजओपपातिका च पठमचित्तकवणे सम्भवेसी नाम, दुतियचित्तकवणतो पट्टाय भूता नाम । येन वा इरियापथेन जायन्ति, याव ततो अज्जं न पापुणन्ति, ताव सम्भवेसी, ततो परं भूताति अत्थो, तस्मा नत्थीति पटिक्खिपितब्बं । सति हि उजुके पाळिअनुगते अत्थे किं अनिद्धारितसामत्थियेन अन्तराभवेन अत्तभावपरिकप्पितेन पयोजनन्ति ।

यं पन ये “सन्तानवसेन पवत्तमानानं धम्मनं अविच्छेदेन देसन्तरेसु पातुभावो दिट्ठो । यथा तं वीहिआदिअविज्जाणकसन्ताने, एवं सविज्जाणकसन्तानेपि अविच्छेदेन देसन्तरेसु पातुभावेन भवितब्बं । अयञ्च नयो सति अन्तराभवे युज्जति, नाज्जथा”ति युत्तिं वदन्ति । तेहि इद्धिमतो चेतोवसिप्पत्तस्स चित्तानुगतिकं कायं अधिदुहन्तस्स खणेन ब्रह्मलोकतो इधूपसङ्कमने, इतो वा ब्रह्मलोकगमने युत्ति वत्तब्बा । यदि सब्बत्थेव विच्छिन्नदेसे धम्मनं पवत्ति न इच्छिता, यदिपि सिया “इद्धिविसयो अचिन्तेय्यो”ति, तं इधापि समानं “कम्मविपाको अचिन्तेय्यो”ति वचनतो, तस्मा तं तेसं मतिमत्तमेव । अचिन्तेय्यसभावा हि सभावधम्मा, ते कत्थचि पच्चयविसेसेन विच्छिन्नदेसे पातुभवन्ति, कत्थचि अविच्छिन्नदेसे च । तथा हि मुखघोसादीहि अज्जस्मिं देसे आदासपब्बतप्पदेसादिके पटिबिम्बपटिघोसादिकं पच्चयुप्पन्नं निब्बत्तमानं दिस्सति, तस्मा न सब्बं सब्बत्थ उपनेतब्बन्ति अयमेत्थ सङ्केपो । वित्थारतो पन पटिबिम्बस्स उदाहरणभावसाधनादिको अन्तराभवविचारो कथावत्थुप्पकरणस्सटीकायं (कथा० अनुटी० ५०७) गहेतब्बो ।

अपरे पन “इधाति कामभवो, हुरन्ति अरूपभवो, उभयमन्तरेनाति रूपभवो वुत्तो”ति वदन्ति, “इधाति पच्चयधम्मा, हुरन्ति पच्चयुप्पन्नधम्मा, उभयमन्तरेनाति पण्णत्तिधम्मा वुत्ता”ति च वदन्ति, तं सब्बअट्ठकथासु नत्थि, तस्मा वुत्तनयेनेव अत्थो वेदितब्बो । अवसिट्ठं रूपन्ति आपोधातुआकासधातूहि सद्धिं लक्खणरूपानि, ओजञ्च सन्धायाह अनिन्द्रियबद्धरूपस्स अधिप्पेतत्ता । तस्स खीणासवस्स तं निब्बानारम्मणं चित्तं न जानन्ति न जायन्ति “ज्ञायमाना”ति वुत्तत्ता । सेसं सुविज्जेय्यमेव ।

चतुर्व्यूहहारविभङ्गवण्णना निट्ठिता ।

७. आवट्टुहारविभङ्गवण्णना

२९. अकुसलानं धम्मनं विद्धंसनसभावत्ता, अकुसलानं वा पजहने कुसलानं सम्पादने पट्टपनसभावत्ता आरम्भधातु । तथाभूताति सीलादीहि समङ्गीभूता । कामधातुआदिका तिधातुयोव तेधातु । तस्स अभिभवनतो तेधातुइस्सरो मच्चुराजा । अनादिमत्तिसंसारे चिरकालं लद्धपतिट्ठापि अचिरकालं भावितेहि कुसलेहि धम्मोहि समुच्छिन्दनीयत्ता अबला किलेसाति वुत्तं “अबलं दुब्बल”न्ति । तेनाह “अबला नं बलीयन्ती”ति ।

इदं वचनं अयं गाथापादो । समाधिस्स पदट्ठानन्ति एत्थ समाधिस्स कारणं समतानुयोगे नियोजनतोति योजेतब्बं । एस नयो सेसेसुपि । पपञ्चाति रागादयोव । तथा चेव संवण्णितन्ति देसनाय पदट्ठानभावेनेव अत्थसंवण्णना कताति अत्थो ।

न्ति तं देसनं । तस्साति सभागादिवसेन आवट्टुनस्स । परिपक्कजाणानं विसेसाधिगमाय । लाभविनिच्छयपरिग्गहमच्छरियानीति आदीसु लाभोति रूपादिआरम्भणप्पटिलाभो । सो परियेसनाय सति होतीति परियेसनागहणेन गहितो । विनिच्छयोति “एत्तकं मे रूपादिरम्भणत्थाय भविस्सति, एत्तकं सद्दादिआरम्भणत्थाय, एत्तकं मय्हं, एत्तकं परस्स, एत्तकं परिभुज्जिस्सामि, एत्तकं निदिहिस्सामी”ति एवं पवत्तो वितक्को विनिच्छयो । सो लापितहेतुकत्ता परियेसनमूलकताय परियेसनागहणेनेव गहितो, तथा परिग्गहमच्छरियानि । तत्थ परिग्गहो “मम इदं”न्ति परिग्गहणं । मच्छरियं “मय्हेव होतू”ति परेहि साधारणभावासहनं । तेनेवस्स पोराणा एवं वचनत्थं वदन्ति “मय्हेविदमच्छरियं होतु, मा अज्जेसं अच्छरियं होतूति पवत्तत्ता मच्छरियन्ति वुच्चती”ति (दी० नि० अट्ठ० २.१०३; अ० नि० अट्ठ० ३.९.२३) । परिभोगत्थानं पन विनिच्छयादीनं परिभोगन्तो गधता वेदितब्बा । छन्दरागो दुब्बलरागो । अज्झोसानं “मम इदं”न्ति तण्हावसेन बलवसन्निट्ठानन्ति आह “छन्दरागअज्झोसाना तण्हा एवा”ति । आरक्खनिमित्तं द्वारपिदहनमज्जूसागोपनादिना सुट्ठु रक्खणनिमित्तं । पापानि करोन्तो परिभोगनिमित्तं रत्तो गिद्धो गधितो मुच्छितो हुत्वा मिगोव परिभुज्जननिमित्तं पमादं आपज्जतीति एवं परियेनारक्खा परिभोगनिमित्तं । पमादो तिविधो तण्हाय वसेन कथितोति दस्सेन्तो “तिविधो तण्हायाति वुत्तं”न्ति आह ।

अविसेसेन वुत्तन्ति “कतमेन उपादानेन सउपादाना”ति विभागेन पुच्छित्वापि “अविज्जाय च तण्हाय चा”ति अविनिब्भुजित्वा वुत्तं । तण्हज्ज अविज्जज्ज चतुरुपादानं वसेनाति कामुपादानादीनं चतुन्नं उपादानानं वसेन विभजित्वा खन्धानं दुक्खभावेन दुक्खसच्चभावेन सह परिज्जेय्यभावं, उपादानानं समुदयभावेन समुदयसच्चभावेन सह पहातब्बभावं दस्सेतीति योजना ।

३०. “यो”ति आदिना वुत्तो तिविधो पमादो परियेसति, आरक्खणज्ज करोति, परिभोगनिमित्तज्जाति सम्बन्धो । पमादो हि पमज्जन्तस्स पुग्गलस्स भोगानं परियेसनाय, आरक्खणाय च हेतुभूतो कत्तुभावेन उपचरितो, परिभोगस्स पन निमित्तं । “तप्पटिपक्खेना”ति पदस्स अत्थं विवरति “अप्पमादानुयोगेना”ति, तेन समथभावं दस्सेति । खेपनाति खयपापना । वोदानपक्खविसभागधम्मवसेनाति वोदानपक्खो च सो पमादस्स विसभागधम्मो चाति वोदान...पे०... धम्मो, समथो, तस्स वसेन ।

समथे सतीति अधिद्वानभूते ज्ञाने सति, तं पादकं कत्वाति अत्थो । या पज्जाति नामरूपपरिच्छेदादिवसेन पवत्तपज्जा । तेनाह “अयं विपस्सना”ति । पहीनेसूति पहीयमानेसु ।

वोदानपक्खन्ति आरम्भधातुआदिवोदानपक्खं निक्खिपित्वा । विसभागधम्मवसेनाति पमादवसेनेव । सभागधम्मवसेनाति पुब्बे निक्खित्तस्स आरम्भधातुआदिवोदानधम्मस्स समथादिसभागधम्मवसेन ।

पुन अपरियोदापनियं सिखाप्पत्तपरियोदापनं इधाधिप्पेतन्ति आह “तं पन अरहत्तेन होती”ति ।

मोहसमुद्धानता वुत्ता “मोहो एव समुद्धान”न्ति कत्वा । अज्जथा पिसुणावाचाय दोससमुद्धानता मुसावादस्स विय मोहसमुद्धानभावा वत्तब्बा सिया ।

कम्मपथभावं पत्तानं, अप्पत्तानञ्च अकुसलधम्मानं “सब्बपाप”न्ति पदेन परिग्गहितत्ता वुत्तं “कम्मपथकम्मविभागेना”ति ।

३१. सेसपदानन्ति “कुसलस्स उपसम्पदा”तिआदीनं (दी० नि० २.९०; ध० प० १८३; नेत्ति० ३०, ५०, ११६, १२४; पेटको० २९) गाथाय अवसिद्धपदानं । यथाधिगतन्ति अत्तना अधिगतप्पकारं, पच्छा भूमिदिसा ।

उपरि यापेन्तीति मनुस्सलोकतो उपरिद्धिमं देवलोकं गमेन्ति ।

३२. यथावुत्तस्स धम्मस्साति सीलस्स च मग्गस्स च । तण्हाविज्जादीनन्ति आदिसद्देन तदेकट्टकिलेसा गच्छन्ति, तेसं पदद्वानधम्मा च । समथविपस्सनादीनन्ति आदिसद्देन सामञ्जफलानं सङ्गहो । यदग्गेन चेत्य “निरोधो रक्खती”ति वुत्तो, तदग्गेन मग्गो रक्खणकिरियाय करणं वुत्तं “येन रक्खती”ति । विसभागधम्मवसेन पुरिमानि सभागधम्मावट्टनवसेन पच्छिमानि सच्चानि निद्धारितानीति योजेतब्बं ।

आवट्टहारविभङ्गवण्णना निद्धिता ।

८. विभत्तिहारविभङ्गवण्णना

३३. धम्मेसूति पुज्जादिदानादिभेदभिन्नेसु सभावधम्मेसु । तत्थ लब्भमानोति तेसु यथावुत्तेसु धम्मेसु लब्भमानो । भूमिविभागोति कामावचरादिदस्सनादिभूमिप्पभेदो । पदद्वानविभागोति ते पुज्जादिधम्मा येसं पदद्वानं, तेसं वा ये धम्मा पदद्वानं, तब्बिभागो । येसं सुत्तानन्ति मूलपदद्वानभूतानं संकिलेसभागियादीनं चतुन्नं सुत्तानं वसेन । असङ्करववत्थानेन हि एतेसु सुत्तेसु सातिसयं धम्मा विभत्ता नाम होन्ति । तेनाह “विसेसतो”ति । यदि एवं कस्मा वासनाभागियनिब्बेधभागियसुत्तानि एवेत्थ गहितानीति? नयिदमेवं निक्खमनपरियोसानभावेन इतरेसम्पि गहितत्ता । यतो हि निस्सटा वासनाभागिया धम्मा, ते संकिलेसभागिया । यंपरियोसाना निब्बेधभागिया धम्मा, ते असेक्खभागियाति द्वयग्गहणेनेव इतरम्पि द्वयं गहितमेव होति । तेनाह “इमेसं चतुन्नं सुत्तानं देसनाया”ति । इमानि चत्तारि सुत्तानीति पाळिया, वक्खमानाय देसनाय वा इतरद्वयसङ्गहो दट्ठब्बो, न पटिक्खेपो ।

तेनेवाति नियमस्स अकतत्ता, ततो च तेन तन्निस्सितेन च ब्रह्मचारी भवतीति सिद्धं होति । एव-सद्दो वा समुच्चयत्थो

दट्ठब्बो । **सिया तस्स पटिक्खेपोति** तस्स अट्ठसमापत्तिब्रह्मचरियस्स सिया पटिक्खेपो । एवं सति सावसेसा देसना सिया ।

तदङ्गादिप्पहानद्वयं पदट्टानभूतं इध गणनूपगं न होतीति “**समुच्छेदपटिप्पस्सद्धिप्पहानानं वसेना**”ति वुत्तं । तथा हेत्थ केचि “तेनेवा”ति पठन्ति । “**तेनेव ब्रह्मचरियेनाति पठन्ती**”ति इदं “संवरसीले ठितो”ति (नेत्ति० ३३) एत्थ वुत्तं पाळिविकप्पं सन्धाय वदति । “**यस्मा...पे०... वक्खती**”ति इदं पच्छिमपाठस्सेव युत्तताय कारणवचनं ।

कथं मन्ताति? अनिब्बेधसभावत्ता महग्गतपुज्जानं न निब्बेधभागियसुत्तेन सङ्गहो, वासनाभागियत्ता पन वासनाभागियसुत्तेनेव सङ्गहोति । तदुपसङ्गा हि पच्छिमो एव पाठो युत्ततरो । इतरथा सावसेसा देसना भवेय्य । तेनाह “**न हि...पे०... देसेती**”ति ।

संकिलेसभागियअसेक्खभागियानं परतो वक्खमानत्ता वुत्तं “**वक्खमानानं...पे०... वसेना**”ति । “**सब्बतो**”ति इदं पुब्बपरापेक्खं । तस्स परापेक्खताय “सब्बतोभागेन एकादससु ठानेसु पक्खिपित्वा”ति अट्ठकथायं योजितं । तत्थ पदादिके विचयहारपदत्थे सन्धाय “**एकादससु ठानेसू**”ति वुत्तं । पुब्बपेक्खताय पन “सब्बतोभागेन देसनाय फलेना”तिआदिना योजेतब्बं ।

संकिलेसभागियानं तण्हासंकिलेसादिना देसनानयो वेदितब्बो । **फलं** अपायदुक्खेन मनुस्सेसु दोभगियेन । असेक्खभागियानं असेक्खेहि सीलक्खन्धादीहि देसनानयो । **फलं** अगगफलेन च अनुपादिसेसाय च निब्बानधातुया वेदितब्बं । इतरेसं पाळियं वुत्तमेव । कामरागब्बापादउद्धम्भागियसंयोजनगहणेन संकिलेसभागियानं, विरागगहणेन असेक्खगहणेनेव च असेक्खभागियानं वक्खमानत्ता वुत्तं “**वक्खमानानं...पे०... वसेना**”ति । पदपदत्थविचारयुत्तिनिद्धारणमुखेन धम्मविभत्तिआदिविचारो कातब्बोति दस्सेतुं पाळियं “**विचयेन...पे०... तब्बानी**”ति वुत्तन्ति अट्ठकथायं “**विचयेन...पे०... दस्सेती**”ति वुत्तं ।

३४. एवन्ति इति । **धम्मे**ति वुत्तसभागधम्मे । **साधारणासाधारणभावेहीति** सामञ्जविसेसेन विसिद्धेहि । **द्वे धम्मा साधारणाति** द्वे इमे धम्मा येहि सभागधम्मा साधारणा नाम होन्ति । कतमे द्वे? नामं, वत्थु च । तत्थ **नामं** नामपञ्चत्ति, तंमुखेनेव सद्धतो तदत्थावगमो । सद्धेन च सामञ्जरूपेनेव तथारूपस्स अत्थस्स गहणं, न विसेसरूपेन, तस्मा सद्धवचनीया अत्था साधारणरूपनामायत्तगहणीयताय नामसाधारणा वुत्ता । **वत्थू**ति पवत्तिट्टानं । यत्थ हि ये धम्मा पवत्तन्ति, तेसं सब्बेसं ते धम्मा साधारणाति पवत्तिट्टानसङ्घातानं वत्थूनं साधारणा । यस्मा पनिदं द्वयं तेसं धम्मानं साधारणभावे पकतिभूतं सभावभूतं, तस्मा वुत्तं “**द्वे धम्माति दुवे पकतियो**”ति । **एकसन्ततिपत्तिततायाति** समानसन्ततिपवत्तिया । तेनाह “**समानवत्थुका**”ति । दस्सनपहातब्बानज्हि यथा मिच्छत्तनियतसत्ता पवत्तिट्टानं, एवं अनियतापीति उभये हि ते समानवत्थुका । एस नयो इतरेसुपि । सक्कायदिट्ठिविचिकिच्छासीलब्बतपरामासा हि भिन्नसभावापेते धम्मा दस्सनेन पहातब्बतं नातिवत्तन्तीति ते नामसामञ्जतं पत्ता, रूपरागादयो च भावनाय पहातब्बतन्ति आह “**पहानेकट्टा नामसाधारणा**”ति । यथा पन “वत्थूनं साधारणा वत्थुसाधारणा”ति अयमत्थो लब्धति, एवं “वत्थुना साधारणा वत्थुसाधारणा”ति अयम्पि अत्थो लब्धतीति दस्सेन्तो “**सहजेकट्टा वत्थुसाधारणा**”ति आह । ते हि अञ्जमञ्जं फुसनादिसभावतो भिन्नापि यस्मिं पवत्तन्ति, तेन वत्थुना साधारणा नाम होन्ति । एत्थ च लब्धमानम्पि कुसलादिनामसाधारणं अनामसित्वा वत्थुसाधारणा ताव योजिताति वेदितब्बा । **पटिपक्खादीहीति** आदिसद्धेन समानफलतासहव्यतादिके सङ्गण्हाति । **सेसपदेसूति** “पुथुज्जनस्सा”तिआदिवाक्येसु । कथं? तत्थ हि पुथुज्जनस्स,

सोतापन्नस्स च सम्भवतो अनागामिनो, अरहतो च असम्भवतोति आदिना योजेतब्बं ।

कथं ते ओधिसो गहिताति केनाकारेण ते “साधारणा”ति वुत्तधम्मा भागसो गहिता । “अमुकस्स, अमुकस्स चा”ति अयञ्हेत्थ अत्थो । सामञ्जभूता धम्मा **साधारणा** नाम, एवं सन्ते कथं तेसं मिच्छत्तनियतानियतादिवसेन विभागेन पवत्तिट्ठानता वुच्चति, न वत्तब्बन्ति अधिप्पायो । अथ विभागेन तं वत्तब्बं, ननु ते साधारणाति न वत्तब्बमेवाति? एवं साधारणाति मिच्छत्तनियतानं, अनियतानन्ति इमेसं उभयेसंयेव ते धम्मा साधारणा । तेनाह — “**न सब्बसत्तानं साधारणताय साधारणा**”ति । “**यस्मा**”ति आदिना तत्थ कारणमाह, तेनेतं दस्सेति “केचि धम्मा केसञ्चिदेव धम्मानं साधारणा होन्ति, अञ्जेसं असाधारणा”ति । तेनाह “**पटिनियतञ्हि तेसं पवत्तिट्ठानं**”न्ति ।

इतरथाति अनियतपवत्तिट्ठानताय सब्बेसं साधारणा, असाधारणा वा सियुं, तथा सति । **तथा वोहारोति** “साधारणा, असाधारणा”ति च अयं वोहारो सामञ्जा एव न भवेय्य । **एते एव धम्माति** “साधारणा”ति वुत्तधम्मा एव । **एवन्ति** “मिच्छत्तनियतानं”न्ति आदिना वुत्तप्पकारेण । **नियतविसया** परिच्छिन्नप्पवत्तिट्ठाना । “**योपी**”ति आदि पुग्गलाधिट्ठानेन वुत्तस्सेवत्थस्स पाकटकरणं । “**न ही**”ति आदिना अन्वयतो, ब्यतिरेकतो च तमेवत्थं विभावेति । **सेसेपीति** “भावनापहातब्बा”ति एवमादिमिहिपि ।

पच्चत्तनियतोति पाटिपुग्गलिको । **इतरस्साति** अपच्चत्तनियतस्स । **तथाति** असाधारणभावेन । कोचि धम्मो कञ्चि धम्मं उपादाय साधारणोपि समानो तदञ्जं उपादाय असाधारणोपि होतीति आह “**साधारणाविधुरताया**”ति । तेनाह “**तं तं उपादाया**”ति आदि । तथा हि “धम्मता”ति वुत्तपठममग्गट्ठता दीपिता, तादिसानं एव अनेकेसं अरियानं वसेन साधारणाति । **पठमस्साति** अट्ठमकस्स । **दुतियस्साति** सोतापन्नस्स । पुन **अट्ठमकस्साति** “अट्ठमकस्स, अनागामिस्स चा”ति एत्थ वुत्तअट्ठमकस्स । तेनाह “**अनागामिमग्गट्ठस्सा**”ति । अग्गफलट्ठतो पट्टाय पटिलोमतो गणियमानो पठममग्गट्ठो **अट्ठमको**, मग्गट्ठताय, पहीयमानकिलेसताय च सब्बेपि मग्गट्ठा अट्ठमका वियाति **अट्ठमका**, “एकचित्तक्खणतो उद्धं न तिट्ठतीति **अट्ठमको**”ति अपरे निरुत्तिनयेन । “**सेक्खा**”ति नामं साधारणन्ति सम्बन्धो । **इतरेसूति** “**भब्बाभब्बा**”ति वुत्तेसु अनरियेसु । तेनाह पाळियं “**हीनुक्कट्टुमज्झिमं उपादाया**”ति ।

नियामावक्कन्तियाति अवक्कन्तनियामताय । **जाणुत्थरस्साति** जाणाधिकस्स । **तथाविधपच्चयसमायोगेति** जाणविसेसपच्चयसमवाये । यथा हि जाणबलेन दन्धाभिज्जता न होति, एवं पटिपदापटिपन्नोपि सुखेन विसोसीयतीति । सा हि सुखापटिपदा खिप्पाभिज्जा तंसमङ्गिनो जाणुत्तरत्ता विपस्सनाय पदट्ठानन्ति वुत्ता ।

धम्मतो अनपेता चिन्ता **धम्मचिन्ता**, योनिमनसिकारेण पवत्तितत्ता धम्मेसु चिन्ता, **धम्मो** वा जाणं, तस्मा धम्मावहा चिन्ता **धम्मचिन्ता**, चिन्तामयजाणस्स हेतुभूता चिन्ताति अत्थो ।

पाळियं सुतमयपञ्चागहणेन “ये ते धम्मा आदिकल्याणा...पे०... तथारूपास्स धम्मा बहुस्सुता होन्ती”ति आदि (अ० नि० ८.२) सुत्तपदसङ्गहो अत्थो परिगगहितो, तथा योनिमनसिकारगहणेन “सो ‘अनिच्च’न्ति योनिमनसि करोती”ति आदिना वुत्तो उपायमनसिकारो परिगगहितो । सम्मादिट्ठिगहणेन “सम्मादिट्ठि भावेति विवेकनिस्सित”न्ति आदिना वुत्ता सम्मादिट्ठि परिगगहिताति दस्सेन्तो आह “**अथ खो...पे०... दस्सेतु**”न्ति । **सेसन्ति** “धम्मस्वाक्खातता”ति एवमादि ।

यस्स च पुब्बे अत्थो न संवणितो, तत्थ कल्याणमित्तताय आयतनगतो पसादो, चित्तवूपसमो च फलन्ति दस्सेन्तो “सप्पुरिस...पे०... पदट्ठान”न्ति आह। अत्तसम्मापणिहितत्ता पापजेगुच्छिनिब्बिदादिबहुलोव होतीति दस्सेन्तो आह “अत्थ...पे०... पदट्ठान”न्ति। धम्मो स्वाक्खातो आदितो पट्ठाय याव परियोसाना सब्बसम्पत्तिपरिपूरिहेतूति दस्सेन्तो “धम्मस्वाक्खातता...पे०... पदट्ठान”न्ति आह। कुसलमूलरोपना हि समापत्तिपरियोसानाति। सङ्गसुट्ठताय सङ्गस्स सुट्ठभावाय सङ्गस्स सप्पत्तिस्सताय “सुट्ठ, भन्ते”ति वचनसम्पटिच्छनभावाय। इतरं सुविज्जेय्यमेव।

विभत्तिहारविभङ्गवण्णना निट्ठिता।

९. परिवत्तनहारविभङ्गवण्णना

३५. सम्मादिट्ठिस्स...पे०... निज्जिण्णा भवतीति एत्थ यथा मग्गसम्मादिट्ठिवसेनत्थो वुत्तो, एवं कम्मस्सकताकम्मपथसम्मादिट्ठिनप्पि वसेन अत्थो लब्भतेव। कम्मपथकथा हेसा। यथावुत्तेनाकारेनाति “अविमुत्ताव समाना”ति, “अविमुत्तिय”न्ति च वुत्तप्पकारेन। मिच्छाभिनिवेसवसेनाति असम्मासम्बुद्धं एव सम्मासम्बुद्धोति, अनिय्यानिकं एव निय्यानिकोति, असन्तं एव पन सन्तन्ति, अनरियं एव अरियोति विपरीताभिनिवेसवसेन। मिच्छाधिमोक्खोति अयाथावपसादो, अयाथावसन्निट्ठानं वा। उप्पन्नमोहो मिच्छाविमुत्तिजाणदस्सनन्ति सम्बन्धो।

३६. वादानं वा अनुवादा वादानुवादा, तेसं वादानं उपादाति अत्थो। वादानुपवत्तियोति वादानं दोसानं अनुपवत्तियो।

अन्तद्वयपरिवत्तनन्ति कामसुखअत्तकिलमथानुयोगसङ्घातस्स अन्तद्वयस्स पटिपक्खवसेन परिवत्तनं।

एतेसुपि वारेसूति “निय्यानिको धम्मो तेसं अधम्मो, सुखो तेसं अधम्मो”ति च इमेसु वारेसु। वुत्तनयेनाति यदि अत्तपरितापनं अत्तनो दुक्खापनं धम्मो, धम्मस्स पटिविरुद्धो अधम्मो सिया, दुक्खस्स च सुखपटिविरुद्धन्ति ज्ञानमग्गफलसुखस्स, अनवज्जपच्चयपरिभोगसुखस्स च तेसं अधम्मभावो आपज्जतीति एवं वत्तब्बा। “यं यं वा पनातिआदिना”ति इदं अवसेसपाठामसनं। एत्थ यं यं वा पन धम्मन्ति यं वा तं वा धम्मं, कुसलं वा अकुसलं वा इड्ढं वा अनिड्ढं वाति वुत्तं होति। रोचयति वा उपगच्छति वाति चित्तेन रोचति, दिट्ठिया उपगच्छतीति। तस्स तस्स धम्मस्स यो पटिपक्खोति तस्स तस्स रुचितस्स, उपगतस्स वा धम्मस्स यो पटिपक्खो नाम। स्वस्स अनिड्ढतो अज्झापन्नो भवतीति यो धम्मो अस्स रुचितस्स, उपगतस्स वा धम्मस्स अनिड्ढतो पच्चनीकतो अब्भुपगतो होति, तेन पटिपक्खेन देसनाय परिवत्तनं परिवत्तनो हारोति अत्थो। तेनाह “पटिपक्खस्स लक्खणं विभावेती”ति।

परिवत्तनहारविभङ्गवण्णना निट्ठिता।

१०. वेवचनहारविभङ्गवण्णना

३७. अज्जमज्जेहीति अज्जेहि अज्जेहि। आयतिन्ति पच्चवेक्खणकाले। कथञ्चीति येन केनचि पकारेन, पठमं वुत्तेन परियायेन अप्पटिविज्झन्तो अपरेन परियायेन पटिविज्झेय्याति अधिप्पायो। परियायवचनं निदिसतीति सम्बन्धो। एवं सब्बत्थ। तस्मिं खणेति परियायवचनस्स वुत्तक्खणे। विक्खित्तचित्तानन्ति आरम्भणन्तरेहि विविधखित्तचित्तानं। अज्जविहितानन्ति अज्जं चिन्तेन्तानं। कस्मा पन अज्जेन परियायेन तदत्थावबोधनं, ननु तेन वुत्ते दळ्हीकरणं होतीति

चोदनं सन्धायाह “तेनेवा”तिआदि । तत्थ तदञ्जेसन्ति तेहि विक्खित्तचित्तादीहि अञ्जेसं, येहि पठमं वचनं सम्मदेव गहितं । तत्थाति वुत्तवचनेनेव पुनप्पुनं वचने । अधिगतअन्वत्थताय पुनरुत्ति परिवज्जनत्थं विसेसनभावेन ताहि ताहि सञ्जाहिपि अयम्पि सद्दो इमस्सत्थस्स वाचको, अयम्पि सद्दो इमस्सत्थस्स वाचकोति पञ्चापनेहि । देसेतब्बस्स तस्स तस्स अत्थस्स अत्तनो चित्ते उपनिबन्धनं ठपनं । तत्थाति धम्मनिरुत्तिपटिसम्भिदायं । बीजावापनं हेतुसम्पादनं ।

एवं भगवतो परियायदेसनायं अनेकानि पयोजनानि वत्त्वा इदानि अत्तनो सम्मासम्बुद्धताय एवं तथागता बुद्धलीलाय अनेकेहि परियायेहि धम्मं देसेन्तीति दस्सेन्तो “किं बहुना”तिआदिमाह ।

पाळियं “पिहा नाम या वत्तमानस्स अत्थस्स पत्थना”ति पच्चुप्पन्नविसयतं दस्सेत्वा पुन अनागतविसयतं दस्सेतुं “सेय्यतरं वा”तिआदि वुत्तन्ति “अनागतपच्चुप्पन्नत्थविसया तण्हा पिहा”ति आह ।

अत्थनिष्फत्तिपटिपालनाति इमस्मिं वा पदे पिहाय एवत्थवसेन अनागतपच्चुप्पन्नत्थविसयभावदीपनतो ।

धम्मरम्मणेनेव सङ्गहिता “धम्मरम्मण”न्त्वेव गहणं गता । चतुवीसति पदानीति एत्थ गेहसितदोमनस्सूपविचारादीनं चतुन्नं छक्कानं वसेन चतुवीस कोट्टासा ।

३८. सायेव पत्थनाकारेन धम्मनन्दीतिआदिमाहाति एत्थ अयमत्थो — सा एव पत्थनाकारेन पवत्तिया आसादिपरियायेन वुत्ता तण्हा रूपादिधम्मेसु नन्दनट्टेन धम्मनन्दी । तेसं एव पियायनट्टेन धम्मपेमं । गिलित्वा परिनिट्ठपेत्वा ठानतो धम्मज्झोसानन्ति ।

इमिनापीति न केवलं “पञ्चा पजानना”तिआदिआवेणिकपरियायेनेव वेवचनं वत्तब्बं, अथ खो इमिना आधिपतेय्यादिसाधारणपरियायेनपि वेवचनं वत्तब्बन्ति अत्थो । इमिनाव नयेनाति एतेन परियायवचनेन । न हि देसनत्थसाधनं “इतिपि सो भगवा”तिआदिपाळिनयदस्सनन्ति दस्सेति । बलनिष्फत्तिगतोतिआदीसु दससु तथागतबलेसु निष्फत्तिं पारिपूरं गतो । सम्बोधिपहानन्तरायदेसना विसेसचोदनासु विसारदभावसङ्घातानि चत्तारि जाणानि पत्तो अधिगतोति वेसारज्जप्पत्तो ।

लोभज्झासयादिअज्झासयं विसेसेन अतिवत्तोति अज्झासयवीतिवत्तो । अतीतहेतुसङ्घेपादिसङ्घेपविरहितताय असङ्घेपसङ्घातं निब्बानं, अकुप्पधम्मताय गुणेहि वा असङ्घेपं असङ्ख्येय्यं गतो उपगतोति असङ्घेपगतो । सेसं सुविज्जेय्यमेव । उद्धेय्यन्ति उद्धरितब्बं ।

धम्मनुस्सतियं एवं अत्थो दट्ठब्बोति सम्बन्धो । संसारदुक्खतो पाति, सन्तेन सुखेन रमेति चाति वा पारं ।

अभूतपुब्बत्ताति अनुप्पन्नपुब्बत्ता, तेनस्स निच्चतंव विभावेति केनचि देवतोपसग्गादिना अनुपसज्जनीयत्ता अनुपसङ्गत्ता ।

“दुप्पस्स”न्तिपि पाळि, दुरधिगमन्ति अत्थो । गुणसोभासुरभिभावेनाति गुणेहि सोभाय, सुगन्धिभावेन च ।

यथा अक्खणवेधी पुग्गलो सिप्पनिष्फत्तिया रत्तन्धकारतिमिसाय अचिरक्खणालोकेन अतिसुखुमम्पि दूरगतं लक्खं

विज्झति, एवं अरियसावको सीलसम्पत्तिया अतिसुखुमं निब्बानं चतुसच्चधम्मं एकपटिवेधेनेव पटिविज्झतीति आह “सिप्पञ्च सीलं अक्खणवेधिताया”ति । लोकिकन्ति निदस्सनमत्तं दट्ठब्बं लोकोत्तरधम्मओलोकनस्सापि अधिष्ठानभावतो ।

वेवचनहारविभङ्गवण्णना निड्डिता ।

११. पञ्जत्तिहारविभङ्गवण्णना

३९. भगवतो साभाविकधम्मकथायाति अत्तनो भावो सभावो, सभावेन निब्बत्ता, ततो वा आगताति साभाविका, सा एव धम्मकथाति साभाविकधम्मकथा, बुद्धानं सामुक्कंसिकधम्मकथाति अत्थो, तां करणभूताय धम्मदेसनाय अनञ्जत्तेपि कथादेसनानं उपचारसिद्धेन भेदेनेवं वुत्तं, अवयवसमुदायविभागेन वा । तेनाह “का च पकतिकथाय देसना? चत्तारि सच्चानी”ति । इदञ्चि अत्थस्स देसनाय अभेदोपचारं कत्वा वुत्तं । तस्सा देसनाय पञ्जापना । अयं पञ्जत्तिहारोति सङ्खेपेनेव पञ्जत्तिहारस्स सरूपमाह । साति यथावुत्तदेसना । तथा तथाति यथा यथा सच्चानि देसेतब्बानि, तथा तथा । कथञ्चेतानि देसेतब्बानि? परिञ्जेय्यादिप्पकारेन । यथाधिप्पेतन्ति अधिप्पेतानुरूपं, बोधनेय्यबन्धवानं बोधनाधिप्पायानुकूलन्ति अत्थो । अत्थन्ति देसेतब्बत्थं, दुक्खादिअत्थमेव वा । निक्खिपतीति पतिट्ठापेति । यतो “चत्तारो सुत्तनिक्खेपा”तिआदि (म० नि० अट्ठ० १.मूलपरियायसुत्तवण्णना) अट्ठकथासु वुच्चति ।

तत्थाति निक्खेपदेसनायन्ति अत्थो । मग्गपक्खियाति दुक्खसच्चतो बहिकताति अधिप्पायो ।

यस्मिं ठानेति यस्मिं भवादिसङ्घाते ठाने । यथावुत्ता देसनाति चतुराहारपटिबद्धरागादिमुखेन वट्ठदीपनी वुत्तप्पकारा देसना ।

४१. तेपरिवट्ठवसेनाति एत्थापि “सच्चेसू”ति योजेतब्बं । परिञ्जापञ्जत्तीति आहाति सम्बन्धो । अज्झत्तरतो, समाहितोति पदद्वयेन समाधानविसिद्धं अज्झत्तरतताभावनं दीपेति गोचरज्झत्ततादीपनतो । केवलो हि अज्झत्तसद्दो अज्झत्तज्झत्तगोचरज्झत्तेसुपि वत्तति । अज्झत्तरतताविसिद्धञ्च समाधानं सातिसयं चित्तद्विति दीपेतीति इममत्थं दस्सेति “समाधानविसिद्धस्सा”तिआदिना ।

आसज्जनट्ठेनाति आसङ्गनट्ठेन । तथा दस्सनन्ति अतथाभूतस्सापि भब्बरूपस्स विय अत्तनो विदंसनं । अलक्खिकोति विलक्खिको ।

कामानन्ति कामावचरधम्मानं । रूपानन्ति रूपावचरधम्मानं । निस्सरणन्ति कामानं रूपावचरधम्मा निस्सरणं, तेसं अरूपावचरधम्मा निस्सरणं । एवं तंसभावानन्ति सउत्तरसभावानं । तथाति यथा सङ्खतधम्मानं निस्सरणभावतो, किलेससमुच्छेदकस्स अरियमग्गस्स आरम्भणभावतो च अत्थेव असङ्खता धातु, तथा वुच्चमानेनापि कारणेन अत्थेव असङ्खता धातूति दस्सेति । कत्थचि विसयेति असङ्खतधातुं सन्धाय वदति । अविपरीतत्थोति भूतत्थो । “यतो खो भो अयं अत्ता पञ्चहि कामगुणेहि समप्पितो समङ्गीभूतो परिचारेति, एत्तावता खो भो अयं अत्ता परमदिट्ठधम्मनिब्बानप्पत्तो होति (दी० नि० १.९४), सपकट्टनिब्बानभाविनो”ति च एवमादीसु उपचारवुत्तिसम्भावतो । यथा तं सीहसद्दोति यथा “सीहो माणवको”तिआदिना माणवकादीसु उपचारवुत्तिना वत्तमानो मिगराजे भूतत्थविसये दिट्ठो, एवं निब्बानसद्दोपि कामगुणरूपज्ज्ञानसमङ्गितासु उपचारवुत्तिया वत्तमानो कत्थचि विसये अविपरीतत्थो । यत्थ च विसये अविपरीतत्थो, सा

असङ्खता धातु । हत्थतले सआमलकं विय जेय्यं पच्चक्खतो पस्सन्तस्स एकप्पमाणस्स सत्थुवचनमेवेत्थ पमाणन्ति दस्सेन्तो “किं वा एताय युत्तिचिन्ताया”तिआदिमाह । “पटिज्जातस्स अत्थस्स सिद्धिया पकासनापज्जती”ति निगमं सन्धायाहाति ।

पज्जत्तिहारविभङ्गवण्णना निड्डिता ।

१२. ओतरणहारविभङ्गवण्णना

४२. इन्द्रियेहीति करणे करणवचनं “मग्गेन गच्छती”तिआदीसु विय, “फरसुना छिन्दती”ति एवमादीसु विय च । ओतरणाति अनुप्पवेसना ।

पज्जाक्खन्धे सङ्गणहनवसेन सम्मासङ्कप्पो वियाति योजना । अधिचित्तअनुयुत्तानं सद्दहनुस्सहनुपट्टानसमादहनेहि सद्दादीसु उपकरोन्तेसु एव पज्जा दस्सनकिच्चं साधेतीति दस्सेन्तो “सद्दा..पे०... वुत्तानी”ति आह । नो च भवङ्गाति तेसं सङ्खारानं पवत्तिकारणताभावं दस्सेति ।

४३. तथा वुत्तोति “निस्सयो”ति वुत्तो । चेतनासीसेन तण्हं एव वदति चेतनासहचरणतो ।

रत्तस्साति मग्गेन असमुच्छिन्नरागस्स । येन पुग्गलो “रत्तो”ति वुच्चति, तस्स रागस्स सम्बन्धिनी सुखा वेदना वुत्ता तत्थ तस्स अनुसयनतो । तेनाह “सुखाय...पे०... वुत्त”न्ति । एस नयो सेसेसुपि । तेनाह “तथा”तिआदि ।

तानि एव इन्द्रियानीति सुखसोमनस्सुपेक्खिन्द्रियानि । “सङ्खारपरियापन्नानी”ति वचनं सन्धायाह “इध वेदनासीसेन चेतना वुत्ता”ति । न हि वेदना सङ्खारक्खन्धपरियापन्ना होति । तण्हाय, दिट्ठियाति च उपयोगे करणवचनन्ति दस्सेन्तो “तण्हाया”तिआदिमाह । इदानीं उपयोगवसेनेव “तण्हाया”तिआदीनं अत्थं दस्सेतुं “यथा वा”तिआदिमाह । तत्थ सेसधम्मन्ति तण्हावज्जितअविसिद्धधम्मानं । तण्हाय निस्सयभावेति यदा तण्हा तेसं निस्सयो होति ।

तण्हाय सेसधम्मानं पच्चयभावेति यदा सेसधम्मा तण्हापच्चया होन्ति । “करजकायसन्निस्सिता”ति इमिना वेदनादिक्खन्धत्तयनिस्सितापि गहिता कायप्पस्सद्धिभावतो । कारणभावन्ति परम्परहेतुभावं । तण्हादिट्ठिउपयेनाति दिट्ठिउपयेन च दिट्ठिसहगततण्हाउपयेन च ।

“आगतीति इधागति, गतीति पेच्चभवो”ति पदद्वयेन वुत्तमेवत्थं पाकटतरं कातुं पाळियं “आगतिगतीपि न भवन्ती”ति वुत्तं । इध हरन्ति द्वारारम्मणधम्मा दस्सिता आसन्नदूरभावेहि द्वारारम्मणेहि विनिवत्तेत्वा गहितत्ता । इध द्वारप्पवत्तधम्मा “उभयमन्तरेना”ति पदस्स अत्थभावेन वुत्ता । चतुब्बूहारे पन अनिन्द्रियबद्धरूपधम्मा तथा वुत्ता । कारणभूतेन अनन्तरपच्चयभूतेन, उपनिस्सयपच्चयभूतेन च । ये धम्मा उपादाय “अत्ता”ति समज्जा, तेसं विज्जाणादिधम्मानं अभावेन अनुप्पादधम्मत्तं आपादितत्ताति अत्थो । “अनिस्सितस्स चलितं नत्थी”तिआदिना पटिलोमतो पच्चयभावो दस्सितोति दस्सेन्तो पाळियं “एसेवन्तो दुक्खस्साति पटिच्चसमुप्पादो”ति वत्वा ननु “अविज्जापच्चया सङ्खारा”तिआदिको पटिच्चसमुप्पादोति चोदनं सन्धाय यथावुत्तस्स पटिच्चसमुप्पादभावं दस्सेतुं “सो दुविधो”तिआदिना लोकियलोकुत्तरवसेन पटिच्चसमुप्पादो विभत्तो । तदत्थतायाति वीतरागविमुत्तिअत्थताय । तब्भावन्ति

लोकुत्तरपटिच्चसमुप्पादभावं ।

ओत्तरणहारविभङ्गवण्णना निट्ठिता ।

१३. सोधनहारविभङ्गवण्णना

४५. सोधेति नामाति पुच्छितमत्थं हत्थतले ठपितआमलकं विय पच्चक्खतो दस्सेन्तो निग्गुम्बं निज्जटं कत्वा विवरन्तो तब्बिसयअज्जाणसंसयादिमलापनयनेन सोधेति, एवं सोधेन्तो च पदस्स अत्थेन अभेदोपचारं कत्वा “पदं सोधेति” च्चेव वुच्चति । तेनाह “पदं सोधेति नामा”ति । पुच्छाय विस्सज्जनमेवेत्थ सोधनन्ति आह “तदत्थस्स विस्सज्जनतो”ति । आरभीयतीति आरम्भो, देसनाय पकासियमानो अत्थो । तेनाह “न ताव...पे०... पबोधितत्ता”ति । इध सोधनं नाम पटिच्छन्नरूपस्स अत्थस्स देसनानुभावेन विवटभावकरणन्ति तमत्थं उपमाय विभावेतुं “अज्जाणपक्खन्दान”न्तिआदि वुत्तं ।

सोधनहारविभङ्गवण्णना निट्ठिता ।

१४. अधिद्धानहारविभङ्गवण्णना

४६. धारयितब्बाति उपधारेतब्बा, उपलक्खितब्बाति अत्थो । वुत्तमेव “सामज्जविसेसकप्पनाय वोहारभावेन अनवद्धानतो”तिआदिना (नेत्ति० अट्ठ० १४) ।

तं तं फलन्ति निरयादिं तं तं फलं । अज्जिताति गता । योनीति एकजाति । समानवसेन मिस्सीभवति एतायाति हि योनि, उपपत्ति । पेच्चाति मरित्वा । उस्सन्नतायाति वितक्कबहुलताय । “उस्सन्नत्ता”तिपि वदन्ति । सस्सतादीहि वा उस्सन्नत्ता । असुरजातिया निब्बत्तापनको असुरजातिनिब्बत्तनको ।

सङ्घाति पज्जा । पज्जापधाना च भावनाति आह “पटिसङ्घाय पटिपक्खभावनाया”ति ।

४७. पत्थटभावेन पथवी । सभावधारणट्ठेन, निस्सत्तनिज्जीवट्ठेन च धातु । आपीयति, अप्पायतीति वा आपो । तेजनवसेन तिक्खतावसेन, दहनवसेन वा तेजो । वायनवसेन वेगगमनवसेन, समुदीरणवसेन वा वायो । वीसति आकाराति केसादयो वीसति कोट्टासा, पकारा वा । कक्खळलक्खणाधिकताय केसादी कक्खळलक्खणा वुत्ता ।

पाटियेक्को पथवीधातुकोट्टासोति पथवीकोट्टासमत्तो, अत्तसुज्जधम्ममत्तोति अत्थो । सन्तप्पतीति एत्थ सरीरपकतिमतिक्कमित्वा उण्हभावो सन्तापो, सरीरदहनवसेन पवत्तो महादाहो, अयमेतेसं विसेसो । येन च जीरीयतीति एकाहिकादिरारोगेन जरीयतीति च अत्थो युज्जति । “सतवारं तापेत्वा तापेत्वा उदके पक्खिपित्वा उद्धटसप्पि सतधोतसप्पी”ति वदन्ति । रसरुधिरमंसमेदन्हारुअट्ठिअट्ठिमिज्जा रसादयो । केचि न्हारुं अपनेत्वा सुक्कं सत्तमं धातुं वदन्ति । विवेकन्ति विसुंभावं, विसदिसभावन्ति अत्थो । वत्थुसङ्घातो हि आहारो परिणामं गच्छन्तो पाणभक्खगहणिपदनिय मुत्तकरीसभावेहि विय अत्तनापि विसदिसरससङ्घातं विसुंभावं निब्बत्तेन्तो तब्भावं गच्छतीति वुच्चति, तथा रसादयोपि रुधिरादिकोट्टासं । तेनाह “रसादिभावेन विवेकं गच्छती”ति ।

सभावलक्षणतोति असुचिभावेन लक्खितब्बतो ।

४८. याथावसरसलक्खणन्ति रसितब्बोति रसो, पटिविज्झितब्बो सभावो, अत्तनो रसो सरसो, याथावो सरसो, याथावसरसो याथावसरसो एव लक्खितब्बत्ता लक्खणन्ति याथावसरसलक्खणं । अथ वा याथावसरसलक्खणन्ति अविपरीतं अत्तनो पवत्तिसङ्घातं किच्चञ्चेव पीळनसङ्घातं लक्खणञ्च । “इदं किच्चं, इदं लक्खणं”न्ति अविज्जाहेतु जातुं न सक्कोति, तब्बिसयजाणुप्पत्तिं निवारेन्ती छादेत्वा परियोनन्धित्वा तिष्ठतीति वुत्ता । तेन वुत्तं “जानितुं पटिविज्झितुं न देती”ति । तयिदमस्सा किच्चन्ति किच्चतो कथिता । कथिताति च वुत्ता, यतो च अविज्जा असम्पटिवेधरसाति वुच्चति । जायति एत्थाति जाति, उप्पत्तिट्ठानं । यदिपि निरोधमग्गे अविज्जा आरम्भणं न करोति, ते पन जानितुकामस्स तप्पटिच्छादनवसेन अनिरोधमग्गोसु निरोधमग्गगहणस्स कारणभावेन पवत्तमाना तत्थ उप्पज्जतीति वुच्चति, तेसम्पि अविज्जाय उप्पत्तिट्ठानता होति, इतरेसं आरम्भणभावेन चाति ।

अत्थानत्थन्ति हिताहितं । सम्मोहविनोदनियं पन “अत्थत्थ”न्ति (विभ० अट्ठ० २२६) वुत्तं, तत्थ अत्थो एव अत्थत्थोति अत्थस्स अविपरीततादस्सनत्थं दुतियेन अत्थसद्देन विसेसनं । न हि जाणं अनत्थे “अत्थो”ति गण्हातीति । कारणाकारणन्ति एत्थापि एवं दट्ठब्बं । अत्थत्थन्ति वा आमोडितवचनं सब्बेसं अत्थानं पाकटकरणभावप्पकासनत्थं, फलं फलन्ति अत्थो, हितपरियायेपि एसेव नयो । न्ति अत्थानत्थादिकं । आकारन्ति अत्थादिकारणमेव ।

पटिविद्धस्स पुन अवेक्खना पच्चवेक्खणा । दुचिन्तितचिन्तितादिलक्खणस्स बालस्स भावो बाल्यं । सम्पजानातीति समं पकारेहि जानाति । बलवमोहो पमोहो । समन्ततो मोहनं सम्मोहो । दुग्गतिगामिकम्मस्स विसेसपच्चयत्ता अविन्दियं । विन्दतीति लभति । अनवज्जधम्मानं विज्जा विय विसेसपच्चयो न होतीति विन्दियं न विन्दति । अयं अविज्जाय वेमत्तताति अयं “दुक्खे अज्जाण”न्तिआदिना किच्चजातिलक्खणेहि वुत्तो अविज्जाय अविसेसो । विज्जातिआदीनं वुत्तनयानसारेन अत्थो वेदितब्बो ।

पासाणसक्खरवालिकाविरहिता भूमि सण्हाति “सण्हट्ठेना”ति वुत्तं ।

तत्तकमेव कालन्ति पच्चकप्पसतानि । विभूतं समत्तिक्कन्तं रूपसज्जासङ्घातं रूपं एतायाति विभूतरूपं, समापत्तिन्ति पदत्थो । न हि काचि अरूपसमापत्ति रूपसज्जासहगता पवत्तीति । निरोधसमापत्तियं वत्तब्बमेव नत्थि, तत्थ नेवसज्जानासज्जायतनसमापत्तिया विसुं गहितत्ता वुत्तं “सेसारूप्यसमापत्तियो”ति ।

दमथं अनुपगच्छन्तो दुट्ठस्सो खलुङ्कस्सो । उत्तरिदमथायाति अरियमग्गदमथाय ।

इतरोति दुक्खापटिपदो खिप्पाभिज्जो, सुखापटिपदो च खिप्पाभिज्जो । उभयतोभागेहीति रूपकायनामकायभागेहि । उभयतोति विक्खम्भनसमुच्छेदविमुत्तिवसेन ।

अनेकोपीति सभावेन अनेकोपि । एकसद्वाभिधेय्यतायाति सामज्जसद्वाभिधेय्यताय ।

अधिट्ठानहारविभङ्गवण्णना निट्ठिता ।

१५. परिक्खारहारविभङ्गवण्णना

४९. “हिनोती”ति पदस्स अत्थं दस्सेन्तो “कारणभावं गच्छती”ति आह अनेकत्थत्ता धातूनं । एतीति आगच्छति, उप्पज्जतीति अत्थो ।

अविज्जायपि हेतुभावेति एत्थ अविज्जा अनन्तराय अविज्जाय अनन्तरसमनन्तरूपनिस्सयनत्थिविगतासेवनपच्चयेहि, अनन्तराय पन सहजाताय सहजातअज्जमज्जनिस्सयसम्पयुत्तअत्थिविगतहेतुपच्चयेहि, असहजाताय उपनिस्सयकोटिया एव पच्चयो होतीति वेदितब्बं । अत्तनो फलं करोतीति कारणन्ति आह “कारणभावो च फलापेक्खाया”ति ।

निब्बत्तिअत्थो फलत्थो फलसङ्घातो अत्थो ।

यो सभावोति पुज्जादिअभिसङ्खारानं यो अभिसङ्खरणसभावो, सो हेतु । सेसपदेसूति विज्जाणादिपदेसु । यथावुत्तप्पभेदोति “असाधारणलक्खणो हेतू”ति आदिना वुत्तप्पभेदो । यो कोचि पच्चयोति जनकादिभेदं यं किञ्चि कारणं । अभिसङ्खरणतोति पच्चक्खतो, परम्पराय च निब्बत्तनतो ।

परिक्खारहारविभङ्गवण्णना निट्ठिता ।

१६. समारोपनहारविभङ्गवण्णना

५०. सुत्तेन गहितेति सुत्ते वुत्ते । पदट्ठानग्गहणं अधिट्ठानविसयदस्सनत्थं, वेवचनग्गहणं अधिवचनविभागदस्सनत्थन्ति योजना । विसयाधिट्ठानभावतोति विसयसङ्घातपवत्तिट्ठानभावतो । वनीयतीति भजीयति । वनतीति भजति सेवति । वनुतेति याचति, पत्थेतीति अत्थो । पच्च कामगुणा कामतण्हाय कारणं होति आरम्भणपच्चयताय । निमित्तग्गाहो अनुब्यज्जनग्गाहस्स कारणं होति उपनिस्सयतायाति एवं सेसेसुपि यथारहं कारणता वत्तब्बा ।

५१. “काये कायानुपस्सी विहराही”ति आदीसु यं वत्तब्बं, तं हेट्ठा लक्खणहारविभङ्गवण्णनायं (नेत्ति० अट्ठ० २३) वुत्तनयेनेव वेदितब्बं । अयं पन विसेसो — रूपधम्मपरिज्जायाति रूपूपिकविज्जाणट्ठित्तिपरिज्जाय ।

“दुक्ख”न्ति पस्सन्ती सा वेदनानुपस्सनाति योजेतब्बं । वेदनाहेतुपरिज्जायाति फस्सपरिज्जाय । “वेदनावसेना”ति पदेन अत्तना उप्पादितदुक्खवसेन । वेदनापरिज्जायाति वेदनूपिकविज्जाणट्ठित्तिपरिज्जाय । निच्चाभिनिवेसपटिपक्खतो अनिच्चानुपस्सनायाति अधिप्पायो । निच्चसज्जानिमित्तस्साति निच्चसज्जाहेतुकस्स । सज्जापरिज्जायाति सज्जूपिकविज्जाणट्ठित्तिपरिज्जाय । पठमग्गवज्झत्ता अगतिगमनस्स वुत्तं “दिट्ठाभिनिवेसस्स...पे०... अगतिगमनस्स चा”ति ।

सङ्खारपरिज्जायाति सङ्खारूपिकविज्जाणट्ठित्तिपरिज्जाय ।

समारोपनहारविभङ्गवण्णना निट्ठिता ।

निट्ठिता च हारविभङ्गवण्णना ।

१. देसनाहारसम्पातवण्णना

“एव”न्तिआदि हारसम्पातदेसनाय सम्बन्धदस्सनं । तत्थ पुरिमेन उपमाद्वयेन सुपरिकम्मकतमणिकोट्टिमसदिसी, सुविरचितजम्बुनदाभरणसदिसी च पाळि । तत्थ कतनानावण्णपुण्णपहारसदिसी, विविधरंसिजालासमुज्जलबद्धनानारतनावलिसदिसी च हारविभङ्गदेसनाति दस्सेति । पच्छिमेन तस्स पणीतमहारहे जटाहि सद्धिं दुक्करतरतं दीपेति । यायं गाथा वुत्ताति योजना ।

५२. यस्मायं हारविभङ्गवारो नप्पयोजेति यथावुत्तेन कारणेन, तस्मा सा हारविभङ्गवारस्स आदिमिह न पच्चामट्ठाति अधिप्पायो । **हारसम्पातवारो पन तं पयोजेतीति** यस्मा पन हारसम्पातवारो तं गाथं पयोजेति यथावुत्तेनेव कारणेन, तस्मा “**सोळस...पे०... आहा**”ति आह । **योजनानयदस्सनन्ति** योजनाय नयदस्सनं ।

तेनाति “तं मच्चुनो पद”न्ति वचनेन । **सब्बं विपल्लासन्ति** द्वादसविधम्मि विपल्लासं । **सामञ्जस्स...पे०... वोहरीयति** यत्थ पतिट्ठितं सामञ्जं, सो विसेसो । अत्थतो पन सञ्जादयो एव रूपादिविसयं विपरीताकारेण गणहन्ते विपल्लासोति दस्सेन्तो “**सञ्जाविपल्लासो**”तिआदिमाह ।

इन्दजालादिवसेन मणिआदिआकारेण उपट्ठहन्ते उपादानक्खन्धपञ्चके अहंममादिकारणताय निरुत्तिनयेन “अत्ता”ति वुच्चमानो तंबुद्धिवोहारप्पवत्तिनिमित्तताय अत्तभावो सुखादीनं वत्थुताय “**अत्तभाववत्थू**”ति पवुच्चतीति आह “तेही”तिआदि । तेसन्ति उपादानक्खन्धानं । **विपल्लासानं पवत्तिआकारो** “असुभे सुभ”न्तिआदि । **विसयो** कायवेदनाचित्तधम्मा । **अविज्जा च...पे०... एव** सम्मोहपुब्बकत्ता सब्बविपल्लासानं । **च-सद्वो सुभसुखसञ्ज्ञानन्ति** एत्थापि आनेत्वा योजेतब्बो ।

तत्थायं योजना — “अविज्जा च सुभसुखसञ्ज्ञानं पच्चयो एव, न तण्हा एव, अविज्जा सुभसुखसञ्ज्ञानञ्च पच्चयो, न निच्चअत्तसञ्ज्ञानं एवा”ति । एवं सन्तेपि पुरिमानं द्विन्नं विपरीतसञ्ज्ञानं तण्हा, पच्छिमानं अविज्जा विसेसपच्चयोति दस्सेन्तो आह “**तथापी**”तिआदि । अविज्जासीसेन चेत्य दिट्ठिया गहणं वेदितब्बं । तेनाह “**दिट्ठिनिवुत्तं चित्तं**”न्ति, “**यो दिट्ठिविपल्लासो**”ति च आदि, यथा च अविज्जासीसेन दिट्ठिया गहणं, एवं दिट्ठिसीसेन अविज्जायपि गहणं सियाति आह “**दिट्ठिसीसेन अविज्जा वुत्ता**”ति । तण्हाविज्जासु सुभसुखसञ्ज्ञानं यथा तण्हा विसेसपच्चयो, न एवं अविज्जा । निच्चअत्तसञ्ज्ञानं पन यथा अविज्जा विसेसपच्चयो, न तथा तण्हाति दस्सेन्तो “**मोहो विसेसपच्चयो**”ति आह ।

पच्छिमानं द्विन्नं...पे०... होतीति अतीतंसे तण्हाभिनिवेसस्स बलवभावाभावतो । तेनेव हि “सो अतीतं रूपं अत्ततो समनुपस्सति”च्चेव वुत्तं, न “अभिनन्दती”ति । **तण्हाविपल्लासोति** तण्हं उपनिस्साय पवत्तो विपल्लासो, न हि तण्हा सयं विपल्लासो । तेनाह “**तण्हामूलको विपल्लासो**”ति । **दिट्ठाभिनन्दनवसेनाति** तण्हुपनिस्सयदिट्ठाभिनन्दनवसेन, यतो सो “तण्हाविपल्लासो”ति वुत्तो । **एतेनाति** “यो तण्हाविपल्लासो”तिआदिपाठेन । सोळस सञ्जीवादा, अट्ठ असञ्जीवादा, अट्ठ नेवसञ्जीनासञ्जीवादा, पञ्च परमदिट्ठधम्मनिब्बानवादा च, यथा अत्तनो गताय, निब्बानप्पत्तिया च परिकप्पवसेन सुभसुखाकारग्गाहिनो, न एवं सत्त उच्छेदवादाति आह “**येभुय्येना**”ति । **पटिपक्खवसेनपीति** विसुद्धिवसेनपि । याव हि उपक्विलेसा, ताव चित्तं न विसुद्धतेव । यदा च ते पहीना, तदा विसुद्धमेव । तेनाह “**न ही**”तिआदि । “अरक्खितेन चित्तेना”ति पाळि निक्खिपित्वा विपल्लासमुखेनेव देसनाय निद्धारियमानत्ता वुत्तं “**यथानुसन्धिनाव गाथं निट्ठपेतु**”न्ति ।

मारस्साति किलेसमारस्स । तस्स हि वसे ठितो सेसमारानं हत्थगतो एवाति । तेनाह
“किलेसमारग्गहणेनेवा”तिआदि ।

मारबन्धनन्ति सत्तमारपक्खे मारस्स बन्धनन्ति **मारबन्धनं** । सो हि किलेसबन्धनभूते अत्तनो समारकपरिसे मज्जति ।
तेन वुत्तं “अन्तलि...पे०... मोक्खसी”ति (महाव० ३३) । इतरमारपक्खे मारोव बन्धनन्ति **मारबन्धनं** । **विसङ्खारो** निब्बानं ।

मोहसम्पयोगतो चित्तं “मूळह”न्ति वुत्तन्ति रत्तदुट्टानम्पि मूळहताय सब्भावे “मूळह”न्ति विसुं वचनं
आवेणिकमोहवसेन वुत्तन्ति दस्सेन्तो “**द्विन्नं मोमूहचित्तुप्पादानं वसेना**”ति आह । एवन्ति एवं रागादिकुसलप्पत्तिया
कुसलभण्डच्छेदनतो अरक्खितं चित्तं होति, सब्बोपि मिच्छाभिनिवेसो एत्थेव सङ्गहं समोसरणं गच्छतीति आह
“**मिच्छादिट्ठि ...पे०... वेदितब्ब**”न्ति । सब्बेपीति “अरक्खितं, मिच्छादिट्ठितं, थिनमिद्धाभिभूतं”न्ति तीहिपि पदेहि
वुत्तधम्मा ।

चक्खुनाति द्वारेन । रूपन्ति विसभागवत्थुसन्निस्सितं रूपायतनं । **निमित्तग्गाही**ति “इत्थी”ति वा पुरिसो”ति वा
“सुभ”न्ति वा “असुभ”न्ति वा परिकप्पितनिमित्तं गणहाति, तस्स वा गहणसीलो । **अनुब्यञ्जनग्गाही**ति
हत्थपादहसितकथितादिप्पभेदे किलेसानं अनु अनु ब्यञ्जनतो अनुब्यञ्जनसज्जिते आकारे गणहाति, तेसं वा गहणसीलो ।
यत्वाधिकरणन्ति यं निमित्तं, निमित्तानुब्यञ्जनग्गहणनिमित्तन्ति अत्थो । एवं “चक्खुन्द्रियं असंवुत्तं विहरन्त”न्ति, यो
“निमित्तग्गाही, अनुब्यञ्जनग्गाही”ति च वुत्तो पुग्गलो, तमेनं **चक्खुन्द्रियं** चक्खुद्वारं **असंवुत्तं** सतिकवाटेन अपिहितं कत्वा
वत्तन्तं, तस्स च रूपस्स इट्ठाकारग्गहणे **अभिज्झा**, अनिट्ठाकारग्गहणे **दोमनस्सं**, असमपेक्खने **मोहो** मिच्छाभिनिवेसे
मिच्छादिट्ठिति एवं अभिज्झाव्यापादा, अज्जे च लामकट्टेन **पापका** अकोसल्लसम्भूतट्टेन **अकुसला** धम्मा **अन्वास्सवेय्युं**
अनु अनु पवत्तेय्युं ।

तस्स **संवराय न पटिपज्जती**ति तस्स चक्खुद्वारस्स संवराय सतिकवाटेन पिदहनत्थं न पटिपज्जति । सा पन
अप्पटिपत्ति चक्खुन्द्रियस्स अनारक्खासंवरस्स अनुप्पादोति दस्सेन्तो “**न रक्खति...पे०... आपज्जती**”ति आह । जवने
उप्पज्जमानोपि हि असंवरो तेन द्वारेन पवत्तनतो “चक्खुन्द्रियासंवरो”त्वेव वुच्चतीति । सेसद्वारेसुपि वुत्तनयेनेव अत्थो
वेदितब्बो । “**पुब्बन्तकप्पनवसेन चा**”तिआदिना सङ्खेपतो वुत्तमत्थं वित्थारतो दस्सेन्तो “सङ्खेपतो च वित्थारो अज्जो”ति
कत्वा तं समुच्चिनन्तो “**या च खो इमा**”तिआदिमाह ।

यथावुत्ता अकुसला धम्माति द्वादस अकुसलचित्तुप्पादधम्मा, तेसं वत्थूनि वा । ते हि समुदयवज्जा
पञ्चुपादानक्खन्धा । “**एव**”न्ति इमिना नेत्तिपाळियं, अट्ठकथायज्च निद्वारितप्पकारेन । **इथा**ति इमिस्सं “अरक्खितेन
चित्तेना”ति गाथायं ।

यदिपि देसनाहारसम्पातपाळियं “**तस्मा रक्खितचित्तस्सा**”ति गाथा सरूपतो न गहिता, अत्थतो पन “**तेसं भगवा
परिज्जाया**”तिआदिना गहिता एवाति तस्सा गहितभावं विभावेतुं “**कथं देसेती**”ति पुच्छित्वा “**तस्मा
रक्खितचित्तस्सा**”ति गाथं उद्धरि ।

योनिमोमनसिकारेन कम्मं करोन्तोति “सो ‘इदं दुक्खं’न्ति योनिसो मनसि करोती”तिआदिना नयेन
विपस्सनासङ्घातेन योनिसोमनसिकारेन भावनाकम्मं करोन्तो, भावेन्तोति अत्थो । **यथाभूतजाणन्ति** जातपरिज्जाय

पुब्बभागविपस्सनाय “अविज्जासमुदया रूपसमुदयो, अविज्जानिरोधा रूपनिरोधो”ति आदिना (पटि० म० १.५०) समपज्जासाय आकारेहि । निरयगतियं दुक्खदुक्खता, सुगतिविसेसे ब्रह्मलोकेकदेसे सङ्खारदुक्खता, इतरत्थ द्वे तिस्सोपीति दस्सेन्तो आह “यथासम्भवं तिविधदुक्खतायोगेना”ति ।

देसनाहारसम्पातवण्णना निट्ठिता ।

२. विचयहारसम्पातवण्णना

५३. कुसलधम्मरम्मणाति कुसलधम्मे उद्दिस्स पवत्तिमत्तं सन्धाय वुत्तं, न तेसं आरम्मणपच्चयतं इध “कुसला धम्मा”ति लोकोत्तरधम्मानं अधिप्पेतत्ता । न हि कदाचि अनुपादानिया धम्मा उपादानारम्मणा होन्ति । फलधम्मे उद्दिस्स पवत्ताय तण्हाय गहितत्ता “कुसल...पे०... दट्ठब्बो”ति वुत्तं । देसनाहारेति देसनाहारसम्पाते । कथं पन कुसलभावोति “कुसला”ति वचनमत्तं गहेत्वा चोदेति, तच्च निदस्सनमत्तं दट्ठब्बं, पहानहेतुभावोपिस्सा सिया चोदकेन सम्पटिच्छितोव । “मानोपि दुविधो”ति आदिना मानस्स च तस्सा तण्हाय च सेवितब्बभावो अकुसलानं पहानाय, कुसलानं उप्पत्तिया च पच्चयभावतो ।

नेक्खम्मस्सितं दोमनस्सं नाम “अरियभूमिं पापुणितुं नासक्खि”न्ति अनुसोचतो उप्पन्नं दोमनस्सन्ति सम्बन्धो । एवन्ति इमिना पाळियं वुत्तप्पकारेण, पिहं उपट्ठपेत्वा छसु द्वारेसु इट्ठारम्मणे आपाथगते अनिच्चादिवसेन विपस्सनं पट्ठपेत्वाति योजना । इट्ठारम्मणज्जेत्थ यथावुत्तनुसोचनदोमनस्सुप्पत्तीनं यथाभिनिविट्ठस्स आरम्मणस्स अनिट्ठतायाति दस्सनत्थं । “कथं नेक्खम्मवसेना”ति पदस्स अत्थं विवरितुं “विपस्सनावसेना”ति आदि वुत्तं । विपस्सनादिविनिमुत्ता वा पठमज्झानादिवसेन वुत्ता कुसला धम्मा इध नेक्खम्मं । अनुस्सतिग्गहणेन उपचारज्झानमेव गहितन्ति “पठमज्झानादिवसेना”ति वुत्तं । आदिसद्देन दुतियज्झानतो पट्ठाया याव अगगफला उपरिविसेसा सङ्गहिता । याय पज्जाविमुत्तिया ।

उपेक्खासतिपारिसुद्धिभावेनाति उपेक्खाजनितसतिपारिसुद्धिसम्भावेन । कम्मयोगगन्ति विपस्सनाभावनादिकम्मस्स योग्गं अनुरूपं अनुच्छविकं । अस्सद्धियेति अस्सद्धियहेतु, “अस्सद्धियेना”तिपि पठन्ति, सो एवत्थो । ओभासगतन्ति जाणोभासगतं । कामं पुब्बेपि पज्जा वुत्ता, अस्सद्धियादीहि पन अज्जेसं किलेसानं विधमनम्पि पज्जाय एव होति, सा च एवंभूताति दस्सनत्थं “ओभासगतं किलेसन्धकारे न इज्जती”ति वुत्तं ।

कोपो कोधो । अप्पच्चयो दोमनस्सं । इद्धिविधजाणादिका छ अभिज्जा पाकटा एवाति “द्वे च विसेसे”ति वुत्तधम्मे दस्सेतुं “मनोमयिद्धि, विपस्सनाजाणज्जा”ति आह । अङ्गणानि रागादयो । उपक्किलेसा अभिज्झाविसमलोभादयो । अनुलोमनं तदेकट्ठता । फन्दना दुब्बला विक्खेपप्पवत्ति । बलवती अनवट्ठानं । सब्बो मिच्छाभिनिवेसो अयोनिमनसिकारेण होति, मिच्छावितक्केन च । तत्थ अयोनिमनसिकारो अकुसलचित्तुप्पादो तप्परियापन्नो मिच्छावितक्को विक्खेपसहितो एवाति वुत्तं “मिच्छाभिनिवेसहेतुताय दिट्ठिपक्खो”ति वुत्तज्हेतं “वितक्कोपि दिट्ठिड्डानं, अयोनिमनसिकारोपि दिट्ठिड्डानं”न्ति (पटि० म० १.१२४) ।

अथ वा इज्जनाति फन्दना, दिट्ठपरित्तासो । यथाह “तदपि तेसं भवतं समणब्राह्मणानं अजानतं अपस्सतं वेदयितं तण्हागतानं परितस्सितविप्फन्दितमेवा”ति (दी० नि० १.१०५ आदयो) । अट्ठितीति अनवट्ठानं, दिट्ठिवितक्को । तेन हि

पुथुज्जनो काले सस्सतं, काले उच्छेदन्ति तं तं दिट्ठिग्गहणं पक्खन्दन्तो सत्ततो परिब्भट्ठुअन्धो विय, समुदे विस्सट्ठवाहनिका विय, यन्ते युत्तगोणो विय च तथा तथा परिब्भमति । तेनाह “दिट्ठियोपि दिट्ठिद्वानं, वितक्कोपि दिट्ठिद्वानं”न्ति (पटि० म० १.१२४) च । एतस्मिञ्च पक्खे मिच्छाभिनिवेसताय, मिच्छाभिनिवेसहेतुताय च तस्सा द्वे पक्खाति एकदेससरूपेकसेसो कतोति वेदितब्बं ।

“एव”न्तिआदिना “सो उपरिम”न्तिआदिपाळियं सम्बन्धं दस्सेति । पटिघसज्जाति भुम्मत्थे पच्चत्तवचनन्ति दस्सेन्तो “पटिघ...पे०... सज्जासू”ति आह । रूपावचरसज्जाति सज्जासीसेन रूपावचरज्ज्ञानानि वदति । नानत्तसज्जाति नानासभावा, नानासभावे वा आरम्मणे सज्जा । ठपेत्वा पटिघसज्जा अवसिट्ठुकामावचरसज्जा हेता । ता समतिक्कमतीति ता रूपसज्जानानत्तसज्जायो आरम्मणेहि सद्धिं सम्मदेव अतिक्कमति ।

रूपावचरज्ज्ञानोभासोपि कसिणारम्मणा । कसिणनिस्सन्दो हि आरुप्पज्ज्ञानुप्पत्ति । दस्सनन्ति कसिणरूपानं दस्सनं । अभिज्ज्ञाब्यापादप्पहानेन सद्धिं वीरियारम्भो उपकारको समथो सतिपस्सद्धियो परिक्खारङ्गता वुत्ता एव । सतिरहितं सम्मसनं नाम नत्थीति “या उपट्ठिता सति असम्मुट्ठा, अयं विपस्सना”ति वुत्तं । तेन सतिसीसेन विपस्सना गहिताति दस्सेति । सम्मोसानं प्हानमाहाति सम्बन्धो ।

५४. पच्चुप्पन्नसुखआयतिसुखविपाककिरियनिरामिसअकापुरिससेवितभावेहि एव सेसा पाळियं एतस्स समाधिस्स सन्तपणीततादिविसेसा वुत्ता, तेपि इध सङ्गहिताति तेसं पदानं अत्थं दस्सेन्तो “अङ्गसन्तताया”तिआदिमाह । तत्थ अङ्गसन्ततायाति फलज्ञानङ्गानं उपसन्तताय । किलेसदरथसन्ततायाति किलेसदरथपटिप्पस्सद्धिया । पणीतोति उळारो । एकोदिभावेनाति मग्गसमाधिसङ्घातेन एकोदिभावेन । एकोदिभावन्ति समाधानं । लोकियसमाधिस्स पच्चनीकनीवरणपठमज्ज्ञाननिकन्तिआदीनि निग्गहेतब्बानि, अज्जे च किलेसा वारेतब्बा । इमस्स पन अरहत्तसमाधिस्स पटिप्पस्सद्धिकिलेसत्ता न निग्गहेतब्बं, वारेतब्बज्च अत्थीति सो मग्गानन्तरं समापत्तिक्खणेव अप्पयोगेनेव अधिगतत्ता, ठितत्ता च अपरिहानिवसेन वा अधिगतत्ता नससङ्खारनिग्गहवारितगतो ।

“सतिवेपुल्लप्पत्तो”ति एतेन अप्पवत्तमानायपि सतिया सतिबहुलताय सतो एव नामाति दस्सेति । “यथापरिच्छिन्नकालवसेना”ति एतेन परिच्छिन्नसतिया सतोति दस्सेति ।

वक्खमानेनाति “पीतिफरणा”तिआदिना अनन्तरं वक्खमानेन । “पीतिफरणा”ति पन पाळि आगता । तं “पञ्चङ्गिको सम्मासमाधी”ति (दी० नि० ३.३५५) समाधिअङ्गभावेन पज्जा उट्ठिताति कत्वा वुत्तं । ततो एव अट्ठकथायं “पीतिफरणा”तिआदीनज्च अत्थसंवण्णना कता । तत्थ “सो इममेव कायं विवेकजेन पीतिसुखेन अभिसन्देती”तिआदिना (दी० नि० १.२२६) नयेन पीतिया, सुखस्स च फरणं वेदितब्बं । सेसं सुविज्जेय्यमेव ।

समाधिवसेन समथो उट्ठतोति सभाववसेन समथो उट्ठतो, न उपकारकधम्मवसेनाति अधिप्पायो ।

५५. रागपटिपक्खत्ता समाधिस्स “अधिचित्तसिक्खाय सिक्खन्तो”ति वुत्तं । वुत्तनयानुसारेनाति “सुखपणिधिआदिसमुग्घाटनेन अप्पणिहितो”तिआदिना । एत्थ च सङ्खारानं खणभङ्गुरतं सम्मदेव पस्सन्तस्स न रागो पतिट्ठं लभतीति अनिच्चानुपस्सना रागचरितस्स सप्पाया वुत्ता, तथा सङ्खारानं सभावदुक्खतं सम्मदेव पस्सन्तस्स पकतियापि दुक्खितेसु दुक्खुप्पादनं वणे खारोदकसेकसदिसन्ति न दोसो पतिट्ठं लभतीति दुक्खानुपस्सना दोसचरितस्स सप्पाया वुत्ता,

तथा सङ्घारेसु सम्मदेव घनविनिब्भोगे कते अत्तसुज्जताय उपट्टहमानाय न मोहो पतिट्ठं लभतीति अनत्तानुपस्सना मोहचरितस्स सप्पाया वुत्ताति वेदितब्बं । रागपटिपक्खत्ता समाधिस्स “अधिचित्तसिक्खाय सिक्खन्तो”ति वुत्तं । एस नयो इतरेसु । सेसमेत्थ सुविज्जेय्यं ।

खन्तिबहुलो उप्पन्नं अरतिं अनभिरतिं अभिभुय्य विहरन्तो सुखेन समाधिं अधिगच्छतीति खन्तिप्पधानतापि समथपक्खभजनस्स कारणं वुत्ता । उट्ठानं सम्पज्जतीति सम्पन्नकायिकवीरियं । सम्माकम्मन्तवायामानं यो कायिकादिविकप्पो वुत्तो पाळियं, सो नेसं कायिकस्स पयोगस्स समुट्ठानवसेन वेदितब्बो ।

“खिप्पाधिगमो”ति इमिना मग्गासेवनभावं दस्सेति । “विपस्सनाय विमुत्ताधिगमो”ति इमिना विपस्सनानुभावेन समुच्छेदविमुत्ति विक्खम्भनविमुत्ति विय समथानुभावेनाति दस्सेति । लोकियेहीति निस्सक्कवचनं । महन्तानन्ति उळारानं, पणीतानन्ति अत्थो ।

५६. तन्ति विचयहारं । विसंवादनहेतूनं लोभादीनं पापधम्मानं । सोधेन्तोति यथा सरणादिविसया अज्जाणादिसंकिलेसा न पवत्तन्ति, एवं सोधेन्तो । परिपूरेन्ताति यथा सीलं अखण्डादिभावेन परिपुण्णं होति अनूनं, एवं परिपूरेन्ता ।

“तथा पटिपज्जन्तो”ति इमिना सत्थु महापतिकारभावो परिपुण्णो दस्सितोति पठमवादे “दस्सनाभूमिञ्च भावनाभूमिञ्चा”ति वुत्तं ।

यस्स अत्थायाति यस्स यस्स प्हानत्थाय । तथा पटिपन्नस्साति यथा असुभज्झानादिं पादकं कत्वा अनागामिमग्गादिअधिगमो होति, तथा पटिपन्नस्स ।

वधितन्ति घातितं ।

“मनुस्सभूतो”ति इदं पुब्बापरापेक्खं कत्वा “पिता मनुस्सभूतो खीणासवो”ति च तथा “माता मनुस्सभूता”ति योजेतब्बं । भेदानुरूपस्स सावनं अनुस्सावनं, भेदानुरूपेन वा वचनेन विज्जापनं ।

५७. मनुस्सत्तन्ति मनुस्सजातिता । लिङ्गसम्पत्तीति पुरिसभावो । हेतूति मनोवचीपणिधानसिद्धिया सद्धिं पुब्बहेतुसम्पदा । सत्थारदस्सनन्ति सत्थु सम्मुखीभावो । गुणसम्पत्तीति अभिज्जासमापत्तिलाभो । अधिकारोति अत्तनो सरीरनिरपेक्खं सत्थु उपकारकरणं । छन्दताति बुद्धभावाय दळहच्छन्दता अनिवत्तिधम्मता ।

न उप्पज्जन्तीति पन अत्थीति “न मे आचरियो अत्थि, सदिसो मे न विज्जती”तिआदि (म० नि० १.२८५; २.३४१; कथा० ४०५; महाव० ११; मि० प० ४.५.११) इमिस्सा लोकधातुया ठत्वा वदन्तेन भगवता “किं पनावुसो सारिपुत्त, अत्थेतरहि अज्जो समणो वा ब्राह्मणो वा भगवतो समसमो सम्बोधिंयन्ति एवं पुट्ठो अहं, भन्ते, ‘नो’ति वदेय्य”न्ति (दी० नि० ३.१६१) वत्वा तस्स कारणं दस्सेतुं “अट्ठानमेतं अनवकासो, यं एकस्सा लोकधातुया द्वे अरहन्तो सम्मासम्बुद्धा”ति (दी० नि० ३.१६१; अ० नि० १.२७७) इमं सुत्तं दस्सेन्तेन धम्मसेनापतिनाव बुद्धखेत्तभूतं इमं लोकधातुं ठपेत्वा अज्जत्थ अनुप्पत्ति वुत्ता होतीति अधिप्पायो ।

खेत्तपरिग्गहो कतो नाम होति “इदं बुद्धखेत्तं नामा”ति ।

एवं ठानाट्टानभावं गताति वुत्तप्पकारेण ठानभूता, वुत्तनयेन वा अज्जेपि यथारहं ठानाट्टानभावेन पवत्ता ।
सत्तपज्जत्तिया उपादानभूताति इन्द्रियबद्धे खन्धे सन्धाय वदति ।

५८. फलस्स पच्चक्खकारिताति “इमस्स कम्मस्स इदं फल”न्ति तंतंकम्मफलावबोधो । अप्पदानाभावोति पच्चयसमवाये कम्मस्स एकन्ततो फलुप्पादनं । तेनाह “कतूपचितान”न्ति ।

५९. अज्झोसितवत्थुनाति तण्हाभिनिवेसवसेन अभिनिविट्ठवत्थुना । रूपभवअरूपभवादिनाति भवतण्हा विय सयं दस्सेति ।

खन्धत्तयवसेनाति सीलादिक्खन्धत्तयवसेन । पटिपदाविभागेनाति “सब्बत्थगामिनी”ति आदिपटिपदाय भेदेन ।

तत्थतत्थगामिनीति निरयादिनिब्बानन्ति द्वीसु गन्धब्बट्टानेसु तत्थ तत्थेव गमनसीला । सब्बत्थगामिनीति यथावुत्तेसु सब्बट्टानेसु च गमनसीला ।

सज्जीवो काळसुत्तं सङ्घातो रोरुवो महारोरुवो तापनो महातापनो अवीचीति एते अट्ठ महानिरया । एकेकस्स चत्तारि चत्तारि द्वारानि, एकेकस्मिं द्वारे चत्तारो चत्तारो गूथनिरयादयोति एवं सोळस उस्सदनिरये वण्णेन्ति ।

सक्कसुयामादिको जेट्ठकदेवराजा । पजापतिवरुणईसानादयो विय दुतियादिट्टानन्तरकारको परिचारको ।

किलेसकामपक्खेति “सङ्कप्पो कामो, रागो कामो, सङ्कप्परागो कामोति (महानि० १) एत्थ वुत्तसङ्कप्पवसेन वुत्तं । सोपि हि विबाधति, उपतापेति चाति किलेसत्तसम्भवतो किलेसकामो वुत्तो, न किलेसवत्थुभावतो । कामपटिसंयुत्तोति कामरागसङ्घातेन कामेन सम्पयुत्तो, कामपटिबद्धो वा । अज्जेसु च कामपटिसंयुत्तेसु धम्मेसु विज्जमानेसु वितक्के एव कामसद्वो धातुसद्वो निरुळ्होति वेदितब्बो वितक्कस्स कामसङ्कप्पवुत्तिया सातिसयत्ता । एस नयो ब्यापादधातुआदीसु । परस्स, अत्तनो च दुक्खापनं विहिंसा । तं तु मिच्छाहि विहिंसा ।

बीजादिधातुनानत्तवसेन खन्धादिनानत्तं वेदितब्बं । खन्धोति द्विधाभूतगो ।

६०. अज्झासयधातूति अज्झासयसभावो । यथा गूथादीनं सभावो एसो यं गूथादीहेव संसन्दति, एवं पुग्गलानं अज्झासयस्सेवेस सभावो, यं दुस्सीलादयो दुस्सीलादिकेहेव संसन्दन्ति ।

सद्धामूलकत्ता कुसलकिरियाय वुत्तं “यं सद्धावसेना”तिआदि । तथा हि वुत्तं “सद्धा बीज”न्ति (सु० नि० ७७) । यं लोभवसेन, सद्धावसेन च दोसवसेन, सद्धावसेन च मोहवसेन, सद्धावसेन चाति योजेतब्बं । वीरियवसेनाति सम्मप्पधानवीरियवसेन । पज्जावसेनाति मग्गसम्मादिट्ठिवसेन ।

अकुसलस्स कम्मस्स कतोकासताय पाळियं वुत्तत्ता “विपाकावरणेन निवुत्त”न्ति वुत्तं । तं पन निदस्सनमत्तं दट्ठब्बं कम्मावरणादीहिपि निवुत्तताय इच्छितत्ता । तथा हि यथा देवदत्तं कोकालिकं सुनक्खत्तं लिच्छविपुत्तन्ति उदाहटं, यदिपि

भगवा पटिवेधस्स अट्टानतं दिस्वा निब्बेधभागियदेसनं न देसेति, वासनाभागियं पन तथारूपस्स देसेति एवाति दस्सेन्तो “सच्चपटिवेध”न्तिआदिमाह । अजातसत्तुआदीनन्ति आदिसद्देन सच्चकादीनं सङ्गहो दट्टब्बो । तस्सापि भगवा अनागते वासनत्थाय धम्मं देसेसि । सत्था हि “अनागते तम्बपण्णिदीपे सासनं पतिट्ठहिस्सती”ति तत्थायं कुलघरे निब्बत्तो पब्बजित्वा काळबुद्धरक्खितत्थेरो नाम पभिन्नपटिसम्भितो महाखीणासवो भविस्सतीति इदं दिस्वा धम्मं देसेसि, सो च तथा अहोसीति ।

असम्पुण्णेति एकन्ततो विपाकदानसमत्थतावसेन पारिपूरिं अनुपगते । दिट्ठुपनिस्सयदिट्ठिसहगतस्स कम्मं सन्धाय “कम्मे असम्पुण्णे”ति वुत्तं । तेनाह “किलेसन्तराय मिस्सकं कम्मन्तरायं दस्सेत्वा”ति ।

६१. दिट्ठि पनेत्थ पधानभावेन पाळियं गहिता सीलब्बतपरामासस्स अधिप्पेतत्ता । तथा हि वुत्तं “यथा पुण्णञ्च गोवतिकं, अचेलञ्च कुक्कुरवतिकं”न्ति । असम्पुण्णत्ता एव हि तस्स मिच्छादिट्ठिकम्मसमादानस्स तेसं भगवा “चत्तारिमानी, पुण्ण, कम्मानी”तिआदिना (म० नि० २.८१) धम्मं देसेसि । तां च देसनाय ते तं दिट्ठिं पटिनिस्सज्जित्वा सम्मत्ते पतिट्ठहिंसु ।

६२. पगुणताय वोदानं पगुणवोदानं । तदेव पठमज्झानादीहि वुट्ठहित्वा दुतियज्झानादिअधिगमस्स पच्चयत्ता वुट्ठानं नाम होतीति आह “वुट्ठानं पगुणवोदानं”न्ति । भवङ्गवुट्ठानं भवङ्गुप्पत्ति । भवङ्गचित्ते हि उप्पन्ने तंसमङ्गिसमापत्तितो वुट्ठितो नाम होति । सज्जावेदयितअपगमो एव अपगमविमोक्खो ।

इदं वुट्ठानन्ति इदं यथावुत्तं कोसल्लं वुट्ठानहेतुभावतो वुट्ठानं । तथा हि वुत्तं “वोदानम्पि तम्हा तम्हा समाधिम्हा वुट्ठानं”न्ति (विभ० ८२८) । इमां पन वुट्ठानपाळिया असङ्गहितत्ता “निरोधसमापत्तिया वुट्ठानं पाळिमुत्तकवुट्ठानं नामा”ति सम्मोहविनोदनियं (विभ० अट्ठ० ८२८) वुत्तं । ये पन “निरोधतो फलसमापत्तिया वुट्ठानं”न्ति पाळियं नत्थीति वदेय्युं, ते “निरोधा वुट्ठहन्तस्स नेवसज्जानासज्जायतनं फलसमापत्तिया अनन्तरपच्चयेन पच्चयो”ति (पट्ठा० १.१.४१७) इमां पाळिया पटिसेधेतब्बा ।

६३. अयं चस्स आसयोति एत्थ आसयजाननादिना येहि इन्द्रियेहि येहि परोपरेहि सत्ता कल्याणपापासयादिका होन्ति, तेसं पजाननं विभावेतीति वेदितब्बं । एवञ्च कत्वा इन्द्रियपरोपरियत्तआसयानुसयजाणानं विसुं असाधारणता, इन्द्रियपरोपरियत्तनानाधिमुत्तिकताजाणानं विसुं बलता च सिद्धा होति ।

थामगतोति एत्थ थामगमनं नाम अज्जेसं असाधारणो कामरागादीनं एव आवेणिको सभावो वेदितब्बो, यतो “थामगतो अनुसयं पजहती”ति (पटि० म० ३.२१) वुत्तं ।

आवज्जनमत्तेनेव सरति आकङ्खायत्तवुत्तिकत्ता । वुत्तञ्चि “आकङ्खपटिबद्धं बुद्धस्स भगवतो जाणं, मनसिकारपटिबद्धं बुद्धस्स भगवतो जाणं”न्तिआदि (महानि० १५६; चूळनि० मोघराजमाणवपुच्छानिद्देस ८५; पटि० म० ३.५) । सब्बज्जुतज्जाणं विय हि सब्बं भगवतो जाणं परिकम्मनिरपेक्खन्ति ।

६४. उपक्विलेसविमुत्तत्ताति एत्थ चित्तादि एव उपक्विलेसा, निब्बत्तकस्स वा कम्मस्स पारिबन्धकिलेसा । कसिणकम्मपरिकम्मज्ञाननिब्बत्तनकसिणभावो चुट्टसविधेन चित्तपरिदमनं अभिज्जाभिनीहारोति सब्बत्थापि वीरियबलस्स

बहूपकारत्ता वुत्तं “वीरियभावनाबलनिब्बत्त”न्ति । दिब्बसदिसत्ताति दिब्बे भवन्ति दिब्बं, यथावुत्तं पसादचक्खु, दिब्बं वियाति दिब्बं, अगगतं अभिज्जाणं । दिब्बविहारो चत्तारि रूपावचरज्झानानि । तेसं वसेन निब्बत्तित्वा पटिलद्धब्बत्ता दिब्बं, तेन दिब्बहेतुकत्ता दिब्बन्ति वुत्तन्ति दस्सेति । दिब्बविहारसन्निस्सितत्ताति रूपावचरचतुत्थज्झानेन निस्सयपच्चयेन निब्बत्तत्ता, तेन दिब्बनिस्सितं दिब्बन्ति दस्सेति । दिवुसदं अक्खरचिन्तका कीळादीसु पठन्तीति वुत्तं “तं सब्बं सहसत्थानुसारेण वेदितब्ब”न्ति । पुरिमा हि तयो अत्था कीळत्थस्स वसेन, इतरे जुतिगतिअत्थवसेनेव दस्सिताति ।

मनुस्सूपचारन्ति मनुस्सगोचरं । दट्ठं न सक्का इत्तरखणत्ता खणपच्चुप्पन्नस्स । “आसन्नचुतिका”तिआदिना सन्ततिपच्चुप्पन्नवसेन “चवमाने उपपज्जमाने”ति वुत्तन्ति दस्सेति । “मोहनिस्सन्दयुत्तत्ता”तिआदिना सत्तानं हीनपणीतत्तादिभावस्स मोहादिकम्मनिदानहेतुकत्तं, निस्सन्दफलतज्ज दस्सेति । दिब्बचक्खुस्स पादकं एतेसन्ति दिब्बचक्खुपादकानि । तेन वुत्तं “दिब्बचक्खुना सहेव इज्झन्ती”ति । तानि हिस्स परिभण्डजाणानि ।

समादीयन्तीति समादानानि, कम्मनि समादानानि एतेसन्ति कम्मसमादाना । समादातब्बनानाविधकम्माति अत्थो पुरिमे अत्थे, दुतिये पन कम्मनि समादापेन्तीति कम्मसमादाना, मिच्छादिट्ठिया कम्मसमादाना मिच्छादिट्ठिकम्मसमादाना, हेतुअत्थे चेतं करणवचनं ।

तं वाचन्ति तं अरियानं उपवदनवाचं । तं चित्तन्ति समुट्ठापकचित्तं । तं दिट्ठिन्ति येन मिच्छागाहेन अरिये अनुद्धंसेति, मिच्छाभिनिवेसं । अयम्पेत्य अत्थो — यथा नाम हेतुसम्पन्नस्स भिक्खुनो विसुद्धं सीलं, समाधिज्ज सम्पादेत्वा ठितस्स दन्धो सत्तुप्पादो खिप्पाभिज्जाय दिट्ठेव धम्मे अज्जा, सति वा उपादिसेसे अनागामिता । एवमेवं यो अरियूपवादी यथावुत्तचित्तदिट्ठीहि अपक्कमित्वा अप्पतिरूपं सभावं “मया, भन्ते, तुम्हाकं उपरि वुत्त”न्ति अच्चयदेसनाय ते न खमापेति, सो कायस्स भेदा निरये एवाति । तेसु पसन्नचित्तस्स खमापनज्जेत्थ तेसं वाचादीनं पहानं पटिनिस्सग्गोव । इतो सावज्जतरं नाम अज्जं नत्थि सब्बानत्थविधानतो, सब्बहितसुखपरिधंसनतो च ।

कायस्स भेदाति इध कायसद्दो अत्तभावपरियायोति आह “उपादिन्नक्खन्धपरिच्चागा”ति । तदनन्तरन्ति तस्स मरणसङ्घातस्स खन्धपरिच्चागस्स अनन्तरं । अभिनिब्बत्तक्खन्धत्थो परसद्दो, अनोरिमभूतवत्थुविसयो वा सिया, अवधिविसेसनमत्तं वा । तेसु पुरिमं सन्धायाह “अभिनिब्बत्तक्खन्धगगहणे”ति, पच्छिमस्स पन वसेन “चुतितो उद्ध”न्ति ।

वुत्तविपरियायेनाति “सुट्ठु चरितं, सोभनं वा चरित”न्तिआदिना । हननन्ति घातनं ।

कारणाकारणन्ति ठानाट्ठानं । चेतनाचेतनासम्पयुत्तधम्मे निरयादिनिब्बानगामिपटिपदाभूते कम्मन्ति गहेत्वा आह “कम्मपरिच्छेदमेवा”ति । कम्मविपाकन्तरं कम्मविपाकविसेसो कम्मविपाकस्स विभागो । अप्पेतुं न सक्कोति अट्टमनवमबलानि विय, तंसदिसं इद्धिविधजाणं विय विकुब्बितुं, एतेनस्स बलसदिसतज्ज निवारेलि । ज्ञानादिजाणं विय वा अप्पेतुं, विकुब्बितुज्ज । यदिपि हि ज्ञानादिपच्चवेक्खणाजाणं इध छट्ठं बलन्ति तस्स सवितक्कसविचारता वुत्ता, तथापि ज्ञानादीहि विना पच्चवेक्खणा नत्थीति ज्ञानादिसहगतं जाणं तदन्तोगधं कत्वा एवं वुत्तं । अथ वा सब्बज्जुतज्जाणं ज्ञानादिकिच्चं विय न सब्बं बलकिच्चं कातुं सक्कोतीति दस्सेतुं “ज्ञानं हुत्वा अप्पेतुं, इद्धि हुत्वा विकुब्बितुज्ज न सक्कोती”ति (विभ० मूलटी० ८३१) वुत्तं, न पन कस्सचि बलस्स ज्ञानइद्धिभावोति दट्ठब्बं ।

विचयहारसम्पातवण्णना निट्ठिता ।

३. युत्तिहारसम्पातवण्णना

६५. पटिपक्खपटिबाळ्हा कुसला धम्मा उप्पज्जितुमेव न सक्कोन्ति, उप्पन्नापि सम्मदेव अत्तनो किच्चं कातुं असमत्थताय अनुप्पन्नसदिसाति पटिपक्खनिवारणेन कुसलानं धम्मानं किच्चकरणभावं दस्सेतुं “**मनच्छट्ठानि...पे०... भविस्सती**”ति वुत्तं । **विहरन्तस्साति** विहरणहेतु । **विहरन्तोति** एत्थापि एसेव नयो, तेन रक्खितचित्तता वुत्तनयेन एकन्ततो सम्मासङ्कप्पगोचरताय च संवत्ततीति दस्सेति । **वुत्तनयेनाति** मिच्छासङ्कप्पानं अवसरं अदत्त्वा विसोधितनेक्खम्मादिवितक्कताय । **अविपरीतमेवाति** कायादिअसुभादितो आदानं । **विनिपातभयन्ति** दुग्गतिभयं । **सब्बोपि चायमत्थोति** “सम्मासङ्कप्पगोचरो सम्मादिट्ठि भविस्सती”तिआदीसु अत्थो युत्तिया युत्तो एव अनरूपकारणभावतो ।

युत्तिहारसम्पातवण्णना निट्ठिता ।

४. पदट्ठानहारसम्पातादिवण्णना

६६. यस्मा वा संकिलेसतो रक्खितचित्तस्स तीणि सुचरितानि पारिपूरिं गच्छन्ति, तस्मा **रक्खितचित्तस्साति** एत्थ यायं रक्खितचित्तता, सा कायसुचरितादीनं तिण्णं सुचरितानं पदट्ठानन्ति एवमेत्थ अत्थो वेदितब्बो । **अत्ताधीनन्ति** अत्तपराधीनं ।

ततो एवाति कारणगहणेन फलस्स गहितत्ता एव ।

६८. तत्थ इतिसद्वोति “परिपालीयती”ति इतिसद्वो ।

७३-४. पाळियं पज्जिन्द्रियानि तीहि खन्धेहि सङ्गहितानीति एत्थ सद्भावीरियसतिन्द्रियेहि पातिमोक्खादि तिविधं सीलं गहितं सोधेतब्बत्ता । तेसन्ति तेहि सीलक्खन्धो सङ्गहितो । समाधिपज्जिन्द्रियेहि समाधिपज्जाक्खन्धा गहिताति पाकटोयमत्थो, तथा सेसम्पीति आह “**इतो परेसु...पे०... वुत्तनयमेवा**”ति ।

७६. हेतुहेतुसमुप्पन्नपच्चयपच्चयुप्पन्नसङ्घातस्साति एत्थ हेतुपच्चयविभागो हेट्ठा वुत्तोयेव ।

पदट्ठानहारसम्पातादिवण्णना निट्ठिता ।

मिस्सकहारसम्पातवण्णना

इदानी यस्मा सुत्तेसु हारानं योजनानयदस्सनत्ता हारसम्पातदेसना हारविभङ्गदेसना विय न हारसरूपमत्तदस्सनत्ता, तस्मा **पेटकोपदेसे** आगतनयानुसारेन अपरेहि विपरियायेहि हारसम्पातयोजनाविधिं दस्सेन्तो “**अपिचा**”तिआदिमाह । तत्थ विज्जाविज्जाय कुसलाकुसलचित्तप्पवत्तिया अलोभादोसलोभदोसापि परम्परभावेन पवत्तन्ति निदानभावतोति दस्सेन्तो “**छ धम्मा...पे०... मूलानी**”ति आह । यथा च निदानभावेन पुब्बङ्गमता, एवं अत्तनो वसेवत्तनेनापि पुब्बङ्गमता लब्भतेवाति वुत्तं “**साधिपतिकानं अधिपति, सब्बचित्तुप्पादानं इन्द्रियानी**”ति । **अलोभस्साति** अलोभयुत्तस्स

चित्तुप्पादस्स । नेक्खम्मच्छन्देनाति कुसलच्छन्देन । नेक्खम्मसद्वो पब्बज्जादीसु निरुळ्हो । वुत्तञ्चि —

“पब्बज्जा पठमं ज्ञानं, निब्बानञ्च विपस्सना ।

सब्बेपि कुसला धम्मा, ‘नेक्खम्म’न्ति पवुच्चरे”ति ॥ (इतिवु० अट्ठ० १०९; दी० नि० टी० २.३५९; अ० नि० टी० २.२.६६) —

तेसु इध कुसला धम्मा अधिप्पेता । तेन वुत्तं “कुसलच्छन्देना”ति । नेक्खम्मच्छन्देन उपनिस्सयभूतेन, न अधिपतिभूतेन । इदं वुत्तं होति — अलोभपधानो चे चित्तुप्पादो होति, नेक्खम्मच्छन्देन उपनिस्सयभूतेन मनो तस्स पुब्बङ्गमो होति । सेसपदद्वयेपि एसेव नयो ।

यदगगेन तेसं धम्मानं मनो पुब्बङ्गमं, तदगगेन तेसं जेट्ठं, पधानञ्चाति वुत्तं “मनोसेट्ठाति मनो तेसं धम्मान”न्तिआदि । मनोमयता मनेन कतादिभावो, सो च मनस्स तेसं सहजातादिना पच्चयभावो एवाति वुत्तं “मनोमयाति...पे०... पच्चयो”ति । ते पनाति एत्थ पन-सद्वो विसेसत्थदीपको, तेनेतं दस्सेति — यदिपि तेसं धम्मानं छन्दादयोपि पच्चया एव, इन्द्रियादिपच्चयेन पन सविसेसं पच्चयभूतस्स मनस्सेव वसेनेव वुत्तं “मनोमया”ति । तत्थ छन्दसमुदानीताति यथावुत्तनेक्खम्मादिछन्देन सम्मा उद्धमुद्धं नीता, ततो समुदागताति अत्थो । ततो एव नेक्खम्मवितक्कादितो समुप्पन्नत्ता अनाविलसङ्कप्पसमुद्धाना । तज्जामनोविज्जाणधातुसम्फस्सेन सहाधिद्वानतो फस्ससमोधाना । “फुट्ठो, भिक्खवे, वेदेति, फुट्ठो सज्जानाति, फुट्ठो चेतेती”ति (सं० नि० ४.९३) हि वुत्तं । इदं मनोकम्मन्ति कायङ्गवाचङ्गचोपनं अकत्वा सद्भासमन्नागतेन पसन्नेन मनसा पवत्तं इदं कुसलं मनोकम्मं । तं पन अनभिज्झासहगतं, अब्यापादसहगतं, सम्मादिट्ठिसहगतन्ति तिविधं होति ।

भासतीति अविसंवादनादिना वाचङ्गचोपनावसेन पवत्तेन्तिया वचीविज्जत्तिया साधेतब्बं साधेतीति अत्थो, तेन कायद्वारतो पवत्तकुसलवचीकम्मम्पि सङ्गहितं होति । तथा हि वक्खति “वचीविज्जत्तिविप्फारतो, तथा सादियनतो च भासती”ति । सब्बम्पि वचीकम्मं सच्चादिवसेन चतुब्बिधं । करोतीति अत्तनो, परेसञ्च हिताहितानि कारणाकारणेहि कायङ्गचोपनावसेन पवत्तेन्तिया कायविज्जत्तिया साधेतब्बं साधेतीति अत्थो, तेन वचीद्वारतो पवत्तकुसलकायकम्मम्पि सङ्गहितं होति । तथा च वक्खति “कायविज्जत्तिविप्फारतो, तथा सादियनतो च करोती”ति (नेत्ति० अट्ठ० ७६ मिस्सकहारसम्पातवण्णना) । कम्मपथवसेन गय्हमाने पाणातिपातादिवसेन तं तिविधं होति । तेनाह “इति दसकुसलकम्मपथादस्सिता”ति । दसपुज्जकिरियवत्थुवसेनापि गाथाय अत्थो युज्जति । तथा हि वक्खति “सो पसन्नचित्तो”तिआदि । भासति वा करोति वा केवलं मनसा पवत्ततीति अनियमत्यो वा-सद्वो । तथा चेव संवणितं ।

दसविधस्स कुसलकम्मस्साति दसविधस्स कुसलकम्मपथकम्मस्स, वक्खमाननयेन वा दसपुज्जकिरियवत्थुसङ्घातस्स कुसलकम्मस्स । ननु तत्थ दानादिमयं तिविधमेव पुज्जकिरियवत्थु वुत्तन्ति? सच्चं, तं पन इतरेसं तदन्तोगधत्ता ।

“सुखमन्वेती”ति सङ्खेपेन वुत्तं सुखानुगमं वित्थारेन दस्सेन्तो “इधस्सु पुरिसो”तिआदिमाह । तत्थ एवं सन्तन्ति एवं भूतं, अप्पहीनानुसयो हुत्वा सुखवेदनीयफस्ससम्भूतन्ति अत्थो ।

तत्थ “यं मनो”तिआदिना गाथात्थवसेन चतुसच्चं निद्वारेति । आदितो ववत्थापितेसु खन्धादीसु खन्धमुखेन सच्चानं

कथितत्ता सत्तानं भिन्नरुचिभावतो नानानयेहि विपस्सनाभूमिकोसल्लत्थं, पुब्बापरसम्बन्धदस्सनत्थञ्च एवं वुत्तं “एवं...पे०... निद्धारेतब्बानी”ति। सच्चमुखेन अस्सादादिके निद्धारेत्वा देसनाहारसम्पातं योजेतुं “तत्थ समुदयेना”तिआदिमाह, तं वुत्तनयमेव। यञ्हेत्थ अञ्जम्पि अत्थतो न विभत्तं, तं हेट्ठा वुत्तनयत्ता, उत्तानत्थत्ता चाति वेदितब्बं।

मननलक्खणेति मननलक्खणहेतु। “मननलक्खणेना”ति वा पाठो। ईहाभावतो व्यापाराभावतो। येन पसादेन समन्नागतत्ता मनो “पसन्नो”ति वुत्तो, तस्स पसादस्स किच्चं मने आरोपेत्वा आह “अकालुसियतो, आरम्मणस्स ओकप्पनतो च पसन्नेना”ति। **तथा सादियनतो**ति वाचाय वत्तब्बं अवत्त्वाव फस्ससादियनतो अनुजानतो। दुतिये **तथा सादियनतो**ति कायेन कातब्बं यथा कतं होति, तथा वाचाय संविधानतो। **तथा पसुत्तत्ता**ति यथा सुखमन्वेति, तथा उपचितत्ता एवाति अत्थो। **ततो**ति ततो कारणा, मनसा पसन्नेन, भासनेन, करणेन च हेतुनाति वुत्तं होति। **अनञ्जत्था**ति एतस्मिं पन अत्थे। **ततो**ति ततो एव। यो हि पसन्नमनो तेन यं भासनं, करणञ्च, ततो एव नं सुखमन्वेतीति वुत्तं होति। **सातभावतो**ति सातवेदनाभावतो। **इट्ठभावतो**ति मनापभावतो। कम्मतो विपाकुप्पत्तिफलदानसमत्थभावेन कम्मस्स निब्बत्तत्ता विपाकस्सेव अनिब्बत्तत्ताति आह “कतू...पे०... अन्वेतीति वुत्त”न्ति **कारणायत्त वुत्तितो**ति कतभावहेतुकत्ता कम्मस्साति अधिप्पायो। **असङ्कन्तितो**ति यस्मिं सन्ताने कम्मं निब्बत्तं, तदञ्जसन्ताना सङ्कमनतो।

आधिपच्चयोगतोति सहजाताधिपतिवसेन आधिपच्चयुत्तत्ता। सहजातधम्मानञ्चि तंसम्पयुत्तस्स मनस्स वसेन पुब्बङ्गमता इधाधिप्पेता। **ततो एवाति** आधिपच्चयोगतो एव। **मनस्साति** उपयोगत्थे सामिवचनं। तेसं धम्मानन्ति सम्बन्धो। **कुसलभावो युज्जति** पसादस्स योनिमनसिकारहेतुकत्ता। ननु विभज्जव्याकरणेसु तेसं सावकानं सद्भा उपपज्जतीति? नायं सद्भा, तदाकारा पन अकुसला धम्मा तथा वुच्चन्तीति वेदितब्बं। तथा हि वक्खति “नायं पसादो”तिआदि (नेत्ति० अट्ठ० ७६ मिस्सकहारसम्पातवण्णना)। **सुखं अन्वेतीति युज्जति** कम्मस्स फलदाने समत्थभावतो। यथा हि कतं कम्मं फलदानसमत्थं होति, तथा कतं उपचितन्ति वुच्चतीति।

मनोपविचारा इध नेक्खम्मसिता सोमनस्सूपविचारा, उपेक्खूपविचारा च वेदितब्बा कुसलाधिकारत्ता। ते पन यस्मा चित्तं निस्सायेव पवत्तन्ति, नानिस्साय, तस्मा वुत्तं “मनो मनोपविचारानं पदट्ठान”न्ति। **कुसलपक्खस्स पदट्ठानन्ति** एत्थ कुसलो ताव फस्सो कुसलस्स वेदनाक्खन्धस्स सञ्जाक्खन्धस्स सङ्खारक्खन्धस्स सहजातादिना पच्चयो होति। “फुट्ठो, भिक्खवे, वेदेति, फुट्ठो सञ्जानाति, फुट्ठो चेतती”ति (सं० नि० ४.९३) वुत्तं। एवं वेदनादीनम्पि वेदितब्बं। सद्भादीनम्पि पच्चयभावे वत्तब्बमेव नत्थि। **सब्बस्साति** चतुभूमकस्स। कामावचरा हि कुसला धम्मा यथारहं चतुभूमकस्सापि कुसलस्स पच्चया होन्ति, एवं इतरभूमकापि।

“पसन्नेन मनसा भासती”ति वुत्तत्ता विसेसतो सम्मावाचापच्चयं भासनं इधाधिप्पेतन्ति वुत्तं “**भासतीति सम्मावाचा**”ति। तत्थायमधिप्पायो “भासतीति यमिदं पदं, इमिना सम्मावाचा गहिता होती”ति। **करोतीति सम्माकम्मन्तो**ति एत्थापि एसेव नयो। सुपरिसुद्धे कायवचीकम्मे ठितस्स आजीवपारिसुद्धि, न इतरस्साति वुत्तं “**ते सम्माआजीवस्स पदट्ठान**”न्ति। तत्थ तेति सम्मावाचाकम्मन्ता। यस्मा पन आजीवट्ठमके सीले पतिट्ठितस्स उप्पन्नानुप्पन्नानं अकुसलधम्मानं पहानानुप्पादनानि, अनुप्पन्नानुप्पन्नानं कुसलधम्मानं उप्पादनपारिपूरिया च सम्भवन्ति, तथा सम्मावायामे ठितस्सेव कायादीसु सुभसञ्जादिविद्धंसिनी सम्मासति सम्भवति, तस्मा वुत्तं “**सम्माआजीवो...पे०... पदट्ठान**”न्ति। जेट्ठकसीलं पातिमोक्खसंवरो, सद्भासाधनो च सोति आह “**तं सीलस्स पदट्ठान**”न्ति।

तेसन्ति कायवचीकम्मानं । **कम्मपच्चयतायाति** कुसलकम्महेतुकताय ।

पदत्थो च वुत्तनयेनाति “मननतो आरम्मणविजाननतो”तिआदिना ।

अयं आवट्टोति अयं सभागविसभागधम्मावट्टनवसेन आवट्टो । एत्थ हि कुसलमूलसम्मत्तमग्गादिनिद्वारणा सभागधम्मावट्टना । अविज्जाभवतण्हानं निद्वारणा विसभागधम्मावट्टना ।

विभत्तिहारे पदट्टानभूमिविभागा वुत्तनया, सुविज्जेय्या चाति धम्मविभागमेव दस्सेन्तो “**नयिदं**”न्तिआदिमाह । तत्थ “**नयिदं यथारुतवसेन गहेतब्बं**”न्ति सुत्तस्स नेय्यत्थतं वत्त्वा “**योही**”तिआदिना तं विवरति । “दुक्खमेव अन्वेती”ति कस्मा वुत्तं, ननु यत्थ कत्थचि हितेसिता कुसलमेवाति? नयिदमीदिसं सन्धाय वुत्तं, अधम्मं पन धम्मोति, धम्मञ्च पन अधम्मोति दीपनेन लोकस्स सब्बानत्थबीजभूतेसु सकलहितसुखुपायपटिक्खेपकेसु तित्थकरेसु असन्तगुणसम्भावनावसेन पवत्तमिच्छाधिमोक्खं सन्धाय वुत्तं । यो हि लोके अप्पमत्तकम्पि पुज्जं कातुकामं पापिकं दिट्ठिं निस्साय पटिबाहति, सोपि गारह्थो, किमङ्गं पन अरियविनये सम्मापटिपत्तिं पटिबाहन्तेसूति दुक्खफलाव तत्थ सम्भावनापसंसा पयिरुपासना । तथा हि वुत्तं — “न खो अहं, मोघपुरिस, अरहत्तस्स मच्छरायामि, अपिच तुय्हेवेतं पापकं दिट्ठिगतं...पे०... दीघरत्तं अहिताय दुक्खाय संवत्तती”ति (दी० नि० ३.७), “यो निन्दियं पसंसति (सु० नि० ६६३; सं० नि० १.१८०, १८१; अ० नि० ४.३; नेत्ति० ९२), सब्बस्सापि अनत्थस्स मूलं बालूपसेवना”ति च ।

इदञ्चि सुत्तन्ति “मनोपुब्बङ्गमा...पे०...पद”न्ति (ध० प० १, २) पठमं गाथं सन्धाय वदति । **एतस्साति** संवण्णियमानसुत्तस्स ।

किच्चपज्जत्तीति अधिपतिपच्चयसङ्घातस्स किच्चस्स पज्जापनं । **पधानपज्जत्तीति** पधानभावस्स पज्जापना । **सहजातपज्जत्तीति** तेसं धम्मानं मनसा सहभावपज्जापना ।

महाभूतातीति इतिसद्दो आदिअत्थो, तेन महाभूताविनाभावी सब्बो रूपधम्मो सङ्गहति ।

“मनोपुब्बङ्गमा”ति समासपदे “मनो”ति पदं तदवयवमत्तन्ति आह “**नेव पदसुद्धी**”ति । तेनेवाह “**मनोपुब्बङ्गमाति पदसुद्धी**”ति । “**छायाव अनपायिनी**”ति इदं सुखानुगमस्स उदाहरणमत्तं, न यथाधिप्पेतत्थपरिसमापनं । “**सुखमन्वेती**”ति पन यथाधिप्पेतत्थपरिसमापनन्ति वुत्तं “**पदसुद्धि चेव आरम्भसुद्धि चा**”ति ।

एकत्तताति मनोपुब्बङ्गमादिसामज्जं सन्धाय वदति । एवं सेसेसुपि । **वेमत्तता** “मनोपुब्बङ्गमा”तिआदिना सामज्जतो वुत्तधम्मे पसादो धारणाय निवत्तेत्वा पसन्नसङ्घाते विसेसे अवट्टापनतो । सेसेसुपि एसेव नयो । पसादो सिनेहसभावो, अस्सद्धियं विय लूखसभावं दोसं विनोदेतीति आह “**ब्यापादविक्खम्भनतो**”ति । **बहिद्धाति** सद्धेय्यवत्थुं सन्धायाह । **ओकप्पनतोति** आरम्मणं अनुपविसित्वा अनुपक्खन्दित्वा सद्धहनतो ।

देय्यधम्मादयोति एत्थ आदिसद्धेन संवेगहिरोत्तप्पकसिणमण्डलादयो सङ्गहन्ति । **इट्टारम्मणादयोति** आदिसद्धेन इट्ठमज्झत्तारम्मणा, द्वारधम्मा, मनसिकारोति एवमादीनं सङ्गहो दट्ठब्बो । **तथा फस्सोति** यथा वेदनादीनं इट्टारम्मणादयो पच्चयो, एवं फस्सोपीति पच्चयतासामज्जमेव उपसंहरति तथा-सद्दो । **वेदनादीनन्ति** हि वेदनादयो तयो खन्धा गहिता । **विज्जाणस्स वेदनादयोति** नामरूपं सन्धाय वदति ।

“सीलमयस्स अदोसो पदट्टान”न्ति वुत्तं खन्तिपधानत्ता सीलस्स । अधिट्ठातीति अनुयुज्जति उप्पादेति । सोति एवं कुसलचित्तं भावेन्तो । “अनुप्पन्नान”न्ति आदिना भावनापहानसमारोपनानि दस्सेन्तो निब्बेधभागियवसेन गाथाय अत्थं विचिन्तित्वा समारोपेति, एवम्पि सक्का योजेतुन्ति वासनाभागियवसेन पदट्टाननिद्वेसे उदाहरीयति ।

एवं “मनोपुब्बङ्गमा धम्मा”ति गाथाय वसेन हारसम्पातयोजनाविधिं दस्सेत्वा इदानीं गाथान्तरेन दस्सेतुं “तथा ददतो पुज्ज”न्ति आदिमाह । तत्थ भावनामयन्ति पज्जाभावनामयं ।

“अलोभो कुसलमूल”न्ति आदि दानादीनं अलोभादिपधानत्ता वुत्तं, सब्बत्थं च “वुत्त”न्ति पदं आनेत्वा योजेतब्बं । ते सन्ति रागादीनं । निस्सरणन्ति च परिनिब्बानमेव सन्धाय वदति ।

परिच्चागसीलो अलोभज्झासयो कामेसु आदीनवदस्सावी सम्मदेव सीलं परिपूरेतीति आह “ददतो...पे०... पदट्टान”न्ति । इध ओळारिका नाम किलेसा वीतिक्कमावत्थानं, तप्पहानं तदङ्गप्पहानेन वेदितब्बं । मज्झिमानन्ति परियुट्ठानावत्थानं । सुखुमानन्ति अनुसयावत्थानं । कतावीभूमिं न्ति खीणासवभूमिं ।

ददतोति मग्गसहगतेन अलोभेन सदेवकस्स लोकस्स अभयदानं ददतो । पुज्जन्ति लोकुत्तरकुसलं । संयमतोति मग्गपरियापन्नेहि सम्मावाचाकम्मन्ताजीवेहि दिट्ठेकट्ठादिसंकिलेसतो मग्गसंयमेन संयमन्तस्स । वेरन्ति पाणातिपातादिपापं । कुसलोति मग्गसम्मादिट्ठिया कुसलो विचक्खणो । जहाति पापकन्ति तेहि तेहि मग्गेहि तं तं पहातब्बं पापधम्मं ओधिसो जहाति समुच्छिन्दति । तेनाह “मग्गो वुत्तो”ति ।

“ददतो”ति आदिना पुब्बे अविभागेन कुसलमूलानि उद्धटानीति इदानीं विभागेन तानि उद्धरन्तो “लोकियकुसलमूल”न्ति आदिमाह ।

पुथुज्जनभूमिं सेक्खभूमिं दस्सिता पहानस्स विप्पकतभावदीपनतो । असेक्खभूमिं दस्सिता अनुपादापरिनिब्बानदीपनतो ।

सग्गगामिनी पटिपदा पुब्बभागप्पटिपत्ति ।

पुज्जे कथिते पुज्जफलम्पि कथितमेव होतीति वुत्तं “ददतो...पे०... देसनमाहा”ति । सच्चकम्मट्टानेन विना संकिलेसप्पहानं नत्थीति दस्सेन्तो आह “कुसलो...पे०... देसनमाहा”ति ।

वेरसद्धो अदिन्नादानादिपापधम्मेसुपि निरुळ्होति वुत्तं “एवं सब्बानिपि सिक्खापदानि वित्थारेतब्बानी”ति । द्वेपि विमुत्तियो सेक्खासेक्खविमुत्तियो, सउपादिसेसअनुपादिसेसविमुत्तियो च । तथा हि वक्खति “निब्बुतोति द्वे निब्बानधातुयो”ति आदि (नेत्ति० अट्ठ० ७६) ।

कारणूपचारेण, कारणग्गहणेन वा फलं गहितन्ति आह “द्वे सुगुत्तियो”ति आदि । वट्ठविवट्ठसम्पत्तियो इमिस्सा देसनाय फलं, तस्स दानं सीलं भावना उपायो, “सम्पत्तिद्वयं इच्छन्तेन दानादीसु अप्पमत्तेन भवितब्बं”न्ति अयमेत्थं भगवतो आणत्तीति इममत्थं सन्धाय आह “फलादीनि यथारहं वेदितब्बानी”ति ।

विचयोति विचयहारसम्पातो, सो वुच्चतीति अत्थो । एस नयो इतो परेसुपि । “**तिविधम्मि दानमय**”न्तिआदिना पदत्थविचयं दस्सेति, तेन अस्सादादयो, इतरे च विचयहारपदत्था अत्थतो विचिता एव होन्तीति । रूपादिआरम्मणस्स परिच्चागो वुत्तोति सम्बन्धो । **सब्बो**ति सकलो अनवसेसतो किच्चस्स वुत्तता ।

दानाभिरतस्स चागाधिद्वानं पारिपूरिं गच्छतीति वुत्तं “**ददतो...पे०... पदद्वान**”न्ति । विरतिसच्चे, वचीसच्चे च तिद्वतो सच्चाधिद्वानं पारिपूरिं गच्छतीति वुत्तं “**संयम...पे०... पदद्वान**”न्ति । कोसल्लयोगतो च पापप्पहानतो च पज्जापारिपूरिं गच्छतीति वुत्तं “**कुसलो...पे०... पदद्वान**”न्ति । अनवसेसरागादीसु पहीनेसु उपसमो उपड्वितो नाम होतीति वुत्तं “**राग... पे०... पदद्वान**”न्ति ।

कुसलोति पुग्गलाधिद्वानेन कोसल्लसम्मादिद्वि वुत्ताति आह “**कुसलो...पे०... मग्गङ्गादिभावेन एकलक्खणत्ता**”ति । **आदिसद्देन** बोधिपक्खियभावादिं सङ्गण्हाति । **खेपेतब्बभावेना**ति पहातब्बभावेन ।

अवेरतन्ति असपत्ततं । **कुसलधम्मही**ति अनवज्जधम्मोहि, फलनिब्बानेहीति अधिप्पायो । दानस्स महप्फलता, सीलादिगुणेहि सत्थु अनुत्तरदक्खिण्येय्यभावो, अनुपादापरिनिब्बानन्ति इमेसं पच्चवेक्खणा इमस्स दानस्स निदानन्ति अयमत्थो पाळियं निरुळ्होव । निब्बचननिदानसन्धयो सुविज्जेय्यावाति आह “**निब्बचननिदानसन्धयो वत्तब्बा**”ति ।

पटिपक्खनिद्देसेन समुदयोति देसनत्थं पटिपक्खनिद्देसेनेन निद्धारितो अयं मच्छरियादिसंकिलेसपक्खिको समुदयो । **अलोभेन...पे०... दानादीही**ति येहि अलोभादीहि दानादयो धम्मा सम्भवन्ति, तानि दानादिग्गहणेनेव गहितानीति कुसलमूलानि निद्धारिती “**इमानि तीणि कुसलानी**”ति । तेसन्ति कुसलमूलानं ।

भयहेतु देति पण्णाकारादिवसेन । **रागहेतु** देति सभागवत्थुस्स । **आमिसकिज्जिक्खहेतु** देति लज्जादिवसेन । **अनुकम्पन्तो** वा करुणाखेत्ते । **अपचयमानो** गुणखेत्ते, उपकारखेत्ते वा । **भयूपरतो**ति भयेन ओरतो । तेन तथारूपेन संयमेन वेरं न चियतेव । एवं सब्बस्स अकुसलस्स पापको विपाकोति योजना ।

“**ददतो**”तिआदिना यथा दानपटिक्खेपेन परिवत्तनं दस्सितं, एवं पहानपटिक्खेपेनपि परिवत्तनं दस्सेतब्बन्ति वुत्तं “**अकुसलो पन न जहाती**”ति ।

कम्मफलं सद्वहन्तो दानकिरियायं पदहन्तो येन विधिना दानं दातब्बं, तत्थ सति उपड्वेपन्तो चित्तं समादहन्तो सम्मादिद्विं पुरक्खरोन्तो दाने सम्मापटिपन्नो होतीति आह “**दानं नाम...पे०... होती**”ति ।

भावनापहानसमारोपनानि पाळियं सरूपतो विज्जायन्तीति पदद्वानवेवचनसमारोपनानि दस्सेतुं “**तं सीलस्स पदद्वान**”न्तिआदि वुत्तं, तं सुविज्जेय्यं । अज्जज्ज यदेत्थ अत्थतो न विभत्तं, तं वुत्तनयत्ता, उत्तानत्थत्ता चाति वेदितब्बं ।

हारसम्पातवारवण्णना निड्विता ।

नयसमुद्वानवारवण्णना

७९. “**विसयभेदतो**”ति सङ्केपेन वुत्तमत्थं वित्थारतो विवरितुं “**यथा ही**”तिआदिमाह । तत्थ **नयतो**ति नयग्गाहतो ।

न हि पटिवेधजाणं विय विपस्सनाजाणं पच्चक्खतो पवत्ततीति । अनुबुज्झियमानोति अभिसमयजाणस्स अनुरूपं बुज्झियमानो । यथा एकपटिवेधेनेव मग्गजाणं पवत्तति, एवं तदनुच्छविकं विपस्सनाजाणेन गह्ममानोति अत्थो । एवञ्च कत्वा नन्दियावट्टादीनं तिण्णं अत्थनयभावो समत्थितो होतीति । तथा हि अत्थविसेसरूपताय तयो नया “सुत्तत्थो”ति वुत्ता, पदत्थविचारभावेपि पन हारा “व्यञ्जनविचयो”ति । यदि एवं कथं तयोति चोदनं सन्धायाह “पटिविज्झन्तानं पना”तिआदि । तत्थ एकमेको संकिलेसवोदानानं विभागतो द्विसङ्गहोति योजना । चतुछअट्टदिसो चाति न पच्चेकं ते नन्दियावट्टादयो चतुछअट्टदिसा, अथ खो यथाक्कमन्ति । “एव”न्तिआदि यथावुत्तस्स अत्थस्स निगमनं ।

तथा चाति यथावुत्तस्स अत्थस्स उपचयेन समत्थना । पुब्बा कोटि न पज्जायतीति एत्थ यं वत्तब्बं, तं परतो पट्टानकथायं आवि भविस्सति । “अन्धं तमं तदा होति, यं लोभो सहते नर”न्तिआदि (चूळनि० खग्गविसाणसुत्तनिद्देस १२८) वचनतो कामतण्हापि पटिच्छादनसभावा, यतो कामच्छन्दं “नीवरण”न्ति वुत्तं । अविज्जाय पन भवेसु आदीनवप्पटिच्छादनं सातिसयन्ति । तथा अविज्जापि संयोजनसभावा, यतो सा बहिद्धा संयोजनभावेन वुत्ता । एवं सन्तेपि तण्हाय बन्धनट्टो सातिसयो अपेक्खितभावतोति इममत्थं दस्सेन्तो “तथापि...पे०... वुत्त”न्ति आह ।

“संयुत्ता”ति पदस्स सम्पयुत्ताति अत्थोति आह “मिस्सिता”ति । “अविज्जाभिभूता...पे०... अभिनिविसन्ता”ति एतेन अविज्जाय अयाथावगहणहेतुतं दस्सेति, ततो सो अविन्दियं विन्दतीति अविज्जाति वुच्चति । किलिस्सनं उपतापनन्ति आह “किलिस्सनप्पयोगं अत्तपरितापनपटिपत्ति”न्ति । अल्लीयनं सेवनं ।

दुक्खन्ति ...पे०... जानन्तीति अत्तना अनुभूयमानं तथा तथा उपट्ठितं कायिकचेतसिकदुक्खं, इतरम्मि वा एकदेसं जानन्ति । तण्हायपि एसेव नयो । सभागविसभागपटिपज्जितब्बाकारतो तत्थ तेसं जाणं नत्थेवातिदस्सेन्तो “इदं दुक्ख”न्तिआदिमाह । पवत्तिपवत्तिहेतुमत्तम्पीति “पवत्ति पवत्तिहेतू”ति एत्तकम्मि । का पन कथाति पचुरजनसाधारणे लोकियेपि नाम अत्थे येसं जाणस्स पटिघातो, परमगम्भीरे अरियानं एव विसयभूते लोकुत्तरे निवत्तिनिवत्तिहेतुसङ्घाते अत्थे का नाम कथा, छिन्ना कथाति अत्थो । अट्टसमापत्तिपभेदस्स केवलस्स समथस्स तादिसे काले बाहिरकानञ्च इज्झनतो “विपस्सनाधिट्टान”न्ति विसेसितं । वूपसमो समुच्छेदो, पटिप्पस्सद्धि च ।

“संसारस्स अनुपच्छेदनतो”ति इदं दिट्ठिगतानं दिट्ठिगतिकमतदस्सनं । सो हि पुत्तमुखदस्सने असति संसारो उच्छिज्जेय्याति भायति । यतो वुत्तं —

“गण्डुप्पादो किकी चेव, कुन्ती ब्राह्मणधम्मिको ।

एते अभयं भायन्ति, सम्मूळ्हा चतुरो जना”ति ॥ (सु० नि० अट्ठ० २.२९३; अ० नि० टी० ३.५.१९२) ।

तदभिज्जाति तं यथावुत्तअन्तद्वयं अभिजानन्ति गुणं आरोपेत्वा जानन्तीति तदभिज्जा । अत्थभञ्जनतो, रोगगण्डसल्लसदिसताय अत्तभावसंकिलेसानञ्च रोगगण्डसल्लता ।

सक्कायदस्सनेति एत्थ दिट्ठिदस्सनं, सक्कायोव दस्सनं सक्कायदस्सनन्ति अत्थो वेदितब्बो । तेसन्ति दिट्ठिचरितानं । अत्ताभिनिवेसो बलवा । तस्मा यथाउपट्ठितं रूपं “अत्ता”इच्चेव गणहन्तीति अधिप्पायो । तथा वेदनादिं । तण्हाचरितो पन यथाउपट्ठितं रूपं तण्हावत्थुं कत्वा अत्तनियाभिनिवेसेन अभिनिविसन्ता तदञ्जमेव अत्ततो समनुपस्सन्ति । एवं वेदनादीसु । तेनाह “तण्हाचरिता”तिआदि । विज्जमानेति परमत्थतो उपलब्धमाने । कार्येति समूहे । दिट्ठिया परिकप्पितो अत्तादि एव

परमत्थतो नुपलब्धति, दिट्ठि पन लब्धतेवाति आह “सती वा विज्जमाना”ति ।

सक्कायदस्सनमुखेनाति सक्कायदिट्ठिमुखेन ।

उच्छेदसस्सतन्ति तंसहचरणतो उच्छेदसस्सतदिट्ठि वुत्ता । “उच्छेदसस्सतवादा”तिपि पाठो ।

कसिणायतनानीति कसिणज्झानानि ।

तेजेत्वाति निसानेत्वा ।

८१. एत्तावता नन्दियावट्टस्स भूमिरचनवसेन संकिलेसपक्खो दस्सितोति आह “तत्थ दिट्ठिचरितोतिआदिना वोदानपक्खं दस्सेती”ति । “यस्मा सल्लेखे तिब्बगारवो”ति इमिना तत्थ तिब्बगारवत्ता संलेखानुसन्ततवुत्तिना भवतीति दस्सेति । सेसेसुपि एसेव नयो । मिच्छाधिमोक्खो सद्भापतिरूपको अवत्थुस्मिं पसादो ।

पुग्गलाधिद्वानेन धम्ममेव विभजतीति आह “सत्तापि...पे०... दस्सेती”ति ।

ये हि केचीति एत्थ हि-सद्वो निपातमत्तं । “इमाहि एव चतूहि पटिपदाही”तिपि पाळि । दुक्खापटिपदादिविभागेन मग्गो एव इध वुत्तोति आह “पटिपदा हि मग्गो”ति चतुद्विसासङ्घातं मग्गान्ति चतुद्विसासङ्घातं पवत्तनुपायं । द्वे दिसा एतिस्साति द्विदिसा । नन्दियावट्टस्साति नन्दियावट्टनयस्स ।

८२. विवत्तति वट्टं एत्थाति विवत्तं, विवत्तं एव विवट्टं, असङ्घतधातु, निब्बुति एव वा । तेन वुत्तं “निब्बान”न्ति ।

“कत्थ ददुब्ब”न्ति वा पाळि । उपचयेति उपचयावत्थायन्ति अत्थो । दसन्नन्ति लोभादिकिलेसवत्थूनं । विपल्लासहेतुभावतोति सुभसज्जादिविपल्लासहेतुकभावतो । विपरियेसग्गाहवसेन हि आदीनवेसु एव संयोजनियेसु धम्मेसु अस्सादानुपस्सिता । न हि यथाभूतज्जाणे सति तथा सम्भवो । तेन वुत्तं “दसन्नं...पे०... भावतो”ति । दसविधकारणेति दसविधे कारणे, दसविधस्स वा कारणे । अयोनिमोमनसिकारपरिक्खता धम्मा सुभारम्मणादयो ।

तब्बिसया किलेसाति आहारपरिज्जापरिबन्धभूता किलेसा । विज्जाणट्ठितीसुपि एसेव नयो । काये पवत्तमानो पठमो विपल्लासो कायसमुदाये, कायेकदेसे च कबळीकारे आहारे पवत्तो एव होतीति वुत्तं “पठमे आहारे विसयभूते पठमो विपल्लासो पवत्तती”ति । तथा वेदनायं पवत्तमानो दुतियविपल्लासो तप्पच्चये फस्साहारे, चित्ते पवत्तमानो ततियविपल्लासो तप्पच्चये मनोसज्जेतनाहारे, धम्मेसु पवत्तमानो चतुत्थविपल्लासो तप्पच्चये विज्जाणाहारे पवत्तो एव होतीति वुत्तं “चतुत्थे आहारे चतुत्थो विपल्लासो”ति । तेनाह “सेसाहारेसुपि एसेव नयो”ति । आहारसीसेन वा आहारपटिबद्धो छन्दरागो गहितो । विज्जाणट्ठितीसुपि एसेव नयो । तेनेवाह “आहारसीसेन तब्बिसया किलेसा अधिप्पेता”ति । पठमे आहारे विसयभूतेति च पठमे आहारे छन्दरागस्स विसयभावं पत्ते, तब्भावं अनतिकक्कन्तेति अत्थो । अप्पहीनच्छन्दरागस्स हि तत्थ विपल्लासा सम्भवन्ति, न इतरस्स । तथा दुतियविपल्लासादीसु अप्पहीनेसु । इतरे उपादानानि पवत्तन्तेव अप्पहीनत्ताति आह “सेसपदेसुपि एसेव नयो”ति । यस्मा च उपादानादीसु अप्पहीनेसुपि योगादयो पवत्तन्तेव यथारहं तंसभावत्ता, तदेकद्वयभावतो च, तस्मा वुत्तं पाळियं “पठमे उपादाने पठमो योगो”तिआदि । तेनाह “सेसपदेसुपि एसेव नयो”ति ।

८३. अपरिजानन्तस्साति जातपरिज्जाय, तीरणपरिज्जाय, प्हानपरिज्जायाति तीहि परिज्जाहि परिच्छिन्दित्वा अजानन्तस्स, तेसं समुदयज्ज अत्थङ्गमज्ज अस्सादज्ज आदीनवज्ज निस्सरणज्ज यथाभूतं अनवबुद्धान्तस्साति अत्थो। **तिब्बो** बहलो **छन्दरागो** होति तण्हाचरितभावतोति अधिप्पायो। इति उपक्किलेसस्स दिट्ठाभिनिवेसस्स हेतुभावतोति इममत्थं सन्धायाह “**वुत्तनयेनेवा**”ति। सुभसुखसज्जाकामुपादानकामभवयोगअभिज्झाकायगन्थकामभवासव- कामभवोघरागसल्लछन्दागतिगमनानि तण्हापक्खिकताय, तण्हासभावताय च **तण्हापधानानि**। सीलब्बतुपादानव्यापादकायगन्थदोससल्लदोसागतिगमनानि पन तण्हाभावे भावतो, विज्जाणट्ठितियो तण्हाविसयतो, सब्बेसं वा तण्हाविसयतो तण्हापधानता लब्भतेव। पच्छिमकानं दिट्ठिपधानता वुत्तनयानुसारेण वेदितब्बा।

८४. कबळीकारे आहारेति कबळीकाराहारविसये छन्दरागे। “अप्पहीने”तिआदिकं परियायकथं मुञ्चित्वा निप्परियायमेव दस्सेन्तो कबळीकाराहारस्स “**असुभसभावत्ता, असुभसमुट्ठानत्ता चा**”ति वुत्तं। लब्भमाने हि उजुके अत्थे किं परियायकथायाति। छन्दरागो वा तत्थ अत्थसिद्धोति एवम्पेत्य अत्थो वुत्तो। न हि तत्थ असति छन्दरागे विपल्लासो सम्भवति। **दुक्खसभावत्ता**ति सङ्खारदुक्खताय दुक्खसभावत्ता। **दुक्खपच्चयत्ता**ति तिविधदुक्खतालक्खणस्स दुक्खस्स कारणतो। **विज्जाणे निच्चसज्जिनो**। तथा हि **साति** नाम भिक्खु केवट्टपुत्तो “तंयेव विज्जाणं सन्धावति संसरती”ति तत्थ निच्चाभिनिवेसं संवेदेसि। येभुय्येन सङ्खारेसु अत्तसज्जिता दिट्ठिगतिकानं “चेतना अत्ता”तिआदिदिट्ठिपरिदीपनेसु वेदितब्बा। “**भवविसुद्धी**”ति पदस्स अत्थवचनं “**निब्बुतिसुख**”न्ति। “**सीलब्बतेहि...** **पे०... सुखन्ति दळ्हं गण्हाती**”ति इमिना सीलब्बतुपादानं इध भवुपादानन्ति दस्सेति। तथा हि वक्खति “सीलब्बतुपादानसङ्घातेन भवुपादानेना”ति।

पच्चया होन्ति उपनिस्सयपच्चयादिना। **पठमे योगे ठितोति** पठमे योगे पतिट्ठितो। अप्पहीना हि किलेसा कम्मवट्ठादीनं कारणभूता तंसमङ्गिनो सत्तस्स पतिट्ठाति वुच्चन्ति। परस्स अभिज्झायनं **पराभिज्झायनं**। भवपत्थनाय भवदिट्ठिभवरागवसेन पियायितस्स वत्थुनो विपरिणामज्जथाभावे दोमनस्सुप्पत्तिं सन्धाय वुत्तं “**भवराग...पे०... पदूसेन्ती**”ति।

गन्थित्वाति गन्थिं कत्वा। द्विधाभूतं रज्जुआदिके विय गन्थिकरणज्झि गन्थनं। चित्तं परियादाय तिट्ठन्ता आसवानं उप्पत्तिहेतु होन्तीति सम्बन्धो। परियुट्ठानप्पत्ता एकच्चे किलेसा विसेसतो आसवुप्पत्तिहेतु होन्तीति दस्सनत्थं अट्ठकथायं उप्पटिपाटिवचनं। तप्पटिपक्खे विसये पत्थेतीति योजना। **तब्बिसयबहुले भवे पत्थेतीति** यथा मानुसकेहि कामेहि निब्बिन्नरूपा देवूपपत्ति। **तंसभावत्ता**ति दिट्ठिसभावत्ता। **अपरापरन्ति** अज्जमज्जं। एकच्चा हि दिट्ठि एकच्चस्स दिट्ठाभिनिवेसस्स कारणं होति, यथा सक्कायदिट्ठि इतरासं। **अभिनिविसन्तस्साति** अभिनिवेसनहेतु। “**अयोनिमोमनसिकारतो...पे०... अविज्जासवो उप्पज्जती**”ति इदं सच्चाभिनिवेसस्स फलभूतं अविज्जासवं दस्सेति एकन्तवस्सिमघवुट्ठानेन विय महोघप्पवत्ति। **अविज्जासवो सिद्धो होति** वुट्ठिहेतुकमहोघसिद्धिया उपरिमघवुट्ठानं विय।

“नन्दीरागसहगता”तिआदीसु (महाव० १४) विय तब्भावत्थो सहगतसद्दोति आह “**अनुसय...पे०... भूता वा**”ति। **चित्तस्स अब्भन्तरसङ्घातं हृदयन्ति** विपाकचित्तप्पवत्तिं सन्धाय वदति। विपाकवट्ठेपि किलेसवासनाहिता अत्थि काचि विसेसमत्ता।

लोभसहगतस्स विज्जाणस्स। **इतरस्स** दोससहगतादिकस्स। ब्यज्जनेन विय भोजनस्स आरम्भणस्स अभिसङ्खरणं विसेसापादनं **उपसेचनं**, नन्दी सप्पीतिकतण्हा उपसेचनं एतस्साति **नन्दूपसेचनं** उपसेचनभूतायपि नन्दिया

रागसल्लउपनिसतो। उपसित्ते पन वत्तब्बमेव नत्थीति दस्सेतुं पाळिया “रागसल्लेन नन्दूपसेचनेन विज्जाणेना”ति वुत्तन्ति तमत्थं पाकटं कातुं “केन पन तं नन्दूपसेचन”न्ति पुच्छति।

रागसल्लेनाति हेतुमि करणवचनन्ति दस्सेन्तो “रागसल्लेन हेतुभूतेना”ति आह। उपनिस्सयपच्चयत्थो चेत्थ हेत्वत्थो। उपगन्तब्बतो विज्जाणेनाति विभत्तिं परिणामेत्वा योजेतब्बं। “पतिट्ठाभावतो”ति इमिना विज्जाणस्स निस्सयादिपच्चयतं वदति। तेनाह “रूपक्खन्धं निस्साय तिट्ठती”ति। एवं दुतियादिविज्जाणट्ठितीसुपि निस्सयादिपच्चयता वत्तब्बा पतिट्ठावचनतो।

८५. यदिपि अकुसलमूलादिके तिपुक्खलस्स, तण्हादिके नन्दियावट्ठस्स दिसाभावेन वक्खति, तथापि अज्जमज्जानुप्पवेसतो एकस्मिं नये सिद्धे इतरेपि सिद्धा एव होन्तीति इमस्स विसेसस्स दस्सनत्थं “आहारादयो...पे०... ववत्थपेतु”न्ति वुत्तं। वक्खमाने वा अकुसलमूलतण्हादिके आदिसद्देन सङ्गहेत्वा “आहारादयो”ति वदन्तो “नयान”न्ति बहुवचनमाह। एकस्स अत्थस्साति रागचरितस्स उपक्विलेसतासङ्घातस्स एकस्स पयोजनस्स। ब्यज्जनत्थोपि गहितो, न ब्यज्जनमेव गहितन्ति सुत्तपदानि अज्जमज्जपरियायवचनानि यथारहं तण्हावत्थूनं तत्थ कथितत्ता वुत्तं “सवत्थुका तण्हा वुत्ता”ति। दोसवत्थूनं, दिट्ठिवत्थूनञ्च तत्थ कथितत्ता “सवत्थुको दोसो, सवत्थुका दिट्ठि च वुत्ता”ति इममत्थं सन्धायाह “वुत्तनयानुसारेना”ति।

दुक्खाकारेन सह दुक्खाकारं गहेत्वाति अत्थो। एवञ्चेतन्ति यदि तंतं अनुपस्सनाबहुलस्स वसेन पुरिमाहारद्वयादीसु विमोक्खमुखविसेसनिद्वारणं कतं, एतं एवमेव वेदितब्बं, न अज्जथा। तत्थ कारणं वदन्तो “न ही”ति आदिमाह। तस्सत्थो — यथा अरियमग्गानं ओधिसो किलेसप्पजहनतो पहातब्बेसु धम्मेसु नियमो अत्थि, न एवं विपस्सनाय परिज्जापहानानं अनिच्चन्तिकत्ताति।

अपरे पनाहु — पुरिमे आहारद्वये परिकिलेसभावेन, दुक्खपच्चयत्ता च दुक्खलक्खणं सुपाकटं। तत्थ पुरिमे विज्जाणट्ठितिविज्जाणाहारे ततियविज्जाणट्ठितियं अनिच्चलक्खणं, मनोसज्जेतनाहारे चतुत्थविज्जाणट्ठितियं अनत्तलक्खणं सुपाकटन्ति तिस्सन्नं अनुपस्सनानं पवत्तिमुखताय तेहि अप्पणिहितादिविमोक्खमुखेहि परिज्जं गच्छन्तीति। तथा विपल्लासादीसु पुरिमद्वयं दुक्खानुपस्सनाय उजुविपच्चनीकं, इतरद्वयं अनिच्चानत्तानुपस्सनानं। इति पवत्तिमुखताय च उजुविपच्चनीकताय च इमे धम्मा यथारहं अप्पणिहितादिविमोक्खमुखेहि परिज्जेय्या, पहातब्बा च वुत्ता। तत्थ सुभसुखसज्जाकामुपादानसीलब्बतुपादानकामयोगभवयोगअभिज्झाकाय गन्थकामासवकामोघ भवोघ रागसल्लच्छन्दअगतिगमनानि सुखस्सादवसेन पवत्तनतो दुक्खानुपस्सनाय पटिपक्खभावतो ब्यापादकायगन्थदोससल्लदोसअगतिगमनानि पवत्तिमुखताय अप्पणिहितविमोक्खमुखेन पहातब्बानि। ततियसज्जादयो निच्चाभिनिवेसतन्निमित्ताहि अनिच्चानुपस्सनाय पटिपक्खभावतो अनिमित्तविमोक्खमुखेन पहातब्बा। चतुत्थसज्जादयो अत्ताभिनिवेसतन्निमित्ताहि अनत्तानुपस्सनाय पटिपक्खभावतो सुज्जतविमोक्खमुखेन पहातब्बा। तत्थ मानसल्लभयअगतिगमनानं निच्चाभिनिवेसनिमित्तता वेदितब्बा। न हि अनिच्चतो पस्सतो मानजप्पनं, भयं वा सम्भवति। अविज्जायोगादीनं अत्ताभिनिवेसनिमित्तता पाकटा एवाति।

८६. अप्पमज्जावज्जा रूपावचरसमापत्तियो दिब्बविहारा “देवूपपत्तिसंवत्तनिककुसलसमापत्तियो चा”ति कत्वा, सतिपि तब्भावे परहितपटिपत्तितो, निदोसताय च सेट्ठा विहाराति चतस्सो अप्पमज्जा ब्रह्मविहारा, चतस्सो फलसमापत्तियो अरियविहारा “आरका किलेसेहि अरियानं विहारा”ति। चतस्सो आरुप्पसमापत्तियो आनेज्जविहारा, सतिपि

देवूपपत्तिसंवत्तनिककुसलसमापत्तिभावे आनेज्जसन्तताहि लोकियेसु सिखाप्पत्तितो ।

अधिकरणभेदेनाति वत्थुभेदेन ।

यं अभिण्हं न पवत्तति, तं **अच्छरियन्ति** दस्सेतुं “अन्धस्स...पे०... उप्पज्जनक”न्ति वुत्तं । **अधितिट्ठति** सीलादि एतेन सच्चेन, एत्थ वा सच्चे निमित्तभूते, **अधिट्ठानमत्तमेव वा** तं सच्चन्ति एवं करणाधिकरणभावत्था पच्चयवसेन वेदितब्बा समानाधिकरणसमासपक्खे । तथा अज्जपदत्थसमासपक्खे । इतरस्मिं पन समासे करणाधिकरणत्था एव, ते च खो सीलादिवसेन च वेदितब्बा । सुखन्ति ज्ञानविपस्सनामग्गफलनिब्बानसुखं । लोकियविपाकसुखम्पि लब्धतेव । “नाज्जत्र बोज्झा...पे०... पाणिन”न्ति (सं० नि० १. ९८) हि इमाय गाथाय सङ्गहिता अनत्तपरिहारमुखेन सत्तानं अभया निब्बानसम्पत्तिसुखावहा चत्तारो धम्मा इध “**सुखभागिया**”ति वुत्ताति । **अनवसेसपरियादानतो**ति फरणवसेन अनवसेसग्गहणतो ।

पठमस्स सतिपट्ठानस्स पठमपटिपदावसेन पवत्तस्साति अधिप्पायो । एवं सेसेसुपि । “**यथा ही**”तिआदिना यथावुत्तपटिपदासतिपट्ठानानं नानन्तरियकत्तं उपमाय विभावेति । सतिपि च सब्बाहि पटिपदाहि सब्बेसं सतिपट्ठानानं नियमाभावे नानन्तरिकभावेन देसनाक्कमेनेवेत्थ नेसं अयमनुक्कमो कतोति वेदितब्बो । अथ वा कायवेदनासु सुभसुखसज्जानं दुब्बिनिवेठियताय असुभदुखानुपस्सनानं किच्चसिद्धितो पुरिमेन पटिपदाद्वयेन पुरिमं सतिपट्ठानद्वयं योजितं तदभावतो । इतरेन इतरं । तानि हि पुरिमेसु सतिपट्ठानेसु कतकम्मस्स इच्छितब्बानि । अथ वा यथा तण्हाचरितदिट्ठिचरितानं मन्दतिक्खपज्जानं वसेन चतस्सो पटिपदा योजिता, एवं चत्तारि सतिपट्ठानानि सम्भवन्तीति दस्सेतुं पटिपदासतिपट्ठानानं अयमनुक्कमो कतो ।

“**तथा**”ति इमिना यथा समानपटिपक्खताय पठमस्स सतिपट्ठानस्स भावना पठमस्स ज्ञानस्स विसेसावहा, एवं पीतिसहगतादिसमानताय दुतियसतिपट्ठानादिभावना दुतियज्झानादीनं विसेसावहाति इममत्थं उपसंहरति । **पीतिपटिसंवेदनादीति आदिसद्देन** सुखपटिसंवेदनं, चित्तसङ्खारपटिसंवेदनं, पस्सम्भनञ्च सङ्गहति । चित्तस्स अभिप्पमोदनग्गहणञ्चेत्थ निदस्सनमत्तं दट्ठब्बं पटिसंवेदनसमादहनविमोचनानम्पि वसेन पवत्तिया इच्छितब्बत्ता । **अनिच्चविरागादीति आदिसद्देन** निरोधपटिनिस्सग्गा सङ्गहन्ति ।

रूपावचरसमापत्तीनन्ति एत्थ पटिलद्धमत्तं पठमज्झानं पठमज्झानसमापत्तिया पगुणवसीभावापादनस्स पच्चयो होति, न इतरासं । इतरासं पन अधिट्ठानभावेन परम्पराय पच्चयो होतीति वेदितब्बं । ब्यापादविहिंसावितक्कअरतिरागा **ब्यापादवितक्कादयो । सुखेनाति** अकिच्छेन, अकसिरेनाति अत्थो ।

दिब्बविहारादिके चत्तारो विहारे पदट्ठानं कत्वा नानासन्तानेसु उप्पन्नाय वुट्ठानगामिनिविपस्सनाय यथाक्कमं अनुप्पन्नाकुसलानुप्पादनादिवसेन पवत्तविसयं सन्धाय पाळियं “**पठमो विहारो भावितो बहुलीकतो**”तिआदि वुत्तं । सम्मप्पधानसदिसज्हेत्थ सम्मप्पधानं वुत्तं । अरियविहारे च हेट्ठिमे निस्साय उपरिमग्गाधिग्माय वायमन्तस्स अयं नयो लब्धति । मग्गपरियापन्नस्सेव वा सम्मप्पधानस्स नानासन्तानिकस्स यथावुत्तविपस्सनागमनेन तंतंकिच्चादिकस्स वसेनेतं वुत्तं । सक्का हि विपस्सनागमनेन सद्धिन्द्रियादितिक्खताविसेसो विय वीरियस्स किच्चविसेसविसयो मग्गो विज्जातुं ।

तथा सिखाप्पत्तउपेक्खासतिपारिसुद्धिदिब्बविहारं निस्साय उप्पन्नं पठमं सम्मप्पधानं मानप्पहानं उक्कंसेति,

ब्रह्मविहारसन्निस्सये उप्पन्नं दुतियं सम्मप्पधानं कामालयसमुग्धातं, अरियविहारसन्निस्सयेन उप्पन्नं ततियं सम्मप्पधानं अविज्जापहानं, सन्तविमोक्खसन्निस्सयेन उप्पन्नं चतुत्थं सम्मप्पधानं भवूपसमं उक्कंसेतीति दस्सेतुं “**पठमं सम्मप्पधानं**”न्तिआदि वुत्तं ।

पहीनमानो न विसंवादेय्याति **मानप्पहानं सच्चाधिट्ठानं** वड्ढेति विसंवादननिमित्तस्सेव अभावतो । अप्पहीनमानो हि माननिस्सयेन किञ्चि विसंवादेय्य । कामालये, दिट्ठालये च समुग्धाटिते चागपटिपक्खस्स अवसरो एव नत्थीति **आलयसमुग्धातो चागाधिट्ठानं** वड्ढेति । अविज्जाय समुच्छिन्नाय पज्जाबुद्धिया परिबन्धोव नत्थि, भवसङ्खारेसु ओस्सट्ठेसु अभवूपसमस्स ओकासोव नत्थीति मानप्पहानादयो सच्चाधिट्ठानादिके संवड्ढेन्तीति दस्सेतुं “**मानप्पहानं**”न्तिआदि वुत्तं ।

अविसंवादनसीलो धम्मच्छन्दबहुलो छन्दाधिपतेय्यं समाधिं निब्बत्तेति । चागाधिमुत्तो नेक्खम्मज्झासयो अकोसज्जबहुलताय वीरियाधिपतेय्यं, जाणुत्तरो चित्तं अत्तनो वसे वत्तेन्तो चित्ताधिपतेय्यं, वूपसन्तसभावो उपसमहेतुभूताय वीमंसाय वीमंसयतो वीमंसाधिपतेय्यं समाधिं निब्बत्तेतीति सच्चाधिट्ठानादिपारिसुद्धिछन्दसमाधिआदीनं पारिपूरिया संवत्ततीति दस्सेतुं “**सच्चाधिट्ठानं भावितं**”न्तिआदि वुत्तं ।

धम्मच्छन्दबहुलो छन्दसमाधिम्हि ठितो इट्ठानिदुच्छळारम्मणापाते अनवज्जसेवी होति । आरद्धवीरियो वीरियसमाधिम्हि ठितो संकिलेसपक्खस्स सन्तपनवसेनेव पुज्जं परिपूरेति । चित्तं अत्तनो वसे वत्तेन्तो चित्तसमाधिम्हि ठितो पज्जाय उपकारानुपकारके धम्मे परिगगणहन्तो **बुद्धिं** फातिं गमिस्सति । वीमंसासमाधिम्हि ठितो धम्मविचयबहुलो उपधिपटिनिस्सग्गावहमेव पटिपत्तिं ब्रूहेतीति इममत्थं दस्सेतुं “**छन्दसमाधि भावितो**”न्तिआदि वुत्तं ।

दूरादूरपच्चत्थिकनिवारणे बहूपकारो **इन्द्रियसंवरो** मेत्ताय विसेसुप्पत्तिहेतुतो **मेत्तं** वड्ढेति । तपेन संकिलेसधम्मे विक्खम्भेन्तो वीरियाधिको परदुक्खापनयनकामतं साहत्थिकं करोतीति **तपो करुणं** संवड्ढेति । पज्जा परियोदापिता सावज्जानवज्जधम्मे परिगगणहन्ती पहासनिपाततो **मुदितं** रक्खन्ती परिव्रूहेति । उपधिनिस्सग्गो पक्खन्दो निन्नपोणपब्भारोव सम्मदेव सत्तसङ्खारेसु उदासिनो होतीति सो **उपेक्खाविहारं** परिवड्ढेतीति इममत्थं दस्सेतुं “**इन्द्रियसंवरो भावितो**”न्तिआदि वुत्तं । तेनाह “**यो यस्स विसेसपच्चयो, सो तं परिपूरेतीति वुत्तो**”न्ति ।

८७. दिसाभावेनाति नयानं दिसाभावेनाति योजेतब्बं । अत्थोपिस्स पुब्बे वुत्तनयेनेव वेदितब्बो । **येन** चतुक्केन **यस्स** रागचरितादिपुगलस्स **वोदानं** विसुद्धि । यथा अपरिज्जाता, अप्पहीना च पठमाहारविपल्लासादयो रागचरितादीनं पुगलानं उपक्विलेसा, एवं पठमपटिपदादयो भाविता बहुलीकता नेसं विसुद्धियो होन्तीति वुत्तनयानुसारेण सक्का विज्जातुन्ति आह “**हेट्ठा वुत्तनयमेवा**”न्ति ।

अथ वा पुरिमाहि द्वीहि पटिपदाहि सिज्झमाना विपस्सना अत्तनो किच्चवुत्तिसङ्घातं पवत्तिदुक्खम्पि सङ्गणहन्ती दुक्खानुपस्सनाबाहुल्लविसेसतो दुक्खलक्खणं पटिविज्झन्ती “**अप्पणिहितं विमोक्खमुखं**”न्ति वुत्ता । ततियाय पटिपदाय सिज्झमाना सुखप्पवत्तिकताय सम्मदेव सन्ततिघनं भिन्दित्वा अनिच्चलक्खणं विभावेन्ती “**अनिमित्तं विमोक्खमुखं**”न्ति वुत्ता । चतुत्थाय पन पटिपदाय सिज्झमाना सुखप्पवत्तिकताय, विसदजाणताय च समूहकिच्चारम्मणघनं भिन्दित्वा सम्मदेव अनत्तलक्खणं विभावेन्ती “**सुज्जतं विमोक्खमुखं**”न्ति वुत्ता ।

तथा कायवेदनानुपस्सना विसेसतो दुक्खलक्खणं विभावेन्ती, चित्तानुपस्सना अनिच्चलक्खणं, धम्मानुपस्सना

अनत्तलक्खणन्ति ता यथाक्कमं “अप्पणिहितादिविमोक्खमुखं”न्ति वुत्ता ।

सप्पीतिकताय अस्सादानि पठमदुतियज्झानानि विरज्जनवसेन विसेसतो दुक्खतो पस्सन्तिया विपस्सनाय वसेन “अप्पणिहितं विमोक्खमुखं”न्ति वुत्तानि । ततियं सन्तसुखताय बाहिरकानं निच्चाभिनिवेसवत्थुभूतं सभावतो “अनिच्चं”न्ति पस्सन्तिया विपस्सनाय वसेन “अनिमित्तं विमोक्खमुखं”न्ति वुत्तं । चतुत्थं उपक्किलेसविगमादीहि परिसुद्धं सुसमाहितं यथा परेसं, एवं अत्तनो च यथाभूतसभाववबोधहेतुताय सम्मदेव “सुज्जं”न्ति पस्सन्तिया विपस्सनाय वसेन “सुज्जतं विमोक्खमुखं”न्ति वुत्तं ।

एवं विहारानं विपस्सनावसेनेव विमोक्खमुखता, तत्थ “दिब्बब्रह्मविहारानं सन्तसुखताय अस्सादनीयता”तिआदिना अप्पणिहितविमोक्खमुखता योजेतब्बा । अरियविहारस्स पज्जाधिकत्ता विसेसतो अनत्तानुपस्सनासन्निस्सयताय सुज्जतविमोक्खता । आनेज्जविहारस्स सन्तविमोक्खताय अनिच्चलक्खणपटिवेधस्स विसेसपच्चयसभावतो अनिमित्तविमोक्खमुखता योजेतब्बा ।

तथा पुरिमानं द्विन्नं सम्मप्यधानानं संकिलेसविसयत्ता किलेसदुक्खवीतिककमस्स दुक्खानुपस्सनाबाहुल्लत्ता अप्पणिहितविमोक्खमुखता । ततियस्स अनुप्यन्नकुसलुप्पादनेन धम्मानं उदयवयवन्तताविभावनतो अनिच्चलक्खणं पाकटन्ति अनिमित्तविमोक्खमुखता । चतुत्थस्स उप्यन्नानं ठितत्तं ब्यापारापज्जनेन धम्मानं अवसवत्तितादीपनतो अनत्तलक्खणं सुपाकटन्ति सुज्जतविमोक्खमुखता ।

मानप्पहानालयसमुग्धातानं सहायतण्हापहानताय तण्हापणिधिविसोधनतो अप्पणिहितविमोक्खमुखता । अविज्जापहानस्स पज्जाकिच्चाधिकताय सुज्जतविमोक्खमुखता । भवूपसमस्स सङ्खारनिमित्तपटिपक्खताय अनिमित्तविमोक्खमुखता ।

पकतिया दुक्खसभावे सङ्खारे जाणसच्चेन अविसंवादेन्तो दुक्खतो एव पस्सति, चागाधिविमुत्तताय तण्हं विदूरीकरोन्तो रागप्पणिधिं विसोसेतीति पुरिमं अधिद्वानद्वयं “अप्पणिहितं विमोक्खमुखं”न्ति वुत्तं । इतरस्स पन अधिद्वानद्वयस्स सुज्जतानिमित्तविमोक्खमुखता वुत्तनया एव ।

छन्दाधिपतेय्या चित्तेकगता विसेसतो धम्मच्छन्दवतो नेक्खम्मवितक्कबहुलस्स होति, वीरियाधिपतेय्या पन कामवितक्कादिके विनोदेन्तस्साति तदुभयं निस्साय पवत्ता विपस्सना विसेसतो रागादिप्पणिधीनं विसोसनतो “अप्पणिहितं विमोक्खमुखं”न्ति वुत्ता । चित्ताधिपतेय्यं, वीमंसाधिपतेय्यञ्च निस्साय पवत्ता यथाक्कमं अनिच्चानत्तानुपस्सनाबाहुल्लतो “अनिमित्तं विमोक्खमुखं, अप्पणिहितं विमोक्खमुखं”न्ति च वुत्ता ।

अभिज्झाविनयनो इन्द्रियसंवरो, कामसङ्कप्पादिविनोदनो तपो च वुत्तनयेनेव पणिधिपटिपक्खतो अप्पणिहितं विमोक्खमुखं, बुद्धि अनत्तानुपस्सनानिमित्तं, उपधिपटिनिस्सगो निमित्तगाहपटिपक्खोति तदुभयसन्निस्सया विपस्सना यथाक्कमं “सुज्जतं, अनिमित्तं विमोक्खमुखं”न्ति वुत्ता ।

आसन्नपच्चत्थिकरागं पटिबाहन्ती मेत्ता रागपणिधिया पटिपक्खो, करुणा परदुक्खापनयनाकारवुत्तिका दुक्खसहगताय दुक्खानुपस्सनाय विसेसपच्चयोति तदुभयसन्निस्सया विपस्सना “अप्पणिहितं विमोक्खमुखं”न्ति वुत्ता ।

मुदिता सत्तानं मोदग्गहणबहुला तदनिच्चतादस्सनतो अनिच्चानुपस्सनाय विसेसपच्चयोति तन्निस्सया विपस्सना अनिमित्तं विमोक्खमुखं। उपेक्खा जाणकिच्चाधिकताय अनत्तानुपस्सनाय विसेसपच्चयोति तन्निस्सया विपस्सना “सुज्जतं विमोक्खमुख”न्ति वुत्ताति एवमेत्थ पवत्तिआकारतो विपस्सतो निस्सयतो, किच्चतो च भिन्दित्वा विमोक्खमुखानि योजितानीति।

समतिक्कमनं परिज्जापहानज्ज। सपरसन्तानेति अत्तनो, परेसज्ज सन्ताने, तेन कायिको, वाचसिको च विहारो “विककीळित”न्ति वुत्तोति दस्सेति “विविधो हारो”ति कत्वा। तस्स पन विभावना इध अधिप्पेता नयस्स भूमिभावतो। येन पटिपक्खभावेन। तेसं पटिपक्खभावोति तेसं आहारादीनं पटिपक्खभावो पहातब्बभावो पटिपदादीनं पटिपक्खभावो पहायकभावोति योजेतब्बं। तत्थ पटिपदाग्गहणेन विपस्सना कथिता। विपस्सना च चत्तारो आहारे परिजानन्ती तप्पटिबद्धछन्दरागं पजहतीति उज्जुमेव तेसं पटिपक्खता, एवं झानादीनम्पि उपादानादिपटिपक्खता वेदितब्बा तदुपदेसेन विपस्सनाय कथितत्ता। विपल्लाससतिपट्टानानं पटिपक्खभावो पाकटो एव। न्ति सीहविककीळितं। वीसतिया चतुक्केहि विसभागतो वित्थारेन विभत्तन्ति तीहि पदेहि सङ्गहेत्वा कथिकत्ता वुत्तं “सङ्खेपेन दस्सेन्तो”ति।

इन्द्रियानन्ति सद्धादिइन्द्रियानं। दसन्नं चतुक्कानं निद्धारणाति योजना।

८८. निग्गच्छतीति निक्खमति। ततो निद्दारेत्वा वुच्चमानो हि निग्गच्छन्तो विय होतीति। चत्तारो पुग्गलेति “तण्हाचरितो मन्दो”तिआदिना (नेत्ति० ६) वुत्ते चत्तारो पुग्गले। पुग्गलाधिद्वानेन चेत्य धम्मो वुत्तोति आह “भूमिं निद्विसित्वा”ति। ततो एवाति यथावुत्तपुग्गलचतुक्कतो एव। इतरत्थापीति “सुखाय...पे०... पुग्गला”ति एत्थापि। साधारणायाति पठमचतुत्थाहिपि विमिस्साय। यथावुत्तासूति दुतियततियासु।

हेट्ठाति देसनाहारविभङ्गविचयहारसम्पातवण्णनासु।

एसेव नयोति कुसलमूलादिद्वादसतिकसङ्गहो अनवज्जपक्खो। “वोदायति सुज्झति एतेनाति वोदान”न्ति (नेत्ति० अट्ठ० ११) वं नेतब्बतं सन्धायाह।

यथा हारउद्देसो कतो, एवं नयानं अकरणे कारणं, पयोजनज्ज विभावेतुकामो “कस्मा पना”तिआदिमाह। नयेहि नयन्तरेहि। सम्भवदस्सनत्थन्ति उपपत्तिदस्सनत्थं। तत्थ सम्भवो अनुद्देसक्कमेन निद्विसने करणं दस्सनं पयोजनं। यदि हि इमे नया उप्पत्तिद्वानवसेन असंकिण्णा भवेय्युं, हारा विय उद्देसानुक्कमेनेव निद्विसितब्बा सियुं। तथा हि वुत्तं हारानं उद्देसावसाने “एते सोळस हारा पकित्तिता अत्थतो असंकिण्णा”ति (नेत्ति० १)।

यस्मा पनेते मूलपदेहि मूलपदन्तरनिद्धारणेन अज्जमज्जं ते निग्गच्छन्ति, तस्मा एकस्मिं निद्विट्ठे इतरोपि अत्थतो निद्विट्ठोयेव नाम होतीति इमस्स अत्थस्स दस्सनत्थं “उद्देसानुक्कमेन निद्वेसो न कतो”ति।

इदानी तमेव सङ्खेपेन वुत्तमत्थं वित्थारेन दस्सेतुं “पठमनयतो ही”तिआदि वुत्तं। तत्थ तण्हादिद्विचरितवसेन द्विधा पुग्गले विभजित्वा तेसं वसेन नन्दियावट्टनयं नीहरित्वा पुन ते एव तण्हादिद्विचरिते चतुप्पटिपदाविभागेन विभजित्वा सीहविककीळितस्स नयस्स सम्भवो दस्सितो, ते एव चतुप्पटिपदाभेदभिन्ने पुग्गले पुन उग्घटितज्जुआदिविभागेन तिधा विभजित्वा तिपुक्खलस्स नयस्स सम्भवो दस्सितो। तं सन्धायाह “पठमनयतो...पे०... निद्विट्ठो”ति।

यस्मा सुभसुखसज्जाहि लोभो, निच्चसज्जाय दोसो “इमिना मे अनत्थो कतो”ति आघातुप्पत्तितो, अत्तसज्जाय मोहो गहितो होति । तथा असुभसज्जादीहि अलोभादयो, तस्मा धम्माधिद्वानवसेन ततियनयतो दुतियनयस्स सम्भवो । यस्मा पन लोभे सति सम्भवतो लोभग्गहणेनेव दोसो गय्हति । लोभो च तण्हा, मोहो अविज्जा, तप्पटिपक्खतो अलोभादोसेहि समथो गय्हति, अमोहेन विपस्सना, तस्मा धम्माधिद्वानवसेनेव दुतियनयतो पठमनयस्स सम्भवोति इमं विसेसं दीपेतुं उद्देसानुक्कमेन निद्देसो न कतोति दस्सेन्तो “**धम्माधिद्वानवसेन पना**”तिआदिमाह ।

तेनेवाति ततियनयतो दुतियनयस्स विय दुतियनयतो पठमनयस्सपि सम्भवतो । एवं पाळियं पुग्गलाधिद्वानवसेन आगतं निस्साय अट्ठकथायं धम्माधिद्वानवसेनेव नयनिग्गमो निद्धारितोति अयमेव विसेसो । **यदि एवन्ति** पाळियं आगतप्पकारतो अज्जेनपि पकारेन नया निद्दारेतब्बा, एवं सन्ते यथा पुग्गलाधिद्वानवसेन पठमनयतो ततियनयस्स, ततियनयतो दुतियनयस्स सम्भवो दस्सितो, एवं धम्माधिद्वानवसेनेव पठमनयतो ततियनयदुतियनयानं, धम्माधिद्वानवसेनेव दुतियनयतो ततियनयस्स सम्भवो दीपेतब्बोति इममत्थमाह “**द्वे हुत्वा...पे... सिया**”ति ।

तत्थ नयोति पच्छा वुत्तदुतियनयो । **अत्थतो**ति अत्थापत्तितो, अत्थतो लब्भमानत्ता एव सरूपेन न कथितोति अत्थो । इदानीं तं अत्थापत्तिं एकन्तिकं कत्वा दस्सेतुं “**यस्मा**”तिआदि वुत्तं । **अनुप्पवेसो इच्छितो** तंतंनयमूलपदानं नयन्तरमूलपदेसु समवरुज्जनतो । तथा हि “यत्थ सब्बो अकुसलपक्खो सङ्गहं समोसरणं गच्छति, यत्थ सब्बो कुसलपक्खो सङ्गहं समोसरणं गच्छती”ति (नेत्ति० ३) च वुत्तं । **अयञ्च अत्थो**ति “नयानं अज्जमज्जअनुप्पवेसो निग्गमो”ति अयं दुविधो अत्थो । पिटकानं अत्थकथनं **पेटकं**, सो एव उपदेसोति **पेटकोपदेसो**, उपदेसभूता परियत्तिसंवण्णनाति अत्थो ।

आदितो पट्टायाति नयानं अज्जमज्जअनुप्पवेसनिग्गममत्तमेव अविभावेत्वा नयविचारस्स पठमावयवतो पभुति **विभावना** दीपना पकासना ।

दोसदिट्ठीति अप्पस्सादतादिदोसगाहिकदिट्ठी, दोसदस्सिनोति अत्थो । ते हि असमूहतानुसया, कामेसु च आदीनवदस्सिनो । इदञ्चि नेसं अङ्गद्वयं अत्तकिलमथानुयोगस्स कारणं वुत्तं । **नत्थि अत्थो**ति यो रागाभिभूतेहि अन्धबालेहि परिकप्पितो दिट्ठधम्मिको कामेहि अत्थो, सो मधुबिन्दुगिद्धस्स मधुलित्तसत्थधारावलेहनसदिसो अप्पस्सादो बहुदुक्खो बहुपायासो बहुआदीनवो सविघातो सपरिळाहो सम्परायिको तथेवाति सब्बदापि विज्जूजातिकस्स कामेहि पयोजनं न विज्जति । **अनज्झोसिता**ति अनभिभूता विहरन्ति । **तेन वुच्चति सुखा पटिपदा**ति तेन मन्दकिलेसभावेन तेसं पुग्गलानं अकिच्छेन सिज्झमाना विपस्सना पटिपदा “सुखा पटिपदा”ति वुच्चति । **अज्झोसिता**ति अभिनिविट्ठा । **इमे सब्बे सत्ता**ति इमे तण्हादिट्ठिचरितभावेन द्विधा वुत्ता अपरिमाणप्पभेदा सब्बेपि पटिपज्जन्ता सत्ता ।

सुखेन पटिनिस्सज्जन्तीति किलेसे अकिच्छेन पजहन्ति । “**इमा चतस्सो पटिपदा**”तिआदि पटिपदानं एत्तावतायं, विसयभावकिच्चेसु च व्यभिचाराभावदस्सनं । **अयं पटिपदा**ति निगमनं, अयं पटिपदा याय वसेन सीहविक्कीळितस्स नयस्स भूमिदस्सनत्थं चत्तारो पुग्गला निद्धारिताति अधिप्पायो । **चतुक्कमग्गेन किलेसे निदिसती**ति अनन्तरं वक्खमानेन आहारादिचतुक्कमग्गेन दसवत्थुके किलेससमूहे निदिसति । **चतुक्कमग्गेन अरियधम्मेषु निदिसितब्बा**ति तप्पटिपक्खेन पटिपदादिचतुक्कमग्गेन अरियधम्मेषु बोधिपक्खियेसु विसयभूतेसु निद्दारेत्वा कथेतब्बा ।

इदञ्च पमाणं चत्तारो आहाराति इमेसं विपल्लासानं पवत्तिया पमाणं, यदिदं चत्तारो आहारा । इदं वुत्तं होति —

यावदेव चत्तारो आहारा परिज्जं न गच्छन्ति, तावदेव चत्तारो विपल्लासे विभजन्ति । यावदेव चत्तारो विपल्लासा अप्पहीना, तावदेव चत्तारि उपादानानि परिबूहन्तीति । एवं सब्बत्थ यथारहं वत्तब्बं । तेनाह “एवं इमानि सब्बानि दस पदानि”ति । “योजेतब्बानी”ति च वचनसेसो ।

“अभिज्झाय गन्थती”ति इमिना अभिज्झायनमेव गन्थनन्ति दस्सेति । एस नयो सेसेसुपि । पपञ्चेन्तोति दिट्ठाभिनिवेसं वित्थारेन्तो ।

विप्पटिसारुप्पत्तिहेतुभावो किलेसानं आसवनन्ति आह “आसवन्ती”ति । किं विप्पटिसाराति तेन किलेसानं वीतिक्कमवत्थुं वदति । यस्मा अप्पहीनानुसयस्सेव विप्पटिसारा, न इतरस्स, तस्मा “ये विप्पटिसारा, ते अनुसया”ति वुत्तं । पदद्वयेनपि फलूपचारेन कारणं वुत्तं ।

पठमेन पदेनाति यथावुत्तेसु दससु सुत्तपदेसु पठमेन पदेन । पठमाय दिसायाति तदत्थसङ्घाताय सीहविककीळितस्स संकिलेसपक्खे पठमाय दिसाय ।

इतीति एवं, वुत्तनयेनाति अत्थो । कुसलाकुसलानन्ति यथावुत्तअनवज्जसावज्जधम्मानं । पक्खपटिपक्खवसेनाति वोदानपक्खतप्पटिपक्खवसेन । योजनाति पठमदिसादिभावेन युत्ते कत्वा मनसानुपेक्खना । “मनसा वोलोक्कयते”ति (नेत्ति० ४) हि वुत्तं ।

तस्साति दिसालोकनस्स । सोतापत्तिफलादीनं परियोसानता इन्द्रियवसेन वेदितब्बा । येसज्हि सद्भादीनं इन्द्रियानं वसेन सतिपट्ठानादीनि सिज्जन्ति, तेसं वसेन सोतापत्तिफलादीनं परियोसानता । तत्थ सोतापत्तिफले सद्भिन्द्रियं पारिपूरिं गच्छति । सोतापन्नो हि सद्भाय परिपूरिकारी । सकदागामिफले वीरियिन्द्रियं पारिपूरिं गच्छति । सकदागामी हि आरद्धवीरियो उपरिमग्गाधिगमाय । अनागामिफले समाधिन्द्रियं पारिपूरिं गच्छति । अनागामी समाधिस्मिं परिपूरिकारी । अगगफले अरहत्ते सतिन्द्रियज्च पज्जिन्द्रियज्च पारिपूरिं गच्छति । अरहा हि सतिवेपुल्लप्पत्तो, पज्जावेपुल्लप्पत्तो चाति ।

अपरे पनाहु — सद्भाबलेन सुभसज्जाय पहानं । सद्दहन्तो हि पटिक्कूलमनसिकारे कम्मं करोति । वीरियबलेन सुखसज्जाय पहानं । वीरियवा हि सुखस्सादं अभिभवित्वा योनिमोमनसिकारमनुयुज्जति । समाधिबलेन निच्चसज्जाय पहानं । समाहितो हि सङ्खारानं उदयब्बयं परिग्गणहन्तो अनिच्चसज्जं पटिलभति । पज्जाबलेन अत्तसज्जाय पहानं । पज्जवा हि सङ्खारानं अवसवत्तितं सल्लक्खेन्तो अत्तसुज्जतं पटिविज्जति । सति पन सब्बत्थापि इच्छितब्बा । तेनाह “सतिं च ख्वाहं, भिक्खवे, सब्बत्थिकं वदामी”ति (सं० नि० ५.२३४; मि० प० २.१.१३) । एवं चतुविपल्लासप्पहायीनं चतुन्नं इन्द्रियानं पारिपूरिद्वानं चत्तारि सामज्जफलानि चतुविपल्लासमुखानं चतुन्नं दिसानं परियोसानानि वुत्तानीति ।

“लोभो अकुसलमूल”न्तिआदि लोभादीनं हेतुफलभावेन सम्पयुत्तताय दस्सनं ।

तत्थ मनापिकेनाति येभुय्यवसेन वुत्तं । अमनापिकेनापि हि आरम्मणेन विपरियेसवसेन लोभो उप्पज्जति । मनापिकेनाति वा मनापिकाकारेन । फस्सवेदनूपविचाररागवितक्कपरिळाहा सहजातापि लब्भन्ति, असहजातापि । “उप्पादो”ति एतेन उप्पज्जमानसङ्खारग्गहणन्ति “उप्पज्जती”ति वुत्तं । उप्पादलक्खणस्सेव पन गहणे “उप्पज्जती”ति न वत्तब्बं सिया । न हि उप्पादो उप्पज्जति, रागजपरिळाहहेतुकता च तेसं रागस्स तण्हासभावत्ता । तण्हा हि दुक्खस्स समुदयो,

यं किञ्चि समुदयधम्मं, सब्बं तं दुक्खन्ति । तथा च वुत्तं “तण्हासहजातवेदनाय पन लोभो सहजातादिपच्चयेहि च पच्चयो”ति । एवं इट्ठारम्मणे उप्पन्नलोभसहगतसुखवेदनाय उदयो इध “उप्पादो सङ्खतलक्खण”न्ति वुत्तो, तस्सा विपरिणामो “विपरिणामदुक्खता”ति । विपरिणामावत्था च उदयावत्थं विना न होतीति सा तं निस्साय उप्पज्जन्ती विय वुत्ता “उप्पादं...पे०... दुक्खता”ति ।

दोसो अकुसलमूलन्ति आदीसुपि वुत्तनयानुसारेण अत्थो वेदितब्बो । अयं पन विसेसो — ठितस्स अज्जथत्तं नाम जरा, तं निस्साय दोमनस्सस्स उप्पज्जनतो वुत्तं “ठितस्स...पे०... दुक्खदुक्खता”ति । दोसजपरिळाहहेतुकता जराय दोसबहुलस्स पुगलस्स नचिरेण जीरणतो वेदितब्बा ।

वयोति सङ्खारानं निरोधो । अनिच्चतावसेन च सङ्खतधम्मानं सङ्खारदुक्खताति वुत्तं “वय...पे०... सङ्खारदुक्खता”ति । तेनाह भगवा “यदनिच्चं तं दुक्ख”न्ति (सं० नि० ३.१५, ४५, ७६; पटि० म० २.१०) । मोहजपरिळाहहेतुकता वयलक्खणस्स येभ्य्येण सम्मोहनिमित्तत्ता, मरणस्स अविज्जापच्चयत्ता च संसारप्पवत्तिता वेदितब्बा ।

अलोभादीनं पज्जादिपारिपूरिहेतुकता यथारहं उपनिस्सयकोटिसहजातकोटिया च पच्चयभावेन वेदितब्बा । सब्बे हि कुसला धम्मा सब्बेसं कुसलानं धम्मानं यथासम्भवं पच्चयविसेसा होन्ति एवाति । अब्बापादवितक्कसन्निस्सयो उपविचारो अब्बापादूपविचारो । अविहिंसूपचारेपि एसेव नयो ।

अयं तिपुक्खलो नाम दुतियो नयो सद्धिं दिसालोकनयेन निद्विट्ठोति वचनसेसो । “इमे चत्तारो”ति आदि पुगलाधिद्वानेनेव नन्दियावट्टस्स नयस्स भूमिदस्सनेन आरद्धं । इमे यथावुत्तपटिपदाचतुक्कस्स वसेन चतुब्बिधा । विसेसेनाति दिट्ठितण्हासन्निस्सयताविसेसेन । दिट्ठिचरितो हि तिक्खपज्जो, मन्दपज्जो च सुखाय पटिपदाय खिप्पाभिज्जाय च दन्धाभिज्जाय च निय्यातीति द्विधा वुत्तोति । तथा तण्हाचरितो दुक्खाय पटिपदाय खिप्पाभिज्जाय च दन्धाभिज्जाय च निय्यातीति द्विधा वुत्तोति दस्सितो चायमत्थो । तेनाह “द्वे होन्ति दिट्ठिचरितो च तण्हाचरितो चा”ति ।

चत्तारो हुत्वाति सीहविककीळितस्स नयस्स भूमिदस्सने चत्तारो हुत्वा ठिता, चतुप्पटिपदावसेन चत्तारो कत्वा वुत्ताति अत्थो । तयो होन्तीति तिपुक्खलस्स नयस्स भूमिदस्सने उग्घटितज्जुआदिवसेन तयो भवन्ति । तयो हुत्वाति तथा तयो हुत्वा ठिता तयो कत्वा कथिता । द्वे होन्तीति इदानीं नन्दियावट्टस्स नयस्स भूमिदस्सने द्वे भवन्ति । अज्झोसानन्ति दिट्ठिअज्झोसानं । अभिनिवेसोति तण्हाभिनिवेसो । अहंकारोति अहंमानो “अह”न्ति वा करणं अहंकारो । दिट्ठिमानमज्जनानं वसेन “अहमस्मी”ति समनुपस्सना ममंकारो, ममायनं तण्हाग्गाहो ।

दसपदानि “पठमा दिसा”ति कातब्बानीति नन्दियावट्टस्स नयस्स “पठमा दिसा”ति करणीयानि, “पठमा दिसा”ति ववत्थपेतब्बानीति अत्थो । संखित्तेन...पे०... पक्खस्साति अनेकप्पभेदस्सपि कण्हपक्खस्स संकिलेसपक्खस्स अत्थं संखित्तेन सङ्खेपेन पटिपक्खे वत्तमाने वोदानधम्मे उद्विस्स जापेन्ति पकासेन्ति, पठमा कातब्बाति योजना । दस पदानि दुतियकानीति तण्हादिका दस कोट्टासा “दुतिया दिसा”ति कातब्बा । “संखित्तेन...पे०... कण्हपक्खस्सा”ति आनेत्वा योजेतब्बं ।

योनिस्सोति उपायसो । योनिस्सो मनसिकारो अनिच्चादिवसेन पठममनसिकारो । पज्जाति सुतचिन्तामयी पज्जा, ज्ञानाभिज्जा च । निब्बिदाति निब्बेधजाणं । सोमनस्सधम्मूपसज्झितं पमोदादिसहगतं चेतसिकसुखं ।

कुसलपक्खे चाति च-सद्धो समुच्चयत्थो, तेन उभयपक्खतो समुच्चयवसेन चतस्सो दिसा, न पच्चेकन्ति दस्सेति ।

तेसन्ति तण्हादीनं, तण्हाय, तण्हापक्खिकानञ्चाति अत्थो । सतिपि अनवसेसतो रागे पहीयमाने अनवसेसतो अविज्जापि पहीयतेव, रागस्स पन चेतोविमुत्ति उजुपटिपक्खोति दस्सनत्थं “रागविरागा”ति वुत्तं । अविज्जाविरागाति एत्थापि एसेव नयो । अयञ्च अत्थो “आसवानं खया अनासवं चेतोविमुत्तिं पञ्जाविमुत्ति”न्तिआदिना (म० नि० १.४३८) आगतपाळिया अत्थवण्णनावसेन वुत्ता, इध पन “रागविरागा चेतोविमुत्ति सेक्खफलं, अविज्जाविरागा पञ्जाविमुत्ति असेक्खफल”न्तिआदिना (नेत्ति० ५१) वेवचनसमारोपने आगतत्ता पुरिमा अनागामिफलं । तज्झि कामरागस्स उजुविपच्चनीकतो समाधिपारिपूरियाव विसेसतो “रागविरागा चेतोविमुत्ती”ति वुच्चति, पच्छिमा अरहत्तफलं तण्हाय, अविज्जाय च अनवसेसप्पहानतो, पञ्जापारिपूरिया च “अविज्जाविरागा पञ्जाविमुत्ती”ति वुच्चति ।

तत्थाति नन्दियावट्टनये । तेसूति “चत्तारि पदानी”ति वुत्तेसु तण्हादीसु चतूसु मूलपदेसु । इध समोसरणन्ति सङ्गहो वुत्तो, सो च सभावतो, सभागतो च होतीति तण्हादीनि चत्तारि दस्सेत्वा “तेसु अट्टारस मूलपदानि समोसरन्ती”ति वुत्तं । समथं भजन्ति सभावतो, सभागतो चाति अधिप्पायो । विपस्सनं भजन्तीति एत्थापि एसेव नयो । नयाधिद्वानानं नयाधिद्वाने अनुप्पवेसो नयानं नयेसु अनुप्पवेसो एव नाम होतीति आह “तिपुक्खलो...पे०... अनुप्पविसन्ती”ति ।

अलोभामोहपक्खं अभजापेत्वा अदोसपक्खं भजापेतब्बस्स नन्दियावट्टसीहविककीळितमूलपदस्स अभावतो अदोसो एकसुत्तकोटिया एककोव होतीति दस्सेन्तो आह “अदोसो अदोसो एवा”ति । दोसो दोसो एवाति एत्थापि एसेव नयो । समोसरन्ति सभागतो च सभावतो च सङ्गहं गच्छन्तीति अत्थो ।

भूमि गोचरोति च मूलपदानि एव सन्धाय वदति । एकेकं नयं अनुप्पविसति तंतंमूलपदानुप्पवेसतो । कुसले वा विज्जाते अकुसलो पटिपक्खो, अकुसले वा कुसलो पटिपक्खो अन्वेसितब्बो संवण्णियमानसुत्तपदानुरूपतो उपपरिक्खितब्बो । अन्वेसना उपपरिक्खा “दिसालोकन”न्ति वुच्चति । सो नयो निद्विसितब्बोति तथा अन्वेसित्वा तेहि धम्मोहि दिसा ववत्थपेत्वा सो सो नयो निद्वारेत्वा योजेतब्बो । यथा मूलपदेसु मूलपदानं अनुप्पवेसो संवण्णितो, इमिनाव नयेन मूलपदतो मूलपदानं निद्वारणाति वेदितब्बाति दस्सेन्तो “यथा एकम्हि...पे०... निद्विसितब्बानी”ति आह । “एकेकस्मिञ्ही”तिआदि कारणवचनं ।

तत्थ तत्थाति एकेकस्मिं नये । एकस्मिं धम्मे विज्जातेति तण्हादिके एकस्मिं मूलपदधम्मे सरूपतो, निद्वारणवसेन वा विज्जाते । सब्बे धम्मा विज्जाता होन्तीति तदञ्जमूलपदभूता सब्बे लोभादयो विज्जाता नयस्स भूमिचरणायोग्यताय पकासा पाकटा होन्ति । “इमेस”न्तिआदि नयत्तयदिसाभूतधम्मानं मत्थकपापनेन तिण्णं नयानं कूटग्गहणं, तं हेट्ठा वुत्तनयमेव ।

पुन “इमेसू”तिआदि कम्मनयद्वयस्स विभागविभावनं, तं विज्जेय्यमेव ।

नयसमुद्धानवारवण्णना निद्विता ।

सासनपट्टानवारवण्णना

८९. सङ्गहवारादीसूति सङ्गहवारउद्देसनिद्देसवारेसु । सरूपतो न दस्सितं, अत्थतो पन दस्सितमेवाति अधिप्पायो । तमेव हि अत्थतो दस्सनत्थं उदाहरणभावेन निक्खिपति, यथा मूलपदेहि पट्टानं निद्धारेतब्बन्ति । “अञ्जमञ्जसङ्गहो”ति इदं मूलपदपट्टानानं अञ्जमञ्जतो निद्धारेतब्बताय कारणवचनं “सति अनुप्पवेसे ततो विनिग्गामो सिया”ति । पट्टानन्ति एत्थ प-इति उपसगगपदं, तं पन “विभत्तेसु धम्मेसु यं सेट्ठं, तदुपागमु”न्तिआदीसु विय पकारत्थजोतकन्ति दस्सेन्तो “पकारेहि ठान”न्तिआदीसु विय पकारत्थजोतकन्ति दस्सेन्तो “पकारेहि ठान”न्ति आह । इधाति इमस्मिं नेत्तिप्पकरणे । तस्साति देसनासङ्घातस्स परियत्तिसासनस्स । तथाभावदीपनन्ति वेनेय्यज्झासयानुरूपेन पवत्तितत्ता संकिलेसभागियतादिप्पकारेहि ठितभावेन दीपेतब्बत्ता “दीपिस्सतीति दीपन”न्ति कत्वा । पतिट्ठहन्ति अधिशीलसिक्खादयो समुदायरूपेण गहिता । एतेहि संकिलेसधम्मादीहि, संकिलेसधम्मादीनं अधिशीलसिक्खादीनं पवत्तनुपायता अनुपुब्बिकथाय सामुक्कंसिकाय धम्मदेसनाय दीपेतब्बा । तेसन्ति संकिलेसधम्मादीनं । पुन तेसन्ति सुत्तानि सन्धायाह ।

गोट्ठाति वजा । पट्टितगावोति गतगावो । आगतट्टानस्मिन्ति सीहनादसुत्तं (म० नि० १.१५६) वदति । पवत्तगमनत्ता एत्थाति वचनसेसो । अथ वा गच्छति एत्थाति गमनं, देसनाजाणस्स निस्सङ्गवसेन पवत्तगमनदेसभावतो पट्टानं नामाति अत्थो । वोमिस्साति “संकिलेसभागियञ्च वासनाभागियञ्चा”तिआदिना दुकतिकचतुक्कभावेन मिस्सिता ।

संकिलेसभावे जापेतब्बे पवत्तं, तं विसयं कत्वा देसितन्ति अत्थो, अत्थमत्तवचनञ्चेत्तं, संकिलेसभागे भवन्ति सहनयेन अत्थो वेदितब्बो । “संकिलेसभागिक”न्तिपि पाठो, तस्स संकिलेसभागो एतस्स अत्थि, संकिलेसभागे वा नियुत्तं, संकिलेसभागस्स वा पबोधनसीलं संकिलेसभागिकं, तदेव संकिलेसभागियन्ति अत्थो वेदितब्बो । पदालनं समुच्छिन्दनं, पदालनसन्निस्सयता चेत्य पदालनगगहणेन गहिताति दट्ठब्बं । असेक्खेति असेक्खधम्मे । तेसं वोमिस्सकनयवसेनाति तेसं संकिलेसभागियादीनं चतुन्नं पटिक्खेपापटिक्खेपवोमिस्सकनयवसेन ।

“तानि पन छ दुका”तिआदिना पदानं गहणपरिच्छेदतो ववत्थापनतं वत्वा परतो “साधारणानि कतानी”ति पदस्स अत्थसंवण्णनाय सयमेव सरूपतो दस्सेस्सति । “अनुद्धरणे कारणं नत्थी”ति वत्वा उद्धरणे पन कारणं दस्सेन्तो “तथा हि वक्खती”तिआदिना पाळिमाहरि । वोदानं नाम संकिलेसतो होति संकिलिट्ठस्सेव वोदानस्स इच्छितत्ता । यस्मा वोदानं तदङ्गादिवसेन संकिलेसतो विसुज्जनं, तस्मा “तं पन अत्थतो वासनाभागियादि एव होती”ति वुत्तं । तत्थ तदङ्गविक्खम्भनेहि वोदानं वासनाभागियादिवसेन होति, समुच्छेदपटिप्पस्सद्धीहि वोदानं निब्बेधभागियवसेन, असेक्खभागियवसेन वोदानं पटिप्पस्सद्धिया एव वेदितब्बं । यायं देसना रागादिभागिनी सिया, सा संकिलेसभागिया । यायं देसना चागादिभागिनी सिया, सा वासनाभागिया । या पन आपत्तिविच्छेदनी सावसेसं, अनवसेसञ्च, सा निब्बेधभागिया, असेक्खभागिया च ।

“तण्हासंकिलेसभागियं सुत्त”न्तिआदिना पठममेव संकिलेसभागस्स दस्सितत्ता वुत्तं “संकिलेसो तिविधो...पे०... विसयदस्सनत्थं आरब्ध”न्ति । भवरागो भवपत्थना । उप्पज्जतीति न विगच्छति । तत्र तत्र भवेति यदि वा कामभवे, यदि वा रूपभवे, यदि वा अरूपभवे । पदन्तरसंयोजनवसेनाति दुकनयेनेव पदन्तरेण योजनवसेन । मिस्सितानि कतानीति संसट्टानि कतानि ।

एककचतुक्कवसेन दस्सितब्बानि पदानि एव गहेत्वा आवुत्तिनयदस्सनवसेन मिस्सेत्वा अवसिट्ठदुकवसेन, तिकचतुक्कवसेन च इतरे अट्ठ पट्टानभागा दस्सिताति आह “तानियेव यथावुत्तानि अट्ठ सुत्तानी”तिआदि । चत्तारो

एककायेव पाळियं आदितो दस्सिता । छट्ठका पाळियं आगता चत्तारो, अट्ठकथायं द्वेति । चत्तारो तिका पाळियं आगता द्वे, अट्ठकथायं द्वेति । द्वे चतुक्का पन अट्ठकथायमेव आगता । “पाळियं अनागता”ति इदं सरूपतो अनागमनं सन्धाय वुत्तं, नयतो पन आगतभावो दस्सितो एव । ये पनेत्थ पाळियं अनागता, तेसं उदाहरणानि परतो दस्सयिस्साम ।

सोळसहीति सोळसविधेहि । न हि तानि सुत्तानि सोळसेव, अथ खो सोळसप्पकारानीति मूलगणनं ठपेत्वा कारणसुत्तलद्धेन सङ्खारगब्भेन तदनुरूपो यो गणनवित्थारो, तस्स पत्थरणविधि पट्टाननयो । इमिना...पे०... नत्थीति यथावुत्तपट्टानविनिमुत्तो परियत्तिसासनप्पदेसो न विज्जति यथारहं तंतंपट्टानभावेन पवत्तत्ताति दस्सेति । यदि सुत्तगेय्यादि नवविधं परियत्तिसासनं यथावुत्तपट्टानवसेनेव पवत्तं, तत्थ कथमिध अनिदस्सितानं गाथादीनं संकिलेसभागियादिभावो गहेतब्बोति पज्जं सन्धाय “गाथाय गाथा अनुमिनितब्बा”तिआदिपाळि पवत्ताति दस्सेतुं “कथं पना”तिआदि वुत्तं ।

तत्थ अयं गाथा वियाति “कामन्धा जालसज्जन्ना, मनोपुब्बङ्गमा धम्मा, उद्धं अधो सब्बधि विप्पमुत्तो, यस्स सेलूपमं चित्तं”न्तिआदिना इध उदाहटगाथा विय । गाथाति अज्जापि तेपिटके बुद्धवचने आगता इध अनुदाहटा । संवण्णनाकाले सम्मुखीभावेन “अयं गाथा विया”ति वुत्ता या काचि गाथा “संकिलेसभागिया”ति वा “संकिलेसवासनानिब्बेधअसेक्खभागिया”ति वा अनुमिनितब्बा नयग्गाहेन आपेतब्बाति दस्सेतुं वुत्तं “संकिलेस...पे०... जानितब्बाति अत्थो”ति । वा-सदो हि इध अवुत्तविकप्पनत्थो । सेसपदेसूति वेय्याकरणसुत्तपदेसु ।

९०. अरियानं धम्मन्ति चारित्तवारित्तभेदं सीलाचारं । एकन्तकरणीयस्स अकरणम्पि वीतिक्कमो एव ।

अविज्जादिके संकिलेसधम्मे तदङ्गादिवसेन धुनातीति धोना वुच्चति पज्जा । पच्चवेक्खित्वा परिभुज्जनपज्जाति पन पकरणेन अवच्छिन्नत्ता वुत्तं । तं अतिक्कमित्वा चरन्तोति पच्चयानं अपच्चवेक्खित्वा पच्चयपरिभोगे आदीनवं अपस्सन्तो इणपरिभोगवसेन परिभुज्जन्तो न परिमुच्चति निरयादिदुक्खतो, वट्टदुक्खतो च ।

कुक्कुजनकं नाम कदलिया पुप्फनाळि । पराभवायाति विनासाय । तथाति यथा फलपाकन्ता कदली, एवं वेळुनळापि ओसधिजातिकत्ताति उपसंहारत्थो तथा-सदो । तेनाह “फलं वेळुं फलं नळ”न्ति ।

सुखेत्तेपीति पि-सद्देन को पन वादो ऊसरादिदोसदुट्ठेसु खेत्तेसूति दस्सेति । “छकण...पे०... अत्थो”ति एतेन यथावुत्तअभिसङ्खरणाभावेन बीजदोसदुट्ठन्ति दस्सेति ।

९१. सज्जितन्ति सज्जितं । अपरिक्खतेति पटिपक्खेहि धम्मोहि अविक्खम्भिते अरोगे ।

याय समन्नागतो पुग्गलो “किं सुतं मया, किं वा सुणामी”ति कुसलं गवेसी चरति, सा धम्मोजपज्जा किस्सवा नाम । दुब्भासिताति दुट्ठ भासिता, इस्सामच्छरियदोसादीहि दुट्ठा वा भासिता ।

९२. विचिनातीति विसेसतो चिनाति पसवति ।

विगतभूताति विगतसच्च । तेनाह “अलीकवादी”ति ।

अवजातपुत्ताति लामकपुत्त । भगवतो सासने पब्बजित्वा निहीनवुत्तितं सन्धाय वदति । नेरयिकोति निरये

निब्वत्तनको । पापकम्मिनो पपतन्ति एत्थाति **पपतं**, नरकं ।

तण्हादीनं सभावभेदतोति तण्हादिद्विदुच्चरितानं तण्हायनविपरीतदस्सनदुडुच्चरितासङ्घातसभावविभागतो ।
अवत्थाभेदतोति तण्हाय छन्दपेमलोभरागनन्दीपिपासामुच्छादयो, दिट्ठिया
 गाहपरामासमिच्छाभिनिवेसविसुकविप्फन्दितविपरीतदस्सनादयो, दुच्चरितस्स तिरच्छानपेत्तिविसयअसुरयोनिगामितादयो
 अवत्थाविसेसा । **च**-सद्देन तेसं कामतण्हादिरूपतण्हादिअत्तानुदिट्ठादिसस्सतगाहादिकायदुच्चरितादि-
 पाणातिपातादिप्पकारभेदो सङ्गहति ।

१३. विपुलन्ति उळारं, तेलादीहि चेष धनधज्जादीहि च पहूतसन्निचयन्ति अत्थो । **सम्बाधा**ति जनसंमदसङ्घटा ।

दण्डेन न हिंसतीति एत्थ वुत्तं यं दण्डनिधानं, तं वट्टविवट्टनिस्सितं । तदुभयस्सापि फलं दस्सेन्तो “**सो पुग्गलो**”तिआदिमाह ।

१४. किञ्चित् तंसमङ्गिनं विमदतीति **किञ्चनं**, रागादि, पलिबुन्धति कुसलप्पवत्तिं निवारेतीति **पलिबोधो**,
 रागादियेव, किञ्चनमेव पलिबोधो **किञ्चनपलिबोधो** । अथ वा किञ्चनञ्च पलिबोधो च **किञ्चनपलिबोधो**,
 आमिसकिञ्चिक्खञ्च रागादिसंकिलेसो चाति अत्थो ।

विसेसितन्ति विलोमं, विसमं किरियन्ति अत्थो । **राजभण्डन्ति** ओरोधे सन्धाय वदन्ति ।

याचयोगोति याचनयोगो, याचकानं मनोरथपरिपूरणतो । तेनाह “**याचितब्बयुत्तो**”ति । **दानयुत्तो**ति सततं
 दानकिरियासमङ्गी । **दानसंविभागरतो**ति एत्थ **दानं** नाम अत्थिकानं यथाधिप्पायपटियत्तपरिच्चागो, **संविभागो** अत्तना
 परिभुज्जितब्बतो अप्पमत्तकतोपि संविभजनं । **इमेहि खो...पे०... होतीति** एत्थ होतिसद्देन “**समन्नागतो**”ति पदं
 सम्बन्धितब्बं, न “**सोतापन्नो**”ति दस्सेतुं “**सोतापन्नो...पे०... होती**”ति वुत्तं । तेहि धम्मोहि समन्नागमो हि इध विधीयति,
 न सोतापन्नभावो, तेन सोतापन्नलक्खणमेते धम्मा, न सोतापन्नभावलक्खणन्ति दस्सेति । तथा हि “**सोतापन्नेन...पे०...
 लब्भमानतं दस्सेती**”ति वुत्तं ।

१५. लपति कथेति एतेनाति **लपनं**, ओट्टुं ।

१७. मुदितोति दिब्बसम्पत्तिया पमुदितो ।

१९. किञ्चापि **उदतारी**ति तरणकिरिया अतीतभावेन वुत्ता, तरणमेव पन गहेत्वा आह “**ओघतरणस्स
 अरियमग्गकिच्चत्ता**”ति । एवं **विप्पमुत्तो**, **विमुत्तो**ति च एत्थ मुच्चनकिरियायपि वत्तब्बं ।

१००. पातु-सद्दपुब्बको **भवन्ति**-सद्दो सिया उप्पादपरियायो सिया आविभावपरियायोति “**पातुभवन्ती**”ति पदस्स
 “उप्पज्जन्ति, पकासेन्ति चा”ति अत्थो वुत्तो । **पातुभूतधम्मस्सा**ति उप्पन्नबोधिपक्खियधम्मस्स, विभूतचतुसच्चधम्मस्स
 वा । **नो कल्लो**ति न युत्तो । **सहेतुधम्मन्ति** एत्थ पच्चयुप्पन्नधम्माव गहिता, न पच्चयधम्माति? नयिदमेवं दट्ठब्बं
 पच्चयधम्मानम्पि पच्चयुप्पन्नभावानतिवत्तनतो । अथ वा **सहेतुधम्मन्ति** पच्चयुप्पन्नधम्मो पधानभावेन वुत्तो, पच्चयधम्मो
 पन गुणभावेनाति एवमेत्थ उभयेसं वुत्तभावो वेदितब्बो ।

आरञ्जकन्ति आरञ्जकङ्गसमन्नागतं । अञ्जातोति परिचयवसेन न जातो, असंसद्भोति अत्थो । तेनाह “निच्चनवो”ति ।

ब्यापादविहिंसवितक्कविरहे वेरिपरिसङ्काय अभावे अकित्तिपरिमुत्तीति एवमादीहिपि कारणेहि कोधप्पहानेन सुखं सुपति । कोधपरिळाहाभावो पन पाकटतरोति आह “कोध...पे०... सयती”ति । विसमूलस्साति एत्थ विससरिक्खताय “विस”न्ति दुक्खं अधिप्पेतन्ति आह “दुक्खविपाकस्सा”ति । सुखन्ति चेतसिकसुखं । अक्कुट्टस्स पच्चक्कोसित्वा च पच्चक्कोसनहेतु उप्पज्जतीति योजना ।

१०१. सल्लुब्बाहनं सल्लुद्धरणं ।

विसयभेदेन, पवत्तिआकारभेदेन च अनेकभेदत्ता कामसञ्जाय वुत्तं “याय कायची”ति ।

दानमुखेनाति दानेन मुखभूतेन, दानं पमुखं कत्वाति अत्थो ।

“अरियमग्गसम्पापनवसेना”ति इमिना अनुकम्पानुद्धानं एकन्तानवज्जतमेव विभावेति । “अनुकम्पा”ति पदस्सत्थविवरणं “करुणायना”ति, इतरस्स “मेत्तायना”ति ।

१०२. पकतिआदीति आदिसद्देन अणुइस्सरपजापतिपुरिसकालाधिद्वायकारिआदिके सङ्गण्हाति ।

कामेसूति कामगुणेसु रूपादिविसयेसु ।

बहलकिलेसतायाति बहुलकिलेसभावेन । पुब्बहेतुमन्दतायाति विवडूपनिस्सयस्स कुसलस्स अकतत्ता ।

चित्तवूपसमभावनायाति चित्तवूपसमकरभावनाय समथविपस्सनाय ।

परिस्सया सीलादिपरिपूरणस्स परिबन्धभूता किलेसा एव । अनरिया पञ्जासीसं उक्खिपित्वा ठातुमेव न सक्कोन्तीति वुत्तं “जाणसिरेन अधोसिरा हुत्वा”ति ।

१०३. भगवतो, भिक्खुसङ्घस्स च वसनयोग्यभावो, तेहि निवुत्थभावो च तस्स सातिसयो वण्णोति वुत्तं “पठमगाथाय जेतवनस्स वण्णं कथेत्वा”ति । वुत्तज्हेतं —

“गामे वा यदि वारञ्जे, निन्ने वा यदि वा थले ।

यत्थ अरहन्तो विहरन्ति, तं भूमिरामणेय्यक”न्ति ॥ (ध० प० ९८; थेरगा० ९९१) ।

इध धम्मसद्दो समाधिपरियायो “एवंधम्मा ते भगवन्तो”तिआदीसु (दी० नि० २.१३; म० नि० ३.१९८; सं० नि० ५.३७८) वियाति आह “धम्मोति समाधी”ति समाधिपक्खिका धम्मा सतिवायामा ।

नानुगच्छेय्याति नानुतसेय्य । अनुतसनमेव हि तण्हादिद्वीहि अनुगमनं । पटिविपस्सेय्याति विपस्सनासम्मसनमाह । यमकतो, हि खणिकतो, पटिपाटितो च सम्मसनं विपस्सनायपि सम्मसनतो पटिविपस्सना नाम । सा हि विपस्सनाय

दिद्विउग्घाटनमानसमुग्घाटननिकन्तिपरियादानहेतुताय विसेसतो पटिपक्खेन असंहीरअसंकुप्पनहेतुभूता परिब्रूहना होति । “**पुनप्पुनं...पे०... अप्पेन्तो**”ति एतेन निब्बानारम्मणधम्मानुब्रूहनं यथा “**ब्रूहेता सुज्जागारान**”न्ति (म० नि० १.६४) दस्सेति ।

यं किञ्चि अपदिसित्वा पटिज्जादानं **सङ्गरो** । सो पन अत्तनो किच्चविसेसं अपदिसित्वा मित्तसन्धववसेन वा कालागमनं अपदिसित्वा किञ्चिक्खानुप्पदानेन वा पटिबाहकरणं अपदिसित्वा बलग्गबोधवसेन वा सियाति तस्स मित्तकरणादिपरियायतं सन्धायाह “**सङ्गरोति...पे०... नाम**”न्ति । एवं **पटिपन्नत्ताति** एवं अनिच्चसज्जामुखेन तियद्धकेसु सङ्घारेसु अप्पमादप्पटिपत्तिया पटिपन्नत्ता ।

दिब्बचक्खु सुविसुद्धन्ति सावसेसा देसनाति आह “**यं सच्छिकरोती**”ति । रूपायतनज्हेत्थ अधिप्पेतं ।

१०४. अन्तन्ति सङ्घारानं पारिमन्तभूतं । **वेदानन्ति** मग्गजाणवेदानमेव । अरहत्ताधिगमेन **अन्तं** परियोसानं गतत्ता । कम्मविपाकवट्टानं, किलेसवट्टस्सापि च उस्सदेन उपचयेन **उस्सदा**, रागादयो ।

सुक्कोभासताय **सुक्का**, अभिविसिद्वग्गहा । सब्बानि वा तारकरूपानि **सुक्का** । **विन्दतीति** उपलभति, पटिविज्झतीति अत्थो ।

“**अज्झत्तं विपस्सनाभिनिवेसो होती**”ति इदं “**सकेसु धम्मेषू**”ति पारगुभावस्स विसेसितत्ता वुत्तं, तज्ज खो अभिनिवेसेनेव देसितं । “**सब्बं, भिक्खवे, अभिज्जेय्य**”न्ति (सं० नि० ४.४६; पटि० म० १.३) वुत्तं । पारगुता च तेसं खन्धानं परिज्जाभिसमयवसेन होति । ततो च नेसं हेतुभूतसमुदये, तदप्पवत्तिलक्खणे निरोधे, निरोधगामिनिया पटिपदाय च पहानसच्छिकिरियाभावनाभिसमयपारिपूरिवसेन इतरसच्चेसुपि पारगुभावो वुत्तो एव होति । सब्बसो हि सकअत्तभावबोधेनपि चतुसच्चाभिसमयो होतियेव । वुत्तज्हेतं “**इमस्मिंयेव ब्याममत्ते कळेवरे ससज्जिम्हि समनके लोकज्ज पज्जपेमि, लोकसमुदयज्जा**”तिआदि (सं० नि० १.१०७; अ० नि० ४.४५) । अथ वा **सकेसु धम्मेषू**ति अत्तनो धम्मेषु । अत्तधम्मा नाम अत्थकामस्स कुलपुत्तस्स सीलादिधम्मा । सीलसमाधिपज्जादयो हि वोदानधम्मा एकन्तहितसुखसम्पादनतो पुरिसस्स सकधम्मा नाम, न अनत्थावहा संकिलेसधम्मा विय परधम्मा । तेसं सीलादीनं पारिपूरिया पारं परियन्तं गतोति **पारगू** । “**अक्कुल पक्कुल**”इति एवं विहिंसनकपयोगं । **अजकलापेन** (उदा० ७) हि तदा भगवन्तं भीसापेतुकामेन कतं यक्खगज्जितं “**अक्कुल पक्कुल**” इति इमिना आकारेन सत्तानं सोतपथं अगमासि, तस्मा तं “**अक्कुलं पक्कुलकरण**”न्ति वुत्तं ।

नाभिनन्दतीति “**अयं मं दड्ढं आगता**”ति न तुस्सति । यस्मा पन “**भगवतो भासितं अभिनन्दी**”तिआदीसु (म० नि० १.८८) विय सम्पटिच्छनत्थोपि अभिनन्दसद्दो होति, तस्मा वुत्तं “**चित्तेन न सम्पटिच्छती**”ति । **न सोचतीति** “**मया असम्मोदिता गच्छती**”ति न चित्तसन्तापं आपज्जति । “**सङ्गा सङ्गामजिं मुत्त**”न्ति इदं अभिनन्दसोचनानं अभावस्स कारणवचनं ।

तेनाति उदके न्हानेन । तेनेवाह “**न उदकेन सुची होती**”ति । तस्सत्थो — उदकुम्मुज्जनादिना नेव सत्तानं सुचि पापतो सुद्धि नाम होतीति । उदकुम्मुज्जनादीनि हि इध उत्तरपदलोपेन “**उदक**”न्ति वुत्तं । **उदकेनाति** वा उम्मुज्जनादिकिरियासाधनभूतेन उदकेन सत्तानं सुचि पापसुद्धि न होतीति । अथ वा सुचितेन यथावुत्तेन उदकेन पापमलतो

सुद्धो नाम सत्तो न होतीति । यदि सिया, सब्बेसमेव मच्छबन्धानं पापसुद्धि सिया । तेनाह “**बह्वेत्थ न्हायती जनो**”ति । मातुघातादिपापकम्मकारीनं, अज्जेसज्ज गोमहिंसादीनं उदकं ओरोहन्तानं अन्तमसो मच्छकच्छपे उपादाय सब्बेसम्पि पापसुद्धि सिया, न पनेवं होती । कस्मा? न्हाणीयपापहेतून् अप्पटिपक्खभावतो । यज्झि यं विनासेति, सो तस्स पटिपक्खो । यथा आलोको अन्धकारस्स, विज्जा अविज्जाय, न एवं न्हाणं पापस्स, तस्मा निट्टमेत्थ गन्तब्बं “न उदकेन सुची होती”ति । येन पन सुचि होति, तं दस्सेतुं “**यमिह सच्चज्जा**”तिआदि वुत्तं । तत्थ **सच्चन्ति** वचीसच्चज्ज विरतिसच्चज्ज । अथ वा **सच्चन्ति** जाणसच्चज्जेव परमत्थसच्चज्ज । **धम्मो**ति सेसो अरियधम्मो । सच्चस्स पनेत्थ विसुं गहणं तस्स बहुकारतादस्सनत्थं । सेसं सुविज्जेय्यमेव ।

जातिबलनिसेधकन्ति जातिमत्तब्राह्मणानं भोवादिकानं पटिसेधकं । जातिवादस्स वा निसेधकं, “न जच्चा ब्राह्मणो होती”ति (सु० नि० ६५५) हि वुत्तं । थेरो हि तथावादेन ते अनिग्गणहन्तोपि निग्गणहन्तो विय होतीति कत्वा वुत्तं ।

१०५. विमुत्तियन्ति अनुपादिसेसनिब्बानधातुयं ।

सवासनन्ति एत्थ खीणासवस्सापि अखीणासवसदिसकायवचीपयोगहेतुभूता सन्ताने किलेसभावना **वासना** नाम आयस्मतो पिलिन्दवच्छस्स (अ० नि० अट्ठ० १.१.२१५; ध० प० अट्ठ० २.पिलिन्दवच्छत्थेरवत्थु) वसलवोहारो विय, सह वासनायाति **सवासनं**, भावनपुंसकज्जेतं “विसमं चन्दिमसूरिया परिवत्तन्ती”तिआदीसु (अ० नि० ४.७०) विय । यथावुत्तवासनम्पि असेसेत्वाति अत्थो । कुम्मग्गपरिहरणवसेन मग्गसम्पटिपत्तीति मग्गे कुसलो अमग्गेपि कुसलो एव होति । भगवा पन सब्बज्जुताय सब्बत्थेव कुसलोति आह “**मग्गे च अमग्गे च कोविदो**”ति ।

१०६. तमेन युत्तोति यथावुत्ततमो तस्स अत्थीति **तमो**, पुगलो । अप्पकासभावेन ठिता खन्धाव तमो । **आलोकभूतोति** जातिगुणालोको, पाकटगुणोति अत्थो ।

किलेसमयं बन्धनं “दळ्ह”न्ति वदन्ति । यतो सच्चानि पटिविज्झन्ता बुद्धाव नं छिन्दन्ति, न अज्जे ।

दुच्छेदनत्थेन सतिपि दळ्हभावे सिथिलवुत्तितं तस्स दीपेतुं “**बन्धनभावम्पी**”तिआदिमाह । तेन “अहो सुखुमतरं खो, भिक्खवे, मारबन्धन”न्ति वुत्तं ।

१०७. यदिपि चेतना कुसलाकुसलसाधारणा, अपुज्जाभिसङ्खारो इधाधिप्पेतोति तस्स वसेन अत्थं दस्सेन्तो “**अकुसलचेतनावसेन चेतती**”ति आह । **चेतनं** अभिसन्दहनं, चित्तस्स ब्यापारापत्तिभावेन पवत्तीति अत्थो । यस्मा पन चेतना यदा विज्जन्ति समुट्ठापेति, तदा दिगुणुस्साहादिगुणवायामा विय हुत्वा पाकटं पयोगं निष्पादेति, तस्मा “**पकप्पेती**”ति वुत्ता । पाकटप्पयोगकप्पनज्जेत्थ पकप्पनं अधिप्पेतं । तेनाह “**तमेव पकप्पेती**”ति । पच्चयट्ठो इध आरम्भणत्थोति वुत्तं “**पवत्तिया पच्चयो होती**”ति ।

१०८. यथा जलसमुद्दस्स वीचिसमुद्धानवसेन लब्भमानो वेगो “**वीचिमयो**”ति वुच्चति, एवं चक्खुसमुद्दस्सापि रूपावभासनवसेन लब्भमानो वेगो “**रूपमयो**”ति वुत्तो । एसेव नयो सेसेसुपि । **आविज्जनतोति** आकड्ढनतो, आकड्ढनज्जेत्थ सन्तानस्स तन्निन्नभावहेतुताय दट्ठब्बं ।

समुदनं किलेसतेमनं, अवस्सवहेतुता, किलेसानं ऊमिआदिसदिसता समावट्टनेन सत्तानं अनत्थावहताय वेदितब्बा ।

उपरूपरिवेगुप्पत्तिया उपगतस्स उट्ठातुं अप्पदानेन, गुणसारविनासनेन च कोधुपनाहादीनं ऊमिआदिसदिसता दट्ठब्बा ।

अभिमुखो नन्दतीति तदारम्मणं सुखं सोमनस्सं सादियन्तो सम्पटिच्छति । **अभिवदतीति** तण्हाभिनिवेसवसेन अभिनिविस्स वदति । तज्झिस्स अभिनिवेसं दीपेतुं “अहो सुख”न्तिआदि वुत्तं । अज्झोसानं अधिमुच्चनभूताय तण्हाय तण्हावत्थुकस्स अनुपविसित्वा आवेणिकताकरणन्ति आह “अज्झोसाय तिट्ठतीति गिलित्वा परिनिट्ठपेत्वा”ति ।

१०९. “कस्मा”तिआदिना सन्तापदुक्खानं असुप्पतिकारतं आह “येन वा पकारेना”ति । येनाति येन वा कामज्झोसानदिट्ठिज्झोसानभूतेन मिच्छाभिनिवेसप्पकारेन । गहट्ठपब्बजिता तथारूपं कत्वा अत्तनो वट्ठिञ्च मज्जन्ति । **अवट्ठि एव पन होति** तस्स पकारस्स वट्ठियं अनुपायभावतो च उपायभावतो च अवट्ठियं । **तथापीति** तत्थ तत्थ इच्छाविघातं पापुणन्तोपि । यस्मा इतो बाहिरका सब्बेन सब्बं भवनिस्सरणं अप्पजानन्तो मन्दकिलेसं दीघायुकं सुखबहुलं एकच्चं भवं तेनेव मन्दकिलेसादिभावेन “निब्बान”न्ति समनुपस्सन्ति, तस्मा भवेन भवविप्पमोक्खं वदन्तीति ।

भवदिट्ठिसहगता तण्हा पुरिमपदे उत्तरपदलोपेन **भवतण्हाति** वुत्ताति आह “भवतण्हातिआदीसु विया”ति ।

यत्थाति यस्मिं भवे ।

ततो एवाति भूतरतिया एव । **अज्जमज्जज्झि सत्तानं छन्दरागो बलवा होति** । **अनवसेसतोति** अनवसेसेन, न किञ्चि सेसेत्वा ।

संसारसोतस्स अनुकूलभावेन गच्छतीति **अनुसोतगामी** । तस्सेव पटिक्कूलवसेन निब्बिदानुपस्सनादीहि पवत्ततीति **पटिसोतगामी**, अचलप्पसादादिसमन्नागमेन ठितसभावोति अत्थो ।

११०. “पलब्धति, निखज्जती”तिआदीसु विय उपसगो पदवट्ठनमत्तन्ति आह “अभिजातिकोति जातियो”ति । कण्हधम्मसमन्नागतत्ता वा **कण्हो** । पठमवयेपि मज्झिमवयेपि पापसमङ्गी हुत्वा ठितो कण्हधम्मे **अभिजायति**, पच्छापि पापं पसवतीति अत्थो । **सुक्कोति** वा एत्थ वुत्तविपरियायेनेव अत्थो वेदितब्बो ।

१११. पुरिमस्मिन्ति पुरिमस्मिं पदे । **विसये भुम्मं** तत्थ देय्यधम्मस्स पतिट्ठापनतो । **दुतिये अधिकरणे**, तदधिकरणज्झि निब्बानन्ति । गहट्ठपब्बजितकिच्चेसु वा विसिट्ठधम्मदस्सनत्थं पच्चयदानारहत्तानं समधुरतानिद्देसो । अथ वा **येन येन पन वत्थुनाति** रूपारूपनिरोधादिना तण्हावत्थुना । **अमराविकखेपवत्थुआदिनाति** एत्थ आदि-सद्देन सुभसुखादिमिच्छाभिनिवेसवत्थुं सङ्गण्हाति । यथा वा तण्हादिट्ठिदुच्चरितानं वसेन संकिलेसभागियस्स सुत्तस्स विभागो, एवं समथविपस्सनासुचरितवसेन तण्हावोदानभागियादिसुत्तविभागोति दस्सेतुं पाळियं “तण्हा...पे... निद्विसितब्ब”न्ति वुत्तं ।

इदं एवं पवत्तन्ति यथा दुचिन्तितादिवसेन बालो होति पुग्गलो, एवं तस्स दुचिन्तितचिन्तितादिभावनावसेन पवत्तं इदं संकिलेसभागियं नाम सुत्तन्ति पुब्बे संकिलेसधम्मविभागेन वुत्तं इदानि सामज्जतो सङ्गहेत्वा वदति । **इदं वासनाभागियं सुत्तन्ति** एत्थापि इमिना नयेन अत्थो वेदितब्बो ।

किलेसट्ठानेहीति किलेसानं पवत्तिट्ठानेहि । **किलेसावत्थाहीति** किलेसानं पवत्तिआकारविसेसेहि । **कामरागादीहि संयुज्जति** कामरागादिहेतु कम्मविपाकादिना । सतिपि तेसं कालन्तरवुत्तियं संयुत्तो नाम होति, यतो कामरागादयो

“संयोजन”न्ति वुच्चन्ति । उपादियतीति दळ्हं गण्हाति पवत्तेति । सेसं वुत्तनयत्ता, उत्तानत्ता च संवण्णितं ।

११२. उदाहरणवसेनाति निदस्सनवसेन, एकदेसदस्सनवसेनाति अत्थो । सकलस्स हि परियत्तिसासनस्स सोळसहि पट्टानभागेहि गहितत्ता । यथा तदेकदेसानं सोळसन्नम्पि पट्टानभागानं गहणं उदाहरणमत्तं, तेसं पन सोळसन्नं एकदेसगहणं उदाहरणन्ति किमेत्थ वत्तब्बं । तेन वुत्तं “एकदेसदस्सनवसेनाति अत्थो”ति । कस्मा पनेत्थ पाळियं पट्टानस्स एकदेसोव उदाहटो, न अवसेसोति? नयनिदस्सनत्थं । इमिना नयेन अवसेसोपि पट्टानभावो वेदितब्बोति ।

तत्थ “अप्पम्पि चे संहित भासमानो...पे... स भागवा सामञ्जस्स होती”ति (ध० प० २०) इदं वासनाभागियञ्च असेक्खभागियञ्च । एत्थ हि “अप्पम्पि चे संहित भासमानो”ति इदं वासनाभागियं, “स भागवा सामञ्जस्स होती”ति इदं असेक्खभागियं ।

तथा मघदेवसुत्तं । तत्थ हि “भूतपुब्बं, आनन्द, इमिस्सायेव मिथिलायं मघदेवो नाम राजा अहोसि धम्मिको धम्मराजा धम्मे ठितो महाधम्मराजा, धम्मं चरति ब्राह्मणगहपतिकेसु नेगमेसु चेव जनपदेसु च, उपोसथञ्च उपवसति चातुद्दसिं, पञ्चदसिं, अट्टमिञ्च पक्खस्सा”तिआदि (म० नि० २.३०८), इदं वासनाभागियं । “इदं खो पनानन्द, एतरहि मया कल्याणं वत्तं नीहरितं एकन्तनिब्बिदाय विरागाय निरोधाय उपसमाय अभिञ्जाय सम्बोधाय निब्बानाय संवत्तती”ति (म० नि० ३.१८९) इदं असेक्खभागियं । “पमादं अप्पमादेन, यदा नुदति पण्डितो”ति (ध० प० २८) इदं निब्बेधभागियं । “पञ्जापासाद...पे... अवेक्खती”ति (ध० प० २८) इदं असेक्खभागियन्ति इदं निब्बेधभागियञ्च असेक्खभागियञ्च ।

तथा “तीणिमानि, भिक्खवे, इन्द्रियानी”ति (सं० नि० ५.४९३) सुत्तं । तत्थ “तीणिमानि, भिक्खवे, इन्द्रियानि । कतमानि तीणीति? अनञ्जातञ्जस्सामीतिन्द्रियं अञ्जिन्द्रिय”न्ति इदं निब्बेधभागियं, “अञ्जाताविन्द्रिय”न्ति (सं० नि० ५.४९३) इदं असेक्खभागियं ।

रट्टपालसुत्तं (म० नि० २.२९३ आदयो) संकिलेसभागियञ्च वासनाभागियञ्च असेक्खभागियञ्च । तत्थ हि “ऊनो लोको अतित्तो तण्हादासो”तिआदिना (म० नि० २.३०६) संकिलेसो विभत्तो, “एको वूपकट्ठो”तिआदिना (म० नि० २.२९९) असेक्खधम्मा, इतरेन वासनाधम्माति ।

“धम्मे च ये अरियपवेदिते रता, अनुत्तरो ते वचसा मनसा कम्मुना च ।

ते सन्तिसोरच्चसमाधिसण्ठिता, सुतस्स पञ्जाय च सारमज्झगू”ति ॥ (सु० नि० ३३२) ।

इदं वासनाभागियञ्च निब्बेधभागियञ्च असेक्खभागियञ्च । एत्थ हि “धम्मे च ये अरियपवेदिते रता”ति अयं वासना, “अनुत्तरा...पे... सण्ठिता”ति अयं निब्बेधो, “सुतस्स पञ्जाय च सारमज्झगू”ति असेक्खधम्मा ।

तथा “सद्धो सुतवा नियामदस्सी”ति गाथा (सु० नि० ३७३) । तत्थ हि “सद्धो सुतवा”ति वासना, “नियामदस्सी वग्गगतेसु न वग्गसारि धीरो, लोभं दोसं विनेय्य पटिघ”न्ति निब्बेधो, “सम्मा सो लोके परिब्बजेय्या”ति असेक्खधम्मा ।

सब्बासवसंवरो परिस्सयादीनं वसेन सब्बभागियं वेदितब्बं । तत्थ हि संकिलेसधम्मा, लोकियसुचरितधम्मा, सेक्खधम्मा, असेक्खधम्मा च विभत्ता । असब्बभागियं पन “पस्सं पस्सती”तिआदिकं (म० नि० १.२०३) उदकादिअनुवादनवचनं वेदितब्बं । एवमेतस्मिं सोळसविधे सासनपट्टाने एते तण्हादिवसेन तयो संकिलेसभागा,

वोदानादिवसेन तयो वासनाभागा, सेक्खानं सीलक्खन्धादीनं वसेन तयो निब्बेधभागा, असेक्खानं सीलक्खन्धादीनं एव वसेन तयो असेक्खभागा, तेसं वसेन मूलपट्टानानि एव द्वादस होन्ति । तानि पन वित्थारनयेन विभजियमानानि छन्नवुताधिकानि चत्तारि सहस्सानि होन्ति । यथादस्सनं पनेतानि उद्धरितब्बानि । तानि पन यस्मा सङ्गहतो कामतण्हादिवसेन तयो तण्हासंकिलेसभागा, सस्सतुच्छेदवसेन द्वे दिट्ठिसंकिलेसभागा, कायदुच्चरितादिवसेन तयो दुच्चरितसंकिलेसभागाति अट्ठ संकिलेसभागा । धम्मामिसाभयदानवसेन तिविधं दानमयं पुज्जकरियवत्थु, कायसुचरितादिवसेन तिविधं सीलमयं पुज्जकरियवत्थु, समथविपस्सनावसेन दुविधं भावनामयं पुज्जकरियवत्थूति अट्ठेव वासनाभागा ।

सद्धानुसारी सद्भावमुत्तो धम्मानुसारी दिट्ठिप्पत्तो कायसक्खीति (पु० प० मातिका ७.३२-३६; पु० प० २६-३०) पज्जन्नं सेक्खानं पच्चेकं तयो सीलादिक्खन्धाति पन्नरस निब्बेधभागा, सुज्जतानिमित्तापणिहितभेदा पज्जाविमुत्तानं तयो अगगफलधम्मा, तेसु पच्चेकं तयो तयो सीलादिक्खन्धा, तथा उभतोभागविमुत्तानन्ति अट्ठारस, सिक्खितब्बाभावसामज्जेन असङ्गत्तातुं पक्खिपित्वा एकूनवीसति असेक्खभागा, इति पुरिमानि एकतिसं, इमानि एकूनवीसतीति समपज्जास संकिलेसभागियादिधम्मा होन्ति । तस्मा इमेसं समपज्जासाय संकिलेसभागियादिधम्मानं वसेन समपज्जास सुत्तानि होन्ति ।

यस्मा च ते पज्जाविमुत्ता उभतोभागविमुत्तविभागं अकत्वा असङ्गत्ताय धातुया अगगहणेन निष्परियायेन असेक्खभागाभावतो नवेव असेक्खभागाति समचत्तालीस होन्ति, तस्मा **पेटके** “चत्तारीसाय आकारेहि परियेसितब्बं, पज्जासाय आकारेहि सासनपट्टानं निदिट्ठु”न्ति (पेटको० २१) च वुत्तं । सङ्गहतो एव पन पुब्बे वुत्तवित्थारनयेन सोळस होन्ति, पुन तिविधसंकिलेसभागियादिवसेन द्वादस होन्ति, पुन तण्हादिट्ठिदुच्चरितसंकिलेसतण्हादिट्ठिदुच्चरितवोदानभावेन छ होन्ति, पुन संकिलेसभागियं वासनाभागियं दस्सनभागियं वासनाभागियं असेक्खभागियन्ति पज्ज होन्ति, पुन मूलपट्टानवसेन चत्तारि होन्ति, पथुज्जनभागियसेक्खभागियअसेक्खभागियभावेन तीणि होन्ति, पुन संकिलेसभागियवोदानभागियभावेन द्वे एव होन्ति । पट्टानभावेन पन एकविधमेव, इति पट्टानभावेन एकविधम्पि संकिलेसवोदानभागियभावेन दुविधन्ति विभागतो याव छन्नवुताधिकं चतुसहस्सप्पभेदं होति, ताव नेतब्बं । एवमेतं पट्टानं सङ्गहतो, विभागतो च वेदितब्बं ।

इमस्सापि पट्टानविभागस्स, न पुरिमस्सेवाति अधिप्पायो । लोकिक्कं अस्सत्थीति, लोकिक्कसहचरणतो वा **लोकिक्कं**, सुत्तं **पदेसेना**ति एकदेसेन । **सब्बपदेसू**ति तंतंतिकानं ततियपदेसु । **बुद्धादीन**न्ति बुद्धपच्चेकबुद्धबुद्धसावकानं । धम्मो पनेत्थ बुद्धादिगगहणेन वेदितब्बो, **आदिसद्देन** वा ।

परिणमतीति परिपच्चति । **धरन्ती**ति पबन्धवसेन पवत्तन्ति । न्ति पापकम्मं । तेति कुसलाभिनिब्बत्तक्खन्धा । **रक्खन्ति** विपाकदानतो विपच्चित्तुं ओकासं न देन्तीति अत्थो । अयज्ज अत्थो उपपज्जवेदनीयेसु युज्जति, इतरस्मिम्पि यथारहं लब्धतेव । तेनाह “**दुतिये वा ततिये वा अत्तभावे**”ति ।

११३. अत्तनो अनवज्जसुखावहं पटिपत्तिं पटिपज्जन्तो परमत्थतो अत्तकामो नामाति आह “**अत्तनो सुखकामो**”ति । सुखानुबन्धज्झि सुखं कामेन्तो सुखमेव कामेतीति च **सुखकामो**ति ।

वित्थतट्ठेनाति सुविप्फारदिट्ठीनं पवत्तनट्टानतासङ्घातेन वित्थारट्ठेन ।

११४. दिट्ठे दुक्खादिधम्मेति भावेनभावलक्खणे भुम्मं, दुक्खादिधम्मे दिट्ठे जातेति अत्थो ।

“उद्ध”न्तिआदि कालदेसानं अनवसेसपरियादानन्ति आह “उद्धन्ति अनागतं, उपरि चा”तिआदि । गमनेनाति चतूपपातगमनेन ।

११५. नगरद्वारथिरकरणत्थन्ति नगरस्स द्वारबाहथिरकरणत्थं । गम्भीरनेमतायाति “नेमं”वुच्चति निखातथम्भादीनं पथाविं अनुपविसित्वा ठितप्पदेसो, गम्भीरं नेमं एतस्साति गम्भीरनेमो, तस्स भावो गम्भीरनेमता, ताय । कम्पनं यथाठितस्स इतो चितो च सञ्चोपनं, चालनं ठितट्ठानतो चावनं । अज्झोगाहेत्वाति अविपरीतसभावाभिसमयवसेन अनुपविसित्वा, अनुपविट्ठो विय हुत्वाति अत्थो ।

संयोजनानं पजहनवसेनाति गाथाय वचनसेसं आनेत्वा दस्सेति । अथ वा पहातब्बस्स पहानेन विना न भावनासिद्धीति अत्थसिद्धं पहातब्बपहानं अज्झत्तं, बहिद्धाति पदद्वयेन योजेत्वा दस्सेतुं अज्झत्तं बहिद्धाति ओरम्भागियउद्धम्भागियसंयोजनानं विसंयोगगहितोति इममत्थं पाळिया समत्थेतुं “तेनाह सब्बलोके”ति वुत्तं ।

अलोभसीसेनाति अलोभेन पुब्बङ्गमेन, यतो योगावचरो “नेक्खम्मच्छन्दो”ति वुच्चति । असुभसज्जा रागप्पटिपक्खताय “विसेसतो अलोभप्पधाना”ति वुत्ता, दसासुभवसेन वा । अधिगतज्झानादीनीति आदिसद्देन विपस्सनादीनि सङ्गण्हाति । विहिंसारतिरागानं ब्यापादहेतुकतो चत्तारोपि ब्रह्मविहारा अब्यापादपधानाति आह “चतु...पे०... अब्यापादो धम्मपद”न्ति । अधिगतानि ज्ञानादीनीति योजना । दसानुस्सति...पे०... अधिगतानि सम्मासति धम्मपदं सतिसीसेन तेसं अधिगन्तब्बत्ताति अधिप्पायो । आनापानभावनायं समाधिपि पधानो, न सति एवाति दस्सनत्थं “दसकसिण...पे०... सम्मासमाधि धम्मपद”न्ति वुत्तं । चतुधातुववत्थानवसेन अधिगतानम्पि एत्थेव सङ्गहो दट्ठब्बो ।

११६. उपलक्खणकारणानीति सज्जानननिमित्तानि ।

पापमेव पापियोति आह “पापं होती”ति, “पापियो”ति च लिङ्गविपल्लासवसेन वुत्तं । एकवचने बहुवचनन्ति एकवचने वत्तब्बे बहुवचनं वुत्तं ।

११७. ओलीयनतण्हाभिनिवेसवसेनाति भवतण्हाभवदिट्ठिवसेन । ता हि भवेसु सत्ते अल्लीयापेन्ति । अतिधावनाभिनिवेसवसेनाति उच्छेददिट्ठिवसेन । सा हि अवट्टुपच्छेदमेव वट्टुपच्छेदं कत्वा अभिनिविसनतो अतिधावनाभिनिवेसो नाम । ओलीयन्तीति सम्मापटिपत्तितो सङ्कोचं आपज्जन्ति । अभिधावन्तीति सम्मापटिपत्तिं अतिक्कमन्ति ।

तेसज्जाति तेसं उभिन्नं अभिनिवेसानं, तदज्जेसज्ज सब्बमज्जितानं ।

११८. इदं इट्ठविपाकं अनिट्ठविपाकन्ति इदं इट्ठविपाकसङ्घातं अनिट्ठविपाकसङ्घातं फलं ।

“अकङ्कतो न जानेय्यु”न्ति एतेन “आकङ्कतो”ति इमिना पदेन सद्धिं सम्बन्धदस्सनमुखेन “न जज्जा”ति पदस्स अत्थं दस्सेति ।

न उपलब्धतीति नत्थीति अत्थो ।

१२०. तानीति कम्मकम्मनिमित्तगतिनिमित्तानि । पत्थरणाकारोयेव हेस, यदिदं छायां वोल्म्बनं । एवं होतीति “अकतं वत मे कल्याण”न्तिआदिप्पकारेण विप्पटिसारो होति ।

१२२. एसकेहीति गवेसकेहि सपरसन्ताने सम्पादकेहि । दुक्खुद्रयन्ति दुक्खफलं । तीहि कारणेहीति कायवाचाचित्तेहि । तानि हि तंतंसंवराणं द्वारभावेन कारणानीति वुत्तानि । तीहि ठानेहीति वा तीहि उप्पत्तिट्ठानेहि । पिहितन्ति पिधायकं ।

“उट्ठानट्ठानसङ्घात”न्ति इदं पासाणभावसामञ्जं गहेत्वा वुत्तं ।

१२३. रजमिस्सकन्ति पुप्फरजमिस्सकं । तस्साति तस्स सेक्खासेक्खमुनिनो । महिच्छादीनं विय गामे चरणप्पच्चया गामवासीनं सद्भाहानि वा भोगहानि वा न होति, अथ खो उपरूपरि वुद्धियेव होतीति दस्सेन्तो “पाकतिकमेव होती”ति आह । अज्झत्तिककम्मट्ठानन्ति चतुसच्चकम्मट्ठानं ।

तेनाति कुसलेन कायवचीकम्मेन । थिरभावो थामं नामाति तस्स अत्थं दस्सेन्तो “थामवाति ठितिमा”ति आह ।

अत्तसंनिस्सयं पेमं अत्ताति गहेत्वा “अत्तसम”न्ति वुत्तन्ति आह “अत्तपेमेन समं पेमं नत्थी”ति । भगवतो विपस्सनाजाणोभासप्पवत्तिं सन्धायाह “पज्जा पन...पे... सक्कोती”ति । सब्बज्जुतज्जाणं, पन अभिज्जाजाणानि च अनन्तापरिमाणं लोकधातुं ओभासेन्ति ।

१२४. किस्स भीताति केन कारणेन भीता ।

ठपेत्वाति पवत्तेत्वा । वचनीयो याचकानन्ति योजना, याचितब्बयुत्तोति अत्थो । यज्जउपक्खरोति यज्जोपकरणं । “एतेसु धम्मेसु ठितो चतूसू”ति वुत्तं चतुक्कं ववत्थपेतुं “सद्धोति एकं अङ्ग”न्तिआदि वुत्तं ।

गाथायं वुत्तधम्मे द्वे द्वे एकं कत्वा अङ्गकरणं दुक्कनयो ।

जातिधम्मन्ति पवत्तिधम्मं सन्धाय वदति ।

१२५. सच्चेकदेसतो सच्चसमुदायो अनवसेसपरियादानतो विसिट्ठोति दस्सेन्तो “परमत्थसच्चं वा होतू”ति आह । चतुरो पदाति चत्तारि पदानि, लिङ्गविपल्लासेन वुत्तं, चत्तारो धम्मकोट्टासाति अत्थो । केवलं सत्तविभागदस्सनत्थमेव चतुपदगहणं, न अधिगतधम्मनुरूपताय ।

निम्मदाति न मदा ।

“सच्चवादी जिनो रोमो”तिपि पाठो । तत्थ रोमोति दिट्ठिरागरत्तानं तित्थियानं, तित्थकरानञ्च अधम्मवादीनं रागविपरीतधम्मदेसनतो भयजनको, अधम्मवादीनं वा तत्थ आदीनवदस्सनेन भायितब्बो, अप्पहीनासंवराणं वा दुरुपसङ्गमनतो दुरासदोति अत्थो ।

सच्चो च सो धम्मो चाति सच्चधम्मो । तेनाह “एकन्तनिस्सरणभावेना”तिआदि ।

एकायनभावन्ति एकमग्गभावं, अज्जमग्गभावन्ति अत्थो ।

दस्सनभागियं भावनाभागियन्ति निब्बेधभागियमेव द्विधा विभजित्वा वुत्तन्ति आह “संकिलेसभागियादीहि चतूहि पदेही”ति । सेसत्तिकानन्ति सत्ताधिद्वानत्तिकादीनं अट्टन्नं तिकानं । सेसपदानञ्चाति संकिलेसभागियञ्च वासनाभागियञ्चातिआदिमिस्सकपदानञ्च । च-सद्देन संकिलेसभागियादिपदानि च सङ्गण्हाति । लोकियत्तिकस्सेव हि “सेसपदानी”ति वुत्तेहि मिस्सकपदेहि एवं संसन्दने नयदस्सनं, इतरेसं पन तिकानं संकिलेसभागियादिपदेहि चेव सेसपदेहि च संसन्दने इदं नयदस्सनन्ति “वुत्तनयानुसारेण सुविज्जेय्य”न्ति वुत्तं । समतिक्कमनन्ति पहानं । सतिपि वासनाभागियसंकिलेसभागियधम्मानं लोकियभावे पुरिमेहि पन पच्छिमा पहातब्बा तदङ्गवसेन, विक्खम्भनवसेन च । एवं पजहनसमत्थताय पहानन्ति वुत्तं “वासनाभागियं सुत्तं संकिलेसभागियस्स समतिक्कमाय होती”ति । संकिलेसधम्मानं समतिक्कमेन अधिगन्तब्बा वोदानधम्मा वियाति योजना । भावना नाम तिविधा ज्ञानभावना, विपस्सनाभावना, मग्गभावनाति । तासु मग्गभावनाय गहिताय विपस्सनाभावना गहिता एव होतीति तं अनामसित्वा इतरा द्वे एव गहिता । तथापि “भावनाभागियस्स सुत्तस्स पटिनिस्सग्गाया”ति वुत्ते किं सब्बेन सब्बं असेक्खस्स ज्ञानभावनापि पटिनिस्सट्ठाति चोदनं मनसि कत्वा पाळियं “असेक्खभागियं सुत्तं दिट्ठधम्मसुखविहारत्थ”न्ति वुत्तन्ति दस्सेन्तो “असेक्खधम्मोसु उप्पन्नेसु मग्गभावनाकिच्चं नाम नत्थी”ति वत्वा “ज्ञानभावनापि दिट्ठधम्मसुखविहारत्था एवा”ति आह ।

एकं एव भवबीजं पटिसन्धिविज्जाणं एकबीजं, तं अस्स अत्थीति एकबीजी । सन्धावित्वा समागन्त्वा, निब्बत्तनवसेन उपगन्त्वाति अत्थो । संसरित्वाति तस्सेव वेवचनं । कुलं कुलं गच्छतीति कोलंकोलो । पुरिमपदे अनुनासिकलोपं अकत्वा निद्देसो ।

तेसं सोतापन्नानं । एतं पभेदन्ति एकबीजिआदिविभागं । पुरिमभवसिद्धं विवट्ठपनिस्सयपुञ्जकम्मं इध पुब्बहेतु नाम । यो “कतपुञ्जता”ति वुच्चति, सो पठममग्गे साधिते चरितत्थताय विपक्कविपाकं विय कम्मं उपरिममग्गानं उपनिस्सयो न सियाति अधिप्पायेनाह “उपरि...पे०... आपज्जती”ति । तिण्णं मग्गानं निरत्थकता आपज्जति पठममग्गेनेव तेहि कातब्बकिच्चस्स साधितत्ता । पठममग्गे...पे०... आपज्जतीति अनुप्पन्नस्स अत्थकिरियासम्भवतो । एवं तिण्णं वादानं युत्तिअभावं दस्सेत्वा चतुत्थवादो एवेत्थ युत्तोति दस्सेन्तो आह “विपस्सना...पे०... युज्जती”ति । “सचे ही”तिआदिना तं युत्तिं विभावेति । विमुत्तिपरिपाचनीयानं धम्मानं परिपक्कताय इन्द्रियानं तिक्खताय आणस्स विसदताय विपस्सनाय बलवभावो वेदितब्बो । सो हि वोमिस्सकनयेन संसरणको इधाधिप्पेतो “देवे चेव मानुसे च सन्धावित्वा”ति वुत्तत्ता । इध कामभवे ठितो इधट्ठको । मनुस्सदेवलोकूपपज्जनतो ओकारेण वोकिण्णो । अरियसावकस्स तंतंसत्तनिकायुपपत्ति तस्स तस्स सोधनसदिसं किलेसमलादिअनत्थापनयनतोति आह “छ देवलोके सोधेत्वा”ति । “अकनिट्ठे ठत्वा”ति एतेन हेट्ठाब्रह्मलोकसोधनं वुत्तमेवाति वेदितब्बं ।

सद्धं धुरं कत्वाति सद्धं धुरं जेट्ठकं पुब्बङ्गमं कत्वा । सद्धाय अनुस्सति पटिपत्ति, सद्धं वा पुब्बभागियं अनुस्सति, सद्धाय वा अनुसरणसीलोति सद्धानुसारी । धम्मानुसारीति एत्थापि एसेव नयो । धम्मोति पनेत्थ पज्जा वेदितब्बा । सद्धहन्तो विमुत्तोति सद्धाविमुत्तो । यदिपि सब्बथा अविमुत्तो, सद्धामत्तेन पन विमुत्तोति अत्थो । सद्धाय वा अधिमुत्तोति सद्धाविमुत्तो । वुत्तनयेनाति उपरिमग्गविपस्सनाय बलवमन्दमन्दतरभावेन । दिट्ठिया पत्तोति दिट्ठिप्पत्तो, चतुसच्चदस्सनसङ्घाताय दिट्ठिया निरोधप्पत्तोति अत्थो । दिट्ठन्तं वा पत्तोति दिट्ठिप्पत्तो, दस्सनसङ्घातस्स

सोतापत्तिमग्गजाणस्स अनन्तरप्पवत्तोति वुत्तं होति । पठमफलतो पट्टाय हि याव अग्गमग्गा दिट्ठिप्पत्ताति । इदन्ति यथावुत्तसोतापन्नानं सद्भाविमुत्तदिट्ठिप्पत्तावचनं । **अट्ठन्तं विमोक्खानन्ति** चतस्सो रूपावचरसमापत्तियो, चतस्सो अरूपावचरसमापत्तियोति **अट्ठ विमोक्खा**, तेसं ।

फुट्ठन्तं सच्छिकरोतीति **कायसक्खी**, फुट्ठानं अन्तो **फुट्ठन्तो**, फुट्ठानं अरूपज्झानानं अनन्तरो कालोति अधिप्पायो । अच्चन्तसंयोगे चेतं उपयोगवचनं, फुट्ठानन्तरकालमेव सच्छिकातब्बं सच्छिकरोतीति वुत्तं होति, “विसमं चन्दिमसूरिया परिवत्तन्ती”ति आदीसु (अ० नि० ४.७०) विय वा भावनपुंसकन्ति एतं दट्ठब्बं । यो हि अरूपज्झानेन रूपकायतो, नामकायेकदेसतो च विक्खम्भनविमोक्खेन विमुत्तो, तेन निरोधसङ्घातो विमोक्खो आलोचितो पकासितो विय होति, न कायेन सच्छिकतो, निरोधं पन आरम्भणं कत्वा एकच्चेसु आसवेसु खेपितेसु तेन सो सच्छिकतो होति । तस्मा सो सच्छिकातब्बं निरोधं यथाआलोचितं नामकायेन सच्छिकरोतीति “**कायसक्खी**”ति वुच्चति, न तु विमुत्तो एकच्चानं एव आसवानं अपरिक्खीणत्ता ।

अभेदेनाति अन्तरापरिनिब्बायिआदिभेदेन विना । “अभेदेना”ति च इदं “सद्भाविमुत्तदिट्ठिप्पत्तिकायसक्खिनो”ति इधापि आनेत्वा योजेतब्बं । यथेव हि अन्तरापरिनिब्बायिआदिभेदानामसनेनेव एको अनागामी होति, एवं यथावुत्तभेदआमसनेनेव सद्भाविमुत्तो, दिट्ठिप्पत्तो, कायसक्खीति तयो अनागामिनो होन्ति । अयञ्च अनागामिनो तादिसमवत्थाभेदं गहेत्वा गणना कताति वेदितब्बं । “**अविहादीसू**”तिआदि सुविज्जेय्यमेव ।

पज्जाय एव विमुत्तो, न चेतोविमुत्तिभूतेन सातिसयेन समाधिनापीति **पज्जाविमुत्तो** । **उभतोभागविमुत्तो**ति उभोहि भागेहि उभतोभागतो विमुत्तो । किलेसानं विक्खम्भनसमुच्छिन्नेहि रूपकायनामकायतो विमुत्तोति इममत्थं दस्सेन्तो “**विक्खम्भन...पे०... विमुत्तो नामा**”ति आह । अरूपसमापत्तिया रूपकायतो, अग्गमग्गेन अरूपकायतो विमुत्तं । यथाह

“इध, भिक्खवे, एकच्चो पुग्गलो ये ते सन्ता विमोक्खा अतिक्कम्म रूपे आरुप्पा, ते कायेन फुसित्वा विहरति, पज्जाय चस्स दिस्वा आसवा परिक्खीणा होन्ति, अयं वुच्चति, भिक्खवे, पुग्गलो उभतोभागविमुत्तो”ति (म० नि० २.१८२) ।

यं पन **महानिदानसुत्ते** “रूपी रूपानि पस्सती”तिआदिके (दी० नि० २.१२९) निरोधसमापत्तिअन्ते अट्ठ विमोक्खे वत्ता —

“यतो खो, आनन्द, भिक्खु इमे अट्ठ विमोक्खे अनुलोमम्पि समापज्जति...पे०... अयं वुच्चतानन्द, भिक्खु उभतोभागविमुत्तो, इमाय च, आनन्द, उभतोभागविमुत्तिया अज्जा उभतोभागविमुत्ति उत्तरितरा वा पणीततरा वा नत्थी”ति (दी० नि० २.१३०) —

वुत्तं, तं उभतोभागविमुत्तसेट्ठवसेन वुत्तं । तत्थ यस्मा आरुप्पसमापत्तीसु एकायपि रूपकायो विक्खम्भितो एव नाम होति, तस्मा चतुन्नं आरुप्पसमापत्तीनं, निरोधसमापत्तिया च लाभीनं वसेन पज्च उभतोभागविमुत्ता वेदितब्बा । एस नयो **कायसक्खि**हि । अट्ठविमोक्खेकदेसेपि हि अट्ठविमोक्खसमज्जा यथा “लोके सत्ता”ति ।

तेरससु सीसेसु पलिबोधसीसादीनि, पवत्तसीसञ्च परियादियितब्बानि, अधिमोक्खसीसादीनि परियादकानि, गोचरसीसं परियादकफलं। तज्झि विसयज्झत्तं फलं, विमोक्खो परियादकस्स मग्गस्स, फलस्स च आरम्मणं। सङ्खारसीसं सङ्खारविवेकभूतो निरोधोति परियादियितब्बानं, परियादकफलानञ्च सह विसयसंसिद्धिदस्सनेन समसीसिभावं दस्सेतुं पटिसम्भिदायं (पटि० म० १.८७) तेरस सीसानि वुत्तानि। इध पन “यस्स पुग्गलस्स अपुब्बं अचरिमं आसवपरियादानञ्च होति जीवितपरियादानञ्चा”ति (पु० प० १६) पुग्गलपञ्चत्तियं आगतत्ता तेसु किलेसपवत्तसीसानं एव वसेन योजनं करोन्तो “किलेससीस”न्तिआदिमाह। तत्थ पवत्तसीसम्पि मग्गो पवत्तितो वुट्ठहन्तो चुत्तितो उद्धं अप्पवत्तिकरणेन यदिपि परियादियति, याव पन चुत्ति, ताव पवत्तिसम्भवतो “पवत्तसीसं जीवितिन्द्रियं चुत्तिचित्तं परियादियती”ति आह।

किलेसपरियादानेन अत्तनो अनन्तरं विय निष्पादेतब्बा, पच्चवेक्खणवारा च किलेसपरियादानस्सेव वाराति वत्तब्बतं अरहन्ति। “विमुत्तस्मिं विमुत्तमिति जाणं होती”ति (म० नि० १.७८; सं० नि० ३.१२, १४) हि वचनतो पच्चवेक्खणपरिसमापनेन किलेसपरियादानं समापितं नाम होति। तं पन परिसमापनं यदि चुत्तिचित्तेन होति, तेनेव जीवितपरिसमापनञ्च होतीति इमाय वारचुत्तिसमताय किलेसपरियादानजीवितपरियादानानं अपुब्बाचरिमता होतीति आह “वारसमताया”ति। भवङ्गं ओतरित्वा परिनिब्बायतोति एत्थ परिनिब्बानचित्तमेव भङ्गोत्तरणभावेन वुत्तन्ति दट्ठब्बं।

चरितन्ति चरिता कायवचीमनप्पवत्ति। एत्थ च येन रागाधिकभावेन पुग्गलो “रागचरितो”ति लक्खीयति, तयिदं लक्खणं। तेनाह “रागज्झासयो रागाधिकोति अत्थो”ति, तेन अप्पहीनभावेन सन्ताने थामगतस्स रागस्स बलभावो लक्खीयतीति दट्ठब्बं। एसेव नयो सेसेसुपि।

सीलवन्तेहीति आदिसदस्स लोपं कत्वा निद्देसो कतोति दस्सेन्तो आह “सीलवन्तादीही”ति। आदिसद्देन दायकादीनं सङ्गहो दट्ठब्बो।

आरम्मणभूता जेय्यन्ति आरम्मणभूताव जेय्यं।

पुथुज्जनभूमिआदीसूति पुथुज्जनसेक्खासेक्खभूमीसु। तत्थ पुथुज्जनभूमिवसेन संवरो, सेक्खभूमिवसेन पहानभावना, असेक्खभूमिवसेन सच्छिकिरिया, पुथुज्जनभूमिसेक्खभूमिवसेन वा यथारहं संवरपहानभावना। पुब्बभागिया हि संवरपहानभावना पुथुज्जनस्स सम्भवन्ति, इतरा सेक्खस्स, असेक्खभूमिवसेन सच्छिकिरिया। नयतो दस्सितन्ति “यं, भिक्खवे, मया ‘इदं न कप्पती’ति अप्पटिक्खित्तं, तं चे कप्पियं अनुलोमेति, अकप्पियं पटिबाहति, तं वो कप्पती”तिआदिना (महाव० ३०५) नयदस्सनवसेन पकासितं। सरागादिसंवत्तनन्ति सरागादिभावाय संवत्तनं।

अज्जमज्जं संसग्गतोति “संकिलेसभागियञ्च वासनाभागियञ्चा”तिआदिना संकिलेसभागियादीनं पदानं अज्जमज्जसंसग्गतो। अनेकविधोति द्वादसविधो याव द्धानवुताधिकचतुसहस्सविधोपि अनेकक्पकारो। लोकियसत्ताधिद्वानादिसंसग्गतोति आदिसद्देन लोकियं जाणं, लोकुत्तरं जाणं, लोकियञ्च लोकुत्तरञ्च जाणं, लोकियं जेय्यं, लोकुत्तरं जेय्यं, लोकियञ्च लोकुत्तरञ्च जेय्यं, लोकियं जाणञ्च जेय्यञ्च, लोकुत्तरं जाणञ्च जेय्यञ्च, लोकियञ्च लोकुत्तरञ्च जाणञ्च जेय्यञ्चातिआदिको सम्भवन्तो पट्टानभेदो सङ्गहितो। उभयत्थाति संकिलेसभागियादिके, लोकियादिके च। यथारहन्ति यो यो संसग्गवसेन योजनं अरहति, सो सो धम्मो। सम्भवाविरोधेनेव हि योजना। न हि “लोकियं निब्बेधभागिय”न्तिआदिना योजना सम्भवति।

तीसु पिटकेसु लब्धमानस्साति तिससो सङ्गीतियो आरुळ्हे तेपिटके बुद्धवचने उपलब्धमानस्स विज्जमानस्स, एतेन न केवलं सङ्गहो एव यथावुत्तभेदानं पट्टानभागानं निद्वारणाय कारणं, अथ खो पाळियं दस्सनञ्चाति विभावेति । तेनाह “यं दिस्सति तासु तासु भूमीसू”ति । “तेनेव ही”तिआदिना यथावुत्तस्स अत्थस्स पाठानुगमं दस्सेति ।

सासनपट्टानवारवण्णना निड्डिता ।

निगमनकथावण्णना

सद्धम्ममावतरट्टानेति देसन्तरतो आगन्त्वा सद्धम्मस्स अवतरणोकासभूते सद्धम्मस्सवनधारणपरिचयपरिपुच्छामनसिकारबहुलानं निवासट्टानतं सन्धायेतं वुत्तं, अत्तनो वा सन्ताने परियत्तिसद्धम्मस्स अनुप्पवेसनट्टानताय एवं वुत्तं । सेसं सुविज्जेय्यमेवाति ।

नेत्तिअट्टकथाय लीनत्थवण्णना निड्डिता ।

नेत्तिप्पकरण-टीका निड्डिता ।